

L. L. 16

10

911.

63029/13

L
8.32

The Library of the
Wellcome Institute for
the History of Medicine

MEDICAL SOCIETY
OF
LONDON
DEPOSIT

Accession Number

Press Mark

PORZIO, L.A.

Vol 1 only

LUCAE ANTONII PORTII

Medici Neapolitani, in Regia Studiorum Univer-
sitate Primarii Anatomiae Professoris.

OPERA OMNIA, MEDICA, PHILOSOPHICA, ET MATHEMATICA, IN UNUM COLLECTA,

Atque ad meliorem, commodioremque formam
redacta.

Cura, ac Studio

FRANCISCI PORTII

Medici Neapolitani ejusdemque Authoris
Consanguinei.

T O M U S I.



NEAPOLI, Typis Felicis Caroli Mosca, MDCCXXXVI.
Superioribus annuentibus.

EXPENSIS CAJETANI ELIA.

LONDON. MEDICAL SOCIETY OF ALEXANDROS

LIBRARY

OF THE

AMERICAN

PHYSICAL

AND

MATHEMATICAL

SCIENCE

OF THE

AMERICAN

PHYSICAL

AND

MATHEMATICAL

SCIENCE

OF THE

I
ILLUSTRISS. AC SPECTATISSIMO VIRO
FRANCISCO
BUONOCORE

Medico Regio, & in Regno Neapolitano
Archiatro.



Iri Clarissimi LUCAE ANTONII PORTII operibus nunc primum in unum collectis, atque e Neapolitanis praelis publicæ luci restitutis, cum aliquid splendoris addere cogitaverim, Dignissimum Patronum, ac fautorem de industria quærendum studui. Non multo autem labore
ad

II

ad id præstandum opus fuit, cum in te, VIRO-
 RUM MAXIME, mentem, animumque intendi,
 cui nostris his temporibus maximam librorum
 Medicorum partem dicatam vidimus; ita ut ju-
 re veluti quodam tuo id exigere videaris. Non
 alii, inquam, quam tibi Opera ista dicata vo-
 lui, cum ab ineunte ætate in hac ipsa nostra
 Civitate, non in celebri quidem Italiæ parte, quæ
 tanto cive superbit, Arti Apollinæ, Nobilissi-
 mæ Medicinæ summa ἀρετῇ^{αρετῆς} animum appule-
 ris, eique faciendæ incubueris, ut non ab illa il-
 lustratum, sed illam illustrasse, nemo Doctorum
 Virorum ignoret. Ignorat fane nemo in remotissi-
 mæ posteritatis stuporem, te nostri seculi ornamen-
 tum, tali ingenii perspicacia, judicii maturitate,
 doctrinæ excellentia pollere, ut primam, quam
 de te habuimus spem, nunquam fefelleris, cum
 & tibi ipse superior, & patriæ gloriosus, & tuis
 jucundissimus semper extiteris. Prætereo hinc se-
 veriora tuæ ætatis Studia, Philosophia præfer-
 tim, & Mathematica, ut Viros Clarissimos GALI-
 LEUM, CARTESIUM, NEWTONUM, LEIBNITIVM,
 WOLFIUM, BORELLUM, GULIELMINUM, aliosque
 vestigiis persequi, Medica, in quibus Doctissimos
 Professores SYLVIVM, WILLISIUM, SYDENHAMIVM,
 FREINDIVM, BOERHAAVIUM, BELLINUM, MAZI-
 NUM, aliosque imitari, ac denique amœnissima
 illa

illa, quæ ad naturalem Historiam pertinent, in quibus Præclarissimos Naturæ Mystas MALPIGHIUM, VALLISNERIUM, REDUM, cæteros exæquare visus sis. Inter eos, itaque, merito te accensere poterimus, qui Patriæ nostræ laudem attulere, cujuscmodi sunt (ut hos potissimum commemorem) BORELLUS, CORNELIUS, CAPUA, PORTIUS, TOZZIUS, CYRILLUS. Sed ne tua perfundatur pudore modestia libenti animo eas omnes laudes prætereo, quas & egregie promereris, & pro animi tui candore quam quod maxime averfariis. Tuas namque virtutes innumeras, & cætera eximia ornamenta, de quibus nulla unquam ætas conticescet, nec satis explicare dicendo, nec percensere numerando ullo pacto possum (quis autem pro re nata poterit) & si possem paucis tamen hic non aggrederer, cum & hujus temporis ratio vetet, & brevioris Epistolæ institutum haud quaquam patiatur. Sunt quippe satis superque a nostro Principe spectatæ, probatæque virtutes tuæ; ita ut jure de te dici possit


Principibus placuisse Viris non ultima laus est.
 effecit id, ut ex omnibus unus ab Hispaniarum REGE semper Inviictissimo PHILIPPO V. fueris delectus, ut in ejus Filii Dilectissimi CAROLI BORBONII Clementissimi Nostri REGIS
 salu-

IV

salutem sartam tectamque servandam, nervos omnes industriæ intenderes, ex quo proinde universi nostri Neapolitani Regni Archiater es constitutus. Illud denique, VIR CLARISSIME, relinquitur, ut duo per humanitatem tuam a te petam, ut scilicet hoc grati animi munus, & tibi esse inscriptum, & gratum acceptumque habere velis; Ego interim D. O. M. precor, ut tuam, e qua publica pendet, incolomitatem, quam diutissime conservet.

Dabam Neap. Idibus Novemb. clolcccxxvi.

Additissimus, & Obsequentissimus tuus
Stephanus Elia.



FRANCISCUS PORTIUS

LECTORI BENEVOLO.



E T si LUCÆ ANTONII PORTII opera edita, quæ extant omnia, fato, fortunaque obsistente eadem, in qua idem ipse Autor posuit, dum variis in locis, diversis in temporibus, aliis, atque aliis occurrentibus negotiis sparsim scripsit, publicique juris fecit; unusquisque de re litteraria benemeritus maxima usus industria unita

simul, atque inter se semper habuerit consentientia; tamen quia in tui commodum, utilitatemque redundat quam maxime, edita hæc omnia, quæ habentur *Autoris* opera non solum nova hac editione in unum complecti simul, & ad commodiorem formam reducere curavimus, verum etiam ut ea habeas meliora, quæ de re Medica, Philosophica, ac Mathematica in differendo conscripsit, suorum, & amicorum consilio servata, typis haud hætenus commissa digna supersunt ut per omnium Eruditissimorum Virorum manus versentur: quorum profecto, dum hæc sub prælo erant, tanta fuit in eis expetendis assidua sollicitudo, ut ad eorum vota adimplenda, quæ typis jam ab *Autore* commissa fuerunt opera, duobus hisce prioribus tomis complexa eis exhibere summa fuerit necessitas. Nec profecto in postumis aliis *Au-*

VI

toris operibus pergustandis sollicitum longa te detinebit mora, quamplurima siquidem, & meliora apud nos extant jam, ut in ordinem, melioremque formam redacta, typis committendo tibi ipsi abunde satisfacere valeamus.

Longa autem te hac præfatione defatigare inutiliter, si in his *Autoris* operibus commendandis ea repeterem, quæ merito tu ipse sentis; muneri tamen aliquantulum ut satisfaciam meo tuos ante oculos ponere decrevi, quam ob causam, quo tempore, quibus in locis singula hæc, quæ in unum redegimus opuscula ab *Autore* conscripta fuerint, atque evulgata.

Quum enim Romæ esset LUCAS ANTONIUS PORTIUS, ibique Primariam Medicinæ Cathædram obtineret eo tempore, quo ab iis, qui GALENI mente haud ritè intellecta de Galenicorum secta esse jactabantur immeritò, phlebotomia, quæ tamquam omnium malorum præsidium certissimum decantabatur, novis jam elucescentibus bonæ philosophiæ luminibus ab immoderato ipsius usu declinasset aliquantulum, quumque eos potissimum invenerit oppugnatores, qui posthabitis rationibus, atque experimentis insanientes Galenicos contra phlebotomiam per ea, quæ ipse Galenus afferuit, redarguere voluerunt; (quæ inter omnes medicorum sectas fera tum vigeat pugna) quamplurimi LUCAM ANTONIUM PORTIUM assiduè precibus premere ceperunt, ut suam Reipublicæ perutilem nimis scripto traderet sententiam, quibus instantibus ut satisfaceret simul, atque ut inter se pugnantium effugeret invidiam, in dialogi formam ERASISTRATUM, *sive de sanguinis missione* opusculum conscripsit, quod Romæ ibidem CHRISTINÆ SVECORUM REGINÆ dicatum edidit anno MDCLXXII. Opus quidem hoc non alia ratione fuit excogitatum, nisi ut redarguantur ii, qui Galeni nomen, auctoritatemque falsè adducendo ægrotis omnibus sanguinis missionem imponunt. Quatuor in eo statuit interlocutores, ex antiquioribus ERASISTRATUM, & GALENUM, ex recentioribus THOMAM VILLIS, & HELMONTIUM, inter quos, etsi contra ERASISTRATUM, & HELMONTIUM pro phlebotomia sæpius administranda primo

mo aspectu **GALENUM** audies propugnare, tamen si ad ipsius **GALENI** leges, ac monita ab oppugnatoribus **ERASISTRATO**, atque **HELMONTIO** relata attendere volueris, ægrotum vix unum invenies, cui tutò venam secare potueris. Quod quidem ut clarius innotesceret, ipsius **GALENI** *Apologiam instituit, qua præcipuè fit manifestum secundum GALENI regulas raro venas esse secandas*. Strenuo autem labore, atque industria *Autor* persequutus est ea, quæ circa sanguinis missionem tradidit **ERASISTRATUS** ad hoc ut eum per ea, quæ docuit, poneret interloquentem, hujus enim Celeberrimi antiquitatis Viri ne nomen quidem apud nos pervenisset, nisi de eo quam honorificam mentionem fecissent **PLINIUS**, & **CORNELIUS CELSUS**, & nisi per pauca scriptorum ejus fragmenta eo animo non transcripsisset **GALENUS**, ut eis se opponeret acrius in libris potissimum, quos tradidit *de sanguinis missione adversus ERASISTRATUM*. Habes igitur Benevole Lector, parvo hoc in opusculo ab Autore in antiquorum scriptorum lectione summopere versato omnia, & meliora potissimum, quæ ab antiquioribus, & recentioribus post **GALENUM** scripta fuere ad admittendam nec ne frequentius sanguinis missionem.

Post **ERASISTRATUM** non minoris utilitatis, ac famæ librum apponere curavimus ab *Autore* inscriptum *Opuscula, & Fragmenta varia*, quæ instantibus amicorum assiduis precibus apud quos manuscripti codices pervenerunt, publici juris tandem fecit Neapoli anno **MDCCL**. Quamplurima continent scitu digna, & à nemine hætenus excogitata, præcipuè ea, quæ circa *tumorum præter naturam* productionem affirmavit, descripto prius innumerabilium, & diversorum canaliculorum varii generis fluida transmittentium ordine, & congerie, in quorum proinde mutatione diversa, sive fluidorum, sive solidorum vitio exorta diversorum omnium *præter naturam tumorum* productionem recognovit. *Specimina quædam* tradidit *Ægriitudinum*, seu illarum corporis constitutionum, quibus vel molesta aliqua nascitur sensatio, vel ad aliquod opus præter solitum inepti, vel deformes sumus, in quibus perquirendis ea

VIII

est affecutus, quæ ad omnium morborum causas dilucide recognoscendas conducere possunt. Fragmentis hisce suam itidem Lectionem apposuit, quam ad Cathedram medicinæ primariam obtinendam, ut mos est in studiorum Universitate Neapolitana publice habuit, in qua prefixo vigintiquatuor horarum tempore examinatur per horæ curriculum titulus capitis decimiprimi libri de differentiis febrium GALENI, qui est *de dignoscenda hectica febre, cui putrida adjungatur*; qua arrepta occasione alia addidit, quæ in Galeni libris de differentiis febrium examinandis adnotavit. Subsequuntur deinde *Dissertationes variae* Venetiis editæ circa annum MDCLXXXIII., quamplurimisque Venerum ordinis Senatorii Excellentissimis Viris dicatæ, apud quos cum Venetiis esset *Autor* summa semper fuit in estimatione. Postremo in loco *Paraphrasim* habes *in librum Hippocratis De veteri medicina*, quam Romæ composuit, eidemque REGINÆ SVECORUM dicavit anno MDCLXXXI; scribendi occasionem dederunt ii, qui ex calido, frigido, humido, & sicco, vel alio quocumque, omnia, quæ de novo in homine, accidunt, fieri affirmantes Hippocratis librum *de Veteri Medicina* ab eorum placitis dissentientem nimis, haud Hippocratis esse contendebant acriter, proindeque ejus libri paraphrasim constituendo propriam Hippocratis doctrinam ostendit, utpotè à Democriti preceptoris sui sistemate non alienam. Quo in paruo Hippocratis libello, quia tam multa scitu necessaria, & ad firmiora medicinæ fundamenta constituenda *Autor* recognovit, arbitratus est, *hoc paruo Hippocratis libello medicinæ compendium, & institutionem optimam comprehendere, ac neminem alia via, aliisque principiis, quam his, quæ ab Hippocrate hic docentur, in medica disciplina esse profecturum*. Huic paraphrasi, ut volumen adaugeret mechanicam constructionem, expositionemque adjunxit fontium illorum reciprocantium, quorum meminit PLINIUS *lib. 2. Naturalis Historiæ cap. 103.* fontium scilicet *Jovis, Solis, & Padi, aliorumque similium*; quæ omnia hac in re conscripta ab *Autore* inventa fuisse haud negant ii, qui *Autoris* fidem abundè recognoscunt, quamvis hæc omnia eadem sanè constructione scripserat, atque evulgavit septem annis

annis prius R. P. CLAUDIUS FRANCISCUS MILLIET DECHALES Propos. XV. Tractatus *De Fontibus naturalibus, & Fluminibus*, nam si ad ea attendere volueris, quæ idem *Autor* jam facti conscius adjunxit in editione alterius libelli *de motu Corporum*, ubi de hisce fontibus naturalibus locutus est plenius, eum DECHALES propositionem predictam haud vidisse unquam confitearis. Duas itidem huic libello inseruit Epistolas ad ANDREAM DE AQVINO Episcopum TRICARICEN *de incremento, sive generatione metallorum, & de fontium, atque fluminum origine*, parvam etiam apposuit *logicam dissertationem*, precipuè ad dissentiones omnes inter Medicos, & Philosophos evitandas conscriptam, secundum ea potissimum, quæ GALENUS habuit lib. de Methodo Medendi.


Secundo tomo initium dedimus illum tibi ante alios *Authoris* exhibendo librum *de Militis in castris sanitate tuenda*, qui jure merito omnium laudes, existimationemque est consecutus. Eum conscripsit simul, typisque mandavit Viennæ Austriæ anno MDCLXXXV., quo, & in præcedenti anno cum fera illa irrepsisset Epidemica constitutio, qua illos præcipuè omnes, qui in Viennæ obsidione, atque in Budæ, Strigonii, aliarumque inferioris Ungariæ Urbium oppugnatione erant, dysenteria, ac diarrhæa tam crudeliter affligebantur, ut non minorem INVICTISSIMI LEOPOLDI I. IMPERATORIS Milites cladem habuerint ab his morbis, quam ab invadente illa immensa Turcharum multitudine; occasionem habuit *Autor* ea excogitandi, quæ ad *militum sanitatem in Castris tuendam* conducere possunt quam maximè, eos nempe ab illis castrentium præcipue morborum causis præservando, in quibus sive ab insueta vivendi ratione, sive in cibis, sive in aquis, sive in aere, sive in quopiam simili incidere possunt facillime, proinde omnia hæc animadversa, non militum in castris tantum, sed viventium omnium tuendæ respicere debent valetudini. Liber subsequitur de motu corporum continens nonnulla, & de fontibus aliquibus naturalibus, editus Neapoli circa annum MDCCIV., in quo, quæ circa gravium descensum, eorumque in planis declivibus

X

bus momentum determinandum nova instituitur methodus, utpote quæ à RENATI præsertim, & GALILEI doctrina recedens summopere iis displicuit, qui Celeberrimorum istorum Virorum placitis solebant tantum acquiescere, quorum proinde nonpauci adversus hanc Auctoris methodum insurrexere Oppugnatores, inter quos fuere VITALIS JORDANUS, & GUIDO GRANDUS Cremonensis Monachus Camaldolensis Celebres Geometræ, Epistolas evulgarunt, quibus, etsi novam Auctoris hypothesein evertere conati sunt, inter se ipsos tamen discordes fuere, ac dissentientes. GUIDO enim GRANDUS in sua Epistola JORDANUM redarguit, dum ait, *Quandoquidem contra quam expectaveram illum non vindicandæ ab oppositionibus PORTII mechanicorum sententiæ incumbere deprehendi, sed totum esse in alia sua opinione persuadenda, quæ à GALILEANA hypothesei, & (quantum arbitror) à veritate ipsa æquè vel magis recedit, quam illa PORTII*, quod de ipsa itidem Grandi epistola dixerunt nonpauci asserentes ea potius contineri, quidquid ad GALILEI doctrinam exponendam ab omnibus fere Mechanicis demonstratum jam fuit, quàm novam Auctoris hypothesein præcipuis argumentis confutare, quæ an vera sint, hujus loci non est examinare, eorum enim, Amice Lector, consulere potes Epistolas, & præsertim eam GUIDONIS GRANDI editam Romæ anno MDCCX. sub titulo *Considerazioni del P. D. GUIDONE GRANDO, e del Sig. NN.* Huic de motu Corporum opusculo quamplurima adjunxerat *de aliquibus fontibus naturalibus*, quæ & si jam antea habuisti ubi apposuimus *paraphrasim in librum Hippocratis de veteri medicina*, attamen ea denuo hic exhibemus, utpote novis experimentis adaucta, atque excogitatis, Auctoris etiam de prima eorum inventionem aliquam contineant Apologiam.

Ultimo demum in loco duo italico sermone conscripta posita sunt opuscula, primum illud est, quod suum post reditum edidit Neapoli anno MDCCXI. sub titulo *Lettere, e Discorsi Accademici*, secundum illud subsequitur, *Del sorgimento de liquori nelle fistole aperte d'ambidue l'estremi*, quod etsi
ulti-

ultimum obtineat locum, primum tamen fuit opusculum, quod *Autor* prælo commisit. anno MDCLXVII., in quibus quamplurima ad naturalem philosophiam atque ad Phisico-Mathematicam scientiam spectantia, haud hæcenus quidem excogitata phenomena facillimè in differendo exposuit, hæc igitur accipe, benevole Lector, tuoque bono consule. Vale.



In hoc Tomo Primo contenta.

E RASISTRATUS , five de Sanguinis missione.	pag.	1
Apologia GALENI.		127
Opuscula , & Fragmenta varia.		163
Dissertationes variæ.		291
In HIPPOCRATIS librum de Veteri medicina Pa- raphrasis.		341

*Opera in Tomo Secundo
contenta.*

D E Militis in Castris, sanitate tuenda.	pag.	1
De Motu Corporum , & de nonnullis Fontibus Naturalibus.		106
Lettere , e Discorsi Accademici.		179
Del Sorgimento de' Licori nelle Fistole aperte d'am- bidue l'Estremi.		323



ERASISTRATUS

S I V E

DE SANGUINIS MISSIONE.

DIALOGUS PRIMUS.

*Erasistratus, Galenus, Thomas Willis, & Joannes
Van-Helmontius.*

ERAS.



I vel mortuus convicio ; & calumnia abstinere , & magniloquentiam tuam parumper omittere potes Galene ; amicè , & brevi sermone , quam habeant vim rationes , quas adversus me , atque meos de sanguinis missione vivens protulisti , velim tecum examines . Neque hunc extimescere debes Helmontium , qui venarum in morbis sectionem damnavit ; adest enim & Willis , qui æquè ac tu

venas in morbis exhauriendas putavit : licèt uterque nostrarum rationum momenta , quibus tu secandas venas esse ; ego easdem vix unquam aperiendas existimavi , haud omninò probaverint ; sed aliis exquisitis argumentis alter tecum , alter tecum sentiat .

GAL. Multum sanè , ut vides , Erasistrate , ab his , quæ à me scripta sunt , gloriæ , atque nominis sum consequutus ; ut gravitati potiùs , & famæ consulere nunc debeam meæ ; & juniores istos sinere de his disceptare : qui etiam nosse debent , si quæ post meos conatus in corporum dissectionibus inventa sunt . Ac demum si videbitur geometrica ratione , qua medendi methodum absolutam dedi , quid constantius ab ipsis dicatur decernam . Doctrina autem tua satis , superque in illis libris de sanguinis missione everfa est . Sectatores tuos , plusquam opus esset redargui ; qui mutarunt sententiam : neque ullus omnium , quot erant , aliquid contra scribere ausus est ; ut postea vix sectæ nomen reliquum fuerit .

HELM. Aded nè post ortum etiam , & Medicinæ progressum novum , & physicæ

physicæ principia inaudita à me edita; in quibus te, & Aristotelem ostendi physicæ ignaros; adeò ne, inquam, tamque magnificè de temetipso sentis, Galene; ut qui plebejos homines verborum torrente traxeris, quâ volueris, nos quoque infatuare posse speres: & tuis argumentis aliorum doctrinam everfam putes; & geometrica ratione, qua nunquam es usus, quid à nobis de venæ sectione constantius dicatur, decernere promittas?

GAL. Convicio ne abstineam, Erasistrate, cum hic Helmontius, quod vivus perpetuò fecerat, me omni verborum contumelia dilacerare non cesset mortuus? Ego autem licèt aliquid liberiùs contra te locutus fuerim, culpa tamen factum hoc est sectatorum tuorum; qui omnium bonarum artium expertes; & ad omne maleficii genus paratissimi odiis me insectabantur, verutiis me exagitabant, & me unum omni insidiarum genere petebant. Quorum temeritatem, ut reprimerem, hac occasione sum usus; quòd sanguinem ægrotantibus mitti non paterentur; tuoque nomine, & auctoritate, quæ maxima tibi Romæ erant, tanquam sacro clypeo sese defenderent. Toparcha verò iste nullam justam habuit occasionem, tam sedulam operam impendendi vel ut mea dogmata refelleret, vel ut mihi malediceret. Quod si speciosas causas afferat humani generis utilitatem, & ut miseris languentibus contra discipulos meos præsidio esset; debuisset potiùs remedia, quæ occultasse dicitur, posteris communicare, quàm omne ferè vitæ tempus inconcinnis declamationibus contrivisse.

ERAS. Jurgia quæso, & jactantiam mittamus Galene; Mittamus Helmonti inanium contentionum jejunitatem. Dedecent hæc magis umbras, quàm vivos. Mortales enim rerum facultates, & copias, & divitias, & civilem potentiam rixa, & iniqua controversia frequenter sibi quærunt. Verùm nihil est quod nos ab illiberali, & jejuna verborum concertatione sperare valeamus. An fortè spes nobis facit Pythagoras redeundi ad vivos; & veluti tauri cornua per ocium exacuunt perfricando ad saxa, nos maledicendi arma experiemur; quibus postea meliores in pugna fortiùs altercemur; & contendamus acriùs? Vana sunt hæc: ac nisi solitarias potiùs animas nos esse placeat; & omni sublata communione, ut olim fertur ante Orpheum, & priùs quàm urbes conderentur factum fuisse ab hominibus, mentem quisque suam in iis occupare velit, quæ magis sibi videbuntur; unum hoc superest ex consociatione studiorum colloquio uti familiariter. Quod si rixamini, hæc ipsa nobis deperibit voluptas; & satiùs erit conticuisse, silentisque perpetuò esse.

WILL. Non tantùm rixari nolim; sed neque libenter alios vidi, aut audiivi rixantes; eritque mihi solitudo pro maxima frequentia.

HELM. An ne hoc patiamur Galene, ut umbris etiam contentiosi, & rixosi videamur? Jam Erasistratus, & Willis nisi similtates omittamus, eorum consuetudine nobis interdiciunt; aditum sermonemque defugient nostrum; ne quid ipsi veluti ex contagione incommodi accipiant. At umbræ concipiendo tantùm offensam, & contumeliam ipsæmet sibi nocent. Nos autem etiam si quid asperiùs propter consuetudinem dicamus, ea tamen mente esse convenit, qua credamus omnem deesse nobis aut nocendi, aut obtrestandi sive vim, sive animum.

GAL. Invidiam, pertinaciam, similtates mittamus, Helmonti; &
ut

ut Erasistrato placeam, magniloquentia ego non utar mea: atque ut vivens illi saeculo mores accommodavi meos; sic nunc quantum fieri potest, sine simulatione, aut ostentatione vobis præstabo operam, & liberè dicam, quæsentiam.

ERAS. Igitur viri præstantissimi, nisi habeatis aliquid, quod huic sermoni præferendum putetis, quæramus an sanguinis missio semper aliena sit; an unquam conveniat in morbis; & quando vel homini, vel equo, vel mulo, vel asino sit necessaria; nam his omnibus venas nunc exhauriri audio: & hac disquisitione etiam si nullum sit habitura usum, mentes nostras oblectemus.

GAL. Ut lubet.

WILL. Non video quid melius facere valeamus, quàm de his iisdem disserere; quibus viventes detineri consuevimus.

ERAS. Multa (*a*) autem de te accepi, Galene, ab iis umbris, quæ vel dum inter vivos agerent, tua opera legerunt: vel te sive vivum, sive mortuum gloriantem audiverunt. At Ego, qui in minimis curiosus aded tibi visus sum, ut notaveris, quod neque (*a*) offerendæ offæ, & cichorium decoquendi rationem prætermiserim; tam parcè tamen de vena secanda locutus sum, ut neque significaverim, an aliquando incidenda sit vena; an omninò & in omnibus morbis id sit prætereundum. Verùm quidquid alii de me dicant, quos non moror, tu tamen Galene ex hoc nunquam rectè, & concludenter ostendes, me in ægritudinibus sanguinis missionem damnassem. Nec satis tibi esse potest conjecturæ, quod si quandoque probassem, silentio non præterissem. Tu enim voluisti Hippocratem sanguinem (*b*) detraxisse iis etiam ægrotantibus, in quibus neque verbum unum fecerat de secanda vena. At Hippocrates solers nimis, atque diligens fuit in describendis iis, quæ circa ægrotantes illos facta, aut observata essent; ut monuerit etiam de supposito, deque paucis sanguinis guttis spontè è nare sive dextra, sive sinistra prodeuntibus.

Prout occasio tulisset, & res tibi cecidisset, meliùs ajebas Hippocratem venas aperuisse iis, quibus nihil tale ille dixerat fuisse factum: me verò a sanguinis detractiōe omninò, ac semper abstinuisse; cum neque significaverim recipienda (*c*) ne illa sit in morbis, an posthabenda. Neque profectò rationes ullas tradidi, (*d*) quibus sanguinis missio explodenda mihi visa fuerit. Tu autem qui ex multis tempore, doctrina, sententia, atque moribus maximè discrepantibus hominibus frequenter unum tibi confingere solitus fueras Hippocratem; quo, veluti clavigero Hercule monstra omnia debellante, vulgares homines deterreret; dum rationes meas de non admittenda sanguinis missione divinares, confixisti tibi pro Erasistrato pumilionem hominem, quem vel digito protereres, vel levī magniloqui oris sputo obrueres.

GAL. Divinatione quidem opus erat, ut causas investigarem eorum, quæ nulla dilucida oratione complexus fueras; & sic eas redargui, quas di-

A 2

scipuli

(*a*) Gal. de venæ sect. adv. Erasistr. cap. 4.

(*b*) Gal. passim in l. Epidem. lib. 3. sect. 3. ægr. 8.

(*c, d*) De venæ sect. adv. Erasistr. cap. 1. & cap. 2.

(1) Ex iis, quæ Erasistratus scripsit, Galenus minime cognoscere potuit, admiserit ne ille unquam sanguinis missionem; an omninò damnaverit.

scipuli tui adducebant; ut si aliæ desint, Erasistrate, jure videri possis pumilio. Tu autem fortè veritus es, ne oppositum tibi accideret ejus, quod mihi evenit. Cum enim vidissem Romæ Medicos religione quadam abstinere ab incisione venarum, illos increpans libellum conscripsi, apposuique titulum *de venæ sectione adversus Erasistratum*; quo malè quidem, fateor, consultum est hominum generi. Nam postea juniores Medici, qui statim tunc meam sententiam amplexati (a) sunt, *febres cunctas in principio venæ sectione indigere putabant; & non mediocri noxa ægrotos afficiebant, ut plures hac ratione perierint; quàm quibus non fuerat vena secta.* Qui huc erant magis ridiculi, quòd ne doctrinam tuam deseruisse viderentur, affirmabant te omisisse hoc præsidii genus, tanquam indubitatum: veluti Ego dixeram in innumeris ægritudinibus omisisse Hippocratem venæ sectionis mentionem facere, tanquam rei, de qua minimè dubitari posset. Atque idèd opus fuit alium conscribere librum, in quo id potissimum Medicis persuasum volui, in nulla ægitudine hanc medicinam à te usurpatam fuisse. Præstabat enim eos sic (b) credere, *quàm omnibus uno ordine venam incidere.* Tu verò fortè timuisti, ne si rationes reddidisses quibus morbis ferè in omnibus sanguini parcendum existimasti, semper omninò alienam esse sanguinis missionem crederent homines. Quorum credulitas, ceu levibus auris humilis juncus, ad auctoritatem sermonemque probati, & eloquentis viri hanc, illac inflectitur. Sed illud etiam insitum est homini; ut cum adhuc non constet, an aliquid faciendum, & administrandum sit, necne; propensior sit ad faciendum, quàm ad quiescendum: contra morem veteris Academiæ, quæ assensum retinebat ab omni eo quod evidenter adhuc non innotuisset; & iis minimè utebatur, quæ minùs clarè constarent. Hinc Medici plerique, qui ipsi potiùs inclarescere, quàm ægrotos à morbis vindicare cupiunt; semper aliquid circa illos faciunt: & commendandi essent, si ad hoc ea non attingerent, quæ magni momenti sunt, & malè administrata perniciem afferunt.

Illud autem in te valdè admirandum visum est Erasistrate, quod Romæ maximè clarus fueris, quia vinciri membra jussisses; & quia sanguinem non detraxeris! Populus enim Romanus propter libertatis amorem vincula abhorrebat: & propter sanguinolentam in illis sæculis gentis naturam pacis etiam tempore funebribus ludis; muniisque gladiatorum; horrendarum bestiarum in homines crudelitate; & ludicra armorum arte militi profutura; ac ficta naumachia delectabatur; sanguinis aspectum non solum non perhorrescebat; verùm etiam ad insigniora vulnera, casusque gladiatorum gentis illius animus erigebatur, & lætabatur: ut non pauci decorum etiam putarent violentas sibi inferre manus; corporisque domicilia, non jubente domino deserere. Sanguinis, inquam, missio admittenda potiùs erat, quàm damnanda, ut apud Romanos medicus inclaresceret.

ERAS. Non mihi hoc unquam quæsi Galene, ut Romanis clarus essem; nec Romanis scripsi: illud tamen timui ne si rationes exposuissem, quibus vasa humorifera non esse incidenda sum opinatus; crederent homines hoc unum perpetuò esse hominum vitæ adversum. Verùm si hoc credidissent;

neque

(a) De venæ sect. advers. Eras. cap. 6.

(b) De cur. rat. per sanguinis miss. cap. 2.

neque tamen ullo magno auxilio essent destituti; nam sapissimè multa reperire licet, quæ tutius id omne præstent, quod sanguinis missio præstare potest: cujus etiam graviora, & frequentiora sunt maleficia, quàm beneficia.

Cœterum ⁽¹⁾ languida sunt, & inania nimis, quæ de non secanda vena discipuli mei dicebant.

Difficile est venam (a) secare, & venam à proxima arteria internoscere; ac maximum Imminet ab arteriæ incisione vitæ periculum? Quid si hæc sectio, & venæ ab arteria internotio quibusdam sectoribus facilis esset, pro ut est facillima; an à morbis homines secta vena vindicari possent?

Aliquis præ timore dum vena incideretur (b) mortuus est? Sic aliquis aquæ potu extinctus est: an propterea aquæ usus interdicens? dejectis animo vena non incidatur; vel prius moneantur, ne timeant ab iis, quæ timenda non sunt.

Aliqui incompefcibili (c) sanguinis fluxu defecerunt? Quid si fluxus iste facile sisti possit; ut re vera sistitur?

Mensura mittendi (d) sanguinis conjici nequit? Quid si illam assequamur? quid si minùs mittatur, quàm conveniat; & postea si videbitur iterum vena aperiatur? Semper remanet illud quærendum, an sanguinis missio conveniat?

GAL. Hæc & alia similia ridicula mihi visa sunt.

ERAS. Ridicula sunt fanè: neque mihi imputandæ sunt ineptiæ discipulorum meorum, ut neque tibi tuorum; maximè cum nullam Ego dederim illis occasionem tam vana adducendi. Sed siue Apoemantes fuerit (e) ille, siue Strato, aut Aristogenes, aut Medius, aut alius, qui sanguinis missionem modum exuperantem à cæde non differre affirmavit; non est profecto vana locutus. Sed neque propterea rejicienda est venæ sectio; cum modus esse possit in ea, qui non sit excedens, & non enecet. An quia opium malè adhibitum enecat, opio nunquam utemur?

HELM. Verum ⁽²⁾ enim verò neque ex his Medici plerique rectè concludunt venas secandas esse. Nequaquam hoc tantum videndum est, an venarum incisio modum non excedens perdat hominem; nec ne: sed insuper videndum quid ipsa auxilii præstet; & an unquam prodesse possit? Neque fanè tam ridicula sunt illa, quibus neglectis complures perierunt.

ERAS. Ipsa ⁽³⁾ igitur rei natura examinanda est, ut etiam tibi, Galene, visum est. Qui illud priùs diceris assumpsisse evacuationem, & detractionem aliquando convenire.

At ego sic habeo, non mediocris evacuationis perpetuò vivens animal indigere; modo vitæ fungatur muneribus; & non sit hyeme sopitum, aut con-

ge-

(a, b) De venæ sect. adv. Erasist. cap. 2.

(c, d, e) De venæ sect. adv. Erasist. cap. 2.

(1) Rationes quas Medici afferebant Galeni tempore pro non mittendo sanguine sunt inanes, atque ridiculæ.

(2) Non solum videndum est, an aliqua sanguinis missio non lædat; sed an profit vel prodesse possit.

(3) Semper aliqua evacuatione opus habet animal vivens; semper aliquid decedit è corpore animalium.

gelatum : & tunc existimo aliqua evacuatione ipsum etiam opus habere ; sed quæ fortè hominum sensibus percipi nequeat . Semper aliquid decedit è corpore animalium : ac si nihil omninò decedat , aut animal mortuum jam est ; aut brevi morietur . Vita enim sinè multarum partium motu minimè consistit . At semper aliquid decedit ab eo , quod movetur .

Quidquid movetur , pro viribus id omne impellit , quod suis motibus utcumque objicitur ; non enim in spatio prorsus inani movetur ; sed qua fertur , corpora alia exturbat . Id autem saltem propter contactum , corporumque affricum non fit sinè aliqua ejus , quod movetur deperditione . Et hoc manifestum quoque est in durissimo chalybe ; qui dum movetur , & alia corpora movet ; licèt lentè , ipse tamen conteritur , & attenuatur . Neque profectò restorationis , & nutrimenti ad vitam prorogandam necessitatem haberent viventium corpora ; nisi aliquid continuò ab ipsis efflueret . Neque mutatio laboris hominem non rarò reficeret à præcedenti alia laboris specie , in qua lassus ille factus est (ut qui scribendo fessus est , dum ambulat reficitur ; fitque denuò ad scribendum validus) nisi ab iis organis , quæ præter participationem motuum , quibus homo vivit , aliis etiam motibus exercentur , aliquid decesserit ; quod illis iisdem , dum post laborem quiescunt ; restitui possit etiam si alia membra interim exerceantur . Verissimum autem est , nequaquam idem , aut omninò simile dissipari in quocunque exercitii genere : videlicet aliud aliquo pacto est , quod ambulando , aliud quod contemplando absumitur ; sic aliud videndo , aliud audiendo , aliud loquendo decedit .

Perpetua igitur evacuatione , aut partium dissipatione , sive dissolutione , translatione , aut permutatione indigent corpora viventium ; quoniam tum compluribus indigent motibus ; ut vivant ; tum etiam aliis , quorum alius , atque alius accidit usus , frequenter exercentur .

Hæc autem in morbis sæpè sunt moderanda ; & pro ut varia est eorum , ex quibus corpus constat natura , aliæ , atque aliæ fieri possunt necessitates hoc , vel illud aliud evacuandi , & detrahendi ; & aliud , atque aliud apponendi , atque restituendi .

Tibi (1) autem , ut audio , satis est , Galene , si dicam corpora aliquando detractione & evacuatione opus habere ; quod ex iis , quæ de febrium ortu , & inflammationum natura à me dicta sunt , deduxisti . Atque ad detrahendum facillima , & omnium expeditissima via tibi visa est venarum sectio . An tutissima etiam , & commodissima ? An quia aliquid decedere debet , & aliquid est evacuandum , sanguis erit hoc , quod evacuandum est ; & ex iis vasis , in quibus ille minimè restagnat ? An cuique evacuationi , & detractioni , cuius homini necessitas facta sit , ut à morbis vindicetur , venæ sectio satisfacit ? Nequaquam hæc tam facilè determinantur , Galene , etiam si illud ponatur , tum ex reliquis substantiis , quæ corpus vivens constituunt ; tum ex sanguine in quocunque statu sive sanitatis , sive ægritudinis ; & in quacunque ætate semper aliquid decedere . Etiam si illud ponatur in quacunque sive copia , sive penuria tum sanguinis , tum aliarum substantiarum semper aliquid dissipari ; semper etiam aliquod debere auferri , atque decedere ; nequaquam illud sequi-

(1) Ex quod hoc aliquid evacuandum sit , & decedere debeat è corpore animalium ; non sequitur venæ sectione id fieri debere .

quitur venam esse aperiendam ; sinendumque sanguinem ex apertione fluere : & multa sanè alia requiruntur , ut hoc determinetur .

Pudet autem ea referre , quæ de febrium , & inflammationum ortu sum opinatus : non quia meliora scripseris , Galene , qui potius perniciosam de febrium essentia sententiam promulgasti ; sed quoniam sanguinis à venis in arterias , & ab arteriis in venas , aliarumque liquidarum substantiarum motum si cognovissem , multò sanè præstantiora de his , aliisque cogitasset ; & posteris tradidisset . Referam tamen illa qualiacumque fuerint .

Arterias putabam (*a*) dum homo integer esset , spirituum tantum receptacula esse ; easque dividi , ac subdividi in angustiores , atque angustiores arteriolas , quæ tandem minoribus venis occurrerent ; quibus cum fines haberent eisdem : sed venas repleri sanguine ; qui propter extremorum osculorum conniventiam , & tenuitatem vasorum non exiliret in proximas arterias ; nisi cum violentia alicujus morbi , vel causæ morbificæ in illas impelleretur . Ac tunc quidem cordis motui , & arteriarum ob concitatos , & perturbatos spiritus resistantiam fieri ; & inde febrem suscitari . Quæ consisteret (*b*) in arteriarum , & cordis motu perturbato : atque ideò febris non esset per se affectus ; sed symptoma , sive (*c*) consecutarius , & ad sanguinis in arterias dilapsum accessorius affectus . Quod si sanguinis aliquid condensaretur , & coagularetur in extremis venis , arteriisque & circa confinia earundem , tunc inflammationem fieri existimabam . Quæ nihil aliud esset , quàm tumor ex congesto , & condensato humore in extremis venis , arteriisque , & circa confinia earundem . Sic putabam : quæ quidem nullam afferunt homini ægrotanti perniciem ; & magna parte nunc etiam sunt retinenda . Sed si sanguinis motum cognovissem ; multò sanè meliora , & præstantiora protulisset .

WILL. Nescio (*1*) quis nomini , atque gloriæ vestræ invidens effecit , ut motus sanguinis systema , sive circulationem ejusdem , quam non rarò veluti manibus contrectastis non cognoveritis . Ac uterque vestrum , tuque potissimum Galene si ea , quæ de extremarum venarum , & arteriarum communiione ab Erasistrato dicta fuerant , consueto fastu non sprevisse , facili profectò negotio sanguinis motum perceptum habere potuisses . Cognovisti enim sanguinem naturā in arteriis contineri , atque moveri ; & non solum in dextro , (*d*) verum etiam in sinistro cordis ventriculo sanguinem potius , quàm puros spiritus perpetuò reperiri . Et his cognitis , nisi facultatibus tuis plus justo favisses , facillimum quoque fuit glandularum naturam , atque usum perspecta habuisse .

GAL. Ità (*2*) planè se res habet : sed cum pluries de iis partibus , quas nos propriè glandulas appellabamus locutus fueris , Willis , audire mihi visus

(*a*) Gal. de 5. miss. advers. Eras. cap. 3.

(*b*) Gal. in 6. Hipp. de morbis vulgar. comm. 1. text. 29.

(*c*) Gal. lib. Medic. sive introductio cap. 13.

(*d*) Gal. de Hipp. & Platon. Decret. lib. 1. c. 5. & alibi.

(*1*) Veteres multa cognoverunt , quibus facile ea , quæ de sanguinis motu à recentioribus comperta sunt , dignoscere potuissent.

(*2*) Marinus Anatomicus prisci ævi cognovit ductus proprios plerarumque glandularum .

sus sum vel ea, quæ ab Erasistrato; vel quæ à Marino præstantissimo Anatomico dicta, & scripta fuerant: ut vix aliquid memoria dignum addidisse his recentiores videantur. Facultates autem appellavi rerum causas incognitas; ut ingenuus potius, quàm mendax, aut arrogans videri debeam ex illo vocabulo.

WIL. An non videntur memoria digna, quæ sæpiùs retuli de cerebro; de hepate; de glandulis salivalibus; de pancreate; de renibus; deque aliis multis mea potissimum ætate, celeberrimorum virorum fecundissima, memoriæ proditis?

GAL. Dignissima quidem hæc, & alia multa circa universam rem anatomicam. Sed ea, quæ memorasti mihi de glandulis circa os, & circa fauces positis; deque aliis multis partibus, quas nos glandulas propriè dicebamus; deque earum ductibus, omninò Marini sunt; qui librum conscripsit de eo, (a) quod à glandulis est, vase. Salivales ductus, sive venulas evidentes salivam à glandulis acceptam stillatim in os effundere nemo meis temporibus ignorabat. Ab aliis item glandulis è cerebro in palatum, & è tonsillis in fauces aliquid eructari cognitum erat; nec non etiam universa intestina à glandulis irrigari. At Marinus (b) alias quasdam etiam præter ante dictas ad irriganda membra glandulas enumeraverat. Non tamen in omnibus agebat meatus, qui sensui paterent, existere. Cui condonandum est, si non omnia indagavit; ac si quasdam glandulas, quas ipse non vidit foraminulosas, & spongiosas, fulcire vasa cum aliis veteribus affirmavit. Erasistratus verò (c) rejecto nomine facultatis tum in libris universalium sermonum, tum passim alibi multa docuit de aptis figuris osculorum meatuum; quibus peculiaris aliquis liquor secernatur, ut neque in his multum habeant, de quo nimis se jactare debeant recentiores.

WILL. At sive Erasistrati, sive Marini opera ad nos non pervenerunt.

GAL. Ego tamen multa retuli tum Marini, tum Erasistrati, tum aliorum; quæ satis esse potuissent; nisi veteribus gloriam eripere voluissetis.

HELM. Ac tu, alique multi, Willis, nomini atque gloriæ invidistis meæ; & nullas mihi retulistis gratias, quod vanum omninò de quatuor humoribus, & de quatuor qualitatibus, & de temperamentis commentum; inanem humoristarum doctrinam; atque decipi eos, qui febrium essentiam in calore ponerent, ostenderim. Cumque docuerim febres non in solo nixu (d) expulsivo, sive motu alterativo consistere, & multo minùs in ipsa alteratione, & diathesi, ut alioqui putarunt scholæ; sed in parte materiali deturpati indignatione Archei (defœdatur enim pars Archei materialis (e) per iram, suscipitque iconem, sive ideam indignationis) cumque multa docuerim de variis rerum fermentationibus, plerique vestrum tuque ipse, Willis, vel mutatis vocibus, & nulla nominis mei mentione facta, eadem docuistis; vel

si ali-

(a) Gal.lib.de lib.proprius cap.3.

(b) Gal.lib.de semine cap.6.

(c) Gal.tum in libris de natural.facult.tum alibi.

(d) Helm.de febrib.cap.13.

(e) Idem de morbis Archealibus.

si aliqua addidistis, illa sunt deteriora, aut saltem haud meliora iis, quæ à Galeno, & discipulorum ejus caterva dicta sunt.

ERAS. Hæc de febribus, & de humoribus, & de fermentationibus disputatio non est, quæ brevi digressionem explicetur; neque ea in præsentem opus est: transferamus igitur illam; & pergamus quærere, quod institueramus, an sanguinis missio unquam conveniat?

Et (1) quidem pro illa asserenda satis non est admisisse, viventia corpora indigere evacuatione. Nam hoc perpetuum est, utcunque corpus vivat. Et ægra, & integra corpora; & emaciata, & plena, aliqua indigent evacuatione. Et multæ semper ab iis, quæ continentur in vasis sanguiferis, ad alia vasa necessariae sunt tum partium transmigrations, & transfusiones; tum decessiones variæ necessariae sunt. Et multa ab aere, aut cibo, & potu desumpta vasis sanguiferis continuò adduntur. Nec non etiam ab aliis vasis corporis viventis, & partibus ejusdem multa continuò transeunt in vasa sanguifera. Estque non solum sanguinis, sed multarum, aliarum substantiarum perpetua quædam circulatio. Quandoquidem (2) nequaquam id omne, quod è partibus, vel parte aliqua decedit; statim extra corpus pellitur, & omninò abscinditur ab eo: ut est id, quod tenues, & sensu minimè perceptibiles abit in auras; & id quod sub sudoris, aut lachrymarum specie emittitur; vel ut sunt illa, quæ sub furfuris, aut piuguis substantiæ è nonnullorum capitibus, aut à naribus, vel ab ore sub muci, aut sputi specie redduntur; & ut sunt ea, quæ per urinarum vias, vel per extremum intestinum unà cum impuritatibus cibi, & potus ejiciuntur; & si quæ sunt alia, quæ omninò abscindantur, & decedant è corpore. Sed quædam partes priusquam extra corpus ferantur, sic decedunt à sanguine, exempli gratia, ut vel spiritibus, vel lymphæ, vel salivæ, vel bili, vel semini, vel nervis, vel aliis partibus totum corpus constituentibus addantur, ad certos adhuc naturæ usus; & quædam ab his decedunt, quæ priusquam omninò expellantur, aliis partibus, & ipsis etiam vasis sanguiferis ad naturæ etiam usus iterum adduntur.

In his autem omnibus id ferè semper perpetuum est, quod nihil decedere videtur sub forma, specie, & natura ejus, à quo facta est decessio; & nihil addi videtur sub forma specie, & natura ejus, ex quo fit additio.

Quod (3) quidem dupliciter contingit. Primum quia nihil est, quod partes habeat omninò similes inter se; nisi fortè aurum, de quo mihi sæpè locutus es, Helmonti; vel purissimum argentum; vel mercurius; vel quid aliud his simile: in quibus fortassis est etiam aliqua partium dissimilitudo; sed quæ sensibus, & hominum industria, ut in oleribus, pane, vino, sanguine, aliisque, notari nequeat. Cumque neque eadem, neque omninò similia sint organa, aut renum, aut hepatis, lienis, pulmonum, cerebri, aliarumque partium; neque ubique iidem, aut omninò similes, & æquales inter se sint

Tom. I.

B

mea-

(1) Quæcunque corpora viventia semper aliqua indigent evacuatione, & partium decessione.

(2) Multæ sunt in viventibus plerarumque substantiarum circulationes & transfusiones.

(3) Ea quæ decedunt è corporibus animalium, vel adduntur; sub alia specie, & forma decedunt, sive adduntur.

meatus; & pori, quorum innumerabilis est in universo corpore multitudo; fit ut ex dissimilibus particulis sive sanguinis, sive lymphæ, sive alterius liquoris aliud decedat in hepate, aliud in liene, aliud in cerebro, aliud in pancreate, aliud in renibus, aliud in cœteris glandulis, & in aliis corporis partibus.

Quod si hæc non sufficiat partium sanguinis aliorumque liquorum; & constructionis organorum, & meatuum, & pororum dissimilitudo; addere possumus mutationes, & alterationes, quas suscipere possunt substantiæ ob varios motus. incursionisque; & corporum permixtiones ad invicem. Quibus comprehendere etiam videri velim, quas appellastis fermentationes; de quibus tamen nunc minutiùs, & exactè quærendum minimè est: tum quia huic quæstioni non sunt necessaria; tum ne nimis digrediamur.

Illud (1) autem ex his consequitur. quòd dum animal benè se habet, quacunque ratione aliquid decedat è sanguine, exempli gratia; id, quod in vasis sanguiferis superest, non est omninò, quale fuerat; priusquam illud decessisset. Non solùm quantitas minuitur sanguinis iis substantiis, quæ à sanguine, dum animal integrum est, multifariam decedunt; verùm etiam id, quod sanguinis reliquum est, non remanet, quale priùs fuerat: & ex hoc etiam non erit ejus similis usus.

Hinc fit, quòd sanguis arteriarum non sit omninò similis sanguini venarum.

Nam postquam sudor exempli gratia, satis, atque satis prodiit è corpore; substantiæ, quæ in corpore sunt reliquæ, vel non habent, vel in minori certè copia habent id, quod sub hac specie decedere possit. Et postquam urina; & ea, quæ cum urina commixta prodeunt satis, atque satis fuerint secreta è vasis humoriferis; jam quod in his reliquum est, non remanet, quale priùs fuerat ante secretionem: vel quia decesserunt partes, quæ congregatæ in pelvim renum urinam constituunt; vel quia decesserunt illæ, quæ præviis nonnullis mutationibus, faciliùs quàm reliquæ in urinas abire, & transmutari potuerunt.

Plerunque autem accidit in integra animante, ut etiam si secundum naturæ necessitates multum semper decedat, & dissipetur, & multæ fiant substantiarum transmigrations, & circulationes ab his vasis in alia; illud tamen, quod reliquum est ejus, ex quo factæ sunt decessiones, tale omninò videatur, quale priùs erat: quoniam eodem ferè tempore, quo quædam decedunt; alia adduntur similiter reficientia, & restaurantia, sive restituentia illud idem; quod decesserat: in cujus locum succedentibus aliis similibus substantiis, videtur illud tale, quale priùs videbatur.

Sic cum ex succo uvarum, aut alterius fructus aliquid decedit, quod vel in fœces, aut in tartarum, aut in vini flores, vel in aliud quodcunque illud sit, congregetur; vel quod mutatum fermentationibus in fœces, aut in tartarum, aut flores abeat; reliquum profectò succi uvarum non remanet; quale priùs fuerat. Vel, ut ex iis deducere licet, quæ me docuistis Helmonti, atque Willis, dum destillatione phlegma, atque spiritus ab aceto: exempli
gra-

(1) Quoniam varia decedunt è sanguine, dum animal benè se habet, & varia addantur; non est sanguis in vasis sibi semper similis.

gratia, decedunt; id quod reliquum est, non est profectò quale priùs fuerat; neque acetum dici meretur.

Cœterum, (1) dum sanguinis, aut aliarum substantiarum semper cordis motu in circulum actarum secto vase aliquid detrahitur, id, quod superest in vase, omninò remanet, quale priùs fuerat: neque detractione corrigitur, aut in meliùs mutatur reliquum. Non minùs ac si à musto mustum auferas; à vino vinum; vel ab aceto acetum; reliquum mustum, vinum, aut acetum erit; quale priùs erat. Neque aliqd detractione præstiteris, nisi quòd reliquum minùs erit. Et præter hoc, quod reliquum minus est, nihil omninò aliud necessariò consequitur ex quacunque confusa, & sinè delectu partium detractione.

HELM. Sanguis igitur, aut alius humor per vasa fluens, & nullibi stagnans si bonus est, sinendus, sin malus sinendus etiam: quoniam confusa sanguinis à sanguine detractione reliquum minimè corrigitur. Nunquam igitur mittendus sanguis.

Verùm (2) enim verò ego multorum hominum, sive ægrotantium, sive benevalentium curiosè sanguinem examinavi: Ac tandem cognovi sanguinem in venis nunquam putrefieri; quin simul ipsa vena putreat; ut in gangræna, & in mortificationibus. Nec non etiam cognovi vana esse Medicorum de sanguine judicia ex vario colore sive viridi, sive flavo, sive subfusco, sive nigro desumpta: necnon vana esse, quæ ex majori, aut minori consistentia ejusdem, crassitie, & viscositate, aquositate, & tenuitate indicia desumuntur. Sanguines enim ejusmodi colore, materia, consistentia valdè dissimiles; quosque Medici dixissent putridos; medicamenta mihi dederunt æquè utilia ac quilibet alius sanguis; qui medicis videri posset optimus.

GAL. Memini (3) me aliquando docuisse, *neque (a) ex colore; neque ex odore; neque ex consistentia: neque ex congelatione; neque ex duritie; neque ex asperitate, aut levitate, aliisque similibus de medicinarum facultatibus rectè Medicos ratiocinari posse.* Sunt enim nonnulla in plerisque ex his dissimilia (ut vina quædam alba, quædam nigra) quorum tamen vires ad nos sunt similes. Hoc idem docuit Clarissimus Medicus Diocles in primo ad Plisarchum de sanitate tuenda libro; ubi hæc scripta reliquit: (b) *qui ergo omnia sapore eodem, odore, colore, aut alio id genus prædita, vires easdem obtinere existimant, haud rectè opinantur: nam multa ostendere quis possit dissimilia fieri ab his, etiamsi, quo ad prædicta attinet, inter se conveniant.* Neque sanè si quid album, aut urinam movet, aut quamlibet aliam habet facultatem: idèò tale esse quodque est putandum, quod vel calidum sit, vel frigidum, vel falsum: quandoquidem non dulcia omnia, aut acria, aut salsa, aut cœtera id genus easdem habent facultates.

B 2

Sed

(a) Gal. de simpl. medicam. facult. lib. 2. c. 2.

(b) Diocles apud Galenum de alimen. facult. lib. 1. c. 1.

(1) Post sectam venam, id quod sanguinis reliquum est in vasis; nisi alia causa occurrat, remanet quale priùs erat.

(2) Vana sunt secundum Helm. plerumque de sanguine judicia.

(3) Medicamentorum vires, neque ex odore, neque ex colore, aliisque similibus dignosci possunt.

Portius De Venæ Sectione.

Sed heu per quàm facilè illa omnia concludis Helmonti ! Licèt sanguinis natura ex colore , & consistentia : aquositate , & tenuitate (etsi multoties aliter (1) pronunciaverim) cognosci nequeat ; nunquam tamen , quantumvis mente contorquearis ostendes sanguinem in venis non posse grave aliquod vitium concipere ; & inde non posse animantem extinguere.

At si sanguis sit sanè optimus ; sed superabundet nimis in venis ; cur quæso non erit evacuandus ?

WILL. Audacter profectò de his omnibus decernit Helmontius . Sed neque tu places Galene ; qui scrupulum injecisti ad ea , quæ apud te notata legi , quæve ego etiam servavi ; attendendum sanguinis colorem , ut de sanguine dijudicemus ; attendendam in sanguinis missione coloris mutationem.

GAL. Et hæc , quæ refers ; & ea , quæ retuli , à me quoque scripta sunt Willis.

WILL. Neque solùm cum superabundat mittendus sanguis est ; verùm etiam cum sulphure , aut sale (a) fixo , vel simul utrisque exaltatis in acrem salsum , aut salino-sulphureum degeneravit : vel (b) cum æstro percitus in partes modo has , modo illas impetuosè irruit ; aut materiam noxiam transfert . Siquidem cruoris portione detracta , nova statim ejus fermentatio oritur ; & non rarò particularum omnium ejusmodi fit metathesis , ut deinceps spiritus cum sale volatili paulum emergant ; & dominium suum recuperent ; sulphure , & sale fixo sub iugo missis : unde phlebotomia cohibetur , & reducitur sanguis.

ERAS. Admiranda quidem , & tumida sanè verba ; non tamen pulchra nimis .

WILL. Neque illud tibi admiserim , Erasistrate , ex sanguinis per venæ sectionem detractiōe necessariò consequi ejusdem in venis diminutionem . Quin imò sæpè detractō sanguine , non solùm tandundem remanet , ac ante detractiōem erat ; sed etiam crescit in venis sanguinis copia .

ERAS. Nihil omninò est , quod detractiōe crescere possit . Confusa sanguinis à sanguine detractiōe ; ut etiam confusa particularum omnis generis à vino detractiōe non mutatur reliquum sive sanguinis , sive vini ; verùm post detractiōem remanet minùs sanguinis ; remanet minùs vini .

WILL. Paradoxa tamen illa facilè probari poterunt . Primum constat experimento .

ERAS. Abstinetō hac vice ab experimentis ; ni vel is omnibus te onerem observationibus ; quibus constat decrescere ea , ex quibus aliquid aufertur , ea autem crescere , quibus aliquid additur .

WILL. Adducam tum experimenta , tum etiam rationes .

ERAS. Sive experimenta , sive rationes adducas , non erunt meliora iis , quas quis afferre posset ad probandum Helenæ potiùs raptu , aut ligneo Caballo ; non autem Pyrrhi , Ullyssis , Machaonis , aliorumque Græcorum manibus concidisse Ilium : vel ad probandum , quòd Pyrrhi potiùs , aut Ullyssis ira , quàm Troja arserit igni . Cum contra ego videam potuisse post Helenæ raptum meliùs esse Trojæ : ac potuisse equo illo exornari potiùs , quàm

ex-

(a , b) Willis de phlebotomia fol. mihi 171. & 173.

(1) Sanguis in vasis potest esse vitiosus ; vitium tamen difficillimè cognosci potest.

excindi pergama . Sed audiamus rationes , & experimenta ista tua.

WILL. *Constans* (a) *observatio est à cruore parcius detracto totam illicò massam ejus insigniùs effervescere ; novasq; in partem affectum eorū habere.*

Cujus ratio est , (b) quòd in magna plethora plures , & sanguinis , & feri portiones in recessus , & angustias protrusæ illic residere cogantur .

Quæ post vasa perpaulum (c) inanita in massam sanguineam impetuosè regurgitant, ipsamque valdè exagitant; & hùc illuc impetuosius adigunt.

Quapropter hoc (d) etiam respectu, vasa per multum depleri opus est; videlicet ut , præter laticem priorem ab angustis liberandum , etiam succo ab exilio reduci , spatium concedatur.

Qui secus (e) cruori minùs congruè adveniens tumultuatur ; ipsum in effervescentias , & eruptiones concitat.

Hinc (f) advertere licet, quoscunque serè homines statim à phlebotomia magis incallescere ; quò tamen sanguine sufficienter evacuato paulo postea temperatiùs habent.

Attamen (g) hujus evacuationis per venæ sectionem necessitas, quæ licet, evitari debet.

Quoniam (h) exinde sanguis fit magis sulphureus , & minùs falsus.

Proinde (i) homines fere quosvis ad febricitandum , & pinguescendum disponit.

ERAS. Nihil (1) magis inconstans ; & quamplurimi vix inflicto vulnere à chirurgo animo linquntur, frigent, & pulsus ipsis dejiciuntur .

Sed in magna aliqua plethora, ex vini potione, exempli gratia , omnia velociùs moventur usque ad insaniam, & furorem hominis.

Cur non potiùs placidè regurgitant ? Cur non potiùs illius fervorem compescunt ? Cur hùc, illuc impetuosius , & non placidissimè , & per consuetas vias sanguinis massam adigunt?

Cur redux iste ab exilio succus est in majori quantitate? non in æquali, aut potiùs ; ut æquum est , in minori copia quàm sanguis, qui tunc effluit per sectam venam ?

Cur hoc etiam ? Cur tumultuatur redux iste exul ? qui cum ob restitutam civitatem gratari potiùs debeat concivibus succis, turbas excitat !

Frequentiùs contrarium accidit: ac si aliquando statim à phlebotomia incallescunt homines , est ista eorum calefactio, veluti Ilii excidium ab Helenæ raptu .

Necessitati , nec resistit Marspiter.

Nullam video necessitatem , quæ ex detractioe reliquus sanguis fieri debeat magis sulphureus , & minùs falsus.

Homines quidem facit morbos: sed neque febres, neque pinguem habitum certò promittere potes ex sanguinis detractioe.

Por-

Igitur

(a,b,c,) Willis de phlebotomia pagina mihi 177.

d,e,f,) Willis de phlebotomia pagina mihi 177.

(g,h,i,) Willis de phlebotomia pagina mihi 171.

(1) Argumenta, & rationes , quibus Tho. Will. ostendere conatur , qui effectus , & motus consequantur sanguinis missionem; nihil habent roboris , & nihil rectè concludunt.

Porro (a) *venæ sectio, magnum sanè remedium, si ad parvas quascunque occasiones prostituatur, quando opus erit ad grandes affectus minùs efficax evadet.*

Et tu, sed ex semetipso terretur; licet desumpta occasione ab aspectu lupi expavescat. Cui quidem si affuescat, postea neque hanc sibi suscipit à lupi aspectu occasionem terroris. Sic⁽¹⁾ aliquis, qui priùs maximè lætabatur propter tenue lucrum; postea quandoque non sibi suscipit à majori lucro lætitiæ occasionem. Sic similiter de aliis animi affectibus, Secus quoniam semel ignis suffocari potest aqua, quæ ad hoc satis sit; semper suffocari poterit aqua, quæ satis sit; & à copiosiori aqua citiùs, atque meliùs extinguetur, & suffocabitur.

Cui (b) *accedit, quòd iuxta vulgi observationem quòd familiariùs quispian phlebotomia utitur, eò crebriùs hac indigebit.*

Quippè sanguine ad phlethoram evitandam emissio. massa reliqua denuo citiùs ad plethoram assurgit.

Longè (c) *secus, ut quorundam, fert opinio; qui verentur ne cruoris penus crebra phlebotomia absumatur: quoniam è contra hoc modo fit quantitas ejus auctior; licet crasis deterior.*

Idem fiat deterior post repetitam sanguinis missionem. Sed non video, ut ex detractioe quantitas ejus fiat auctior: nam ex detractioe non sequitur, quòd plus addatur, quàm detractum sit; imò neque sequitur quòd addatur tantundem.

Ità namque cruor sale balsamico, (d) & contra putredinem præservativo multum spoliatus; loco ejus sulphure pinguisco, & ~~magis~~ magis saturatur. à corruptione, vel pingui oleo, vel myrrha, vel succino, vel therebinthi lacryma, quàm sale. Ac si sanguis spoliatur sale; non video cur saturari debeat sulphure hoc pinguisco, & incendiario!

Phlebotomia insuper (e) *sanguinis mixtionem, & temperiem sæpè emendare solet; adeoque multiplici respectu. Primò enim si quiddam heterogenium massæ ejus confunditur; quod*

Igitur grandes affectus non sanantur sanguinis missione: sicuti neque raptu Helenæ Ilium evertitur; licet occasione raptus hujusmodi eversum dicatur. Neque puer lupi aspectu

Neque causam video, quæ hanc sanguinis crebrius mittendi ponat indigentiam.

Satiùs igitur semper erit nunquam mittere sanguinem. Sed neque hoc verum est, quòd ex sanguinis detractioe reliqua massa, denuò citiùs ad plethoram assurgat.

Ea quæ post sanguinis missionem corpori adduntur; quoniam minori sanguinis copię permiscuntur, sæpè minùs rectè convertuntur in humores muneribus vitæ idoneos: ut crasis qui-

Cum sanguis confusè educatur, cur quæso reliquum spoliatur sale balsamico putredinis præservativo? Cœterum scio quædam meliùs præservari

Ejus, quod neque rectè subigi, nec facilè secerni, ac amandari possit, tantum educitur, quantum permixtum erat illi sanguinis portioni, quæ, pertusa vena detrahitur. Nec proin-

(a,b,c,) Willis de phlebotomia pagina mihi 171.

(d,e,) Willis de phlebotomia mihi 171.

(1) *Vera causa alicujus effectus semper producit effectum illum.*

scilicet non rectè subigi nec facile discerni, ac amandari possit; vena pertusa, sanguis effluens materiae istius portionem non raro multam secum foras convehit; proinde ut reliqua perdomari, aut expelli queat.

Enim (a) verò vasis foramine aperto, statim sanguis fermentescens particulas extraneas, quæ licet, unâ congregat; & sui portionem istam, in qua plurimæ, agregantur, foras extrudit.

potius extraneæ, rebelles, contumaces, ab exilio reduces, & magis noxiæ sanguis particulæ statim, ubi vena aperta fuerit, utiliora congregant; & simul aggregata foras expellunt?

Hinc (b) observare est: quando cruor primo,

GAL. Dum hæc narras, Willis, non audis, quæ mecum susurrat Erasistratus, verbis his tuis nihil omninò probari?

ERAS. Sunt sermones isti tui veluti Cabalistici, Astrologici; sunt omninò profani.

HELM. Pejora sanè habes iis, quæ à Galeno dicta sunt.

GAL. Multa ⁽¹⁾ quidem, Willis, sive bona sive mala possunt, per accidens contingere homini, cui sanguis mittitur; & oportet distinguere ea, quæ sic fiunt, ab iis, quæ per se, an necessariò consequuntur sanguinis detractionem: quale est illud, quod dicebat Erasistratus, eorum, quæ in venis continebantur, diminutio. Nam ut fieri unquàm poterit, cum aliquid detrahatur; quin etiam ex hoc copia simul minuatur ejus, à quo detrahitur? Minuitur quidem necessariò copia, ipsis etiam annuentibus Erasistrato, & Helmontio. Cavè, Willis, ne ipsis hac in re repugnes; neve contrarium affirmes. Non enim parùm hoc est, quòd concedant detractione diminui copiam: ac mox debebunt fateri in plerisque morbis, in quibus adest plenitudo vasorum, venæ sectionem frequenter convenire.

Illud ⁽²⁾ autem, an ex detractione mutetur reliquum, dubium sanè est. Ac etiam si mutetur, dubium est, per se ne; an per accidens; sive casu potius, & fortuna aliqua, vel ex animi affectu aliquo mutetur. Et hæc fortè intelligit Erasistratus, dum raptum memorat Helenæ, Trojæ excidium, Lupi aspectum, lætitiæ occasione lucri, & alia similia. Negat Erasistratus, quòd ipsa detractione mutetur reliquum; quoniam sanguis confusè detrahitur, & sine partium discrimine. Ac etiam si concedat mutari reliquum; attamen quod maximè incertum est, nos probare deberemus; in meliùs, & non in deterius mutari.

Nos

(a, b,) Willis de phlebotomia pagina mihi 171.

(1) Nihil necessariò consequitur sanguinis missionem præter ejusdem sanguinis in vasis diminutionem.

(2) Quædam tamen alia per accidens sive non necessariò consequuntur sanguinis missionem, ut fuit Trojæ excidium ex raptu Helenæ.

Nos (1) verò circa humores in vasis sanguiferis existentes, quidquid velis, statuamus Willis; quòd habeant tot portiones salis utriusque, tot sulphuris, tot aquæ, tot terræ, tot spiritus: vel, si hæc non ampliùs placent, dicamus, quod ego asserueram, bilem naturalem, tum melancholiam, tum pituitam, & quartam quandam substantiam aeri respondentem componere totam sanguinis massam, quæ in venis est: vel alia quæcunque ponantur sanguinem componentia. Hæc quæcunque tandem fuerint, sanitatis tempore modum servabunt aliquem; ægritudinis verò sæpissimè non servabunt. Excedant jam in sanguine sal, & sulphur secundum tuam hypothèsim; vel secundum meam excedat bilis flava. Cum non liceat chirurgo sic vas pertundere, ut sal, vel sulphur tantùm; vel bilis tantùm egrediatur; neque cognosci possit in quo vase sit plus salis, & sulphuris, vel bilis, quàm aliarum substantiarum; consequitur, secta vena, id profundi, quod foramini proximius erat: quodcunque illud sit. Adeò ut licèt casu fieri possit, ut aliquid mittatur diversum ab eo, quod remanet in vasis sanguiferis. & fortè commodum aliquod ex hoc sequi possit; attamen id neque promitti, neque certò sperari potest. Ac licèt supponere valeamus tenuiores, ac spirituosiores particulas aperto semel aditu faciliùs effluere; & remanere in vasis crassiores; videndum adhuc esset, an hoc prodesse potius; quam obesse possit; & quando plus proficit, quàm obsit. Præterquamquod spirituosiores implicitæ cum sint crassioribus, & crassiores tenuioribus; hæc illas, & illæ istas unà secum ferunt. Ac tu mihi dixisti. Willis, sanguinis spiritum implicitum adeò esse terrestrioribus, & crassioribus particulis, ut diù permaneat in educto sanguine; (a) & opus te habuisse ignis vi haud mediocri, ut spiritus iste eliceretur. Ego autem quantum dignoscere potui, dum Crysippi, & Erasistrati sententiam examinabam, ne vulnerato quidem corde, visus est sinister ejusdem ventriculus exinaniri propter effluentem spiritum; (b) verùm propter effluentem sanguinem; qui meo quidem iudicio habet particulas quasdam efficaciores, & tenuiores, quas spiritus appellare possis, aliis tamen implicitas particulis.

HELM. Verùm (2) enim vero, ego testor vobis, sanguini, dum in venis animalium est, minimè ea omnia inesse; nec talia, qualia chymicis operationibus postea ab ipso educuntur. Multa enim fermentationibus, & ignis vi fiunt, quæ priùs non erant in eo, in quo, vel ex quo illa facta sunt.

GAL. Hoc (3) magis comprobatur inesse sanguini partes hæterogenias; quæ etiam si omnes igni, vel alia causa urgeantur, non possint in unum, idemque transmutari; quoniam heterogeniæ sunt. Ac illud confirmatur debere partium varia genera in sanguine aliquam servare proportionem; & ex non servata proportionem aliquando morbos fieri posse, Quod æquè explicatur, si bilem, melancholiam, & pituitam dicamus sanguinis partes esse; ac
si san-

(a) Willis de febr. cap. 1.

(b) Galen. de Hip. & Platon. decret. lib. 1. cap. 5.

(1) Principia medica Galeni, & prima sanguinis componentia comparantur cum principiis, & sanguinem componentibus Th. Willis.

(2) Non omnia, quæ à sanguine videntur extrahi, sanguini priùs inerant.

(3) Partes sanguinis sunt heterogeniæ, & aliquam servare debent proportionem.

si sanguinem ex sale, sulphure, spiritu, aqua, & terra constare affirmemus.

Hippocrates (sive (1)) potius is, aut illi, qui aphorismos conscripserunt) cum servata proportionem humorum, sanguinis massa abundaret in venis, & morbus urgeret, missione utebatur per sectam venam; via videlicet omnium expeditissima ad diminuendam sanguinis abundantiam. Si verò proportio non servaretur (puta si bilis excederet; vel sales, & sulphura, Willis, magis, minusve adusta, aut exaltata supra reliquas substantias excederent) medicamentum propinabat; quo vel per vomitum, vel per urinas, vel sudore, vel inferna potissimum evacuatione humoris, qui superabundaret, exturbaretur.

Ego autem licet, aliquando alias mihi proposuerim tum causas, tum rationes, quibus sanguis mittendus esset; ut plurimum tamen Hippocratem sum imitatus: ac cum sanguis bonus esset, aut parum recederet à naturali statu, & superabundaret; tunc maximè mittendum existimavi: exceptis tamen iis, in quibus missio contraindicatur; (2) & præsertim pueris (a) qui decimum quartum annum non attigerint. Qui quoniam multum dissipant, & multa ipsis fit per halitum digestio; sanguinis missione non indigent; etiamsi sanguis in ipsis aliquando abundet. Quod si crudior sanguis esset, aut superexcoctus; tunc alio præsidii genere utendum censui. Ac frequenter timui, ne dum puri, vel vitiosi sanguinis per sectam venam missio celebraretur; impurior, & magis vitiosus è primis viis in vacuas venas traheretur. Tu autem, Willis, quid simile ais contingere de is sanguinis, & feri portionibus, quæ in magna plethora in recessus, & angustias protruduntur: cui periculo nescio an largiori missione satis consultum fuerit.

Quam ob rem etiam, atque etiam rogo; hoc maximè retineamus: & quantum rectius fieri potest, hoc maximè firmemus, sanguinem optimum posse aliquando superabundare in vasis; & ex copia fieri posse morbos; qui citò, & tutissimè missione sanguinis sanentur.

ERAS. Quando hæc est, Galene, sanguinis in venis, per quas liberè movetur suprabundantia?

GAL. Rectè mones: & primò plenitudinem vasorum, quæ non sunt adhuc impedita, vel obstructa; postmodum verò examinabimus illam, quæ contingit in vasis jam obstructis, aut impeditis; ut per eorundem cavitatem sanguis haud liberè fluere possit. Ultraque autem alicujus respectu est; quin copia, inopia; plenitudo, inanitas; excessus, defectus; & alia similia nunquam melius cognoscuntur, quam cum respectivè ad aliquid, quod sit veluti norma, considerantur.

ERAS. Ità sanè.

GAL. Quapropter (3) tibi persuasum velim, Erasistrate, duplicem esse posse sanguinis plenitudinem, aliam respectivè ad ægotantis corporis vasa, quæ nimis distendantur; aliam respectivè ad ejusdem corporis vires, quæ

Tom. I.

C

ve-

(a) Gal. Methodi med. l. I. c. 14. ad Glaucon. l. c. 14. in lib. contra Erasim. & Erasistr. & de c. 1. per sanguinis & passim alibi.

(1) Hipp. mittebat sanguinem, cum is bonus esset, & superabundaret.

(2) Nunquam pueris sanguis detrahendus ex Galeno.

(3) Duplicè ponebat Galenus sanguinis plenitudinem aliam respectivè ad vires, aliam respectivè ad vasa.

veluti opprimantur. Illius disertè quidem (a) meministi libro primo salubrium; secundam, quæ vires respicit, minimè cognovisti Erasistrate.

ERAS. Neque nunc quidem capio plenitudinem istam; quæ vires, non vasa, nec vasorum capacitatem respiciat.

GAL. Efficiam, ut capias. Sunt (b) qui sese graves, pigros, segnes, atque agrè mobiles referant; quibus neque brachia; neque tibiæ, neque manus, neque partes aliæ pleniores videntur; perinde ac illis, qui ab exercitio partes eas distentas, & universum corpus tensum habent: quos ea plenitudine laborare affirmo, quæ virtutem respicit. Nam ubi corpus tensum est, venæque, arteriæque turgent, & distentæ nimis apparent; veluti ab exercitio esse consueverunt; & brachia, tibiæque, manulque videntur pleniores; tunc plenitudinem eam dico, quæ ad vasa, & eorundem capacitatem referri debeat.

Quòd si hæc accidant universo corpori totius quidem plenitudo aderit, sive quòd ad vires, sive quòd ad vasa. Si verò contingant parti alicui, in qua gravitatis sensus percipiatur; quæve ad proprias actiones sit languidior, sinè tamen tensione in vasis; partis illius virtutem, atque robur respiciens plenitudo tunc aderit. Quòd si præterea adsit tensio illius partis, & vasorum, quæ ad illam pertinet, distensio, atque ampliatio; tunc plenitudo illius partis ad vasorum capacitatem referenda erit. His similia ventriculo etiam sæpè accidunt; qui vel tensionem, & periculosam tunicarum ampliationem, & protractionem à nimia cibi, & potus copia patitur; vel propter virtutis imbecillitatem etiam à non magna copia gravatur: illam dixeris quòd ad capacitatem ventriculi plenitudinem; hanc verò quòd ad vires, roburque ejusdem.

Ultraque autem plenitudo, sive quòd ad vires, sive quòd ad vasa evacuatione indiget: & ea quidem, quæ sanguinis est, venæ sectione; quæ verò ventriculo, exempli gratia accidit, vomitu, aut inferna dejectione curatur.

Sed (c) cum infesta adest degravans plenitudo, videndum prius est, ne (c) crudus per corpus collectus sit succus. In quo advertendum diligenter est, quantum valeat, robustaque sit virtus; & quantum humor ipse sit refrigeratus: nam exoluta ab id genus affectibus virtus, adhibita sanguinis missione, in extremum malum recidere solet: ut nequaquam postea restitui possit. Quod ubi evenit, periculum non leve consequitur; potissimum si febris accedat statu æstivo; stomachoque malè affecto; aut toto adeò corpore natura molli, & temperie humido: ejusmodi enim hominibus multa accidit per halitum digestio, repentinaque syn-copa, etiam si febris haud magna invadat. Si verò horum nihil sit, cæterum hyems fuerit, regione natura frigida; tum natura quòque hominis frigidior, iis per sanguinis missionem, & totum corpus graviter perfrigeratur, & accidunt nonnulla, quæ ad gravem sequuntur refrigerationem symptomata. Quocirca, qui sic affecti sunt, eos sanguinis missione vacuare non convenit; sed frictionibus, mediocriterque excalescentibus unctionibus; tum potionibus humorum crassitudinem incidentibus, ac modicè calescentibus. Ne quæso credas, Erasistra-

te,

(a) Erasif. rel. à Gal. lib. de plenitud.

(b) Galenus l. de cur. rat. per sanguinis mis. cap. 4. & 5. & lib. de plenitud. & passim alibi.

(c) De cur. rat. per sanguinis mis. cap. 6.

(1) In cruditate humorum non est sanguis detrahendus secundum Galenum

te, me semper in plenitudine sanguinem profudisse!

WILL. Pleraque (¹) ex his verbis quidem discrepant, re autem maximè consentiunt iis, quæ à me scripta sunt: videlicet in ea (a) sanguinis dyscrasia, in qua principia nobiliora, & activa; spiritus nempe, sal volatilis, & sulphur depressa, vel absumpta sunt; particulae verò aquosæ, ac terrestres præpollent; sanguis haud quaquam emitti, sed tanquam vitæ thesaurus præservari debet. Sed ubi principia activa minimè sunt depressa contra plethoram, aut factam, aut incipientem, sive in homine, sive in jumentis, prima, ac communissima indicatio est sanguinem mittere.

HELM. Verùm beneficium hoc aut nunquam, aut vix semel, vel bis in toto vitæ curriculo phlebotomia præstatnr: nam ut ajebas Willis, post (b) semel aut bis detractum sanguinem fit inevitabilis ulterius mittendi necessitas; & quò plus mittas; eò plus sanguinis copia crescet!

Tibi autem Galene ex ejusdem Willis monitu in humorum cruditate, & frigiditate, cum regio est frigida, & hominis natura frigidior, consulerem, ut parcè sanguinem, & repetitis vicibus mitti jubeas; nam, ut inquit, ex parca sanguinis detractone id, quod (c) reliquum est effervesce constans est observatio; & statim à phlebotomia homines ferè quoscunque magis (d) incallescere!

GAL. Sed hæc constans Willis observatio Erasistrato maximè videtur inconstans: & ego ad refrigerandum potius, quàm ad calefaciendum sanguinem detraxi.

ERAS. Ambigua Oraculi responsa audio:

Cræsus (e) Halim penetrans, magnam pervertet opum vim;
vel illud aliud Apollinis;

Ajo (f) te Æacida Romano vincere posse.

At, Galene, ea, quæ comparantur, debent esse ejusdem speciei. Motus motui, sive vires viribus; superficies superficiei; magnitudo trinendimensa corpori, & sanguinis quantitas capacitati vasorum rectè comparantur. Tu verò sanguinis molem, sive quantitatem, corpus scilicet trinendimensum, viribus comparas; cum tamen trina dimensio, quæ sanguini convenit, nullo pacto viribus aptari possit.

Vel (²) præterea mihi videris, Galene, accipere sanguinem veluti plumbum; à cujus pondere viginti circiter librarum robusti, & bene valentis hominis vires non opprimantur; valetudinarii verò opprimantur: ut expediat à sanguine, veluti a plumbo aliquid detrahere, ut infirmi hominis vires à pondere, & à sarcina levantur. Ac qui mittendi sanguinis indicationem pluries sumendam duxeris à virium constantia; nunc eandem sumendam præcipis à virium infirmitate; cum sese graves, pigros, & agrè mobiles sentiunt ægroti! Mihi verò haud sic videtur.

C 2

Rectè

(a) Willis de phlebotomia fol. mihi. 172.

(b) Willis de phlebotom. fol. mihi 176.

(c, d) Willis de phlebotomia pag. mihi 177.

(e, f) M. Tul. Cic. de divin. l. 2.

(1) Neque secundum Willis cuius verbis non re à Galeno discrepas sententia.

(2) Non datur plenitudo, quò ad vires, quam Galenus malè confixit.

Resè (¹) quidem pondus comparari posset viribus ; nam pondus motum quendam corporis significat ; & vires motum etiam quendam significant . Sed sanguis non est veluti corpus grave extrinsecum homini, & nihil pertinens ad hominem : à quo si magis , ac magis detrahas : magis , ac magis levabitur homo ; quoniam minùs , atque minùs gravabitur à minori , atque minori extrinseci plumbi pondere . Sanguis est quid intrinsecum homini ; est quid pertinens ad hominem : & vires corporis nequaquam sunt independentes à sanguine ; non sunt quid distinctum à sanguine ; quodve à sanguine maximè non dependeat . Ea , quæ ad invicem hac ratione referuntur , debent esse omninò distincta ; aut saltem in eo secundum quod referantur ad invicem , & comparantur distincta esse debent .

Neque (²) planè dixerim vires ventriculi distinctas omninò esse ab iis, quæ in ventriculo continentur ; maximè si nihil vitiosi , neque nimii contineatur ; quod ejusdem tunicas plusquam æquum est distendat , & eam faciat repletionem , quæ ventriculi capacitatem respiciat ; quam tu in venis sanguinis plenitudinem , quò ad vasa appellas . Et meritò quidem , ut audio , junior Asclepiades in eo (a) volumine, quod (³) de tuenda sanitate composuit, vomitum damnavit , fortè non tantum eorum Offensus consuetudine, qui quotidie ejiciendo vorandi facultatem moliuntur ; sed quoniam vomitu ventriculus fit imbecillior . Ventriculi enim vires ex parte consistunt in iis liquoribus , qui in ipsum ventriculum ad ciborum dissolutionem, & præparationem confluunt . Qui cum semielaboratis cibus simul vomitu rejiciuntur , & exinde fit postea ventriculus imbecillior . Neque in hoc saltem casu in quo ventriculus quantumvis imbecillis , non est tamen repletus cibus ; sive nequaquam ea laborat plenitudine , quæ ad ejus capacitatem referenda est ; neque vitiosi quicquam continet , reprehendendus est Asclepiades : quin potius est commendandus . Si imbecillis est ventriculus corroboretur ; atque tardiùs , & minori copia fit habenti offeratur : nam si vomitu non repletum ventriculum , neque alieni quicquam in se habentem tentes , imbecilliolem reddes .

Ita sanè dicendum de sanguine est , quòd non sit veluti plumbum , quod nullam habet connexionem cum corpore viventi ; neque robur hominis sit quid distinctum , & Independentens à sanguine : aded ut quantumvis vires langueant , modò sanguis non superabundet respectivè ad vasa ; (de qua plenitudine postea dicemus) neque alicubi vitiosus restagnet , nullum ex ejus deductione vires levamen accipere possint ; neque virtutis augmentum aliquod ex missione sequi debeat ; quin potius major ejusdem costernatio .

HELM. Aliàs, Galene , quò vires erunt imbecilliores ; eò plus sanguinis , veluti plus plumbi , detrahendum erit . Ac licèt detur hoc , Erasistrate, sanguinem respectivè ad vires esse veluti pondus plumbi ; cum multò majorem gravitatem percipiant languida corpora viventium à brachiorum , aut crurum , quàm à sanguinis pondere ; rescindenda illis brachia , aut crura erunt : & pro-

(a) Cornel. Cels. l. 1. cap. 3.

(1) Vires animalis non consistunt in aliquo omninò distincto à sanguine.

(2) Neque vires ventriculi consistunt in aliquo omninò distincto ab iis, quæ in ventriculo continentur.

(3) Asclepiades damnavat vomitum , & quare.

& profectò quandoque id satius erit : nam omninò sinè brachiis , & sinè cruribus diù superstes esse potest homo ; cum omninò sinè sanguine , neque momentum quidem vivere valeat .

GAL. Præsenferam , (1) Erasistrate , difficultatem illam oportere nos accipere vires , roburque hominis , veluti quid independens , & distinctum à sanguine ; cujus copia aliquando respectivè quidem ad vasa superabundans non sit : sed quoniam gravis est sanguis , & vires possunt esse magis , atque magis languidæ ; aliquando illius non magna copia , respectivè ad vasa , magna , & excedens sit respectivè ad vires . Atque ideò libro de plenitudine ostendere conatus sum , neque ex incremento , neque ex sanguinis decremento vires necessariò augeri , aut minui . Nam , ut optimè noverant , qui meo tempore gymnasticam docebant , aut exercebant , potest homo magis sanguineus esse , & minùs , aut magis , quàm ante valentior ; potest esse minùs sanguineus , & magis , vel minùs robustus : potest demum tantundem sanguinis habere , ac priùs ; cum neque ex hoc necessariò sequatur , quòd æquè validus futurus sit . Quandoquidem robur corporis nequaquam omninò à sanguine dependet ; nam ad motus quosvis faciliùs . & validiùs edendos concurrat , & spirituum animalium , & nervorum , & musculorum , cæterarumque partium constitutio . Ac etiamsi omninò à sanguine vires dependeant : cum possit is magis minusve esse pituitosus , & frigidior , aut aliter vitiosus : fieri etiam quandoque potest , ut sanguinis quidem decrescat copia : sed quoniam vitium , quod in eo erat corrigitur , corporis vires crescant .

Cæterùm his postea minimè sum usus , dum de curandi ratione per sanguinis missionem librum conscriberem : verebar enim ne obiiceretur , missione sanguinis quò ad vasa non superabundantis spirituum animalium , nervorum , musculorumque constitutionem non fieri meliorem ; neque ejusdem vitia corrigi : & probandum priùs esse , quod tacitè supposueram , sanguinem esse veluti pondus extrinsecum respectivè ad vires ; ad hoc , ut illud postea concludi possit , sanguine , qui vitiosus non sit , quivè vasa non repleat , aut distendat , plusquàm æquum est , infirmam corporis virtutem gravari .

Quæ omnia ex his , quæ dixeram , neque ex incremento sanguinis , neque ex decremento vires necessariò augeri , aut diminui , minimè probari poterant .

HELM. Si plus tamen , atque plus auferas : videbis , an præstet brachium excindere , quàm omnem sanguinem detrahere !

GAL. Quamobrem (2) in eo libro , Erasistrate , de curandi ratione aliter sanè rem explicavi istam : atque docui (a) non solùm nutrimentum animalis partibus ex sanguine esse ; sed calorem quoque naturalem (pro quo nunc intelligere potestis id omne , in quo vires consistunt) perseverantiam ex sanguine obtinere : quemadmodum ex lignis comburi idoneis perseverantiam , & durationem habet , qui in foco est ignis ; à quo ædes totas calefcere conspici-

mus

(a) Gal. lib. de cur. rat. per sang. miss. cap. 5.

(1) Ex aliquo in animante sanguinis incremento , vel decremento , non sequitur necessariò majus , minusve robur .

(2) Vires , sive calor naturalis à Galeno comparatur igni , & sanguis lignis sive viridibus , sive siccis ; quod malefactum .

mus. Atque sicuti ignis potest esse languidus, vel validus; exiguus, & magnus; & sicuti ligna possunt esse viridia, aut sicca, & magis, minusque combustibilia, & in magna, aut minima copia: ita, & is, qui in corpore animantis est calor naturalis, qui maximè in corde cùm in fonte vigere debet, & sanguis quo calor iste nutritur; multas suscipere potest variationes. Et ut exiguus ignis obruitur congestis in eum confertim lignis quantumvis siccis; ita non rarò exiguus in corpore viventi, & in ipso corde calor naturalis etiam à non magna sanguinis copia, si ad vasorum capacitatem illa referatur, opprimi, & veluti obrui potest. Detraçto autem sanguine per venæ sectionem, & suscitari, & faciliùs accendi poterit calor ille.

ERAS. Hæc alia explicandi ratio tua, Galene, non differt à prioribus; nam mutatis vocibus iterum tacitè supponis, vires, & robur corporis; sive id in quo potissimùm vires consistunt, quod tu calorem naturalem appellas, esse omninò quid distinctum à sanguine; & iterum accipis sanguinem, veluti plumbi extrinseci pondus; sive veluti ligna distincta ab igne; resque tota in idem recidit.

Quod (1) autem in corpore animato, cujus partes solidæ sint benè organizatæ, sive constructæ, nos supponere possumus, est; vires, roburque ejusdem, sive quem dicis calorem naturalem consistere in motibus liquidarum substantiarum, quotcunque illæ sint, & quocunque nomine appellentur. Quæ quidem liquidæ substantiæ sint veluti in circulo dispositæ; ita ut cujuslibet motus dependeat à motibus reliquarum; & unius turbato, vel alterato motu facilè turbentur, & alterentur omnes.

Inter has omnium consensu non infimum locum sanguis habet; à cujus motibus dependent motus aliarum liquidarum substantiarum; sive spiritus, sive lympa, sive alio nomine vocentur. Sed unaquæque aliarum motu suo, & partium constitutione aliquid contribuit ad sanguinis motum tum circularem, tum intestinum particularum ejus. Et hæc quidem fiunt necessitate naturæ; quoniam veluti in circulo sunt omnes dispositæ, & invicem quàm maximè communicant; ita ut ad motum unius sive velociorem, sive tardior, & ad hunc, vel illum terminum alteretur motus alterius, & fiat velocior, vel tardior; & ad unum potiùs, quàm alterum terminum: & aliquid sublimetur, vel aliquid præcipitetur; vel secernatur, vel misceatur aliquid; aut quid aliud fiat.

Vires (2) insuper tunc maximè constant cum tunica vasorum sunt potiùs aliquantulum tensæ, & distente; quàm rugosæ, & flaccidæ. Tunc maximè constant vires cum vasa sunt turgidiuscula potiùs; quàm exinanita. Mediocri enim turgiditate, & tensione tunicarum multa tum rectiùs, tum validiùs fiunt; quàm cum exinanita sunt, & nihil turgent vasa; & quàm cum flaccidæ potiùs, quàm tensæ sunt fibrillæ, & tunica vasorum, aliarumque partium. Id manifestum adeò est, ut non indigeat majori explicatione.

Qui-

(1) *Vires corporis animati consistunt in aptis motibus liquidarum substantiarum; quæ sunt veluti in circulum dispositæ, ut unius motus dependeat à motu aliarum.*

(2) *Vires animantis tunc maximè constant cum vasa sunt turgidiuscula potiùs, quàm exinanita, & flaccida.]*

Quibus positis quò ad vires, & non quò ad vasa plenitudo ista tua Galene apparet inanis, & omni verisimilitudine destituta. Ac dum illam explicas, semper supponis sanguinem, (1) tanquàm aliquid in quo vires, neque saltem ex parte, consistant. Quod est falsum. Ac si parùm detrahas à venis fortè aliquando nullam observabis virium dejectionem; sed si plus detrahas, certò certius vires deficient: maximè si non adsit illa magna plenitudo quò ad vasa; tunc enim, præter alia, quæ accidunt, propter detractionem ejus, quod non superabundat in vasis, & nimium non est respectivè ad vasorum capacitatem, flaccescent tunicae; & minus tensæ, quàm opus, erunt fibrillæ, & membranæ: ut dictum est; & vires ex hoc erunt imbecilliores, & languidiores.

HELM. Natura (2) autem animalis respuit, Galene, & aspernatur metaphoras illas ignis, & lignorum sive siccorum, sive viridum. Cordis quidem sinistro ventriculo inest vitale fermentum, quo cruor venalis nobiliorem formam acquirit; & ex venali fit arterialis. Ac maximum discrimen est inter venarum cruorem, (a) & sanguinem arterialem; qui per accensionem, non quidem igneitis, sed illuminativam, ad tenuissimum æthera, vitales spiritus, & animæ subterniculum ascendit: ut tandem totus sanguis mutetur in spiritus sinè fæce, aut capite mortuo. Fæx autem semper remanet in iis, quæ per ignis calorem attenuantur, aut resolvuntur.

WILL. Mihi tamen non displicuit illa caloris nativi, sive ejus in quo vires animantis maximè consistunt, cum igne comparatio. Et præstantissimus Philosophus Renatus des Cartes lib. de homine ignem quendam (sinè lumine tamen, Helmonti) cordi inesse asseruit; à quo sanguis, qui in cordis sinus illabatur, temporis momento rarescat, inque multo majorem molem crescat. Quod melius explicavit per epistolas ad amicos assimilans hujus ignis vires virtutibus nonnullorum liquorum chymicorum, qui ut ut sese mutuo tangunt, statim rarefiunt, fervent, & ebulliunt, moxque caloris sensum excitare apti sunt.

At liquorem quendam, spiritumque hujus virtutis, qui sanguini permisceatur, continuo per nervos in cor deferri ego sum opinatus.

Verùm (3) quidquid sit de his; ac sive ignis sit in cordis sinibus, cujus sanguis venosus sit pabulum: sive insit cordis ventriculo vitale fermentum illuminativum, sive sinè lumine, nunquam hoc suadebis Galene ad suscitandum, sive ventilandum, atque sublevandum ignem istum; vel ad corroborandum vitale fermentum sanguinis missione opus habere animantes. Nam cum ignis iste languidulus est, tunc etiam depressa sunt principia activa. Tu autem tunc dices, Galene, sanguinem esse crudiorum, comparandumve lignis viridibus, & minus combustibilibus. In quo calu neque secundum meam, neque secundum sententiam tuam utilis est sanguinis missio; vel, ut

tu

(a) Hel. Blas human. &c.

(1) Ex sanguinis detractiōe vires imminuntur.

(2) Sanguis in sinistro cordis sinu aliquid accipit, sive acquirit quo postea sanguis arteriarum, differat à sanguine venarum.

(3) Sanguis non est mittendus cum id quod supponitur in corde perficere sanguinem, languidum est.

tu inquis, ne magis refrigeretur, & crudior fiat humor; vel, ut ego affirmo, ne magis activa principia deprimantur.

Neque cruor non superabundans in vasis, & cujus quantitas respectivè ad vasorum capacitatem non sit magna, opprimere, vel obruere potest languidulum cordis ignem. Sanguis enim descendit in cordis sinus (a) cochleatim, & pro ratione ejus, quod accenditur, & rarefit: ut si parum sanguinis accendatur, & rarefiat, & in parva quantitate lentoque motu per arterias propellatur; parum quoque ejusdem in cordis sinus dilabitur: ac si multum sanguinis accendatur, multum quoque ejusdem è venis in cordis sinus influat. Quæ quidem in principiis maximè, & statu nonnullarum febrium manifesta sunt. Atque ideo ab eo, quod in vasis, & respectivè ad vasa neque copiosum, neque excedens est, natus; sive vitalis ignis, aut vitale fermentum minimè opprimi potest.

Præterea monstruosum hoc esset, à virium tum imbecillitate, tum robore sumendam esse sanguinis mittendi indicationem; & idem esset, ac si diceremus sanguinem perpetuò mittendum esse!

Cæterum si principia activa prævaleant; si ignis iste sive calor natus cordis validus nimis sit; si spiritus animales, & substantia, quæ per nervos in cor descendit efficax nimis sit; sive efficax nimis sit vitale fermentum cordis; si sanguinis copia superabundet in vasis, sitque sanguis ad accensionem, & repentinam maximè rarefactionem paratus; & immineat propter eam vasorum disruptio, non video, qua religione teneamur, quin sanguinem mittamus!

HELM. Ut tandem probes Willis, convenire, aliquando sanguinem mittere, fasciculum conformasti ex tua, ex Galeni, ex mea, & ex Renati hypothesi!

ERAS. Hoc tamen majus tibi faceffit negotium Helmonti vasorum disruptio ex supposita repentina substantiarum, quæ in vasis continentur, rarefactione.

Nam in prima plenitudinis specie, (1) quæ Galeno dicitur quò ad vires, concesso illam aliquando dari, & possibilem esse, non tamen sanguinem respectivè ad vasa non superabundantem detrahare, sed vires reficere, & ut licet augere debemus.

In secunda verò specie, quæ dicitur quò ad vasa, & respectivè ad vasorum capacitatem, si nullum disruptionis vasorum periculum immineat, satis est consueta per poros evacuatio, partiumque perpetua decessio: quæ etiam industria aliqua, remediove, si videbitur, sollicitari, & promoveri poterit. Enim verò cum multum semper decedat, si nihil interim adiiciatur, aut minùs sanè adiiciatur, quàm dissipetur; necessariò brevi hæc etiam cessabit quò ad vasa repletio.

Id (2) autem confirmatur amplissimo Galeni decreto, quo sancitum est puerorum omnium, qui decimum quartum annum non attigerint, semper

(a) Will. de affect. hysteris contra Nathanaelem Higmorem.

(1) Sanguis non est mittendus nisi ex nimia rarefactione ejusdem vasorum immineat disruptionis periculum.

(2) Ratione, qua pueris sanguis mitti non debet; neque aliis mitti debet.

per parcendum esse sanguini : quoniam plurima pueris fit per halitum digestio. Puerorum autem naturæ accedere existimavit ea corpora, quæ mollia, tenera, humida, laxaque membra, & perspirabilia habent; quibus neque sanguis detrahendus est. Verùm reliqua viventia corpora, cujuscumque ætatis, atque habitus fuerint, multum quoque dissipant; ut paulò quidem longiori tempore, quàm pueris, & fortè etiam in aliquo casu breviori, si quæ est illis quò ad vasa plenitudo, ipsius naturæ spontè, & unius diei lapsu facile curetur.

Neque ⁽¹⁾ profectò iis, quæ cibo, & potu adduntur, tam facilis est hæc vasorum repletio. Quæ vix fortè in aliis hominibus est unquam admittenda, præter eos, qui insolita crapula replentur; & insolito copiosi vini potu inebriantur. Si quidem homines, qui paulatim, atque paulatim assuescunt lautissimis conviviiis, vasa post modum satis ampla habent: ut si præcedentem crapulam exhalaverint, remaneant apta ad accipiendum id, quod ipsis ex nova crapula additur. Repletio igitur, quæ vasorum capacitatem respiciat, non potest contingere nisi iis, qui peccant in tenui victu: hoc est iis, qui cum ad pleniorum tum cibum, tum potum assueti minimè sint, pleniori cibo, potuque utuntur.

In quibus est etiam aliqua dubitatio: quoniam haud similiter venæ, arteriæque, ac ventriculus repleri possunt. Motu primùm voluntario faucium cibus in œsophagum protrusus, postea, nisi vomitus obstet, necessariò in ventrem descendit. Neque si ventriculus nimis repleatur, necessariò vasa humorifera replebuntur.

Cuncta ⁽²⁾ insuper viventium corpora assueta sunt ad quasdam notatu dignas repletionum, & inanitionum vicissitudines: à quibus nihil mali suscipiunt. Et hominis ferè cujuscumque bene habentis post prandium, vel cœnam liquorum libræ aliquot vasis accedunt; fiunt ipsi venæ manifestò turgidiores, & cordis pulsationes magis concitatae; & elapsis horis circiter duodecim exinaniuntur ipsi vasa per totidem librarum decessionem: neque ex hac quotidiana vasorum repletionem, & evacuationem incommodi aliquid accipit homo.

Estque in his omnibus latitudo sanè notabilis.

Quo ⁽³⁾ circa illi sunt maximè reprehendendi, qui cum à prima ægritudinis hora curationem hominis susceperint; post unam, & alteram diem, & quandoque post tertiam, & quartam, & quintam, & decimam etiam, vasorum in quibus nihil restagnat plenitudinem accusant; & propter hoc, quod plena ab ipsis supponantur vasa, aliquid detrahunt. Cum jam, vel spatio ipso materies, quæ fortè plenitudinem faciebat exhausta sit, vel debuerint ipso, priusquam tot horæ, vel dies præterissent; vomitu; vel clystere; vel pharmaco, vel frictionibus; vel venarum sectione, si illam probent, id omne, quod plenitudinem faciebat evacuasce, & desinere in posterum plenitudinem accusare!

Tom. I.

D

GAL.

(1) Rarò contingit vasa esse nimis repleta.

(2) Corpora viventium assueta sunt ad quasdam notatu dignas evacuationes & repletiones.

(3) Post unam, vel alteram diem malè accusatur plenitudo in morbis.

GAL. Animadverti (1) ego te, Erasistrate, atque (a) Asclepiadem, qui fortè à te accepit; aliosque non paucos pernegasse plenitudinem esse continentem morborum causam. Atque Asclepiades quidem ajebat; (b) si continens morborum causa esset plenitudo, factis nonnunquam largis inter morbi initia evacuationibus fore, ut nocumentum statim à se omne æger depellat: nunc contra visi sæpius sunt, purgata plenitudine, morbi tamen ipsi augeri. Sed multa quidem adversus hæc à me scripta sunt.

ERAS. Ut (2) plurimum sic se res habet, ut ab Asclepiade dictum est. Neque tempus nunc est examinandi, vel quia nos obscurè locuti sumus, te non intellexisse ea, quæ diximus; vel plerunque placuisse tibi nos malè traducere per ora virorum; ut saltem secundum ab Hippocrate in Medicina occupares locum: neque præsens quæstio hac alia indiget disceptatione.

Verum si vasa animalium, aut alia utcunque nimis repleta sint, si non sint adeò repleta; contingere tamen potest, ut nimis distendantur, & de repente nimis repleantur propter nimiam eorum, quæ in ipsis continentur, rarefactionem. Ex qua, magnum sanè malum, disruptio vasorum internorum, & ea, quæ consequuntur disruptionem, timenda sunt? effusio nempe, & extra vasa liquidarum substantiarum influxus in sinus, cavitatesque, ventresque nobiles; & inter partes, quarum usus necessarius est ad vitam prorogandam; & alia multa: quæ vel hominem citò auferant, vel morbi curationem reddant difficiliorem.

Et (3) ad hæc præcavenda non video, quare sanguis mittendus non sit: maximè cum ignoretur in quam partem disruptio futura sit. Nam si sciremus disruptionem futuram esse in parte ignobili: è qua humor extra vasa lapsus facilè, & sine gravi incommodo extra corpus universum effundi possit (quod sæpè accidit non sine levamine; cum simul educatur quod fortè in parte illa restagnabat) profectò haud sollicitus essem de sanguine per institutam arte venæ sectionem mittendo. Neque de re omninò impossibili est hypothesis illa, Helmonti, repentè, & improvisò posse sanguinem nimis rarefieri.

GAL. Restè igitur hanc quoque in libro de plenitudine addidi vasorum distentionem, & repletionem nimiam; quæ ex rarefactione fieri potest.

HELM. Hæc (4) quidem sanguinis rarefactio non est omninò impossibilis; sed nisi aliud simul concurrat, non potest vasa disrumpere: quoniam tunica vasorum partim cedunt, partim resistunt illi nimia rarefactioni, quæ vasa posset disrumpere. Requiritur insuper ad disruptionem gas sylvestre; (c) quod etiam vasa vitrea utcunque magna, nisi rima in juncturis relinquatur aper-

(a, b.) Gal. con. ea, quæ à Iulian. in Hip. aph. dicta sunt, & de causis procatarticis cap. 3.

(c) Hel. tract. de flatibus.

(1) Asclepiades negabat plenitudinem continentem esse morborum causam.

(2) Multa mala consequuntur vasorum disruptionem.

(3) Sanguinis missio convenit, ubi propter nimiam sanguinis rarefactionem vasa disrumpi possunt.

(4) Nimia sanguinis rarefactio, quæ vasa posset disrumpere non est impossibilis, sed rarò contingit.

aperta, subito diffringit; ut accidit cum pomum acidulum sine aquis vitro hermeticè clauso coquitur; nam si aquæ addantur, in quibus pomum coquatur, alitus tantum aquosus, nullum autem emittitur gas sylvestre. Similiter, ac multò citius, & facilius vasa disrumpuntur in destillationibus olei tartari; quoniam gas sylvestre, quod è tartaro per ignem emittitur, validius nimis est.

ERAS. Quædam ut facilè rarefiunt, & intumescunt; ità facilè detumescunt, & condensantur: ut quævis resistentia impediat in illis magnas rarefactiones amplissimum locum exposcentes. Et quædam sunt, quæ sic rarefiunt, ut multum ejus, propter quod rarefiunt, effluere possit per poros valis, in quo continentur. Alia sunt, in quibus haud similiter contingit.

Sed potest gas illud sylvestre, Helmonti, non deesse in homine, ut expediat foramen aliquod adaperire in vena; ne vasa disrumpantur in parte nobili, cujus usus sit necessarius.

HELM. Potest quidem gas sylvestre non deesse in homine; sed in sanguine, & in ultimis digestionibus, aut nunquam, aut per quàm rarò, nisi de foris accedat, adest.

ERAS. Potest tamen adesse; potest de foris accedere.

HELM. Ac si adsit; vel tam repentè, tamque citò, & improvisò vasa disrumpit, ut neque chirurgus possit accersiri ad secandam venam; vel si tempus concedatur, alia potius sunt adhibenda remedia, quæ exoticum, quicquid hac est, in venis corrigat, atque expugnet.

ERAS. At (1) si Chirurgus prestò sit, cur sanguinem non mittemus? Neque remedia huc usque comperta sunt, quæ tam facilè in quibusdam casibus, ac sanguinis missio vasorum disruptionem prohibeant. Ac si dentur remedia ista, qua religione tenebimur sanguinem quòque non mittere? Cum expediat quandoque crus abscindere: cur in magno disruptionis ex sanguinis rarefactione periculo non conveniet venam aliquam secare; & sinere partem sanguinis aliquam effluere?

An, quia sanguis dicitur animatus, timebimus, ne simul anima emittatur? Willis, qui hoc dedit sanguini tum venali, tum arteriali esse animatum, id non timet; multò minus hoc ipsum timere debes Helmonti, (a) qui venarum cruorem animatum non esse asseruisti; sed illustrativè tantum vitalitatem participare: maximè cum neque in magna copia mitti debeat; sed tantum quantum opus, ut ex hac nimie intumescentiæ vasorum causa cesset timor disruptionis.

Mihi (2) verò timenda adeò videtur sanguinis, & aliarum substantiarum insinus, cavitatesque partium, quarum usus ad vitam protrahendam necessarius est, effusio (puta in cavitatem bronchiorum, vel circa nervorum principia ex vulnere, contusione, vel ex alia causa) ut non solum ad præcavendam disruptionem, ex qua sequitur humorum extra venas effluxus; verum

D 2

etiam

(a) Hel. Blas human. cap. 22.

(1) Ac sanguinis missione cessat ex magna rarefactione disruptionis periculum.

(2) Cum aliquid intus de recenti ruptum, aut collisum est, convenit sanguinem mittere.

etiam cum disruptio de recenti facta est, ad præcavendum ne magna in sinus, cavitatesque partium nobiliorum, & circa illas effusio fiat, convenire videatur sanguinis detractio; etiam si vasa non nimis turgeant; etiam si sanguis non sit nimis rarefactus, Multa rectè fiunt in præcipiti; ut cum ruptum aliquid intus, atque collisum est, & cum homo concidit, vel suffocatur disrupto vase in cerebro, vel in pulmonibus; quæ aliàs minimè conveniunt.

Sed (¹) si ex rarefactione non immineat proximè vasorum disruptio (potest enim etiam illa fieri ex alia causa) vel si cum jam facta sit, id, quod effluit extra corpus effundatur; vel commodè, facilliquè industria, conatue educi queat; melius erit non mittere sanguinem, aliisque uti remediis; ac sinere si quid abundet in vasis humoriferis, per consuetas vias exhalari; nec non etiam per vulnus: parùm interim si videbitur adiiciendo; aut multò minùs, quàm per transpirationem dissipetur; vel nihil omnino, donec videbitur.

GAL. Cum semel concefferis Erasistrate posse sanguinem ex aliqua causa abundare in vasis: consequitur non solum convenire detractiorem cum vasa distenta nimis sunt, ut disruptio immineat; sed in quocunque casu, in quo hæc per consuetas vias exhalatio, & transpiratio satis non sit. Nam (*a*) cutis potest esse densa; poruli, qui in ea sunt possunt esse obstructi; ut minùs dissipetur, quàm conveniat. Cumque humores minimè decrecant in vasis, tantundem singulis diebus cibo, & potu addatur, quantum per poros in auras abit, inedia insuper magis, minusve rigorosa opus habes; & plures quidem sectatorum tuorum diatritarii erant.

Abstinencia (¹) autem à cibo, & potu vires maximè fatigat; humores (*b*) biliosiores amarulentioresque reddit, frequentes item cordis morsus, & inquietudines parit. Dejectiones alvi propter abstinenciam à cibo, & potu sunt difficiliores; & omnia excrementa acriora, & maligniora efficiuntur.

Non igitur cæcorum more, (*c*) qui amplam, compendiosamque, & planam viam in propinquo habentes sæpè numero angustam, ac asperam, prolixamque errabundi ineunt; omissa venæ sectione per inedias multorum dierum lentam, tardamque vasorum sanguiferorum inanitionem expectabimus; quæ momento temporis, & compendiosissimè liberali missione evacuari possunt.

Item cum inedia non solum sanguinem, sed universum corporis habitum (*d*) evacuet, & carnes etiam eliquet; cur quis id evacuet, quod evacuatione opus non habet? aut cur sine operæ pretio eliquet etiam carnes, cum sanguinem tantum subtrahere liceat?

WILL. Non (³) videris intellexisse, Galene, ea omnia, quæ ab Erasistrate

(*a*) Gal. de venæ sect. adv. Erasistr. cap. 4. & 9.

(*b, c,*) Gal. de venæ sect. adv. Erasistr. cap. 4.

(*d*) Gal. de venæ sect. adv. Erasistratum cap. 4.

(¹) Si ex rarefactione non immineat proximè vasorum disruptio, satius est omittere sanguinis missionem.

(²) Quæ mala præstet abstinencia.

(³) Malum quod fit à plenitudine sanatur spontè à natura dummodo nulla pars solida interim lædatur.

strato dicta sunt. Aut non datur morbus ex plenitudine vasorum in quibus nihil restagnat, pro ut non dari dixit etiam post Erasistratum Asclepiades; aut si datur is continget iis, qui præter consuetudinem crapulæ indulserunt; vel largiori, & inconsueto vini, similisque liquoris potu usi sunt; vel iis, quibus ex aliqua causa humores de repente rarefiunt in vasis. Quod si id accadat cum periculo effusionis humorum è vasis in partem aliquam internam, ut vel mors sequi possit, vel malum aliud fiat difficilioris solutionis, tunc missione utendum censet. Si verò nihil ejusmodi timeatur; satius est, inquit, sinere ægrotantem: nam post unam, vel alteram diem plenitudo cessabit; & æger ex hac causa erit integer; vel si ægrotet adhuc, nequaquam ex plenitudine vasorum ægrotabit.

Et (1) quidem post crapulam, aut vini potum largiorem; post balnea; post insolationes, & alia à quibus sanguis valdè turgescit, ut sæpè spontanea fiat hæmorrhagia, convenire (a) venarum sectionem existimavi: quoniam in magnis turgescentiis, antequam fiat, nescitur ex qua parte futura sit hæmorrhagia; & fieri illa potest ex disrupta vena in sinum, cavitatemque partis nobilioris, aut circa partem nobilem: aliàs si nihil ejusmodi timendum esset; in his profectò missionem minimè probassem.

GAL. Neque in hoc casu ego illam probo; neque statim exporrectis à somno; neque post largiorem potum, & post crapulam, in qua impossibile est, quin crudi succi abundant, incidendæ sunt venæ.

WILL. De his autem manuscriptum reliqui, cui novissima deest manus; pereundum enim mihi fuit, priusquam opus absolverem: & vereor ne multa sint in illo minùs castigata; minùs rectè, minùs clarè expressa; in quo etiam sunt, quæ prius dixi de sanguinis incremento ex detracti one: quæ vobis nihil rectè concludere visa sunt. Ac vereor ne amici nominis mei observantissimi illud typis mandari curaverint. Sed si id præstiterunt fortè etiam monuerunt Lectorem opus esse posthumum.

Memini (2) autem me notasse in eodem manuscripto novisse (b) quosdam à phlebotomia paulò post potum pleniorum; aut liquoris vinosi ingestionem adhibita in leipothymias terribiles incidisse, quæ per quam diù donec spiritus vitalis semiobrutus denuò emergeret, perduraverunt; ut acri omnino opus sit ingenio, & in rerum medicarum experientia satis instructo ad decernendum, an his expediat sanguinem mittere. Neque temerè, & sinè magna consideratione administranda in his est venæ sectio; etiam si de plenitudine, & sanguinis turgescencia, & disruptione periculo nullum adsit dubium. Ac nisi periculum hoc disruptionis vasorum internorum sit sanè magnum, ego cum Erasistrato sentio, melius esse sinire ægrotantes crapulam, & ebrietatem dormire, & exhalare.

Ne-

(a) Willis de phlebotomia fol. mihi 168. & 170.

(b) Willis de phlebotomia pagina mihi 176.

(1) Willis ebriis, quibus vasa disrumpi potuissent propter plenitudinem, sanguinem mittebat.

(2) Sed in terribiles leipothymias observavi incidere eos, quibus post vinosum potum largiorem sanguis missus esset.

Neque⁽¹⁾ tanta unquam esse potest in corpore adhuc viventi, aut cutis densitas, aut meatuum obstructio, ut multum non dissipetur. Quod si tanta adsit, prima indicatio non est sanguinem mittere; sed cutem laxare; porulos, & meatus adaperire. Et cum prima die, aut nihil omnino, aut sanè parum offeras, aut etiam vomitu, vel clysteribus utaris; plenissimi ebrii, & crapulosi absque sanguinis missione à plenitudine sanabuntur. Atque hoc volui monitum; quoniam non semel observavi terribiles animi defectus post (a) potum largiorem, aut liquoris vinosi ingestionem ex sanguinis detractione fuisse insecutos.

ERAS. Neque (f) ego diatriton, aut diatritarios probo Galene; neque rigidam eorundem victus rationem commendo; neque illa videtur necessaria: sufficit si prima die nihil, aut parum; sequenti parum, aut paulò plus quàm parum offeratur: in reliquis ut videbitur.

Tu autem inquis, Galene, quòd inedia totum corpus (b) evacuat, & carnes eliquat, Idcirco ut vasa evacuentur, sanguinem mittis; ne carnes eliquentur; & ne corpus emaciatur, cibum præbes eodem tempore. Quod idem est, ac eodem tempore vasa deplere, & iterum replere. Id enim omne, quod cibo, potuque additur, nequaquam statim carnibus, verùm omnino prius additur vasis humoriferis. Et illud sæpè numero accidit, te sanguinis missione meliores humores detrahere; & cibo, potuque largiori peiores in venas intrudere.

HELM. Canes duorum, & trium dierum, & sæpè plurium inediam sibi dum agrotant, præscribere solent: & hac ratione absque chirurgo, aut Medico à quamplurimis morbis vindicantur.

Verùm, (B) Galenus inquit, *Inedia (c) vires fatigat*. Primùm, inquam, vires inedia confirmantur; postea si nihil omnino detur languidiores certè fiunt. An sanguinis missione illæ fortificantur?

Inedia, (4) inquit, *humores (d) biliosiores, & amarulentiores reddit*. Ita sanè; inquam, concedatur hoc. Illud est frequenter inedia humores fieri efficaciores ad superandum, & debellandum morborum causas. Nonne tibi humores videntur Galene fieri biliosiores, & amarulentiores absinthio, centaureo, succo cyrenaico, pipere, aliisque similibus; quibus tu multoties usus, febres plerasque curare consuevisti?

Frequentes (5) etiam, ais, abstinencia cordis (e) *morsus, & inquietudines parit*. At ego frequenter vidi inquietudines, & cordis morsus abstinencia; aut levi haustu, vel aquæ, vel vini sedatos. Neque inquietudines sunt fem-

(a) Willis de phlebotomia pag. mihi 176.

(b) Galenus de ven. sec. adv. Erasist. cap. 4.

(c, d, e) Galen. de ven. sec. adv. Erasist. cap. 4.

(1) Nunquam est in corpore viventi maxima cutis densitas, aut meatuum obstructio.

(2) Diatritatoriorum Medicorum victus ratio probanda non est.

(3) Inedia ab assumpto cibo primis horis vires confirmat.

(4) Humores biliosiores, & amarulentiores sæpè sunt aptiores ad superandum causas morborum.

(5) Inquietudines quandoque sedanda minimè sunt.

semper sedandæ . Quibus crisis futura est , iis nox præcedens molesta ; ac sæpè motu illo , quo fit animi , & corporis inquietitudo , morbus curatur . Parturiens mulier , & gallina etiam inquieta , anxiosa , & querula est , & multas percipiens molestias ; quibus ipsis postmodum mulier , & gallina levatur : & væ parturienti cui ante exclusum foetum partus dolores cessant .

Quid insuper ais , Galene ; abstinentia dejectiones alvi fiunt difficiliiores *excrementaq; omnia (a) acriora, & maligniora efficiuntur?* Igitur, inquam, sanguinem mittamus , pleniorum victum post sanguinis missionem offeramus ; ut largior , copiosior , & benignior sit excrementorum alvi proventus !

WILL. Puerilia (¹) nimis hæc omnia sunt , quæ adduxisti , Galene ; meliora tamen Helmonti , & fortiora supersunt argumenta , de quibus postmodum .

Vel aquam clystere infundas , Galene , & dejectiones alvi non erunt difficiliiores , & excrementorum acrimonia mitescet . Vel , cum diatriton non probemus , frustulum panis propina ; quo grammaticum sanasti ; (*b*) qui quoties vehementer doceret aut cogitaret , aut inediam sustineret , aut irasceretur , comitiali morbo corripiebatur : offulam panis propina , vel ex se , vel vino austero , vel posca , vel granatorum succo madidam ; pro ut melius videbitur . Sic etiam his , aliisque similibus , modò non præstet humores esse biliosiores , bilem retunde ; & aliquid adhibe eorum , quæ in minima quantitate vires reficiunt , & vitia corrigunt humorum : qua ratione eodem tempore vasa deplebuntur , & humorum vitia emendabuntur .

ERAS. Non igitur , ò eloquentissimè cæcorum more , qui neque faxa , neque stirpes , neque foveas devitant , si vasa unquam evacuatione indigent , compendiosissima sectionis via , liberalique missione evacuabimus . Atque ex me discere potuisses , ò præstantissimè (*c*) neque hydropicorum aquas affatim , & liberali missione esse evacuandas ; & mortiferum esse (*d*) pus omne quantumvis corruptissimum effudisse . Eo perniciosior existimanda erit compendiosa hæc tua per sectionem vasorum evacuatio ; quò sanguis pure , & hydropicorum aquis utilior est ; & magis necessarius ad vitam conservandam , & prorogandam ; & quò facilius sanguis insensibiliter absumitur .

Secunda (²) vena sanguis affatim , & sinè discrimine eorum , quæ in vasis continentur , sequitur . Secus cum natura , vel urinis , vel insensibili corporis transpiratione vasa evacuantur ; neque confertim è vasis humoriferis ; neque sinè particularum discrimine fit evacuatio . Eaque licèt in minima copia singulis momentis , perpetua tamen cum sit , & multipliciter remediis sollicitari possit , ut sæpè ipso morbo sollicitatur ; sola satis quoque erit , & tutior , & commodior nisi magnum illud ex supposita non impossibili repentina humorum rarefactione disruptionis vasorum , & in quibus nihil restagnat , proximum immineat periculum .

COL-

(*a, b*) Galenus de venæ sec. adv. Erasistr. cap. 4.

(*c*) Erasistr. rel. à Gal. 6. aphorism. aph. 27.

(*d*) Cels. l. 2. cap. 8.

(¹) Quibus præcaveantur mala , quæ ab abstinentia fiunt.

(²) Sufficit ubi vasis non imminet disruptio consueta per transpirationem humorum evacuatio .

DIALOGUS

SECUNDUS.

GAL.



Xperiar, Erasistrate, an verbis tantum admittas sanguinis missionem, re verò eandem semper damnes. Nam casus ille, ut præscribatur, si ex repentina sanguinis rarefactione vasorum, in quibus nihil restagnat, proximum immineat disruptionis periculum, est ut Lunæ in terram occursum; qui, (1) impossibilis quidem non est, sed tot sæculis nunquam observatus. Nisi peculiare adsit parte in aliqua vitium, ut meatus alicujus angustia, vel obstructio, vel tunicæ infirmitas; nunquam, aut per quàm rarò vasa disrumpentur. Siquidem humores rarefacti velocius trajiciuntur per eos ductus, in quibus nullum adest impedimentum; sinè tamen disruptionis metu, propter indifferentiam vasorum ad disruptionem. Ac nisi à particulari aliqua causa determinetur locus; nulla ratio est, cur hoc potius vas, quàm aliud disrumpatur; & in unum sinum potius, quàm in alium humores effundantur. Neque vasa omnia simul disrumpi possunt: atque ideò consentaneum est nullum disrumpi.

Præterea (2) in febrium, & paroxysmorum febrilium statu, in quo humores maximè rarefiunt, & ampliorem sibi exposcentes locum vasa maximè distendunt; propter alias rationes minùs convenit, quàm aliis temporibus sanguinem mittere.

WILL. Quin in statu morborum omnium, ut etiam in declinatione venæ minimè sunt aperiendæ; vel cautè admodum. Quippè (a) in statu dum natura crîsim molîens maximè occupatur; adeò ut spiritus summè laborent, sanguis valdè fermentescat, iste supremus ejus nixus perturbari non debet. Similiter in statu paroxysmi: tunc enim natura maximè etiam occupatur; & spiritus summè laborant. In (b) declinatione verò morbi, aut natura victrix subsidio isto non indiget; aut victa talem evacuationem non feret.

HELM. Si vehemens febris urget, (c) in ipso impetu ejus sanguinem mitte-

(a,b) Willis de phlebotomia pag. mihi 176.

(c) Cels. l. 2. cap. 10. fol. 15.

(1) Periculum disruptionis vasorum ex sanguinis rarefactione rarissime contingit.

(2) His febrium temporibus, in quibus sanguis est maximè rarefactus secundum plerumque non convenit sanguinem mittere.

mittere, hominem jugulare est, dixit Celsus. Igitur si sanguinis missio non convenit, cum sanguis est maximè rarefactus; nunquam profectò conveniet.

GAL. Sed in omni inflammatione sive jam facta, sive incipiente, magnam disruptionis vasorum; & humorum extra vasa effluxus, imminet periculum: suntque inflammationes frequentissimæ. Si igitur illis circumstantiis hanc addamus, inflammationem nempe, vel inflammationis metum; frequentissimus erit usus mittendi sanguinis.

ERAS. Jam video, Galene, nos esse in eo casu, in quo non ea tantum inspicienda sunt, quæ continentur in vasis, in quibus nihil restagnat; verum etiam id, quod alicubi infixum, & impactum hæret: ut est id, quod sæpè in vase aliquo, vel meatu, vel sinu, vel inter fibras partis alicujus restagnat, aut coactum est; aut aliter ipsi inhæret, & morbum facit: de quibus omnibus agendum est.

Ac (1) primò determinemus, quid pro inflammatione accipiamus; & an id, quod inflammatio vulgò dicitur, in aliquo ex his consistat. Vox enim ipsa ignem significat: ut cum domus comburitur, præciosiora quæque extrahuntur, vel per fenestras, & quòcunque facultas est, foras ejiciuntur; & aquis accurritur ad extinguendum ignem; sic plerique, cum audiunt inflammationem quempiam laborare, sanguinem mittendum esse existimant; & corpus esse refrigerandum.

GAL. Inflammationis (2) notæ præcipuæ quatuor sunt; tumor, & rubor, cum calore, & dolore: alii febrem; alii dolorem addunt, ut is sit pulsabilis circa partem affectam; alii neque febrem, neque dolorem requirunt, ut morbus dicatur inflammatio.

ERAS. Omnes retinent, quòd sit tumor: ac si placet addere velim; quòd in eo mutationes sint celeres. Nam si tumor non habeat celeres mutationes, etiam si rubeat, non dicitur inflammatio. Et morbi nonnulli, inflammationes quidem dicuntur à Medicis, sed occultæ, & indolentes: inter quos etiam sunt peripneumonia, & pleuritides pleræque (licet hæc ex dolore definiantur) (quoniam nonnunquam adest tumor celeris mutationis, sive in pectore, sive in parte alia; sine tamen aut doloris, aut caloris notabili, vel gravi perceptione. Quæ perceptio doloris, si adsit, vel superveniat; adsit item, & febris, erunt effectus potius tumoris celeris motus, quàm quòd morbi essentiam constituent.

WILL. In (3) peripneumonia, pleuritide, (a) angina, aliisque similibus inflammationibus obstructio aliqua requiritur in parte affecta à sanguinis, aut aliarum substantiarum lentore, & crassitie: adeò ut pleræque particulae per angustias vasorum liberè meare nequeunt, turgescant in illis, & inter eorundem interstitia, & phlegmonen, sive inflammatoriam obstructionem creent. Requiritur (b) etiam in sanguine febrillis effervescencia; vel saltem, quòd is sit ad febriliter effervescendum paratus, atque dispositus.

Tom. I.

E

Quæ

(a, b) Willis de perip. & de pleur. & in aliis locis hæc, & similia habet.

(1) Quid vulgò sit inflammatio.

(2) Inflammationis signa.

(3) Causa pleuritidis, anginae, & similium affectionum secundum Th. Willis.

Quæ duo (*a*) sanguinis lentor , & febrilis effervescentia simul concurrere debent : aliàs à peripneumonia , pleuritide, similibusque aliis inflammationibus immunitas est . Quorum (*b*) tamen, modò alterum in actu prius est ; & quodammodo alterum alterius causa , aut saltem occasio existit . Nam (*c*) interdum sanguis in febrem concitus obstructionem pulmonarem pleuriticam, aut aliam facit (*d*) quandoque item iste in pulmone , vel in alia quapiam parte remoram offendens (*e*) à propria obstructione effervescentiam febrilem concipit . Attamen ad morbi huius procatarxin constituendam sanguis unà ad effervesendum ; simulque ad vasa pulmonaria obstruenda aptus esse debet .

ERAS. Ut (*1*) omnes inflammationes comprehendantur ; mihi videtur, si vobis placet , sic definiendum : *Inflammatiō est tumor , cuius mutationes sunt celeres* . Reliqua omnia , quæ de his dicuntur , appellari velim , vel causas , vel effectus tumoris celerem habentis motum , sive quòd idem est , celeres habentis mutationes : mutationes enim , quæ fiunt in tumore alicubi fixo (quales sunt resolutiones ; suppurationes ; disruptiones ; effusiones humorum è vasis ; separationes ejus , quod alienum est ; mortificationes , aliæque similes) vel motus sunt ; vel sinè motu minimè sunt .

Quòd si dolor , maximè pulsabilis , calor , & quid aliud molestum alicubi percipiatur ; & cordis etiam motus perturbetur , ut in febre fieri consuevit , certiores ex his sumus de inflammatione celeres mutationes habente ; & in ea corporis parte consistente , in qua molestiæ illæ percipiuntur ; præcipuè si locus affectus oculis conspici nequeat . Quæ quidem molestæ perceptiones, licèt dici possint animi affectus , ut re vera sunt ; attamen non fiunt sinè mutationibus, sive sinè motu nonnullarum particularum corporis.

In hujuscemodi tumore adest etiam obstructio . Et rubor in eo , si oculis cernere facultas sit , facile conspicitur propter meantem minùs liberè sanguinem per eam partem : & propter luctam inter ea , quæ circulationibus ibi resistunt ; & eas substantias , quæ in circulum propelluntur : Ex qua lucta sæpè etiam dolor percipitur pulsabilis .

WILL. His quidem sic expositis , excepto , quòd non denotas aliquando præcedere febrilem effervescentiam , & lentorem in sanguine, omnia comprehendendi videntur .

ERAS. Nunquam tamen dixeris febrilem effervescentiam , & lentorem in sanguine , utcunque præcedant , pleuritidem constituere ; sed tantum pleuritidem facile , non tamen necessariò , ex illis fieri posse : videlicet si aliquid per angustias vasorum minus aptum ad permeandum , pleuræ hæreat.

Neque difficultates omnes , circa hæc , quæ , ut verum fatear , nimis confidenter affirmas , aut negas , Willis , ne nimis digrediamur enumerandæ nunc sunt .

HELM. Ne vulgus audito inflammationis nomine facile decipiatur , & ne pro tumore accipiat ignem , operæ pretium quidem esset , malum hoc deinceps appellare tumorem , cuius mutationes sint celeres . Pro mutationibus autem in pleuritide , in peripneumonia , aliisque similibus morbis accipio cruoris extraventiones ; dolores , quorum comes , & causa est convul-

(*a, b, c, d, e,*) Will. de perip. & de pleur. & in aliis locis hæc & similia habet.

(*1*) *Inflammatiō est tumor cuius mutationes sunt celeres* .

vulsiva, & spasmodica contractio partis, in qua dolores fiunt; accipio ejusdem cruoris grumefactiones, coagulationesque; & nisi citò succurratur putrefactiones, transmutationesque in pus.

His (1) tamen addendam censeo potissimam tantorum malorum effectricem causam; quæ est peregrina aciditas concepta in Archeo, & in cruorem deposita. Quod sic breviter explico. Accidit sæpenumero, ut dum quis limonem acidum, vel fructus alios acidos, & acerbos, & immaturos avidius devorat, intuentibus dentes obstupefiant, & gingivæ rigeant; non minus ac si ipsimet acidum limonem dentibus contrivissent, & devorassent. Id autem nulla alia ratione explicari potest; nisi hac, quòd intuentium Archeus (tu autem, Erasistrate fortè diceres intuentium animus) aciditatem in semetipso occasione illius aspectus concipit (ut puer terrorem ex aspectu concipit Lupi) quam postea deponit in dentes proprios, & in proprias gingivas; quæ nihilo minus obstupefiant, & rigescunt, ac si ipsa acidum limonem masticassent. Quòd si nullam Archeus, sive animus, Erasistrate, concipiat aciditatem, licet oculi aspiciant alios, atque alios acidum quidpiam avidissimè devorantes, & masticantes; nullus tamen fit in intuentium dentibus stupor. Ita similiter, inquam, si Archeus occasione aliqua peregrinam concipiat aciditatem, quam in cruorem deponat, morbi fiunt: nam ex suscepta aciditate grumescit cruor.

Ubique autem (2) acidus cruor appellat, est veluti spina parti infixæ; & ejus generis apostema parit Erasistrate, quale denotasti ex illo apostemate, si-ve tumore ea omnia postmodum fiunt, quæ à te enumerata sunt.

Quod si major cruoris portio acescat; eaque non ejiciatur à venis, pestilens aliquod pathema insurgit. Idque videtur primus medendum Hippocrates sensisse: dum scribit libro de veteri Medicina: *non calidum (a) frigidum, humidum, siccumque morbi sunt; sed acre, amarum, acidum, & austerum est.*

ERAS. Aliquid aliud intelligere videtur Hippocrates in illo libro; & eadem sunt de amaro, & acido, & de calido, & frigido difficultates. Neque meo quidem judicio ea tantum, quæ aciditatis sensum excitare apta sunt; sanguinem, vel aliquas sanguinis particulas coagulare valent.

GAL. Nescio (3) an his omnibus affirmandi occasionem mihi præcidere volueritis, sæpissimè inflammationes fieri ex humoribus calidiorem naturam adeptis; & vasa nimium replentibus, atque distendentibus.

ERAS. Non quidem omnem sic dicendi occasionem tibi præcidimus. Semper enim alieni quidpiam est in parte affecta; quod illius loci vasa obstruat: meatus, & porulos aliquos occludat; & inter fibrillas statuatur: ac si omnia desint; non deest id, quod ab Helmontio spina dicitur. Atque quodcunque hoc sit, quod vel restagnet in parte affecta, & in circulum minimè

E 2

ra-

(a) Hel.pleura furens f.mihi 246.

(1) *Inflammationum causa secundum Helmontium est concepta in Archeo aciditas.*

(2) *Acidus cruor facit apostema, estque veluti spina parti infixæ secundum Helmontium.*

(3) *In parte inflammata est semper alieni quidpiam, quod in illa plenitudine aliquam facit.*

rapiatur; vel eidem sit infixum; semper partem illam magis, minusvè replet; & membranulas divellit; & fibrillas magis, minusvè contendit: ut dubitandum non sit de aliqua in loco affecto plenitudine.

In aliis ⁽¹⁾verò partibus, quæ nihil simile patiuntur; & in aliis partibus in quibus nihil coactum stagnat; nulla plenitudo necessaria est, ad hoc, ut illa pars, quæ malè habet, inflammatione laboret. Et frequenter quisque nostrum observare potuit corporum etiam emaciatorum, & exinanitorum partes quasdam tumoribus cujuscunque generis prehasas: ut manifestum sit nullam requiri in universo corpore plenitudinem ad faciendam in parte aliqua inflammationem.

Illud ⁽²⁾ autem quod inflammationem facit, sæpè non excedit avellanam nucem; sæpè non est majus fabæ magnitudine. Et spina, quæ in pleura inflammationem excitare potest, & atroci dolore hominem torquere, esse potest mole minor, quàm sit frumenti aristula: quæ absque dubio digitum etiam inflammare: & febres citare; & totum corpus perturbare valet: ut cum priùs nihil in corpore excederet, post infixam aristulam multa superabundare videantur; cum re vera nil nisi aristula superabundet. Et frigoris sæpè numero, & caloris, aliæque ex eadem causa fiunt animi molestæ perceptiones, sive sensationes; quæ omnia ubi infixa aristula sublata fuerit, desinere solent.

WILL. Circa calorem verò illud, Galene, animadvertendum est; in febribus plerisque, ac ^(a) imprimis in causone sanguine, ut ut vehementissimè æstuanti, & tota præcordia accedenti peripneumoniæ tamen haud concitari, ut neque pleuritidem: requiritur scilicet illa alia in sanguine diathesis ad lentescendum, & ad obstructions faciendum; sive, quoniam placet id, quod in pleuritide obstructionem facit, spinam appellare, sanguinis requiritur ad spinam hanc alicubi infingendam aptitudo.

GAL. Esto facilis ad hæc omnia concedendum, Willis, Tu qui fanaticos, & pseudo chymicos ab Helmontio instructos, eos, qui in pleuritide venas minimè secant, appellare solitus es. Esto etiam facilis ad mittendum metaphoricam in pleuritide spinam! Ego autem si quid logices sum peritus, jam animo provideo; mox nos exaudituros Erasistratum, & Helmontium constanter affirmantes sanguinis missionem, aut omninò non convenire in inflammationibus; aut certè nunquam per se convenire; & vix fortè hoc extorquebis; aliquandò indirectè, & per accidens venarum sectionem sive in pleuritide, sive in peripneumonia, sive in angina proficuum esse.

ERAS. Anxietas ⁽³⁾ hæc tua, Galene, est inanis; Ac in eo maximè decipi videris, quòd credas proximè imminenti vasorum disruptionis periculo

(a) Will. de peripneu.

(1) Nulla tamen necessaria est in toto corpore plenitudo, ut alicubi tumor, sive inflammatio fiat.

(2) Spina in tumore, sive id quod inflammationem facit, sæpè mole minimum est.

(3) Si unquam conveniat sanguinem mittere, rariùs convenit cum pars aliqua est inflammata, quàm cum sine inflammatione sanguis est nimis rarefactus.

culo ex humorum copia, si illa unquam datur, sive potius ex eorundem repentina rarefactione; si hæc alia addatur circumstantia, præsens scilicet inflammatio, vel inflammationis metus, frequentius conveniat sanguinem mittere: cum sæpe ex hoc ipso, quod præsens sit alicubi inflammatio, aut tumoris, cujus celeres sint mutationes, metus; missio, quæ alias conveniret, non conveniat.

Cum nullus adest in universo corpore hujus generis tumor; vel planè ignoratur, an alicubi adsit; semper in proximè imminente ex supposita plenitudine, sive potius propter repentinam rarefactionem humorum, disruptionis, & dilacerationis periculo, commendandus, aut saltem excusandus est Medicus, qui venas secari jusserit: videlicet propter incertitudinem & loci ignorationem, in quo disruptio, & extra venas humoris effusio futura est.

At cum inflammatio alicubi constiterit, locus est ferè semper ad mutationes, crises, sive judicia morborum determinatus: & est is idem in quo inflammatio facta est. Quod si is sit item commodus, ut plerunque accidit, & eo disrupto id, quod è vasis minoribus effluit, & è fibris stillat, facile educi queat, tantum abest, quod sanguinis detractione disruptionem prohibere debeamus, ut sæpenumero illam medicamentis promovere, & sollicitare teneamur: videlicet cum aliter solvi, & auferri nequit id, quod morbum facit; ut non rarò igne, ferroque pars affecta violenter sit aperienda. Contrarium si faxint Medici, frequenter hoc unum præstabunt, quod salutaris crises impederint; & morbos reddiderint tum curatu difficiliore, tum magis periculosos. Pro crisi autem salutari eas etiam intelligo morborum judicationes; quæ nonnunquam fiunt sinè ulla sensibili, aut notabili evacuatione, emendatis, & restitutis iis, quæ morbum faciebant: & in tumore quidem timetur sæpe disruptio; sed haud semper accidit.

Quid si tanta non adsit in vasis liquidarum substantiarum rarefactio, & ex rarefactione plenitudo? Quæ, utcunque supponatur, rarò contingit; & cum parum, aut nihil adjicias, brevi tempore durat. Quid si humores in vasis sint magis lenti, ut dicitis, quàm conveniat; sint crassiores; sint ignavi; sint effœti? Quid si motus cordis sit minùs concitatus? Quid si Archeus, ut ait Helmontius, sive animus aciditatem conceperit; & illam in cruorem deposuerit? Sive ut ait Willis sit sanguis ad magis lentescendum paratus? Ultriusque autem verba sic interpetror: quod aliquando liquidæ animati corporis substantiæ multas particulas habeant jam grumosas, vel ad grumescendum paratas, jam ineptas ad permeandum per angustias vasorum; vel quæ facile ad id ineptæ jam jam fieri possint ex hac, vel alia quacunque causa. Quod tum ab Helmontio, tum ab Willis, verbis in hoc non re discrepantibus, satis expositum est.

Sequitur (1) ne fortè ex his, quod sanguis sit mittendus? est ne proinde ejusdem copia sinè discrimine, & sinè vitiosarum partium ab optimis selectione, ut sectione sit, diminuenda? Mihi videtur perficiendus potius, & emendandus; quàm diminuendus. Vel si diminuendus erit; non sinè partium

(1) In inflammationibus sanguis est emendandus, & corrigendus, non diminuendus. Corrigitur autem, emendatur, & diminuitur cordis motu.

tium discrimine, & selectione quadam diminuendus. Utrunque præstat cordis præcipuè motus; & omnium, quæ in vasis invicem communicantibus continentur, circulatio.

Quibus quidem motibus, aliisque ab his ortum ducentibus quidquid in circulum propellitur, multiplici ratione perficitur: ac si labem aliquam, per partem affectam pertransiens, acceperit; repetitis circuitionibus; ac variis generis perpurgationibus; & separationibus, quæ in glandulis, & in aliis partibus fiunt, felicius illam deponit; quàm quacunque alia artis industria: quæ nulla omnino esse potest sinè hujus circulationis beneficio.

Motibus his multa quòque fit, sed non sinè selectione quadam, partium tum decessio, tum transpiratio, & dissipatio; qua decrescit humorum copia, & detumescunt vasa. Idque melius, atque facilius contingit, si prima, secundave die parum cibo, potuque addatur; & si id ipsum, quod quacunque ratione addendum videtur, aptum quoque, atque potens sit tum ad corrigendum, tum ad perficiendum sanguinem: ad hoc ut item is percurrens locum affectum, & partes circumpositas diluens, efficacius corrigere, & emendare, vel solvere valeat id, quod morbum facit; & aliquid indè auferat; & id quod remanet magis resolubile reddat.

Aeris quòque, quo æger utitur, constitutio sive illa eligi, sive arte procurari possit, & reliqua omnia, quæ administrantur, & quorum usus fuerit, hoc idem respicere debent: scilicet ut sanguis, & aliæ liquidæ substantiæ, quæ sunt in corpore, perficiantur, & aptiores reddantur ad solvendam, & superandam morbi causam; dum transeunt per partem affectam.

GAL. Non (¹) displicet, Erasistrate, illa tua de crisi non impedienda animadversio; sive per solutionem, aut insensibilem resolutionem ejus, quod morbum facit; sive per urinas, vel sudores; vel per aptam, commodamque abscessus disruptionem crisis expectetur. Neque inficiabor particulam præcipuè affectam sæpissimè locum esse ad futuram crisin determinatum; eò enim potissimum natura conatur omnem sarcinam deponere, quò minùs resistitur ab affecta parte propter majorem, quàm in cæteris, virium imbecillitatem: ut ex plerisque, quæ à me posteritati tradita sunt, perquam facile ostendi potest.

Sed (²) si pars affecta ad crisin omninò salutarem suscipiendam (ut est; quæ sæpe fit insensibiliter) non sit disposita; & locus non sit aptus, ut id commodè evacuetur, quod crisi evacuari debet (ut commodi non sunt pulmones, neque succingens membrana, neque pleræque aliæ partes) ac si propter vasorum plenitudinem, & humorum, sive turgescientiam dixeritis, sive rarefactionem; vel futura timeatur disruptio in loco minimè comodo ad evacuationem ejus, quod extra vasa erumpet; vel etiam, disruptio cum timeatur, nec ea omnino evitari possit; major tamen illa futura sit, quàm si vasa non essent repleta, vel si humores non essent rarefacti; an non venam secabimus?

ERAS. Satis dictum est de rarefactione, & plenitudine vasorum. Nunc, Galene, loquimur de inflammationibus: ad quas constituendas nulla requiritur rarefactio excedens, aut ex rarefactione, vel ex alia causa excedens plenitudo

(1) Quæ crises non impediendæ.

(2) Quæ verò sunt sanguinis missione retardandæ, aut impediendæ?

nitudo. Sufficit crassiuscula particula ad permeandum inepta; sufficit spina, quæ tumori hujus generis det occasionem; vel quid aliud, quod spinæ locum subeat.

Præterea, saltem ut plurimum, ea, quæ concreſcunt, & craſſiora fiunt; eodem tempore minimè rareſiunt, vel creſcunt in mole.

Sed (1) demus in parte affecta aliquid eſſe coactum; in vasis verò non obſtructis, & in toto reliquo corpore humores eſſe rarefactos. Hæc ipſa tamen humorum rarefactio poteſt eſſe inflammationis remedium ſolvendo ſcilicet, & item rarefaciendo in tranſitu per partem affectam; quod in ipſa concreverat, & obſtructionem faciebat.

Demus etiam rarefactis humoribus, & turgidis vasis diſruptionem aliquam loci minimè commodi fieri poſſe majorem; quàm non rarefactis, & non turgidis. Demus aliquando rem tam graviter urgere, ut non ſinè periculo nonnullarum horarum lapſus expectetur; quo ſanguis conſuetis viis, mediisque tum diminuatur, & detumeat, tum perficiatur. Concurrant etiam Galene, illa omnia, quæ tu aſſeris; quis enim dixerit impoſſibile proſus eſſe illa omnia ſimul concurrere, lunamque, ut tu ais, terræ occurrere! Atque idè, ubi omnia concurrant, venarum ſectionem admittamus; ſinendumque dicamus tantum ſanguinis eſſuere, quantum exigit imminens, atque proximum ex rarefactione nimia, atque nimia vaſorum plenitudine diſruptionis periculum.

Hoc (2) tamen, Galene, non eſt inflammationem curare. Nam ſi nihil eorum, quæ dicta ſunt, adſint; ſi in vasis humoriferis nihil excedat, nihil ſit rarefactum, nihil vaſa pluſquam æquum eſt diſtendat, & ampliet; utique etiam tumor omnis generis partem aliquam corporis moleſtare poterit. Tumor autem id expoſcit auferi quod in parte affecta conſiſtit; ſivè ſpina illud vocetur; ſivè ſanguis grumefactus; vel humor craſſus, & lentus, & ad permeandum ineptus; ſivè alio quocunque nomine appelletur. Detractione verò, quæ ſectione vasis à parte affecta remoti inſtituitur, non evacuatur id, quod morbum facit. Quod neque in inflammationibus evacuatur ſectione vasis proximi; nam ſi hac ratione evacuari poſſet, utique fluidum eſſet, & permeabile, & facile amovibile à parte affecta; & abſque venæ ſectione raptum unà cum humoribus, in circulum ſemper actis, relinqueret partem affectam: quæ proinde detumeſceret, & facile ſanaretur.

HELM. Conſiderent quæſo viri ornatiffimi; in pleuritide ſimilibuſque affectibus phlebotomiam (a) non eſſe uſui propter revulſionem, & derivationem: ſed propter meram ſanguinis, viriumque, extractionem, & diminutionem. Ut ſcilicet natura evacuationem exhorreſcens deſiſtat, ceſſetque mittere cruoris augmentum circa pleuram. Attendant inquam, an hoc non ſit cum virium jactura tam inſigni, & repentinæ (in morbo in quo totum onus vires ſolæ baſulant) à poſteriori mederi per cautionem, præventionemque incrementi

Stul-

(a) Hel. pleura fur. num. 8. & 9.

(1) Rarefactio humorum aliquando eſt tumorum remedium.

(2) Sanguinem detrachere non eſt curare inflammationes; quæ id expoſcunt auferri, quod in parte affecta morbum facit.

Stulta (a) prorsus ministeria ab artificialibus minùs rectè applicatis desumpta. Torrens (b) quippè fluens ad quendam terminum minuitur, sistiturque si ripa eius ad latus aperiatur, & propinquiore, magisque prono itinere ad declivem locum labatur. Sed quid istud juverit in pleuritide? si tantùm ad aliquot uncias venæ depleri queant; & quidem cum notabili iactura!

GAL. Ad hæc quid tibi videtur respondendum, Willis? Erasistratus nisi multa concurrant in tumoribus quibuscumque, & nisi nonnullarum horarum lapsus minimè tutò expectari possit; sanguinis detractionem minimè convenire affirmat: ac si illa concurrant maximè in tumore cuius celeres sint mutationes, quas crises cum antiquis possumus appellare; non quidem tantquam tumorum istiusmodi, sive inflammationum remedium, vel per se; sed alio respectu, sive per accidens convenire asserit. Helmontius neque hæc quidem admittere videtur; quoniam detraçtio non fit sinè virium iactura; neque propter revulsionem, & derivationem aliquod præstare potest beneficium.

WILL. Non sumus adeò deviæti, Galene: Atque tu, Helmonti, qui sacrum codicem perlegisti, meliora sentire debes; etenim *lex divina (c) circumcisionis ritum, quasi symbolum phlebotomiæ præcipiens innuere videtur, ingenitas naturæ humanæ impuritates aliquatenus per sanguinis missionem expurgari debere.*

HELM. Mente ne sanus es, Willis, qui circumcisionis Hebræorum ritum phlebotomiæ symbolum esse existimas: cum contra sacra pagina non semel sanguinis utilitatem, & ad prorogandam vitam necessitatem pluribus insinuet? Neque dissimulandum est, pium, fidelemque hominem minimè decere; ab iis, quæ sinè dubio ad spirituales usus instituta fuere a Deo, tam longè remotas, nullamque cum illis connexionem habentes deducere conclusiones.

WILL. In pleuritide, & peripneumonia, aliisque similibus affectionibus ad obstructionem in pulmone, sive pleura tollendam, *phlebotomia (d) omni semper ævo à Medicis quibusque, veluti remedium præcipuum, præscribi solebat.* Qui verò hodie illam damnant, ab Helmontio tantùm, vel à Chrysippo per Galeni traditionem id accepere.

ERAS. Neque⁽¹⁾ hoc verum est. Antiquiores enim Medici quotquot fuere celebriores hoc vitæ breviario minimè sunt usi, vel perquàm parcissimè. Idque manifestum est ex iis, quæ sub Hippocratis nomine his etiam temporibus inter vivos circumferuntur. Sunt autem non unius Hippocratis, quidquid dicat Galenus, sed antiquissimorum medicorum, quæ ab injuria temporum superfuerunt volumina, in unum postea collecta, & uni attributa.

In his libris rarissimè reperies veteres Medicos celebriores sanguinis missionem usurpasse in morbis. Reperies frequentissimè anginas; peripneumonias; pleuritides; tumores alios, in quibus mutationes, sive crises, & judi-

cia

(a, b,) Helm. pleura furens num. 8. & 9.

(c) Will. de phlebotom.

(d) Will. de pleurit.

(1) Antiquiores celebriores Medici etiam in inflammationibus rarò, vel nunquam venas secabant.

cia sunt celeres; febres omnis generis sedulò descriptas; curationesque similium morborum diligenter traditas; medendi rationes, & remedia, quibus utebantur studiosissimè, & curiosissimè enarrata: cum tamen nihil meminerint de mittendo sanguine; vel de secanda vena.

Historiæ tum ægritudinum, tum ægrotantium his, similibusque morbis, in quibus vos venas secastis, ad fastidium, & nauseam usque legi poterunt tum in libris Epidemiorum; tum in libris de internis affectionibus; tum in libris de morbis; tum in libro de natura muliebri; & passim in aliis, in quibus nihil omninò memoratur de sanguinis missione. Ac nisi Galenus nobis etiam imponat, dum affirmat, non quidem omissam in curatione sanguinis missionem, sed omissam ab antiquioribus scriptoribus ejusdem narrationem; oportet existimare illos per quàm rarò sanguinis missione fuisse usos. Ac cum rarò sanguinem detraxerint, inter eos tamen, quibus detractus fuit, nescio an ægrotantem aliquem ostendere possis, Willis de quo certè, & sinè dubitatione affirmare valeas, eum missione fuisse senatum!

Quodd si aliis innumeris ægrotantibus missus quòque fuit sanguis, ut gratis Galenus asseruit; Ego inquam, puduisse postea Scriptores illos meminisse, & in codicem referre missionem; quoniam observaverunt vel nocumentum, vel nullum ægrotis attulisse auxilium. Cur quæso disertissimi viri oblitii sunt illam referre, cum meminerint minutiora quæquè?

Chrysippus autem Siculus, qui venæ sectionem damnavit, & rerum anatomicarum, prout tunc licuit, peritia: & consuetudinum populorum notitia; & morum prudentia, quàm potissimum ex poetis traxit, quibus maxime delectabatur; Chrysippus, qui de affectibus, & ægritudinibus animi, deque remediis ægro animo convenientibus (quæ medicinæ pars est nobilissima ab aliis prætermissa) accuratè nimis, atque diligenter scripsit; non est sanè spernendus Chrysippus.

Cumque duo fuerint Asclepiadæ vetustior alter (a) Bithynus ex eodem cum Hippocrate genere; recentior alter, & me posterior, qui (b) memorabiles pharmacorum compositiones in multis libris conscripsisse dicitur; ille in curatione multorum difficiliorum morborum nil de venæ sectione memoratu dignum habuit; recentior verò, qui, ut audio, antiquiorem medicandi rationem mortis meditationem appellabat, pleuriticos, (c) dixisse fertur, Athenis, & Romæ phlebotomatos pejùs habuisse; in Hellesponto autem, & (d) Pario relevatos: ut ex his etiam, quæ junior Asclepiades notavit, deduci facile possit; pleuræ inflammationem ex se non exposcere sanguinis missionem.

Hippocrates item, (sive is, qui librum conscripsit de victus ratione in morbis acutis) in pleuritide, *at si quidem, inquit, dolor ad claviculam de se significationem præbeat, aut gravitas ad brachium, aut circa mammam, aut supra septum transversum; venam secare prodest in cubiti flexura internam, si verò sub septo transverso fuerit dolor, ad claviculam autem de se signi-*

Tom. I.

F

ficatio

(a) Galen. introd. sive Medic. cap. 4.

(b) Galen. de compos. pharmac. 2. loco lib. 1.

(c, d,) Cel. Aurel. a quo Mercur. lib. 1. cap. 4. variar. lect. & Gal. lib. 3. de morbis vulgar. com. 3. æg. 1. & passim alibi.

ficationem non præbeat, alvum mollire oportet, aut veratro nigro, aut peplio: ut etiam ex his pateat: nihil satis comperti, atque manifesti habuisse scriptorem illum de secanda, vel non secanda vena; & de veratro, sive peplio exhibendo, vel non exhibendo. At vos, Willis, atque Galene (a) distinctionem istam doloris ad claviculam se extendentis, vel non extendentis si rectè conjicio ex iis, quæ à vobis dicta sunt, minimè probatis. Ac proindè, ut idem scriptor de victus ratione ait, videmini omnes veluti vates; quorum (b) alii eandem avem si sinistra appareat bonam esse ducunt, si dextera malam; alii contraria his dicunt. Et in Aruspicina talia multa sunt, alia in aliis. Quidam Cursor ad Olympia proficisci cogitans aquila se in somnis visus est factus: detulit ad conjectorem quendam; at ille vicisti, inquit, ista enim avis volat nulla vehementius; detulit ad alium; tu verò, inquit, te victum esse non vides? ista enim avis insectans alias, & agitans semper ipsa postrema est. Similiter & vos facere videmini cum rationes adducitis, quare conveniat, vel non conveniat, & ex qua vena administranda sit sanguinis missio. Quòd quidem contingit, quoniam nihil certi, & constantis huc usque invenistis.

Neque ego tam obscuri nominis sum, Willis, ut veluti nunquam fuissim inter vivos; & veluti doctrina mea tamdiu non viguisset, non floruisset Romæ; tunc cum habebat Roma plura millia millium hominum, quàm nunc habeat tota ferè Italia, jure dicere possis, omnes omni ævo in pleuritide venam secare soliti fuerunt!

Neque Helmontius, à quo multa, & præclarissima accipimus, deridendus tibi fuit!

WILL. Quotquot estis, qui sanguinem in morbis nunquam, vel rarò misistis? Si vos omnes ad eos conferatis, qui vel unum Galenum secuti nihil frequentius præstiterunt, quàm venas quocunque tempore, & quacumque occasione dissecare comperietis vix esse veluti unum ad centena millia millium.

HELM. Vota (1) in comitiis omnibus non deberent numerari, sed ponderari. Tantum momenti Galeno addunt innumerabiles ejusdem sectatores, quantum Alcorani doctrinæ Maumedani omnes, qui vastissimas, & quondam florentissimas orbis provincias, habitarunt, & adhuc inhabitant.

Affirii, (2) Caldæi, Ægyptii vanis divinandi artibus utebantur. Cur non fieri potuit, ut pernicies etiam ista dissecandi venas admitteretur; non minùs ac admissa quondam Romæ fuit illorum sententia, qui febricitantes senes frigido fluvio demergendos esse affirmabant, ut sanarentur? Cilicum, & Pisidarum gens, & his finitima Pamphila volatibus avium, cantibusque, ut certissimis signis, declarari res futuras putabant. Tota Græcia nihil publicè, aut privatè faciendum suscipiebat, sinè Pythio, aut Dedonæo, aut Ammonis oraculo. Populus Romanus iis etiam temporibus, quibus Medi-

cos

(a) Galen. in comm. lib. de vict. rat. in morbis acutis, & Willis passim.

(b) Hipp. de victus rat. in morbis acutis.

(1) Vota debent ponderari non numerari.

(2) Vanitates, & superstitiones pleræque passim admixtæ fuerunt à populis amplissimis, atque clarissimis.

cos non admisit ; tota Æthiopia ; tota Europa ; tota Asia ; tota Africa plures habebat augures , & conjectores tum publicos , tum privatos ; quàm nunc habeat & Medicos , & Astrologos , & Cabalistas . Ipsi Reges , & ductores augures erant ; & à cantibus , volatibusque avium , & extorum inspectione ridicula (nisi fortè primi institutores de loci salubritate aliquam ab integritate extorum voluerint facere conjecturam), quid in gravissimo quoque negotio faciendum esset conjiciebant . ⁽¹⁾ Quorum omnium si judicia , atque simul sumptas sententias ponderemus , facile cognoscemus plus momenti , atque ponderis habere unius Marci Tullii Ciceronis judicium , atque sententiam venas esse artes illas , affirmantis .

Eventus ⁽²⁾ etiam narrabantur , quibus extispicinæ , & aruspicinæ , aliisque similibus artibus fides adhibenda videretur ; non minus ac experimenta , & eventus à plerisque nunc narrantur de missionis sanguinis utilitate . Quibus minimè fidendum puto : & circa sanguinis missionem plus ponderis habere existimo unius Erasistrati , etiam inimico , & invido Galeni ore clarissimi , judicium ; quàm reliquorum omnium . Quoniam nullus est morbus in quo ex sanguinis missione certò sanitatem promittere possis ; pro ut nullus omninò est aquilæ volatus , ex quo ante eventum victoria , aut clades prædicti possit . Et rationes quidem , quæ adducuntur , & eventus , quos prædicant , sunt aruspicum rationibus , & eventibus , in quibus isti gloriabantur , perquam similes .

Desierunt jam extispicina , & aruspicina , quæ tot tantisque seculis flourerant ; desierunt vaticinari Pythia oracula : aliæ tamen superstitiolæ vanitates mentes hominum occupaverunt ; quæ fortè aliquando seculorum lapsu ipsæ etiam desinent . Sed aliæ , atque aliæ exurgent : nullus enim unquam fuit populus , qui non saltem aliqua superstitione teneretur .

In his autem , similibusque ipsa rerum natura inspicienda est . Videndum , non inquam , an passeruli cantu , vel pulli alacritate exercitus victoria ; sed an felix sternutatio promitti possit . Videndum , non inquam , an pleuritis ; sed an paronychia sanguinis missione sanari possit : an spina , non inquam , pleuræ ; sed digito infixa sanguinis missione faciliùs extrahatur .

Et fieri quidem potest , ut paronychia non differat à pleuritide , nisi ratione loci , & eorum , quæ locum consequuntur .

GAL. Ego autem inter sectatores meos connumerari nolim ; neque profectò tam largè sanguinis profusor fui , ut vobis videor .

WILL. Ipsam igitur rerum naturam inspiciamus ; & vota ponderemus potius , quàm numeremus .

Ult ⁽³⁾ remotas causas præteream (repentinos nempe caloris , aut frigoris excessus ; pororum constipationes ; crapulas ; vini , aut liquorum arden-

F 2

tium

(1) Sententia M. T. Cic. magis habenda est , quam omnium aruspicum , & augurum sententia .

(2) Eventibus , qui narrantur tum circa extispicinam , tum circa aruspicinam , tum circa sanguinis missionem non est fidendum , non est credendum .

(3) Inflammationum causæ secundum Th. Willis , & rationes , quibus sanguis mitti debet .

tium immodicos potus; exercitium immoderatum; malignam aeris, aut malam corporis constitutionem; atque alias, quæ sanguinem ad lentescendum, simulque effervesendum prædispositum exagitant) tum peripneumoniæ, tum anginæ, aliarumquæ similium affectionum, & præcipuè pleuritidis proxima causa est (a) sanguis in membranæ istius, vel alterius partis vasis minoribus, ac interstitiis ob lentorem obstructus, & extravasatus; dein ob turgescentiam copiosius ibidem aggestus; proindeque phlegmonem excitans. Quibus superveniunt dolores acuti, tussis, respiratio difficilis, atque alia pro loci ratione; in quo obstructio facta est.

Accidit autem hæc in sanguine diathesis, quod cruoris (b) partes crassiores à subtilioribus non satis comminuuntur; ita ut omnibus æqualiter mixtis; & mutuò subactis demum humores utiles in munia quibusque appropriata secedant; atque inutiles per cloacas idoneas continuò amendantur: verum è contra in quantum sanguinis particula sulphurea unà cum salinis, & terrestribus nimis evectis combinatæ, cæteras quasque irretiunt, & inviscant; proinde liquor ejus recrementa quæque, & impuritates intra se continens instar glutinis lentescit; & propterea diathesin peripneumoniam, aut pleuriticam concipit.

Quamobrem in his, similibusque morbis sanguinis detractio non solum convenit, imò interdum (c) sæpius iterari debet: nam vasa sanguine depleta non solum morbi fomitem subtrahunt; sed & materiam loco affecto impactam resorbent. Quapropter si vires constabunt, & pulsus satis robustus erit, sanguinis missio liberalior statim ab initio convenit: secus verò ea in quantitate modica celebretur, subinde tamen pro data occasione repetenda.

Ac nihil refert, modò hæc contingant, per se, an per accidens, Galene, dicas contingere.

Longè autem præstat sanguinis missionem prima vice plenius celebrare, quàm parciore phlebotomias pluries iterare: Quippè (d) sanguinis lentescens, ac in viscositatem degeneris portiones quamplurimæ circa locum affectum aggregatur; quæ nisi vasis per phlebotomiam copiosam valdè depletis, illinc avocentur, & magna ex parte foras effluant, sanguinis missio effectu desiderabili frustrabitur. Atque ideò si vires constant liberalior esse debet; sin minùs parciior quidem, sed reiterari poterit.

ERAS. Multa priùs probanda supponis, Willis, quæ etiam si omnia vera sint, neque tamen, nisi rarò, sanguis mitti debet.

Et (1) vasa quidem, propter tunicarum, ex quibus constant, naturam contrahibilem, & distendibilem, nisi quid aliud impediat, semper multum sanè, atque multum admittere possunt ejus substantiæ, quæ alicubi inhærens morbum facit: sicuti novam, atque novam quotidie ex cibo, & potu admittunt substantiam; quoniam finè incommodo ampliabilia sunt, & capaciora fieri possunt.

Atque

(a) Will. de pleur. fol. 87.

(b) Will. de perip. fol. 78.

(c) Will. de peripn. fol. 81. & similia cum de pleuritide habet.

(d) Will. de pleur. fol. 89.

(1) Non deest vasis amplitudo & capacitas; quæ valeant admittere, & in circulum rapere id, quod alicubi morbum facit.

Atque ideò si materies loco affecto impacta aliquando non resorbetur, Willis, hoc non fit propter defectum amplitudinis vasorum, vel quia eadem sint repleta nimis; sed propter alias causas, rationesque alias. Ac vasa cuncta corporis, etiam si sint ferè prorsus inania, sæpiissimè tamen non resorbent, neque admittunt aquas hydropicorum, ut neque pus empyematicorum; cum alias eadem vasa etiam si repleta sint satis, & turgidiuscula, copiosissimas tamen admittant aquas, urinæ non rarò reddendas.

Præterquam quod plenioribus, rapidioribusque fluentis faciliùs rapitur id, quod alicubi impactum hæret; ut frequenter addendum potiùs, quàm auferendum sit.

HELM. In (1) pleuritide, peripneumonia, aliisque similibus affectibus, cum sanguinis missio iudicio tuo celebranda est, Willis, semper vires debent esse validæ; pulsus debet esse robustus: ut si vires sint valdè languidæ, nisi fallor, detractio tibi videatur omittenda. Fortè quia existimas magni esse momenti ad morbi solutionem virium robur, ut re vera est; & fortè existimas missione vires debilitari. Quid enim timeas, nisi, hoc timeas, vires debilitari?

WILL. Utrumque existimo; & hoc timeo sanguinis missione vires magis pessum iri.

HELM. Nisi igitur (2) virium, atque virtutis sit superabundantia quædam, & excessus aliquis, sectione venæ semper nocebis. Atqui in pleuritide nunquam adest virium excessus, & superabundantia, nequè in mathusalem; igitur si illud audeas, sanguinem mittere, semper nocebis.

WILL. Magnam oporteret è medio medicantium partem auferre; quoniam pharmaca ferè omnia aliquid virium detrahunt.

HELM. At medicamenta, quæ ego præscripsi pleuriticis, dens apri, sanguis hirci, fimus equi, virga tauri, papaver erraticum, & alia similia nihil nocent viribus, nihil detrahunt virtuti.

WILL. Sed hæc plerumque minimè satès sunt.

HELM. Rectè usurpata ferè semper satès sunt: & nunquam enecant hominem: cum sanguinis missio nunquam satès sit; & sæpiissimè enecet.

WILL. Illis quòque medicamentis aliisque similibus; ut oculis cancerorum; sale prunellæ; spiritu sanguinis; spiritu cornu cervi, sum ego quòque usus in pleuritide. Sed non propterea, quòd hæc prosint; sanguinis missio omittenda est; etiam si aliquantulum vires infrigat: sufficit si ritè, rectèque admissa, & administrata multò plus prosit, quàm noceat.

ERAS. Satiùs (3) effet, si dicamus, aliquando vires excedere in corporibus animantium, roboreque nimio virium multos fieri morbos; ac oportere nonnunquam vires infringere; donec animo etiam linguatur ægro-

HELM. Ut de Tancrede cecinit Poeta Italus:

Squar-

(1) Qui sanguinem mittunt credunt debere vires esse robustas; & credunt easdem languescere detractiōe sanguinis.

(2) Ac proinde ex ipsorum sententia semper aliquo pacto nocet sanguinis missio.

(3) Fortè aliquando nocet virium robur.

Squarcia le fascie, e le ferite; e piove

Da le sue piaghe esacerbate un rio:

E' s' uccidea; ma quella doglia acerba

Con trarlo di se stesso in vita il serba.

Qui (1) si vires constituissent, se se necasset, virium languore, animique defectione servatus est. An similiter dicas in pleuritide perhorrescere naturam sanguinis missionem; ac ubi secta fuerit vena, *illam pœnitere (a) rumoris, & procellæ*, quam excitavit in pleura; ut proinde à misso sanguine videantur aliquando ægrotantes se se meliùs habere? Sed ipsa etiam natura deterrita, atque retracta; vel, ut ait Erasistratus, impedita à meliori crisi molienda cogitabit postea *de puris (b) generatione ab extraversato sanguine fabricandi*, cum multo majori sanè ægrotantium discrimine. Nam tunc non quidem disruptio, Galene, atque Willis, sed corruptio vasorum, & totius partis mortificatio timenda erit.

ERAS. Verùm quibus lancibus Willis damnum, & utilitatem metiri oportere cenles; ut ante venæ sectionem sciant Medici, quando plus prosint, quàm noceant mittendo sanguinem?

WILL. Sanguis è quibusque peripneumonia, pro ut etiam pleuritide laborantibus detractus, postquam refrixit, in superficie sua loco cremoris coccinei pelliculam subalbidam, aut alias discolorem, quæ itidem tenax admodum, & viscida est, succrescentem habet. Quo experimento constat salinas, terrestresque ejusdem particulas evectas nimis esse; ac sulphureis combinatas cæteras inviscare, & irretire. Quibus ad partem affectam delatis, ex majori earundem congestione major profectò fiet inflammatio.

Iisdem verò particulis magna ex parte evacuatis per sanguinis missionem, quæ foramine ampliore celebrari debet, ut crassioribus facilior pateat aditus, minor, necessum est, & levior, & solutu facilior sit inflammatio. Et hæc est prima utilitas ex fomitis detractio.

HELM. An foramen amplum impedit subtiliorum, & efficaciorum particularum è secta vena effluxum?

ERAS. Salinæ verò particulæ evectæ (jam tuis vocibus loquor Willis) sunt ne salis, quem dicere soles; volatilem; an salis, quem appellare consuevisti fixum?

HELM. Operam ludis, Erasistrate, Willis de his interrogando.

WILL. Evectæ quidem sunt particulæ salinæ fixæ; nam salis volatilis particulæ, ut etiam; & spirituosæ; quibus reliqua subiguntur, attenuantur, & comminuuntur, sunt potiùs depressæ. Quamobrem medicamenta, quæ sale volatili tantùm; & quæ spiritu, & sale volatili abundant, ut sunt medicamenta prænarrata, mirificè profunt pleuriticis.

ERAS. Nescio an sal prunellæ, qui item à te pleuriticis commendatur, sit volatilis, an fixus: tutè hoc vide cum Helmontio similium rerum magistro optimo.

HELM. Operam ludis Erasistrate.

ERAS.

(a,b) Helm. pleura fur.

(1) Videntur sæpè meliùs se habere pleuritici à misso sanguine, cum se habeant pejùs.

ERAS. Sine ludam: videbo tamen an sanare possim ægrotantem Willis nostrum, Willis de re anatomica optimè quidem meritum.

Sulphura, quæ dixisti Willis, videntur tibi depressa in sanguine pleuriticorum; an ipsa quòque evecta?

WILL. *Sulphur* (a) post spiritum est principium maximè activum — & in pleuritide, (b) ac in peripneumonia sanguis crassus quidem est, sed minùs sulphureus, (b) sive inflammabilis existit, quàm in febre caulo; (b) quæ etiam à sanguinis compage nimis constricta, (b) & nihil à se dimittente procedit. Unde sulphur minimè dixerim in pleuritide evectum, aut non sanè multum: & quandòque depressum potius, quàm evectum.

ERAS. Nihil (1) interim de aquis; quas, si in sanguine superabundaverint, scio non semel facere tumores varii generis, & eos quandòque quos inflammationes appellant?

WILL. Fortè quia superabundanti humiditate elementa efficaciora ab invicem (c) elongantur, seu dissociantur nimis: quarum subjectum iners, & pigrum, & minoris efficaciæ, & motui ineptum existit. Porro corpora nimis humida sunt putredini, & corruptioni plurimum obnoxia; quoniam ab humiditate nimia combinatio spiritus sulphuris, ac salis nimis laxa efficitur; ut se mutuo non implicant; nec implexu in subjecto retineantur; ex putredine verò & corruptione postmodum omne ferè morbi genus fieri potest.

ERAS. Opportuna fortassis ratio! Quid si terrestres, & salis fixioris particulæ essent nimis evectæ; sanguis esset nimis iners, piger, & minoris efficaciæ, & functionibus vitæ ineptus, & consequenter aptus ad obstructions faciendas; esset nimis lentus; nimis ad grumescendum paratus (ex quo jure timet Helmoniius ne pestilens aliquod pathema insurgat) sanguinem ne mitteres in pleuritide, Willis, aliisque similibus affectibus?

WILL. Si cruoris mixtio (d) plurimum solvi; & pessum ire incipit, uti in peste, ac febribus malignis, à phlebotomia omninò abstineatur. (2) Quippè sanguine detractò spirituum (quorum unice interest massam sanguineam à putredine, & corruptione vindicare) penùs diminuitur; ut statim omnia in dissolutionem exitialem tendant. Porro si discrasia sanguinis ejusmodi fuerit, ut principiis nobilioribus (scilicet spiritu, sale volatili; ac sulphure) depressis, vel absumptis, particulæ aquosæ, ac terrestres præpolleant, sanguis haud quamquam emitti sed tanquam vitæ thesaurus præservari debet. Quippè cum spirituum copię tantum exiguæ sunt, illorum quodvis dispendium functiones omnes vacillare facit; inque morbi partes cedit: quare in hydrope, cachexia, tabe, aliisque, ubi principia activa summè deprimuntur, affectibus venam secare ferè idem est, ac hominem jugulare.

ERAS. Nihil nunc de hydrope, cachexia, tabe, aliisque similibus af-

fe-

(a) Will. de fermentatione cap. 2.

(b, b, b, b) Ad sensum Willis tract. de respirat. organ. & usu sect. 1. c. 2. f. 26.

(c) Will. de fermentatione cap. 2.

(d) Willis de phlebotomia pag. mihi 172.

(1) Aquositates superabundantes possunt facere tumores etiam celeris motus.

(2) Quibus non convenit sanguinem mittere secundum Th. Willis.

festibus; in quibus, ut inquis, venam secare ferè idem est, ac hominem jugulare; sed de tumoribus celeres habentibus motus, sive de inflammationibus; & præcipue de pleuritide, peripneumonia, & angina loquamur; in quibus, ut deducitur ex iis, quæ huc usque à te dicta sunt, minùs, atque rariùs quàm in reliquis morbis convenit sanguinem mittere.

Ac (1) multa quidem ex his arbitrio confinxisti tuo, Willis. Sed illa tenaci memoria retine; & facultas etiam tibi sit arbitrio multa alia confingendi. Edoce tamen his retentis, ut pleuriticis sanguinis detractio prodesse possit, & quando profit; & quibus lancibus metiri solitus fueris sanguinis missionem pleuriticis plus prodesse, quàm nocere?

Si dicas in pleuriticorum sanguine nihil evectum, nihil depresso esse (loquor tuis vocabulis, Willis, veniam mihi dabunt Galenus, & Helmontius) deferres tuam hypothesim; dixisti enim in pleuritide sanguinis salinas, & terrestres particulas esse evectas. Ac nisi dixisses, cum nihil evectum, nihil depresso est, missione nocebis potiùs, quàm juvabis propter virium jacturam, quæ semper, ut ais, sanguinis missionem aliquo pacto consequitur: Et sanguis tunc bonus est secundum tuam sententiam; & nulla tunc opus per venæ sectionem sanguinis evacuatione: etiam si humores superabundent in vasis; cum sufficiet, & opportunior sit, quæ natura sit per insensibilem transpirationem evacuatio. Et Galene hac in parte te callidiori, qui dicebat superabundantem sanguinem secta vena diminui debere, satis in superioribus factum est. Hæc tamen ad te non pertinent; nam in hoc casu defereres hypothesim tuam, qua affirmas in pleuritide principia componentia sanguinem non servare proportionem, cum sal, & terra sint evecta; in hoc casu verò nihil evectum, nihil depresso est.

Vel activa principia tua sunt depressa, vel absumpta, ut subigere, attemperare, & comminuere minimè valeant crassiores minùs activorum, sive passivorum principiorum particulas; & tunc quoque plus nocebis, quàm proderis missione. Quoniam tunc sanguis (a) *tanquam vitæ thesaurus præservari debet*; & abstinendum à sectione; *ne statim (b) omnia in dissolutionem exitialem tendant*, — & quodvis spirituum dispendium functiones (c) *omnes tunc vacillare facit*.

GAL. Humores (d) crudi secundum meam sententiam abundarent in hoc casu; & propterea sanguis minimè mittendus esset.

ERAS. Præterea in hoc casu, in quo principia activa magis, minusve depressa sunt, aperto foramine maximè ampliori, ut tu vis, effluent principia tum activa, tum passiva; sic ut confusa reperiuntur in vasis. Aliquis dicere posset, quod semper effluat plus activorum, & subtiliorum; quàm passivorum, & crassiorum. Et quæ remanent activorum non evehantur missione, propter aliquam virium jacturam. Sed quæ remanent passivorum ex missione propter eandem virium jacturam, evehantur magis; & erunt ad permanendum minùs apta. Nequè rationem ullam probabilem habere-

(a,b,c) Willis de phlebotomia pagina mihi 176.

(d) Galenus de cur.rat.per sangninis miss.c.6.& pluries alibi.

(1) Ex iisdem Tho.Willis rationib. deducitur rarò vel nunquam in pleuritide aliisque inflammationib.convenire sanguinem mittere.

bere potes, qua tibi suadeas; effluere tantum quod noxium est; & id omne retineri, quod est utile,

Vel affirmabis utraque principia tùm activa, tùm passiva esse depressa (loquor, ut vides, tuis vocibus) & rursus hypothese[m] deseres. Nam tu vis in pleuritide, & peripneumonia principia passiva esse eve[ct]a, non quidem depressa; & deesset in hoc casu tùm lentor, & crassities sanguinis propter passivorum depressionem. Eve[ct]æ enim sunt salinæ fixæ, & terrestres particulæ; vel superabundant etiam aquosæ, cum sanguis est lentus. Tùm etiam deesset febrilis effervescentia sanguinis propter activorum, & præcipue, ut dicere solitus es, sulphuris depressionem. Et hæc duo, sanguinis lentor, & febrilis effervescentia (a) tibi necessaria visa sunt ad constituendam pleuriticam procatharsim. Item propter virium imbecillitatem ex depressione omnium principiorum; nequ[e] conveniet in hoc casu venas secare.

Tenaci memoria retine, quæ dixisti, & alia arbitrio finge tuo; ac pergamus dicere. Vel utraque principia tua tùm activa, tùm passiva erunt æqualiter eve[ct]a; & casus hic item in hypothese[m] tua minimè continetur, licet videatur contineri: iterum sumus extra hypothese[m], licet primo aspectu videri possit nos non discedere ab hypothese[m]. Deest tibi lentor sanguinis ad faciendam pleuritidem. Lentor enim, & crassities nequit consistere cum activa, quæ subigunt, secundum tuam sententiam, comminuunt, & attenuant passiva, eve[ct]a sunt; Et activa non possunt esse eve[ct]a, nisi passiva deprimantur: dicuntur enim hæc contra se mutuò agere; ut eve[ct]io, sive exaltatio activorum; minimè sinat evehi, & exaltari passiva.

GAL. Similiter profectò dicendum esset de calore, & de qualitate, & de facultate calorifica; quòd non possit crescere in aliquo subiecto, nisi simul discedat, vel deprimatur frigus, vel frigiditas, sive facultas frigorigera. Verùm ego ponebam calorem, & frigus qualitates maximè activas; siccitatem verò, & humiditatem illarum respectu passivas qualitates appellabam. Ita tamen, ut aliqua activarum, caliditas exempli gratia, augeri, sive exaltari posset in eodem subiecto, in quo adaucta, sive exaltata esset aliqua passivarum; nam caliditas nequ[e] siccitati, nequ[e] humiditati opponitur; licet faciliùs cum siccitate, quàm cum humiditate, quam progressu temporis destruit, reperiatur.

WILL. Omitte quæso, Galene, sic mihi subsidio esse.

HELM. Tandem hæc omitte, Galene, quæ haud rerum explicant naturam.

ERAS. Vide quæso Willis, cum activa principia tua sunt eve[ct]a, sive validiora dixeris, & efficaciora; tunc meliùs attenuantur, subiguntur, & comminuuntur passivorum, sive minùs activorum, & ad motus, functionesque ineptiorum principiorum particulæ; ut etiam in hoc casu deesse debeat lentor sanguinis, qui tibi necessarius videtur ad pleuritidem faciendam. Lentor enim, sive sanguinis crassities, & ad permeandum ineptitudo, tunc adest, ut rectè ais, cum minùs subiguntur, attenuantur, & comminiuntur particulæ quæcunque sanguinis. Et propter hanc rationem febris sæpè est remedium plerorumque similium morborum; videlicet quoniam motu febris

attenuatur, & comminuitur, sive subigitur, & solvitur id, quod morbum facit.

WILL. In (1) peripneumonia quidem, & puto etiam in pleuritide, atque aliis similibus affectibus, sæpenumero cum symptomata horrenda, *uti febris intensa, respiratio (a) summè laboriosa, cum tussi, vigilia, aliisque signis infaustis urgetur: si pulsus adhuc fortis, & spiritus animales in vigore persistunt, melius ægrotantis spes erit; quàm si rebus istis plus sedatis pulsus debilis; & spiritus torpidi, aut oppressi fuerint.*

ERAS. Optimè sanè: atque ideo ea quibus æger, vel conquiescat à febre, vel respirationem habeat minùs laboriosam, vel minùs tussiat, vel non immodicè vigilet; non debent esse talia, quæ spiritus etiam torpidiores efficere possint; non debent esse talia, quæ vires opprimant. Nam (2) torpor spirituum in peripneumonia, aliisque morbis similem ortum habentibus, est omnium signorum perniciosissimus.

Sanguinis autem missione omnia quidem mala conquiescunt, ut mors etiam summa quies corporis ex ea sperari possit: & ex tua etiam confessione sanguinis missione vires dejiciuntur, (b) & spiritus fiunt torpidiores. Igitur nisi vigor spirituum sit nimis excedens; nisi vires nimis superabundent, & nisi ex virium abundantia homo lædatur, omittenda erit sanguinis missio. Nam plus sedatis febre, respiratione, tussi; minus infestante vigilia, aliisque similibus; si tamen pulsus sit minùs fortis & spiritus animales minùs in vigore persistent, vel torpidiores, ut tu ais, aut oppressi fuerint (ut torpidiores fiunt ex sanguinis missione; ex qua etiam pulsus sunt minùs fortes) *peior (c) ægrotantis spes erit.*

Nequè aliquid timere debes ab activis parùm evectis, sive exaltatis; nam hoc ipsum deprimit passiva, in quorum exaltatione potissimum ex tua doctrina principiiisque morbus consistit.

Cæterum clarissimè, Willis, infinitas alias difficultates habet hypothesi, & doctrina tua; quas prætermittimus. Sufficit enim, si nunc dicamus, admissis etiam iis, quæ tu gratis affirmas, nunquam, vel rarò convenire missionem sanguinis in inflammationibus, sive tumoribus celeris motus: nam nunquam, vel perquam rarò ægrotat homo ex abundantia, & copia virium; atque spirituum; & lentor sanguinis non subsistit cum spirituum, & principiorum activorum copia, & exaltatione.

WILL. Est (3) tamen alia hujusce rei explicandi ratio, hætenùs non satis exposita. Sanguis eductus è pleuritidis, *pellicula (d) albicante, aut alias discolori, crassa, & viscosa semper obducitur. Cuius ratio est, quod sanguis cum*
in-

(a) Will. de perip. f. 81.

(b) Will. de phleb. f. 172. & alibi.

(c) Will. de perip. f. 81.

(d) Will. de respir. org. & usu sect. 1. cap. 2.

(1) Nequè febris, nequè difficilis respiratio, nequè tussis, vigilia, & similia sunt in pleuritide pessima signa; verum virium dejectio.

(2) Et proinde remedia id maxime respicere debent ne vires infringant; & plerumque nihil timendum à febre; vel à virium robore.

(3) Alia itera vana causa pleuritidis explicandi ratio.]

inter circulandum particulas veteres non à se dimittit , novasque in se haud satis recipit , diuturna coctione inspissatur ; ac instar carnis elixæ à colore sanguineo versus albidum mutatur ; in quo casu siquidem vasorum ductus exiles haud facile pertransit , extraversari periclitatur , & pleuritici , aut peripneumoniam facile excitat . Et proderit tunc ex uno capite sanguinem mittere .

ERAS. Sanguis ⁽¹⁾ inter circulandum non dimittat à se, exempli gratia, id omne , quod urinis emitti solet: tu ne igitur speras sanguinis missione evacuari posse urinas? tu ne speras veteres particulas non dimissas , pertusa vena, evacuari; & reliquas in corpore corrigi, & non magis inspissari, si vera sunt hæc alia , quæ supponis? Bella etiam ratio ista est, Willis , sanguinem ad instar carnis elixæ , ex qua ulteriori coctione fit gluten , ex rubro in albidum mutari ; sed nullo probabili nititur fundamento .

HELM. Aquæ ⁽²⁾ copiosæ sunt in hoc alio casu, Willis, superinfundendæ & superaddendæ sanguini! Nam carnes quantumvis elixentur, si juri novæ, atque novæ aquæ addantur , nunquam juris reliquum in glutinum abibit: sin verò juris partem auferas; reliquum citius concrescet in gluten solidissimum. Vel ignis augendus , sive potius spiritus, atque vires: nam gluten semper liquidum est propè ignem; sive sanguis semper liquidus est, cum vires, & spiritus abundant; ubi verò frigidum ambiens sentiat gluten , statim coagulatur.

O' stulta Medentum argumenta : Ulteriori coctione , & sanguinis elaboratione in vasis solvuntur magis , & liquefcunt humores; veluti ulteriori igne melius solvitur , & liquefcit aurum; & quid vulgari igni simile aptè à te constitutum in corde est . Loquor jam ego quoque tuis vocibus . Hinc fortè est, quòd nonnulli inquirunt , plus sanguinis educi posse ab iis animantibus , quæ biduo abstinerunt ab omni cibo ; quàm ab iis , ut consueverunt, pastæ fuerunt . non quia re vera plus adsit , cum nihil crescere possit , nisi additione; sed quoniam multa quæ minùs fluida erant , abstinentiæ tempore , sive tu dicas ulteriori coctione , fluidiora ; & fluxibilia facta sint : ut plus educatur, licèt nequaquam plus adsit ; sed minus .

Memini autem me accepisse (a) RR.PP. Jesuitis , Japponenses , quorum amplissima sunt regna, & nunquam in morbis venas secare consueverunt, Europæis , qui ad compescendum fervorem sanguinis venas aperiendas esse existimabant , respondere solitos ; adjiciendum potius sanguini , ut fervor ejus compescatur , quàm detrahendum . Sicuti ubi ignem (fortè morbi causam intelligentes) subtrahere nequeas , superinfundendæ sunt lebeti aquæ : nam si partem eorum , quæ fervent , detraxeris , reliquæ magis , atque magis ebullient .

O' terque, quaterque stulta , & vana Medentum argumenta ! Quibus ; si vera essent quæ isti , & illi supponunt , facile concludere liceret , quodcunque quis vellet oppositarum rerum . Plerique autem mentis acumine , & divina intelligentia , qua præditi sunt , ad decernendum verum à falso , minimè

(a) Audita hæc à Reverendiss. P. Daniele Bartolo Societatis Jesu histor. clarissimo.

(1) Ex qua neque deducitur sanguinem esse mittendum.

(2) Stulta sunt pleraque Medentum argumenta.

utuntur ; & ludicris, vanisque garriunt rationibus , nihil rectè , nihil evidenter concludentibus .

WILL. Verùm enim verò in peripneumonia, *siquidem* (a) *haud totus illicò sanguis lentorem*, quem dixi, *acquirat, portiones primò* (1) *depravatæ circa obstructionis locum, maximè aggregantur*, (b) *& circum circa in vasis minoribus hærent*. Quare sanguis per phlebotomiam primò exiens sæpè culpa vacabit . Dein vasa depleta alterum morbificum prius stagnantem excipient , & circulationi reddent . Cumque portiones ejus juxta consitæ juncto velut agmine ferantur , ad venæ orificium delatæ simul effluunt ; & postquam ista sanguinis vitiosi aggeries tota effluxit : reliquus statim purior succedit : Et tunc vena occludenda est .

HELM. Erit ne unquam insulsitatum modus aliquis ! Unde nosti, Willis , quòd minus prius effluat inculpati sanguinis ; quàm vitiosi postmodum sequatur ? An unquam paronychia vasis sibi proximi sectione sanata est ?

Portiones sanguinis vitiosi juxta consitæ , juncto velut agmine , feruntur ad venæ sectæ orificium , horulæ brevi minuto adapertum ! Cur non potius ad semper patulum in summo cole foramen ? Qui dux tam insipiens , istius agminis particularum inutilium ; qui cum vias complures habeat semper patulas , non sinat moveri agmen ; nili cum remota vena pertunditur ?

ERAS. Cæterum viri clarissimi , Helmonti , atque Galene , minimè obliviscamur , multa nos oculatissimo Willis in anatomicis debere accepta : fortè mysterium aliquod in his habet , nobis hætenus non revelatum . Nostrum igitur omnium nomine rogatum te velim , Willis , aperias si quid habes ex corporum dissectionibus ; quare hæc sic contingere debeant : quamve venam , edoce , sive in peripneumonia , sive in pleuritide secandam putes ?

WILL. Rem planè expediam ; ac referam etiam antiquiorum hac de re sententias : nequè omittam Galenum ipsum , qui ab eodem latere , in quo pleuritis erat , venam secabat .

GAL. Ego autem , fatebor enim , post cognitum sanguinis motum , non sum demens adeò , ac plerique sectatores mei , qui ea nunc quoque sentiunt , quæ olim à me fusè de his scripta sunt .

WILL. Postea Arabes saphenam , aut basilicam lateris oppositi aperuerunt ; & ejusdem lateris sectionem sub piaculo damnarunt . Ac inter Sectatores sive Græcorum , sive Arabum magna semper fuit de his altercatio : & in infaustris eventibus , quos frequenter contingere necessum est , sive feces , sive non feces venam quamcunque , alii alios homicidii reos judicabant . Nequè tanta unquam inter Judæos , & Samaritanos circa sacros cultus concertatio fuit ; quàm circa secandæ venæ electionem .

HELM. Omnes scilicet sive Græci , sive Arabes decipiebantur ; nequè utrique quicquam comperti habebant , quare mitterent ; vel non mitterent sanguinem ; & ex una potius , quàm ex alia vena mitterent .

WILL.

(a) Will. de peripn.

(b) Will. de peripneumon.

(1) An sectione venæ brachii aliquid evacuetur ejus , quod in pulmonibus obstructions , & morbum facit .

WILL. Nebulas ⁽¹⁾ tamen istas omnes discussit sanguinis motus, & circulatio: qua cognita manifestum fuit perinde esse, sive in pleuritide, sive in peripneumonia ex utro latere vena secetur. Mos tamen invaluit in pleuritide basilicam potius affecti lateris, quam aliam venam adaperiri; fortè quia dum sanguis effluit è basilica, brachii arteriæ majori copia sanguinem excipiunt, quàm pro ratione reliquarum arteriarum; ac dum celeriori motu sanguis decurrit ad brachii arterias, minus forsan *sanguinis* (a) *arteriis vertebralibus pro morbi fomite infunditur*: leve sanè & brevissimi temporis levamen; de quo etiam maximopere dubitari possit: ac forsan dixi, ne aliquis vestrum hoc sibi suscipiat onus ostendendi contrarium.

Uti ⁽²⁾ vias autem doceam, quibus venæ sanguiferæ membranæ succingentis, sive pulmonum communicent cum aliis valis sanguiferis; quæ in superficie corporis sunt, hoc primum habeto, viri ornatissimi, satis esse si vias refluï à pleura sanguinis describam. Nam his cognitis, innotescant illæ, quibus sanguis lentus, & crassus in aliquo pulmonis lobulo consistens, & peripneumoniâ creans, factò veluti agmine partium, duci possit ad foramen sectæ venæ.

Vena finè pari id omne suscipit, quod per arterias vertebrales ad pleuram fuerat delatum; ramique hujus venæ id reassumere possunt, quod pleuritiden producit. At vena ista in cavam venam exoneratur.

GAL. Nulla igitur recta via à vena vertebrali ad brachii venas; & sanguis venæ azygos, sive finè pari permiscetur universo sanguini, qui per cavam trajicitur?

WILL. Nulla profectò; & sanguis venæ vertebralis permiscetur sanguini totius corporis, qui per cavam trajicitur, Cava autem sanguinem infundit in dextrum cordis ventriculum. Et à dextro cordis ventriculo per arteriam pulmonicam sanguis in pulmones diducitur.

GAL. Quænam est hæc arteria pulmonica! habet ne fortè ramum aliquem, quo sanguis feratur ad brachium?

WILL. Neque item habet: quamve tu dicebas venam arteriosam, nos appellamus arteriam pulmonicam. Atque hæc arteria in pulmonibus dividitur, & subdividitur in minutissimos furculos. Sant autem in pulmonibus iisdem radices venæ pulmonaris; quæ primum inconspicuæ sunt, aut vix alicubi conspicuæ: verùm mox concurrentes ad invicem majores venas constituunt; & hæ concurrentes majores alias venas efformant; donec ex omnium concursu vena pulmonaris constituatur. Quæ id omne suscipit è pulmonibus, quod ad ipsos per pulmonarem arteriam delatum fuerat; undè patet etiam, quòd reassumere possit id, quod peripneumoniâ constituit.

GAL. Optimè quidem rem habemus. Sed est ne ramus aliquis hujus venæ pulmonaris, qui recta feratur ad brachium; & quænam est hæc vena pulmonaris?

WILL.

(a) Will. de pleur.

(1) Nihil magni interest quænam vena secetur in pleuritide, vel peripneumonia.

(2) Quibus viis pleura, vel pulmones cum venis brachii communicare possint.

WILL. Vena pulmonaris est vas illud amplum, quod à te dicebatur arteria venosa; cujus nosti, Galene, nullum ramum dimitti ad brachium Sanguis autem venæ pulmonaris, per quam similiter transit sanguis universi corporis, in sinistrum cordis ventriculum diducitur: indèque in aortam propellitur; quæ in plures dividitur ramos; hique in alios minores, atque minores: donec extremi furculi arteriarum sint planè inconspicui: sanguinem tamen transfundunt in minimas venulas; quæ majorum venarum radices potius appellandæ sunt, quàm rami.

Cum autem brachii arteriæ sint rami arteriæ magnæ, sive aortæ; necessum est partem aliquam ejus, quod in magna arteria continetur; & retrogrediendo; necessum est, partem aliquam ejus, quod in sinistro cordis sinu, & in pulmonari vena est; & portionem aliquam ejus, quod à parte pulmonum affecta susceptum est, ad brachii arterias propellatur: è quarum minoribus furculis demum in brachii item venas, quidquid illud est percolatur.

ERAS. O admirabilis animantium corporis structura! quæ tot fontes, tot rivos, tot minores, atque minores rivulos habet; tot habet flumina tam facilè inter se communicantia! E majoribus fluminibus in minora; ab his in rivos, rivulosque minores, atque minores: indèque ad alios alterius fermè speciei minores rivulos; è quibus in majores, atque majores rivos: postmodum ad majora flumina! Quibus motibus alia segregantur; alia minutissimè permiscuntur; & multa sanè perficiuntur; quæ nequè hominis, in quomet illa fiunt, mentis acie satis assequi possunt!

GAL. Cæterum, Willis hac tua disertissima motus sanguinis descriptione causa cecidimus.

A pleura (1) ad venam Azygos; à vena ista sinè pari in cavam; è cava in dextrum cordis ventriculum; è dextro ventriculo in pulmones; à pulmonibus unà cum eo, quod fortè è parte affecta pulmonum suscipitur, ad arteriam venosam iterum ad cor, sinistramque ejus sinum; à corde in aortam; ab aorta ad universum corporis habitum; & consequenter etiam ad brachia! Causa planè cecidimus, Willis.

Quota enim est, hæc portio ejus, quod à parte affecta pulmonum, vel pleuræ ad brachii venas deferitur; si ulla ejus, quod restagnabat, & tanquam spina infixæ quiescebat, deferitur? probandum enim hoc etiam esset.

Quota etiam est ejusdem portio, quæ ad unam basilicam brevi illo tempore diducitur? sunt enim plures in brachio venæ.

Vide, Willis, an plùs inculpati, quàm lentescens sanguinis educas? Si quid enim ex parte affecta movetur, permiscetur priùs sanguini universi corporis: postmodum sanguinis vitiosi, quivè restagnabat, particulæ velut factæ agmine, non minùs ad brachia, quàm ad caput, ad pedes, ad renes, & ad colem ipsum, cæterasque partes feruntur.

Ac etiam si hoc tibi concedat Erasistratus, tunc cum vena in brachio adaperitur, statim aliquid auferri ejus, quod in parte affecta morbum faciebat; attamen priùsquàm hujus portio aliqua quantulacunque ad foramen accedat,

(1) Si sanguinis detractio non fuerit magna nihil ex secta in brachio vena evacuetur ejus, quod in pulmone, vel pleura restagnat; ac cum magna fuerit parùm sanè educitur.

cedat, tùm neceſſum eſt; evacuetur priùs is ſanguis, qui in illa vena, quæ ſecatur, continebatur; tùm neceſſum eſt, priùs effluxerit proportionalis portio ejus ſanguinis, qui continebatur in arteria brachii; & ejus, qui continebatur in aorta, & in ſiniſtro cordis ventre; & proportionalis etiam portio ejus, qui continebatur in arteria venoſa: uſque ad partem affectam: ac demum poſtquam is ſanguis effluxerit portio fortassis aliqua ejus, quod à parte affecta ſumptum eſt, deveniet ad foramen. Atque ideò non parum ſanguinis oportet eduxiſſe priùs; quàm particulæ aliquæ, veluti factò agmine, à parte affecta pulmonum ad foramen accedant.

Illud (1) ſuperellet opponendum his, quæ ab Erasistrato, vel ab Helmontio dicta ſunt; dum venæ largiori miſſione evacuantur, exinanita vaſa faciliùs reſſumere, quod extrà in partem affectam illapſum eſt, reſtagnatve; nequè hoc omne, quod aufertur, poſtea iterum in partem affectam recolligi? Verùm monuit Erasistratus ſanguinem; cui parum adjicitur, repetitis circuitiõibus tùm diſſipari, tùm perfici; ut poſteà faciliùs ſolvatur, & in circulum rapiatur id, quod alicubi inflammationem, ſivè tumorem facit. Secus miſſo ſanguine id, quod ejus reliquum eſt, vel remanet ut priùs; vel ut nos dicimus ob virium jaſturam fit effectum, iners & ignavum; ut major vitioſarum partium in affectum locum deſcriptio, & corruptio vaſorum expectanda ſit, non diſruptio tantum. Addidit inſuper nequaquam propter defectum capacitatis, & amplitudinis vaſorum non reſſumi id, quod alicubi hærens, reſtagnantve morbos facit; ſed propter alias cauſas.

WILL. Quid (2) ſi cucurbitulæ cum ſcarificatione extrinſecus applicentur dolenti loco in pectore, & ſublinguales venæ pertundantur in angina; extrahaturque ſanguis parti affectæ proximus?

ERAS. Fortè leviùs peccabis; obſervatum enim aliquando eſt per proximum in urethra ulcus expurgari bubones inguinum: licèt non rarò etiam obſervatum fuerit occasione proximi ulceris intumuiſſe bubones. Sunt fortassis occultæ viæ, quæ ducunt ab A ad B diverſæ ab illis, quæ ducunt à B ad A; & non eſt earum idem uſus; nequè in quovis ulcere omnes iſtæ viæ ſimiliter afficiuntur.

GAL. O ſtulta Medentum argumenta? tecum exclamabo, Helmonti, ego exiſtimabam ſectiõne venarum ſiniſtræ manus liènem curari poſſe: ſectiõnæ venæ in dextra manu, quæ inter minimum, & annularem digitum intercurrit, hepar ſanari! Hæc tamen & ſimilia ſæpè docuit Hippocrates, ſivè Heraclidis, ſivè Draconis filius? O vaniſſimæ clariſſimorum virorũ cogitationes. *Dextra (a) nare, ajebam, ſanguis erumpens ad dextrum hypochondrium fixa cucurbitula, clarè, celeriterque ſiſtitur; ſicuti ad ſiniſtrum è ſiniſtra erumpens.*

Sic res videbatur, & ſic eventus aliquando offendeſcit. Sed incauti eſt facilè pronũciare; ubi aliquid ſemel tantum, aut bis fuerit obſervatum; & rei natura adhuc ſit abſcondita. Fieri namque poſteſt, ut caſu, fortuna, animi affe-

(a) Galenus de cur. rat. per ſanguis miſs. cap. 15.

(1) Detractione ſanguinis venæ non reſſumunt faciliùs id, quod extra vaſa effluxum erat.

(2) Scarificationes circa partem affectam an prodeſſe poſſint, ut & ſectio venarum ſublingualium in angina.

affectu, aliave causa, dum sanguis mittitur, aliquid contingat; quod nullam habeat cum missione connexionem.

WILL. Non inficiabor omnia, quotquot fuerunt Medicorum placita incerta nimis esse. Ego observavi, quod miraberis Galene, in ægrotante quodam sanguinem per intervalla expuenti, ex sanguinis per sectam (a) venam evacuatione (fuit autem pluries illi vena incisa) semper constanterque sanguinis sputum fuisse exacerbatum! Si desisset sanguis ore emitti; phlebotomia denuò sanguis ab ore prodibat!

HEL. Hujus ægrotantis archeus indignabatur sanguinis missionem; & indignationem ostendebat majori sanguinis in partem affectam influxu. Alterius verò archeus fortè demissior fuisset, & pacatior ex sanguinis missione: non enim ex eadem occasione eadem imagines imprimuntur in archeo; nequè eadem in omnibus excitantur affectiones. Quantò meliùs fecisses, Willis, si omissa sanguinis missione, decus proximæ tibi Germaniæ Helmontium imitatus propria, & specifica morborum remedia investigasses?

GAL. Musæ meritò sum adstipulatus, qui stercore canino albo in angina utebatur: *hoc enim pharmaco* (1) *fortius nullum novi nequè in angina; nequè in magna tonsillarum inflammatione; aut iis, quibus ex glandulis suffocationis periculum imminet.* Hoc etiam habeo humani stercoreis experimentum. (b) *Affiduè quidam phlegmonis ad guttur existentibus vexabatur; adeò vehementer, ut suffocationis subiret periculum: & sane ob hoc periculum sanguinem mittere cogi videbatur. In hunc, cum fortè quis incidisset, pollicitus est se præbiturum medicamenti experimentum; & se vocari, si quando rursus aliqua in parte gutturis emicuiisset phlegmone, ante sanguinis missionem præcepit. Itaque vocatus, medicamento illito, statim hominem curavit. Quod etiam in aliis quamplurimis similiter affectis pluries, atque pluries felici cum successu observatum est. Erat autem remedium illud pueri stercore biduo lupinis (c) more quo edi solent cum pane bene cocto in clybano modicum salem, & fermentum habente, pasti: vinum vetus superbibendo. Non quia, si aliis cibis vesceretur puer, remedium esset minus efficax; sed quoniam stercoreis pueri, sic lupinis victitantis, esset minus foetidum. Multos etiam tonsillis, & glandulis aliis tumefactis ferè suffocatos, absque sanguinis missione curavi succo (d) corticum nucum.*

Sanguinem verò & hœdi, & capræ, & hirci ad hæmoptoicos plerosque valde utilem expertus sum. Verùm iis, quæ rationibus meis minus convenirent, parcius sum usus, fortè non sinè ægrotantium incommodo.

Enim (2) verò in oculorum inflammationibus non audebam aliquandò vinum propinare; etiam si cognovissem vinum ab Hippocrate fuisse commendatum. Vinum nanque, maximè rubrum, parùm differt à san-

(a) Will. de sang. sput.

(b) Gal. de compos. pharm. 2. locos; & de simp. medic. facult. lib. 10.

(c) Gal. loco sup. citato.

(d) Gal. de compos. pharm. 2. locos l. 6. cap. 1. fol. 167.

(1) Remedia, quibus absque sanguinis missione Galenus observavit anginas curari.

(2) Vinum sanat plerasque inflammationes.

à sanguine ; & calidum potestate cum sit , & ad humorum plenitudinem majorem faciendam nimis aptum , officere potiùs , quàm conducere posse ophthalmia laborantibus videbatur . Cæterùm rem tandem ausus , juvenem sanavi , cui oculi (a) squallidi quidem erant , sed venas habebant valde tumidas , & sanguine plenas . Jussi , ut cum se lavisset , potu uteretur meraciore , & ita se sopori traderet . Quod factum est ; somnus enim profundus ipsum invasit ; & manè sinè dolore surrexit : mihiq̃ue fiduciam præbuit , ut in quibus sanguinis copia crassioris , sivè lentescantis , ut ais Willis , in oculorum venulis contineretur , sinè plethorica totius corporis dispositione (quæ non fuerat , vel defierat in hoc ægrotante ; quoniam plures dies præterlapsi erant) uterer (b) vini potione ; ut quæ diffundere sanguinem , atque dimovere possit , sui que motus vehementia obstructions aperire .

Minimè autem dubito , illud idem , quod in oculis consistens ophthalmiam ; in pleura lateris dolorem efficere posse : ut experimentis edoctum existimem Hippocratem illum , qui libros de morbis conscripsit , & in pleuritide vinum commendavit . Vinum enim obstructions eas aperire potest , quæ inflammationem faciunt .

Nequè his tecum dissentio , Willis , qui vini , & liquorum ardentium immodicos potus , causas sæpè esse pleuritidis , saltem remotas , affirmas . Quid enim mali non facit cujusque rei intemperantia ; & mala rerum omnium combinatio ? Sed ea medicamenta ritè administrata , quæ affectos ; ignavos , inertes , & pigros , & crassos emendant humores ; obstructions etiam , & inflammationes curare possunt ,

ELM. Id (1) quod autem summæ admirationi est , Galene , scito ; eos qui erysipelate infestantur , (videtur autem tibi erysipelas inflammationis species omnium maximè calida) & à largiori sanguinis missione maximum subeunt vitæ periculum , ardenti vini spiritu sanari posse .



(a) Comm. 6. aphorism. aphorism. 31.

(b) Comm. 6. aphorism. adhor. 31.

(1) Spiritus vini sanat plerasque inflammationes.

DIALOGUS

TERTIUS.

GAL.



NON dissimulabo, Viri Clarissimi, experimenta vestra subvertere doctrinae meae fundamenta, quae videbantur firmiora. Et satis, superque video, si vivens fortè ego his rectè uti velim, quae in corporum anatome sive igne, sive cultro parata, cognovistis, multa prius mihi essent dediscenda. Cæterum, viri æterno digni nomine, quoniam res eò perducta est, ut haud multa desiderem ad veterem sententiam deferendam, scrupulum diluite, quod superest.

Sunt quædam sanguinis evacuationes à natura institutæ, quibus à plerisque morbis homo liberatur, & iisdem retentis, in morbos incidit; ut est fluxus hæmorrhoidalis; & quæ menstruatim fit in foeminis, sanguinis ex utero evacuatio: Et morbos sæpè vidimus graviores, sanguinis è naribus, vel alia ex parte fluxu curatos.

Cumque apud omnes in confesso sit, medicum debere esse naturæ imitatore; videamus, & hoc etiam: An si quando natura in his deficiat; & menses mulieri; vel hæmorrhoidales venæ homini minimè fluant; aut alia sit suppressa consueta sanguinis evacuatio; vel natura deficiat in crisi, quam sanguinis fluxu sæpè instituit, medicus naturam imitatus, debeat venas secare; & sanguinem mittendo, arte supplere debeat id, in quo natura deficit: ut hac saltem ratione conveniat plerumque, atque profit sanguinem mittere.

Verùm enim verò, etiam, atque etiam exoro vos, ne me interrogetis; quidnam pro natura ipse intelligam: veluti factum est cum de inflammationibus agebamus; interrogastis enim, quid pro inflammatione ipse acciperem. In præsentia autem exterritus iis, quæ hætenus dicta sunt, non aulam definire, quid pro natura intelligendum sit. Vos igitur hoc etiam decernite.

Memini (1) tamen me alicubi scripsisse, ex solius cutis hominis diligentiori inspectione, perspicuum fieri *mentem* (a) *quandam esse, quæ vim habeat admirabilem, quæque terras omnes pervadens in omnes ejus partes extendatur*. Nequè ea tantum, quæ in homine observantur, hoc denotant; sed (a) *quodcunque aliud animal difficare velimus, parem in eo artem opificis, ac sapientiam reperiemus; & quantò ipsum minus fuerit, tantò maiorem nobis admirationem excitabit*. Mentem istam nonnulli naturam appellant: mihi autem videor, cum dicerem, naturam esse in homine morborum omnium medicatricem, & medicum naturæ esse ministrum, & imitatore, nequaquam hanc intellexisse naturam.

Ac,

(a, a) Gal. de usu partium lib. 17. cap. 11.

(1) Variæ Galeni, aliorumque de natura definitiones, atque sententiæ.

Ac, nisi me memoria fallit, librum composui, in quo quæsi, an animal sit id, quod in utero est; & an mundus sit animal; & alia multa; in quo mihi videor distinctionem fecisse inter animæ naturam, & corpoream hominis naturam. Illam dixi intelligentem, volentemque, & rationis, consiliique plenam. Alteram naturam mortalem appellavi, atque terrestrem, (a) & intelligentiæ expertem; quæ nequè rationem habeat; & mortalem solam circumcuium cognoscat; operamque interitui obnoxiam accipiat.

Stoici autem spiritum dicebant animam, itemque naturam.

Alicubi dixi naturam idem significare, ac formam (b) substantialem, quæ non est captu facilior, quàm sit spiritus, vel anima, vel mens.

Cum autem exponerem aphorismum in morbis (c) minùs periclitantur, quorum naturæ, aut ætati, aut habitui, aut tempori magis congruit morbus; dixi Hippocratem tum in eo loco, tum alibi, & in toto libro de natura hominis accipere naturam pro ea, quæ ex primis elementis fit, temperatura: nequè minus dubium est, quænam sint prima elementa; & quæ ex ipsis fiant temperaturæ.

In libris autem de temperamentis naturam (d) cum dixi, universam substantiam, ac temperiem, quæ ex primis elementis conflatur, significavi; calido, frigido, humido, & sicco. Quæ omnia, ut video, vobis minimè arident.

Sed in libro, cujus titulus est, quod animi vires corporis temperaturas sequuntur, naturæ (e) nomen idem sonare dixi, quod & substantiæ nomen.

Cæterum in libris methodi medendi, fortunam, artem, & artificem, materiarum interventu agere; naturam verò per se ipsam: eamque ex his tribus partibus compleri affirmavi, ex (f) spiritus, & partium, quæ verè dicuntur solidæ, substantia (quas alibi ex semine genitali conditas esse affirmavi) & tertia ab his carnosæ, quæ cuique parti cule est sua. Singulas autem jam dictarum trium propriam pro natura sua, tum qualitatem habere, tum quantitatem: ac qualitatem quidem earum consistere dixi in congrua temperie humidi, sicci, calidi, & frigidi. Et multa alia his similia eodem loco addidi; quæ maximis difficultatibus jam video urgeri posse.

Hippocrates insuper mihi visus est libro de victus ratione in morbis acutis, pro natura accepisse non solum temperaturam; verum etiam habitum, (g) struemque corporis, & compositionem.

Sed in libris de crisis morbum ego oneri comparavi; & ægri naturam onus hoc sustinere, & bajulare volui; ac pro natura idem intelligendum esse putavi, ac vires (h) ægrotantis.

HELM. Hui, Galene, quis unquam ex his rectam naturæ definitionem explicabitur?

H 2

GAL.

(a) Gal. an animal sit, quod in utero est cap. 4.

(b) Comm. 2. aphorism. aphorif. 34.

(c) Aphor. 2. aphorif. 34.

(d) Galen. de temperam. lib. 3. cap. 4.

(e) Gal. lib. quod animi mores &c. cap. 2.

(f) Gal. meth. med. lib. 11. cap. 1.

(g) De victus rat. in morbis acutis comm. 2. tex. 47.

(h) De crisis lib. 3. cap. 3.

GAL. Jam sum hoc protestatus ; difficillimum mihi videri ex iis, quæ docui , naturam definire . Sed illud minimè dubitandum est , naturam sanguinis evacuatione multos morbos curare consuevisse .

HELM. Hoc mihi semper objiciebant Medici plerique ; venæ sectionem remedium esse à natura inventum ! Aliique etiam humanioribus literis ornati viri, ut ut à Medicis acceperant , hæc eadem objectabant .

Ex ⁽¹⁾ his tamen non pauci omninò ignorare videbantur , quid natura esset ; & quid pro natura ipsimet intelligerent . Qui autem erant minùs imperiti , Socratis veluti Dæmonem aliquem , qui de hominibus benemeretur , intelligere videbantur : quæve salutaria contingerent in morbis , à natura , sive ab eudæmone aliquo facta existimabant : quæ verò minimè salutaria essent , præter naturam fieri dicebant ; ac veluti si à cacodæmone aliquo , qui morbo faveret , facta essent , damnabant .

Rem istam nimis , atque nimis ampliabant : ac agebant naturam dies , mensesque noscere ; in quibus salutariter movere aliquid consueta sit . Contra verò etiam rerum præter naturam autorem, dies , mensesque suos habere , affirmabant ; in quibus in alicujus damnum , & vitæ perniciem aliquid molitur . Hinc multa de septimestri , & octimestri partu : multa de iis dicebantur , quæ sexta , vel septima , vel octava , vel alia die observarentur in morbis , Astrologi accedebant , qui retinentes ea , quæ asserebantur de septimestri , ac octimestri partu ; & de diebus decretoriis ; omnium tamen , quæ acciderent in hominum vita , præcipuas causas quærebant in astris ; & ab astris etiam sciscitabantur ; expediret ne , an non sanguinem mittere ; & mittendi opportunitatem temporis ab astris petendam esse affirmabant .

GAL. Quæso , Helmonti , antequam unam expediamus fabulam , non transeamus ad fabulas alias . Hæc , quæ memoras de Astrologorum sententia , & de diebus decretoriis , non pertinent ad præsentem quæstionem .

HELM. Operæ ⁽²⁾ pretium tamen fuit ; hanc non prætermisisse rationem , non convenire sanguinem mittere propter æternam homini Astrologiæ Divinatoriæ ignorantiam .

Vis autem, Galene, definiam tibi naturam ? accipe definitionem *Christiano homine (a) dignam* : *Natura est Dei iussum , quo res est id , quod est , & agit id , quod agere iussa est .*

ERAS. Galeno obsequamur , Helmonti ; omnia enim complexus est , quæ dici possunt . Ac primò determinemus , an sit quicquam non naturale , sive præter naturam , aut extra naturam . Qua de re omnes stricto more , & rigorosè loqui debent ; non impropriè , vel metaphoricè , ne facilè decipiantur à metaphora .

WILL. Quid est autem extra , aut præter naturam universam , quæ omnia comprehenduntur ?

HELM. Omnia iussum Dei sequuntur , & omnia faciunt id , quod facere iussa sunt ; nequè ipsam excipio mentem humanam , & intelligentias alias ; quæ arbitrio uti iussæ sunt . Licèt arbitrium sit sæpè causa (b) peccati,

(a) Helm. in plurib. locis.

(b) D. Aug. in lib. conf.

(1) *Quidam pro natura intelligunt veluti Dæmonem aliquem.*

(2) *Ars Astrologica divinandi ignoratur, & ignorabitur.*

ti, ut ait Augustinus. Sed peccatum nihil ponit in natura; estque potius defectus aliquis naturæ, sive, quod idem est, alicujus boni privatio. Quidquid enim est in natura, bonum est, & à bono est; hoc est, à Deo est.

ERAS. Deus (1) autem est prima supremaque natura; simplex, atque una; in qua omnia vivunt, & comprehenduntur omnia. Estque in Deo natura ipsemet Deus.

In (2) homine similiter natura est ipsemet homo. Verum natura humana non est simplex veluti Divina. Diversa, & multiplicia sunt corporea in homine organa; quorum multiplex, atque varius est usus. Tum etiam præter corporis naturam alia in homine reperitur natura, incorporea; & omnino spiritualis. Quæ omnia naturæ, corporeæ, & incorporeæ simul juncta, hominem constituunt.

Magnum (3) tamen commercium est inter utriusque substantiæ, corporeæ, & spiritualis animæ, in homine naturas; & magnum habet spiritus in corpus imperium. Ultrumque manifestum est, tum ex hoc, quod multa moventur in corpore ad mentis libitum; tum ex eo, quod dum homo vivit, nulla fortè fit spiritus, sive mentis actio, ad quam corpus motu aliquo non concurrat. Hinc est, quod defatigetur tandem corpus, & languescat, non solum dum sensibiliter movetur sive ambulando, sive natando, aut aliter sese exercendo; verum etiam videndo, & audiendo. Dum memorando, præterita repetit animus; & dum imaginatur; & dum mens sedulo, spatioque temporis longiori de re aliqua cogitat, sit ne, an non sit, & ut sit? lassatur quodque tandem corpus.

Nescio (4) autem, an in homine post varios partium corporis labores, purissimum intelligere, sit solius mentis opus: in quo corpus minimè amplius defatigetur; quàm fuerat defatigatum in indagatione eorum, quæ necessaria erant, ut res intelligeretur.

Rem sic explico: cum fortè fuerit. A æqualis B; & C, minor quàm A, vel B, sed æqualis D; ut mens intelligat, an A minùs C æqualis sit B minùs D; necessariò homo priùs concipere debet A, & B; & cognoscere debet, an A æquetur B: quæ nequaquam fiunt sinè aliquo corporeorum organorum labore. Postea concipere debet C, & D minores singulas quàm A, vel B; & cognoscere debet an C æquetur D: quæ item sinè aliquo corporeorum organorum conamine minimè fiunt. Verum postquam homo hæc conceperit, atque cognoverit; & postquàm instrumenta corporea fuerint in his aliquo pacto defatigata, fortè mens nullo alio indiget corporis labore; nullo alio indiget instrumentorum corporis motu, ut intelligat jam conceptam A minùs jam concepta C, æquari jam conceptæ B minùs jam concepta D. Quoniam mens hominis intelligendi vim habens fortè ex sui natura, & sinè corporis auxilio, & sinè ulla acquisita scientia per se intelligit, atque novit remanere æqualia; ubi ab æqualibus æqualia ablata fuerint. Sic postquam homo

con-

(1) Natura rei est ipsamet res.

(2) In homine natura non est una, atque simplex.

(3) Magna est inter animæ, & corporis naturam communicatio.

(4) Dubitatur an purum intelligere in homine sit opus solius spiritus, sive animus.

conceperit aliquod, quodcunque illud sit; mens ejus ex se, sive ex sui natura intelligit, illud idem esse, vel non esse. Sic alia multa mens hominis novit.

Hæc (1) tamen affirmo non sine aliqua hæsitatione: etenim ut determinantur, quæ dicta sunt; necessum est prius novisse, quid ex se mens humana possit; tum cum reperitur in corpore; tum cum est nuda, sive extra corpus. Ego autem licet fuerim in corpore viventi; attamen tunc minus recte sum de his speculatus. Quod etiam ferè semper omnibus accidit hominibus: qui nihil minus recte contemplantur, quam mentem; qua Deo sunt similes. Nequè etiam, ut opus esset, nunc memini eorum omnium, quæ mihi, dum viverem, contingebant. Viventes autem, quoniam nullam viam habent, qua clarè cognoscere valeant, quid mens ex se possit in corpore; quid possit extra corpus; & ut extra corpus mens eorum intelligat, nihil etiam de his certò determinare poterunt.

Prætereà (2) mens hominis arbitrio utens, & diversimodè corporis dirigens motus, varias etiam sæpe in illo excitat tempestates, ut sic dicam: quæ licet frequenter animi affectus appellentur; nunquam tamen sunt sine aliquo corporis motu. Adeò ut non rarò etiam, posteaquam cessaverit animi affectus, remaneat in solo corpore aliqua læsio, & organi mutatio. Sic sæpe numero, etiam si desierit timor, remanet spasmus cynicus; aut alius morbus, qui ab illo animi affectu ortum habuit: quod quidem sæpè accidit.

Partium (3) insuper corporis natura propter varios motus, variasque figuras, & aptitudines, & ut uno verbo omnia dicam, propter varios modos, varia etiam, atque diversa videtur: & multa fiunt ex vario concursu partium corporis, quarum modi; hoc est, motus, figura, situs, dispositio, combinatio, & alia similia, non sunt uniusmodi. Sic saliva naturam habet, quæ non videtur eadem, ac bilis natura: estque salivæ natura ipsamet saliva: & bilis natura est ipsamet bilis. (4) Sic aliæ fluidæ substantiæ in animante, aliæque partes etiam solidæ pro ut variæ sunt; & varios obtinent modos, varias aliquo pacto, & non uniusmodi naturas habent: quarum proinde varius est usus: & ex ipsarum concursu vario, diversa, atque diversa fiunt; sive in cibo; sive in sanguine; sive in tenui substantia, quam spiritum dicimus, (corporeum tamen ad differentiam alterius omninò incorporei) sive in fibris cerebri; sive in corde; sive in aliis partibus solidis.

Hæc (5) autem, quæ fiunt, nonnunquam sunt salutaria; nonnunquam perniciofa, & mortem accelerantia; atque totam corporis œconomiam perturbantia, nonnunquam actionem aliquam excitant, vel ad illam eandem faciunt hominem impotentem. Sic dum luminis natura, hoc est ipsum lumen, concurrat cum oculi natura; sive quod idem est, dum lumen ferit oculos; quædam fiunt, ac moventur successivè: quibus demum, vel videat ho-

mo

(1) Homo nequit cognoscere, quid mens possit absque corpore.

(2) Mens hominis multa movet in corpore.

(3) Modi diversi corporearum substantiarum efficiunt, ut illarum videatur varia, atque diversa natura.

(4) Concursu vario rerum varia fiunt.

(5) Quæ vel salutaria sunt, vel noxia, & perniciofa animanti.

mo, vel fiat cœcus: ut accidit: cum lumen vehemens nimis est. Alia, atque alia fieri necessum est, tùm concursu inter se naturarum, quæ intra hominem sunt, & simul sumptæ totius hominis naturam componunt; tùm concursu naturarum, quæ extra hominem sunt, cum iis naturis, sive aurium, sive oculorum, sive narium, vel aliarum partium, quæ hominem constituunt.

Naturæ (¹) autem rerum omnium universi constituunt naturam; quòd idem est, ac dicere res omnes constituunt universum. Estque universi natura ipsummet universum: non minùs ac naturæ partium horologii, sive partes horologii simul aptè conjunctæ, atque dispositæ, universum constituunt horologium.

Omnia (²) igitur, quæ sunt, naturam habent, & natura consistunt: sunt enim id, quod sunt.

Et quæcunque ab his fiunt, naturam habent, & natura consistunt; quoniam ipsa quoque sunt; & ab his sunt, sive ex iis facta sunt, quæ naturam habebant, & natura consistebant; hoc est, erant. (³) Quamobrem in homine vita, morbus, sanitas, mors, & alia, quæ ipsi contingere possunt; natura sunt, vel contingunt. Ac etiam, si casu lapidis majusculi caput homini diffringatur, natura diffringitur: & præter, sive supra naturam esset, si concurrentibus iis, quibus caput diffringi potest, caput non diffringeretur.

Atque (⁴) idèd nolim, Galene, Medicum appellari imitatore naturæ; nam natura servat; natura perdit hominem: & qui sanat, & qui enecat, est imitator naturæ.

GAL. Adhuc non video difficultati factum esse satis. Ac vix conjicio velle vos Medicum non debere esse imitatore nature sive benè, sive malè operantis; vel cum ægrotantis, & vitæ ejusdem sive commodo, sive incommodo: sed debere Medicum imitari naturam benè tantùm, sive salutariter, & cum ægrotantis commodo operantem. At natura sæpè disrumpuntur vasa, è quibus sanguis effluit maximo cum ægrotantis hominis operæ pretio: ut si hac ratione benè operantem naturam Medicus imitari velit, venas sæpe difsecare debeat.

Verùm lubet meliùs, atque rectiùs examinare, quid sit natura: neque digressio erit Medico inutilis.

Definitio (⁵) autem illa; *Natura est id, quod res est, cujus dicitur natura*; minimè convenit cum Aristotelis disertissimi Avi tui, Erasistrate, definitione. Aristoteles enim libro secundo physicorum dixit, *Naturam esse principium aliquod, & causam movendi, & quiescendi, in quo est primò, & per se, & non secundum accidens*. Qua definitione Aristoteles separavit ea, quæ naturam habent, & natura consistunt, ac natura fiunt; ab iis, quæ arteconstant, & à reliquis omnibus, quæ fiunt per accidens; non per se. Ut cum homo Medicus sanat semetipsum,

non

(¹) Naturæ rerum omnium, sive res omnes universi constituunt naturam.

(²) Omnia, quæ fiunt, aut sunt; natura fiunt, aut sunt.

(³) Miraculosum, sive supra naturam, aut præter naturam quidnam est.

(⁴) Qui enecat, & qui sanat; est imitator naturæ.

(⁵) Aristotelis de natura definitio adducitur, quæ tandem improbat.

non quidem natura is sanatur, inquit Aristoteles; sed per accidens: quoniam accidit homini ægrotanti esse Medicum; & potest is idem ægrotare absque eo, quod sit Medicus. Similiter Statua, & domus, & alia fabrefacta non sunt natura, quoniam lignum, lapides, & alia, ex quibus hæc fiunt, non habent in se principium motus; quo statua, vel domus ex ipsis fiat. Vos autem Erasistrate, atque Helmonti videmini confundere omnia; quæ casu; fortuna, arte, & quæ natura, & secundum naturam fiunt; & quæ natura constant, & quæ non constant.

WILL. Satis erit, Galene, si quæ nostra sunt defendamus, vel explicemus; sin minus corrigamus: omissis iis, quæ ab Aristotele dicta sunt.

ERAS. Nihil casu fit, vel fortuna: *æterno consilio feruntur*, (a) *semper currunt opera necessitatis*, aiebat Zoroaster, qui Cham, sive Chami filius, aut nepos fuit. Homines autem sæpè casu, vel fortuna fieri inquiunt ea, quorum necessitates ignorant; sive quorum ignorant causas, ex quibus illa eadem facta sunt.

Artifex (1) autem quicumque nihil novi ponit in natura; sed transfert tantum huc, atque illuc ea, quæ natura sunt, vel naturam habere dicuntur. Statuarius abscindit, vel deradit è ligno has, vel illas partes, quæ sibi videntur. Et id demum, quod ligni remanet, statua est. Vel huc, atque illuc transfert ceræ partes statuarius; quæ sic aptè transpositæ statua sunt. Sic alii artifices nihil moliuntur, & nihil novi ponunt in natura; nisi quodd eorum industria huc, atque illuc aptè transferuntur, & transponuntur ea, quæ sunt; hoc est ea, quæ naturam habent.

GAL. Verùm figura, in qua potissimum consistit statua, non erat in ligno, vel lapide, vel cera, neque ad ligni, vel lapidis, vel ceræ naturam spectat: sed ligno, lapidi, vel ceræ indita est ab artifice: sive facta est ab artifice in ligno, vel in alia materia; & accidit figura ista statuæ ligno, vel lapidi, vel ceræ. Atque ideo statua non est ens per se, sive natura consistens; sed per accidens, sive artificiale.

ERAS. Figuram (2) indere, vel creare revera minimè potest homo; quoniam nequit homo artifex facere, vel creare figuratum: lignum scilicet, vel lapidem. Impropiè vero dicimus hominem dare, vel indere figuram ligno; vel creare figuram in ligno, cum huc, vel illuc transfert partes ligni; vel cum aliàs aptè deradit; alias sinit, ut prius erant: & in his quidem, quæ intactæ relinquuntur, consistit statua.

Si (3) his verò non es contentus, Galene, dicam statuam, & statuas omnes minores ligno præesse in ligno, priusquam lignum tangatur ab artifice: sic etiam in alia quacunque substantia corporea omnes dicam reperiri figuras; cum una tantum oculis conspicua sit; & reliquæ infinitæ abscondantur, & cooperiantur illâ, quæ oculis cernitur. Praxiteles autem auferens multas figuras è marmore primò, secundò, ac tertio conspicuas; sive quod idem est, abscindendo, & auferendo eas lapidis partes, quæ Alexandri vetabant, & abscon-

(a) Franc. Patrit. tom. 3. lib. 1. cap. 1.

(1) Artifex quicumque nihil novi ponit in natura.

(2) Figura ab eo qui non potest facere figuratum fieri nequit.

(3) Infinitæ statuæ sunt in marmore quovis.

abscondebant statuas, tandem aperuit nobis, & manifestavit Alexandri imaginem, lapideamque figuram. Sic similiter alii artifices alias nobis manifestant, & aperiunt figuras, aliasque nobis ostendunt imagines. Alii verò artifices id maximè præstant, quod abscissa membra statuarum colligunt, & conjungunt, & aptè connectunt: ut statua, quæ prius minimè conspiciebatur, quoniam membra, & partes minores ejusdem longè removebantur ad invicem, tandem conspicua fit.

HELM. Verùm enim verò, Erasistrate, membra, & minores parti-
læ hujusce statuæ non habent principium sese movendi, & sese connectendi ad invicem; & sese colligendi in unum locum: veluti de Orrilo cecinit Poeta.

Se gli spiccano il capo, Orrilo scendo;

Ne cessa brancolar, fin che lo trovi:

Et hor pe 'l crine; & hor pe 'l naso il prende

Lo salda al collo, e non sò con che chiovi.

Pigliat tal' hor Grifone, e 'l braccio stende,

Nel fiume il getta, e non par, ch' anco giovi

Che nuota Orrilo al fondo come un pesce,

E co 'l suo capo salvo à la riva esce.

Quamobrem pro Aristotele respondebit Galenus, eas saltem statuas, quæ sunt per compositionem, & aggregationem, connexionemque partium, quæ prius remotæ erant ad invicem, non esse secundum naturam; nam non componuntur, & congregantur, connectunturque primò, & per se; sed per accidens manu artificis: secus ignis secundum naturam sursum fertur; quoniam hæc est ignis natura ad superiora spatia moveri; sive; ut ait Aristoteles, hujus motus principium est primò, & per se, & non secundum accidens in ipsomet igne.

ERAS. Licèt (1) annuas, Galene, quis tamen tibi, aut Avo meo Aristoteli revelavit hanc esse ignis naturam, superiora petere? Cur non potiùs protrusus ignis à circumfuso aere inferiora petente, per accidens, ut dicitis, sive non ex sui propria natura sursum fertur?

WILL. Boylius conterraneus meus machinam paravit, è cujus ventre aer extrahebatur; & multa, quæ in aperto aere, veluti ignis, ascendunt, ut fumus exempli gratia, in ventre illo constitutus, postquam aer extractus esset, descendebant gravium more, & ventris fundum petebant: quod etiam, licèt alia, & fortè faciliore etiam industria, pluries observatum fuerat in celeberrima illa Academia, quæ in Italia *del Cimento* appellata est.

ERAS. Ecquis Avum Aristotelem certum fecit, gràvia non impelli deorsum ab alia substantia; quæ ab alia moveatur; & illa ab alia! Ac quis cognovit in motibus corporum universi non dari veluti circulum quendam; in quo unum ab alio moveatur: & cum aliquod in eo signatum fuerit ultimum, hoc ultimum moveat primum; & primum moveat reliqua; à quorum uno moveatur, quod ultimum signatum fuerat! In circulo autem non est necesse signare primum, vel ultimum. Nequè illud necessum est in universo moveri omnia, cum unum movetur; multa enim jam fluida sunt, & facile sibi invicem locum cedunt: ut possit unum moveri absque eo, quod

Tom. I.

I

remo-

remotis corporibus ulla sensibilis fiat motus communicatio.

Vera (1) autem si esset Aristotelis de natura definitio (de qua tamen dubitandum est , an ita sit accipienda , ut vos illam accipitis) multa sanè , quæ ab ipsomet naturam habere , & natura consistere dicuntur ; multa , quæ secundum naturam in homine fieri creduntur , essent per accidens , ut vos dicitis.

Chylus non esset secundum naturam ; nam cibus non habet principium sese transmutandi in chylum : Nequè ventriculus , & ea , quæ in ventriculum confluunt , principium in se habent faciendi chylum ; requiritur enim concursus naturæ ciborum . Nequè ventriculus movetur per se , & ex sui natura iis omnibus motibus , qui conferunt ad ciborum confestionem ; alii enim communicantur à diaphragmate ; alii à corde ; alii ab aliis partibus.

Chyli , sanguinis , cæterarumque similium substantiarum motus in animante non essent natura , sive secundum naturam ; impelluntur enim à corde ; exprimuntur ab aliis corporibus : ac nullum habet sanguis principium sese in circulum agitandi : Motus igitur præcipuus , ac magis sensibilis in animante , à quo plerique alii motus dependent , est per accidens : eo sensu sumptis vocibus istis , quo vos eas accipere consuevistis.

Brachia , & crura non essent dicenda moveri in homine secundum naturam ; quoniam nullum brachiis inest animalis motus primum principium .

Visiones , auditiones , & cæteræ sensationes non essent secundum naturam : nam nequè oculi , nequè aures principium habent primò , & per se , & non secundum accidens sese movendi iis motibus , qui necessarii sunt ad visiones , vel ad auditiones : verum oculi moventur ab extrinseco lumine ; aures autem à quibusdam motibus , quos in aere contingit fieri.

Homo item non posset dici natura vivere ; nam non vivit omnino per se ; absque ullius extrinsecæ rei auxilio . Conservatur enim ab aere extrinseco , cujus perpetuò indiget ; & ipse movet aerem ; & movetur idem , & alteratur ab aere in omni statu , ac tempore sive morbi , sive sanitatis .

Nisi igitur dicamus omnia , quæcunque sunt , natura constare , & naturam habere ; ac naturam esse idipsum , quod res est ; & rerum , sive naturarum concursu vario varia fieri ; quæ etiam naturam habeant , & secundum naturam esse dici mereantur ; omnia fermè erunt per accidens ; eo sensu , quo vos voces istas usurpatis.

Verum enim verò , Galene , non parum ab instituto sermone sumus elongati ; nequè res est ulterius protrahenda . Tu igitur , qui huic digressioni occasionem dedisti , vide , quænam ex his , quæ dicta sunt , colligenda videantur ; ut illud demum determinetur.

AN

(1) Si vera esset Aristotelis de natura definitio , fere omnia essent per accidens.

A N M E D I C U S

*Imitatus naturam, profluvio sanguinis animal servantem,
venas aliquando secare debeat; Et quænam sint
venæ istæ secandæ.*

GAL. **D**ifficilior sanè nunc res est, & magis, quàm priùs intricata: vi-
debo tamen, quæ colligenda, & quæ deducenda ex his sint.

Omnia natura consistunt, & secundùm naturam fiunt.

Fluxu (¹) autem sanguinis è naribus, hæmorrhoidibus, ab utero, vel ex alia parte, homo non rarò servatur; sed fluxu sanguinis ex iisdem locis homo idem sæpè necatur. Aliquis vindicatur à morbis profluvio urinarum: nonnemo etiam profluvio extinguitur urinarum. Sudore plerique sanantur; alii sudore moriuntur. Dejectionibus alvi alii levantur: dejectionibus alvi alii è medio tolluntur. Natura disrupto, & ritè expurgato abscessu aliquo, homo sanatur: disruptione etiam abscessus alicujus, & irrumpentibus aquis, sanie, aliisque substantiis inter cavitates pectoris, vel inter membranas infimi ventris, animal quandòque de repente suffocatur, & occiditur; quandòque hydrope, vel aliis morbis corripitur: à quibus postea vel vindicatur, vel etiam moritur.

Nequè hæc, & alia quæcunque, utilia cum sunt, & salutaria, natura fieri; cum verò inutilia, vel etiam perniciofa, præter naturam esse dicenda sunt. Nequè alia ab eudæmone, alia à cacodæmone fiunt: sed omnia sive utilia, sive inutilia, & perniciofa, concursu fiunt vario rerum; hoc est naturarum: & quæ fiunt ex iis, quæ natura consistunt, natura quòque ipsa consistunt, suntque secundùm naturam.

Medicus proinde non debet esse simpliciter naturæ imitator; sed debet esse imitator naturæ, dum utilia, & salutaria molitur.

Animadvertendum, (²) inquam, igitur est, quæ concurrant, dum fluxu sanguinis, sudore, urinarum profluvio, aut alia evacuatione homo servatur; quæve concurrant, cum perditur. Attamen omni industria niti debet Medicus; ut ea concurrant, ex quibus salutaria consequuntur: & eorum concursum impedire debet, ex quibus consequuntur mortifera. Verùm sive peritus, sive imperitus fuerit, ut etiam quivis alius artifex, semper imitabitur naturam; nunc hominis viventis, & bene se habentis; aut amissam sanitatem recuperantis; nunc hominis languentis, aut morientis, & ratione aliqua malè se habentis; Quoniam nihil omninò fieri potest præter naturam ab iis, quæ natura consistunt.

Hæc colliguntur, aut deducuntur ex iis, quæ dicta sunt. Sed adhuc non video quando Medicus naturam imitatus benè operantem, venas secare debeat; & quænam venæ secandæ sint?

WILL. Vide Galene, si quid adjuvo, curasve levasso. Difficillimum

I 2

planè

(1) Quæcunque accidunt in morbis, natura accidunt, sive utilia, sive inutilia.

(2) Animadvertenda, quænam concurrant, cum aliquid salutariter fit.

planè homini ut plurimùm est, quamvis artium peritissimo singularem aliquam, determinatamque imitari naturam. Quamobrem nescit homo facere pomum; nescit facere folium, sive ficus, sive platani; nescit facere febrem tertianam, nescit facere quartanam; nescit eam introducere in animante dispositionem, qua id, quod noxium est, ad hæmorrhoidas, vel ad nares, vel ad uterum contendat; nescit facere homo capillum capitis sui. Atque ideo *Αιμαρροιας à natura (a) institutæ casus nonnulli extant, quos Medicina nequitiam imitari, nequò si fortè deficient, per phlebotomiam supplere potest. In febribus circa morbi crisin, scilicet post materiæ pepasum, hoc est ad discernendum præparationem hæmorrhagia spontanea, siquidem in tempore facta, phlebotomiæ cuicunque, cuius tempus optimum nescitur, longè præstat. Porro eatameniorum, & hæmorrhoidum fluxus naturæ instinctu eveniens longè utilior est, quàm sanguinis missio in iis locis ab arte provocata.*

ERAS. Vix meliùs dici potest. Singula autem breviter percurramus, quò res magis manifesta appareat.

Mulier (1) apta toro, ut plurimùm, quocunque anni tempore semper aliquid patitur ad speciei propagationem, vel fœtus nutritionem ordinatum: ac nisi lætet, vel utero gerat, ut plurimùm continuò aliquid in ejus utero præparatur; quod in fœtus usum abiret, si ipsa plena esset. Illud autem, etsi sæpissimè non sit in multa copia, replet tamen primùm partem nonnullarum viarum, acceditque ad illos poros, per quos transiret ad fœtus regiones, si fœmina utero gereret: ad placentam scilicet uterinam; & ad secundinas, quibus puer involvitur. Sed cum uterus sit inanis, & vacuus, frustra etiam hoc fit. Quocirca lapsu dierum, non solum quia hoc in majori copia erit coadunatum in illis meatibus; verùm etiam quia mora vitium aliquod concipit; tandem mulierem molestat, & conniventes poros aperit; è quibus effluit.

Sanguis autem ut plurimùm consequitur è proximis vasis sanguiferis, quibus cum communicant meatus isti, per quos aliquid defertur ad fœtum. Ac sanguine quidem abluatur uterus, & meliùs perpurgatur ab eo, quod jam molestum erat; quodve retentum magis minusve totum mulieris corpus turbare poterat: eadem, aut simili sanè ratione, qua malum quodcumque, in quacunque corporis parte genitum, ut & spina digito infixæ totum animal turbare consuevit.

Contingit autem sæpè numero sanguinem istum, quo uterus meliùs abluatur, non esse totum ejusdem generis cum eo, qui in fœminæ corpore reliquus est. Nam cum id, quod in fœtus usum transire debuisset, mora, vitium jam concepit, & cum tempus instat menstruationis; sanguis minùs liberè fluit per vasa uteri: quæ proinde turgent aliquantulum; & fit in ipsis partium ad circulum minùs aptarum coadunatio quædam. Postea verò cum ad aperta fuerint conniventia pororum oscula, hic potissimùm sanguis circulationi minùs aptus unà cum ea substantia, quæ hoc morbi genus concitaverat, educitur; & fœminæ benè est.

Hæc

(a) Will. de phleb. fol. 172.

(1) Fœmina menstruationem patitur propter ea, quæ præparantur, ac fiunt, in ipsius utero.

Hæc (¹) autem omnia natura fiunt . Et ex his manifestum est , quid , si statis temporibus uterus minimè fluat , alia sanguinis evacuatio ex secta vena prodesse possit ? Quæcunque vena secetur , id quidem ; quo menstruatio movetur , & utero primum dein , universo corpori molestum esse potest , nequaquam educitur . Nequè si hirudines applicentur venis cervicis uteri , modò nihil in his retagnet , commodum ullum sequitur . Et fabulosum omninò est sectione venarum pedis , uterum expurgari ; nullum enim peculiare commercium est inter venas pedum , & ea , quæ in utero consistunt .

Medicus imitari debet naturam benè quidem operantem , inquis , Galene . Igitur si potest , eos poros aperire debet Medicus , quos natura cum benè operatur , recludere consuevit in utero . Num si apostema , vel vena varicosa , vel spina aliqua sit in brachio , prodest adapertio , vel sectio facta in altero brachio , vel in pede ? Sepissimè quidem nequè prodest , si malum sit in eodem pede . Nam locus aptus adapertioni abscessus , exempli gratia , vel ut quævis causa morbi , & id , quod noxium est , & parti alicui inhæret , expurgetur , nequaquam latissimè patet Galene . Nequè quævis sectio vasorum , vel pororum adapertio necessitati satisfacit ; adeò ut non rarò cum malum sit in digiti articulo , sectio facta in eodem digiti articulo , propter chirurgi imperitiam , spes frustetur ægrotantis : quoniam etli non magna corporis pars sit digitus ; nequè magna digiti pars sit articulus ejusdem ; sectio tamen nequaquam in quacunque articuli parte est æquè conveniens .

GAL. Ego (²) autem credideram , menses moveri mulieribus ex sanguinis in toto corpore suberabundantia ; quoniam domi degunt , & segnem ducunt vitam : ut si ritè non procedant , venæ sectio defectum suppleat .

ERAS. Falsò credidisti . Sive abundet , sive non abundet sanguis in foemina corpore , nisi aliquid menstruatim fiat in utero , nulla unquam fiat menstruatio . Aliquando cum magna sit in universo corpore sanguinis inopia ; foemina tamen propter ea , quæ in uteris fiunt , profluvio pereunt sanguinis ab utero : & non semel , cum non desit sanguis , hac menstrua evacuatione eadem destituuntur . Nec si sanguis abundet , ratio ulla est , cur ab utero potius , quàm ab aliis partibus singulis mensibus fluere debeat ; nisi hæc , quod singulis mensibus aliquid sit in utero . Cumque biduo , vel triduo post menstruum fluxum foemina (maximè si largiori victu tunc utantur) tantundem humoris in vasis habeant , ac antè menstruationem habebant ; non ipsis , ex hoc , post biduum , vel triduum iterum fluit uterus .

Menses (³) moventur mulieri , iis , quæ in utero fiunt , ad conceptionem ordinata ; sive quorum usus esset foetui , si illa conciperet : potest autem homo concipere , quocunque anni tempore , & illis maximè sistuntur , & retinentur menses , quæ minùs cogitant de prole suscipienda ; & minùs cogitant de iis , quorum cogitatio movet partes conceptioni dicatas .

Aves quæ marem non admittunt ; aut non pariunt ova , aut pauciora sanè pariunt . Suntque , quæ concipiunt quidem ova ; sed illa parere nequeunt ; quo-

(1) *In defectu menstruorum , nihil juvat sanguinem mittere.*

(2) *Menses non moventur mulieri , ex sanguinis in toto corpore abundantia*

(3) *Quid analogum eius , quod movet menses homini , certis temporibus molestat cæteras animantes.*

quoniam maris congressu uterus earum, nequè fovetur, nequè excitatur tum ad ritè concipiendum; tum ad pariendum ova. Moriunturque sæpè ex hac causa inclusæ aviculæ, quoniam dulci maris destitutæ consortio infœcunda, quæ conceperunt ova, parere nequeunt. Sic feles, & canes, & vaccæ, & equæ, aliæque animantes, cum illud movetur in ipsarum uteris, quod conceptioni inservire debet, nisi marem admittant; malè habent; & quandòque in furorem aguntur. Nequè toto reliquo anni tempore; licèt pluries nunc majorem, nunc minorem habeant sanguinis copiam; quàm cum veneris æstro sunt percitæ, & cum ipsarum uteri moventur; simile aliquid patiuntur.

In ⁽¹⁾ his autem omnibus unum, idemque est principium; una, atque eadem est, vel saltem similis in omnibus explicandi ratio. Sed cum differant corpora animantium, differant & hominum corpora, differant mores, & ingenia, differant consuetudines, & variæ, atque variæ sæpè concurrant aliarum causarum complicationes: aliis citiùs, aliis tardiùs movetur uterus; estque fluxus aliis mulieribus magis, aliis minùs copiosus; aliis magis, aliis minùs sanguinolentus; & in aliquibus est omninò albicans; & mucositatis, aut albuminis ovorum impuriusculi speciem refert; & in aliis aliter fit.

Mulieres ⁽²⁾ quòque reperiuntur, quibus primis conceptionis mensibus fluat uterus. Quòd contingere videtur: quoniam in aliqua uteri parte illis temporibus aliquid etiam lecernitur ab humoribus ad uterum appellentibus; quòd tamen non transit in fœtus usus; vel quia illi parti non adhæret placenta, quæ tunc exigua est; vel quia adhuc uterus non est satis explicatus, & distensus, vel ob aliam rationem. Idque retentum in angustis meatibus illius uteri regionis, vitium consuetis temporibus concipit, & consueto more fluxum concitat.

GAL. Quid autem tibi videtur, Erasistrate, de sanguine, qui ab hæmorrhoidibus fluere consuevit: quo retento, natura enim sæpè expurgatur, pleuritis, peripneumonia, cæcitas, epilepsia, alique morbi fieri possunt; ut experientia fortè edoctus, pluries monuit Hippocrates?

ERAS. Sive ⁽³⁾ dicamus sanguinem universum, aliasque liquidas corporis substantias debere esse omninò resolubiles, non relieta face, ut ait Helmontius, quæ postea alicubi deponatur; sive dicamus, nil debere esse in sanguine; quod per meatuum, & pororum angustias non possit facilè permeare? Autcunque contingat, humores corporis particulas nonnullas habere vel minùs resolubiles: vel minùs aptas in circulum ferri, & meatus penetrare, & è vasis in vasa transfundi; necessum est easdem particulas alicubi impingentes obstructions primùm facere; deinde alias, atque alias circa partem illam congregari, & circumexistantia vasa, propter impeditum liberum humorum motum, nonnihil intumescere, & turgere.

Quæ cum contingere possint in quacunque corporis parte, frequentissimè observantur in illis locis; per quos repunt hæmorrhoidales venæ. Idque fit, vel quia pars illa minùs movetur, quàm brachia, & crura, exempli gratia; vel quia diaphragmatis motu, & viscerum pressu minùs urgentur ea,

quæ

(1) Non est in omnibus menstruatio similis; & quare?

(2) Fæminæ pleræque utero gerunt, & menses habent. & quare?

(3) Quid moveat fluxum hæmorrhoidalium venarum, aut aliarum.

quæ in vasis ultimi intestini continentur, quàm quæ sunt in superioribus intestinis, vel quia extremum intestinum aliquid suscipit ab impurioribus, & inutilioribus excrementis, à quorum proximitate, dum transeunt, contaminatur etiam pars aliqua ipsius intestini; vel ob alias rationes: sunt enim multiplices rationes propter quas in una potiùs parte, quàm in alia morbus aliquis, & congestio aliqua fiat.

Cæterum (¹) quacunque de causa in intestino potiùs recto, quàm alibi pars aliqua intumuit, & circumexistentes venæ particulis turgidæ factæ fuerint, ad motum circulationemque minùs idoneis; si vel spontè, vel Medici industria (naturam rectè operantem, ut inquit Galene, imitati) disrumpatur pars illa, vel aperiatur, primùm effluet id, quod antequam deponeretur in hæmorrhoidas mixtum sanguini inutile erat, & morbos parere poterat, & id quod minùs aptum erat ad angustias vasorum pervadendum. Postea si quid aliud consequitur utiliorum humorum, eò melius unà expurgantur reliquæ fortè adhuc in parte affecta restagnantes. Ac demum si fluxus sistatur homini benè est; si quidem id potissimum evacuatum est, quod non solum inutile, sed noxium insuper erat, & partem saltem illam molestabat.

Verùm (²) si pars illa nequè spontè, nequè arte disrumpatur, ac aliquid circulationi ineptum ab humoribus præterfluentibus raptum ad oculos, vel ad aures feratur; potest hominem cæcum, vel surdum facere; delatum ad pleuram potest lateris dolorem excitare; ad alias partes à sanguine circumfluo illud idem propulsum, vel epilepsiam, vel alios morbos progignet: veluti dixisti, Galene, ab Hippocrate monitum.

At (³) si adaperitis hæmorrhoidibus, & expurgatis particulis inutilioribus in illis locis stagnantibus, fluxus minimè sistatur, ægrotabit postea homo ex hac alia causa: ubi scilicèt via pateat, multùm evacuabitur ejus, quod ut iliter ad corporis usus fuisset retentum.

Accidit autem non rarò, multas esse in sanguine; ac multas continuò generari è cibis, potibusque particulas inutiles, & ad vitæ functiones minimè aptas; quæ faciliè deponantur in ægrotantes hæmorrhoidas; & unà expurgentur cum aliqua portione eorum, quæ utiliter retinerentur. Atque ideò sæpè nisi sanguis, & humores alii priùs corrigantur; & nisi priùs functiones, quibus alimentum perficitur, promoveantur; præstat diutiùs aliquantulum fluere hæmorrhoidas, quàm obserari.

Accidit (⁴) item frequenter multa expurgari per hæmorrhoidas, quæ re vera non sunt sanguis, sed vel serositates, vel mucositates similes iis, quæ copiosè è naribus fluere solent: sanguis tamen videntur; quoniam exigua sanguinis quantitate perfusa, sanguineo inficiuntur colore.

In (⁵) his autem omnibus, aliisque similibus, quævis sanguinis missio ex secsta vena obest potiùs, quàm prodest. Enim verò quæcunque alia vena secetur ex iis, in quibus nihil restagnat; vel nihil prorsus educitur ejus, quod

no-

(1) Fluxus hæmorrhoidalium quandoque iuvat; & quare?

(2) Suppressio hæmorrhoidalium potest esse causa morborum graviorum.

(3) Fluxus immodicus hæmorrhoidalium morbos facit.

(4) Non id omne quod per hæmorrhoidas fluit, sanguis est.

(5) Suppressio hæmorrhoidibus non expedit venas alias secare.

noxium est ; vel si quid educitur, casu, fortunave educitur ; (idque nulla arte præcognosci potest) vel plus boni, quàm vitiosi sanguinis emittitur, sed frequentissimè, quæcunq; tandem vena eligatur pro sectione, nihil omnino evacuetur ejus, quod circa ultimum intestinum morbum facit. Et idcirco in hoc etiam casu, ut in aliis, si sanguinis missio perniciofa non est, inutilis certè est.

GAL. Sanguis verò, qui naturæ salutaris crisi è naribus fluit: & à gravissimis morbis hominem liberat; non videtur hujusmodi.

WILL. Has fortè sanguinis spontaneas eruptiones, quæ in febribus potissimum fiunt circa morbi (a) crises (scilicet post materiam pepasimum; hoc est ad secernendum præparationem) difficilius quàm reliquas imitari potest Medicus; quoniam tempus optimum mittendi sanguinis nescitur; nescitur oportunus sectioni, & missioni locus.

ERAS. Et (1) quidem multæ aliæ fieri possunt, aut sanguinolentæ substantiæ evacuationes similes iis, quæ ab hæmorrhoidibus fieri consuevere. Nihil enim prohibet, quin aliis corporis partibus similia prorsus accidant, ac hæmorrhoidibus. Quæ aliquando ubi tumeant, & vitioso humore repletæ fuerint; nisi Helmontius, aut alius remedium proferat quo vitium corrigatur, & redeat humor ad utiles usus; arte adaperiri possunt. Id autem fieri nequit tum in interno abscessu; tum ubi interna corporis vasa varicosa facta fuerint, & restagnanti aliqua tumeant substantia; & quævis alia sectio, cum nihil evacuet è loco, in quo morbi causa hospitatur; inutilis est; & necessitati minimè satisfacit.

Verùm (2) enim vero, animadvertendum insuper est, ea quæ præcipitantur, exempli gratia in sanguine, vel in aliis humoribus; quæ postea sudoribus, vel urinis, vel dejectionibus plerunque evacuantur; nequaquam evacuari posse per sectam venam; vel per adaperitum arte in quacunque parte corporis foramen, nisi eò contendant ea ipsa, quæ præcipitantur: quòd quidem Medicus divinare nequit. Aliquando tamen si abscessus, vel tumor appareat tanquam verisimile credere possumus: dum omnia confusa in circum aguntur, circa tumorem retineri, & congregari ea, quæ præcipitantur ab humoribus. Circa tumorem enim, vel abscessum, vel ulcus non raro inveniuntur obstacula quædam, quæ non sinunt ultra meare ea, quæ jam præcipitata sunt. Et adaperitio loci illius spontè eveniens, vel arte instituta (si oculis pateat, vel & manibus tractari possit) salutem plerunque affert; cum quævis alia sectio, & adaperitio inutilis sit.

Item (3) præcipitationes, vel alia similia frequenter fiunt, atque contingunt in humoribus fluentibus per unam determinatam corporis partem non verò per alias. Terræ, inquam, atomi, exempli gratia; & arenulæ, licèt ubique, si ea concurrant, quæ ad hoc sunt necessaria, præcipitari possint ab humoribus; & licèt lapides, & tophi ex iis: quæ humores constituunt, ubi-

(a) Will. de phlebotom.

(1) Pleraque crises per spontaneas eruptiones sunt similes fluxui hæmorrhoidali, similiterque moventur.

(2) Quæ præcipitantur à sanguine, non deducuntur per sectam venam.

(3) Præcipitationes sæpè, ac coagulationes fiunt in una parte sanguinis non in aliis; & in determinato vase, non in aliis. Ita etiam, & rarefactiones.

ubique concrefcere poffint ; frequentiffimè tamen hæ terræ, & arenarum præcipitationes ab humoribus ; & lapidum , tophorumque concretiones in renibus tantùm contingunt , & renes tantùm moleftant : quoniam frequentiffimè contingit renes tantùm id habere , quod neceffarium eft ad præcipitationes, & concretiones iftas .

Exemplum clariùs minimè fuppetit ; Vos quæfo , fi quod habetis, affer- te . Ego rem fic concipio : aliquando in parte corporis determinata (cum cæteræ nihil hujusmodi habeant) aliquid reperiri ; quo mutetur diverfimodè, præcipitetur , vel attenuetur , aut aliter afficiatur aliquid ex iis humoribus, qui per partem illam excurrunt . Id autem tùm falutare, tùm perniciofum homini effe poteft ; pro ut variæ funt morborum fpecies ; & varia funt , & diverfa nimis , quæ fic fieri poffunt .

WILL. Si placet Helmontio , exemplum afferam ex chymicis opera- tionibus mutuatum .

HELM. Quid ni afferas !

WILL. Oleum tartari in vafe ampliori , vel potiùs contentum fiftilis inter fe communicantibus , agitetur leniter , & in circulum feratur , veluti fanguis ; & è determinato vasis , vel fiftularum loco guttatim influat in per- tranfeuntem oleum tartari, vitrioli fpiritus ; ftatim ebullient utrique liquores in illo peculiari loco, fivè vasis , fivè fiftulæ . Poftmodum , & præcipitatio fiet pulveris vitriolati tartari circa illum eundem locum potiùs , quàm alibi ; & deducetur pulvis ad determinatas potiùs quasdam fiftulas , quàm ad alias ; & ad determinatum quendam vasis , fivè fiftularum locum , quàm ad alium .

ERAS. Ita inquam , pleræque tùm præcipitationes , tùm coagulatio- nes ; tùm mutationes aliæ fieri poffunt in peculiari aliqua corporis parte , & circa illam ; propter ea , quæ fanguini , aliisque humoribus in determinata illa corporis parte permifcentur ; & propter ea , quæ circa illam , & non ubi- que fiunt .

Quòd (¹) fi propterea homo ægrotet ; patet quid in his , fimilibusque venæ fectione prodeffe poffit ! venæ , inquam , nullam peculiarem habentis communionem cum ea parte ; in qua morbi fedes , origo , atque fomes , & caufa exiftit ! Quæ fi contingat spontè difrumpi ; arte enim , interna cum fit , aperiri nequit , crifis aliqua tunc fiet ; & aliquado evacuatio effe poteft falu- tatis : videlicet fi id , quod prodit , non colligatur in finus ; fed extra corpus feratur unà cum fanguine , vel unà cum fanguinolenta fubftantia morbi caufa expurgetur ; vel abfumatur ; & æger relinquatur in eo virium ftatu : ex quo ad fanitatem reduci , & integer fieri poffit . Hæc natura quidem fieri poffunt , ut dictum eft ; fed natura fecùs etiam contingere poteft ; & æger vel moritur poft difruptionem ; vel etiam poftea malè habet .

In (²) his autem fimilibusque , in quibus cæcus etiam eft benè oculatus medicus , fi cafu aliquid tentandum erit , & de ægroti vita , ubi non fit nefas , periculum facere ; illæ potiùs evacuationes follicitari debebunt , quibus fre-

Tom. I.

K

quen-

(1) Nequè cum quicquam præcipitatur , aut coagulatur in fanguine , venæ fectione auxilium ullum afferre poteft .

(2) Si cafu , & cæca mente evacuatio aliqua tentanda eft , unà potiùs ex iis , quibus natura frequentius utitur , eligi debet ; quàm fanguinis detractio .

quentius natura utitur ; & illæ potiùs erunt procurandæ, quibus omninò suppressis, animal diu vivere nequit : ut est transpiratio ; urinarum, & excrementorum alvi dejectio ; bilis descensus in duodenum, qui absque pharmaco per os sumpto, motu quodam extrinsecùs impresso sollicitari potest : ita etiam, & salivæ uberior segregatio ; & mucusitatum à capite in fauces, vel nares uberior proventus procurari potest. Videlicet unum, vel alterum ex his, pro ut melius videbitur, vel quid aliud simile magis consuetum naturæ tentari potiùs debet ; quàm sanguinem, quo vivimus, casu profundere.

Difficultas ne superest alia Galene ?

GAL. Non quam memini ; nisi fortè aliquam habeat Willis.

WILL. Nequè equidem nunc memini aliam ; nisi fortè eam, quam afferre posset : si præsens esset Nathanael Higmorus : quo cum magna mihi fuit circa affectiones, quas appellant hystericas altercatio. Affectionem enim, quam plerique dicunt hystericam ; sanguinis, & pulmonum Higmorus ; ego verò cerebri potiùs, & generis nervoli affectum esse existimavi : in quo censeo memini me fuisse deceptum.

At (1) ille, inter cætera argumenta, adducebat maximum levamen, quod ex sanguinis missione hystericis contingeret. Ego verò contra ingenuè professus sum ; *mibi phlebotomiam in hystericis (a) sæpius experto successum istum tam confidenter ab Higmoro promissum defuisse. Urgente paroxysmo, haud minùs quàm instante febris crisi, sanguinis missio rarò indicatur : quippe natura cum hoste suo acriter decertans, quò minùs perturbatur, eò citius, & mitius, & melius se expedire solet.*

Semel (b) cum accessio hysterica diutius, perdurasset, memini me venam incidisse ; e cujus orificio satis largo sanguis effluxit non tenuis, & flatulentus ; sed crassus, & antequam frigesceret in pelvi concrevens ; nec tamen paroxysmus illicò transiit, aut serenitas universalis : quam ita gloriòse spondebat Higmorus, illicò inducta est.

Plures etiam (c) novi invaletudinarias, quæ cum affectibus hystericis primò tantùm leviùs, & rariùs obnoxie fuerint. post copiosas, aut phlebotomias, aut hæmorrhagias spontaneas (quod notatu dignum est) statim istius morbi paroxysmis gravioribus, & crebrioribus infestari cæperint.

HEL. Sunt hystericæ affectiones (d) secundariæ ; & nervi quidem in ipsis læsi apparent ; sed non sunt læsi, nisi quatenus cerebrum, & nervorum principium auscultant inferiorum regimini.

Principium autem nervorum sæpè odoribus aliis perturbatur, odoribus aliis conquiescit, & placatur, absque ulla cujuslibet substantiæ sensibili evacuatione : scilicet non est copia sanguinis, quæ illos excitat affectus ; neque aliud, quod sensibili evacuatione indigeat.

ERAS. De his igitur in presenti dicta sunt satis ; ac videbimus postea cum alius congressus erit, si quæ alia videbuntur addenda.

DIA-

(a, b) Will. de pass. hyster. contra Higmorum.

(c) Will. de passion. hyster. contra Higmorum.

(d) Helmon. passim.

(1) Hystericæ non sanantur missione sanguinis ; & non rarò ab eadem pejor se habent.

DIALOGUS

QUARTUS.

ERAS.



Uanquàm hætenus, Viri Clarissimi, omne ferè studium adhibuimus, ut rationes perpenderentur, propter quas sanguinis missio è vasis, in quibus nihil restagnat, admittenda ne in morbis, an non admittenda videretur; ac licèt nunquam, vel nimis rarò venarum sectione convenire ostensum sit: fortè tamen in inquisitione illa aliqua fuit nostra deceptio; qua id minimè cognoverimus,

quod magis expediat. Quid enim facilius, quàm mentes decipi hominum; dum non omnia circumspiciunt, quæ priùs considerari debent, ut rectè aliquid decernatur? Et fortè aliquis nostrum minùs acriter, ac minori diligentia, quàm fieri potuisset oppositam sententiam tutatus est; idcirco norma veluti aliqua utendum censeo; qua denuò examini subjiciantur ea, quæ dicta sunt: ut majori demum cum fiducia recta nos, & veritati consona sensisse, affirmare valeamus.

Norma autem ista, quantùm ego dignoscere possum, esset diligenter de his periculum facere; & eorum ægrotantium, qui simili morbo laborarent, alios destituere omni artis auxilio, præterquàm dieta, sivè tenui, sivè pleniori, pro ut meliùs videretur; aliis verò venas semel, aut pluries secare, & sinere sanguinem fluere: servata tamen quantitatis ratione, quæ non minima sit, quæ nihil hominem mutet; nequè sit magna, quæ hominem perdat. Quòd si plures sanarentur ex iis, quibus missus; quàm ex iis, quibus sanguis missus non esset, prodesse missionem, ac aliquos servatos propter sectam venam; aliquos periisse propter omissam venæ sectionem, affirmare possemus.

GAL. Valdè dubito ex quorumnam numero plures servarentur.

ERAS. Nequè nunc, nobis mortuis, hæc experiri licet. At si vitali fruerer aura, profectò non solùm non ampliùs auderem, quod olim ausus sum, detestabile carnificis occupare ministerium, & vivorum (a) corpora incidere ut posituram, colorem, magnitudinem, figuram, situm, ordinem, connectionem, communionemque partium in spirantibus membris cognoscerem; verùm etiam ex professo cum alieno periculo, an unquàm sanguinis missio profutura sit, cognoscere nollem: serò scilicet, cognovi tamen, humanitatem, & pietatem, & commiserationem decere hominem; ac si quem ista decent, Medicum maximè decent.

Iis autem, quæ de utilitate, & detrimento accepto à sanguinis missione vulgò traduntur; non est omninò credendum: quoniam frequenter hominem latet utilitas; latet, & damnum; & frequentissimè homo idem decipitur ab

K 2

his

(a) Eras. rel. Corn. Celso lib. i.

his, quæ in ipfomet fiunt; & ab his, quæ fiunt extra ipsum; & sæpè existimat noxia, quæ utilia sunt; & utilia, quæ sunt noxia; & sæpissimè bona, ac mala multa sibi promittit, vel timet ab his, quæ nequè boni, nequè mali quicquam conferre possunt.

Nonnè fuerunt Populi vastissimæ regionis accolæ, qui fufis ad Crocodilum precibus, mala multa vitari, & bona multa homini contingere posse crediderunt! Quos quidem unà cum Sacerdotibus hujus superstitionis illudit Cleomenes Alexandrinus, (a) qui læsus in puero, quem rapuit Crocodilus, Crocodilorum venationem impetrasset: nisi Sacerdotes, qui noluerunt ipsorum Deum ludibrio haberi, magnam argenti quantitatem in suum ærarium contulissent: qua recepta, condonavit venationem.

Si mos inter homines insurgat, quocunque oleo, vel amurca ægrotantes deliniri; quocunque signo sive trianguli, sive pentagoni, sive eo, quod dicunt Salomonis ægrotantes signari mos sit, post breve tempus complures reperiemus constanter tum obtestantes, tum jurantes se illo oleo, vel amurca, vel quocunque inani signo à gravioribus morbis fuisse curatos.

Apud eos, quorum in usu frequenti est sanguinis missio, multi eadem dicuntur levati, atque sanati: apud alios nulla est in morbis sectionis venarum necessitas; nulla, si unquam contingit venas sectas fuisse, à fluxu sanguinis deprædicatur consecuta utilitas.

Quibusdam satis est, si non omnes moriantur, quibus sanguis mittitur; ut superstitibus omnes missione credantur servati. Aliis sufficit, si unus perierit sanguinis profluvio; ut postea eos omnes, quibus sanguis mittitur, perituros existiment.

Quamobrem, omissis iis, quæ vulgò aut traduntur, aut creduntur, te maximè deprecor, Galene. & tuam obtestor fidem, referas an inter innumeros, quorum ego ægritudines narravi, aliquos notaveris mortuos; qui re vera servari potuerint; si ego illis venas secuissem? Postmodum te, atque Willis exoratos velim, referatis; an unquam longissimo tempore, quo rem Medicam egistis, observaveritis ægrotos, de quibus certò, & sinè dubitatione affirmare valeatis, sanguinis detractione è vasis, in quibus nihil restagnat, fuisse servatos? Ab Helmontio autem nihil hujuscemodi sperare debemus; qui nequè aliquem mortuum ob omissam; nequè aliquem servatum ob admissam sanguinis missionem cognovit unquam. Quin etiam idem Helmontius multos recenset phlebotomia omninò necatos à Medicis; & nemo nostrum multoties sic prorsus sese rem habere, ut Helmontius ait, inficiari potest. Nos verò non recenseamus mortuos ex sanguinis missione; sed vel mortuos ex non admissa, vel servatos ex admissa.

WILL. Satis hoc ego, atque Galenus, alique complures non rarò testati sumus; qui sanguinem esse vitæ thesaurum; & nisi necessitas urgeat parcendum sanguini; & nonnullis in morbis idem esse venam secare, ac hominem jugulare, pluries docuimus. Nequè ego, quòd memini, notavi ullos, qui ob præteritam procul dubio in curatione sanguinis missionem mortui sint: sive, quod idem est, qui misso sanguine certò servati essent. Notavi quidem plerosque, qui post sanguinis missionem meliùs sese habere visi sunt.

GAL.

(a) Aristotel. de re famil. lib. 1. num. 32.

GAL. Occasio autem tulit, ut ego affirmarem nonnullos periisse ob omiffam à te Erasistrate, vel à fe&toribus tuis sanguinis miffionem: nonnullos etiam notavi ex hoc maximè fervatos, quòd opportuno tempore sanguis illis fuerit detractus.

EBAS. Hos, (¹) quæso, refer, Galene.

GAL. In commentariis de divisionibus cum multorum ægrotantium historias retuleris, Erasistrate, notavi libro priore puellam Chienfem ob omiffam à te in curatione sanguinis miffionem fuiffe mortuam. Notavi, inquam, vel fic notare operæ pretium fuit.

HISTORIA PRIMA.

Puella Chienfis sputo sanguinis, aliisque affectionibus laborantis.

ERAS. **M** Emini puellam Chienfem, cui purgationes (a) longo tempore suppressæ fuerant; deinde subsecutæ sunt tussiculæ, unâ cum reje&ione pituitæ. Processu verò temporis, & sanguinis ab ore reje&io supervenit. Tum quod ad circuitum purgationum ab utero attinet, interdum illæ in quatuor, interdum duobus mensibus redibant. Etiam iisdem ferme diebus, quibus purgationes fiebant, ipsa reje&io sanguinis ab ore accidere solebat, diebusque tribus, aut quatuor perdurabat. Quapropter inde perspicuum erat, sive, ut rectiùs dicam, perspicuum tunc mihi videbatur illam id genus excretionis ab ore loco purgationum, sive ad supplementum purgationum ab utero sortitam fuiffe. Insequebantur autem iis ipsis diebus febriculæ; quæ postea desinebant. Primis autem temporibus ipsa potionibus, & fomentationibus uteri, & subditis, ac victus ratione ad hoc idonea medicari accepta est. Aderat enim circa os uteri non intensa, sed notabilis durities. Verùm cum remedia nihil omninò per menses promoverent, ac uno perpetuò circuitu gravitas in lumbos incumberet, humiditasque nulla compareret; illic febres continuæ intensiores prioribus exortæ sunt: quas, & tusses vehementes postquam corpus iam mollius circa os uteri factum esset, insecutæ sunt. A curatione igitur circa uterum adhibenda abstinuimus, difficile esse arbitrati, durantibus adhuc febribus, per eam partem purgationes facere. Reliquis verò remediis usi sumus: quemadmodum, & in huiusmodi & in aliis affectibus consuevimus. Præterea ad medendi rationem, ipso purgationum circuitu observato, cibaria subtrahabamus. Eaque ratione reje&io sanguinis non ampliùs, quàm semel, eademque in pauca quantitate supervenit. Verùm postea reje&iones ab ore purulentæ factæ sunt: & femina tandem mortua est.

Si dicas alia remedia fuiffe omiffa, quæ mihi fortè erant incognita; & eorum usu à tuberculo primùm, & postea ab ulcere, quod erat in aliqua parte interna pectoris, puellam sanari potuisse, non equidem contendam: Sed pati, non possum, quòd dicas, illam mortuam ob omiffam sanguinis miffionem.

(a) Erasistrat. relat. à Gal. lib. de venæ sec. adv. Erasistrateos cap. 3.

(1) Malè Gal. binos ægrotantes ex iis, quos in commentaria retulit Erasistrat. ob omiffam venæ sectionem pronunciavit mortuos.

nem. Illius etenim morbus non erat in sanguine; nequē à sanguinis copia factus fuerat: ac si à sanguinis copia factus fuisset; copia illa jam non aderat, cum ego scēminam curandam suscepi; nequē humorum copia ulla, nisi continuò addas, multo tempore perdurat.

GAL. Sic occasio tulit; Erasistrate: & hoc profectò in illa controversia constanter asseverandum fuit, mortuam fuisse puellam Chiensem ob non detractum sanguinem. Nec Teuthræ commilitoni, & concivi meo, qui me turbabatur, & mea defendebat, contradicere æquum fuit.

ERAS. Quis hic Teuthras fuit? quid tibi cum militibus, etiam si concivibus? aut quid militi cum re medica? Erat ne fortassis Teuthras hic in bello, quòd cum Medicis gerebas? commilito?

GAL. Mox audies; sed prius accipe aliam historiam simili morbo, puella Chienensis, ægro tantis mulieris.

HISTORIA SECUNDA.

Mulieris tussi, spirandi difficultate, sanguinis sputo, aliisque affectionibus laborantis; & tandem extinctæ.

Mulierculam (a) quandam, quæ viginti, uniusque annorum ætatem agebat; ac ex menstruæ purgationis retentione, ut tunc videbatur, faciem rubicundam obtinebat, tussiebatque paululum, & difficulter spirabat, Medici curare adorti, primum quidem membra illius laneis vinculis leniter excipiebant; & in inedia exigere iuebant; venam autem secare nolebant; nosque id facere volentes prohibebant. Quia verò domesticis ipsius mulieris familiariter utebantur; & ætate me erant multò superiores, facile ipsis est habita fides. Ego quidem illis venæ sectionem tunc temporis suadere non conatus sum; sed interrogavi num mihi per eos liceret, sanguinem ad vias uteri remediis, quæ hoc efficere possent, provocare. Quod cum illi promptè concessissent adii familiarem ipsius ægræ obstetricem; quam, & exhortatus sum, ut usum illorum experiretur. Verum illa remediis huiusmodi, tempore, quo factum id oportebat, usam fuisse se affirmabat: quando scilicet menstrua purgatio futura in expectatione erat: recitabatque remedia ordine, quæ mulieri obtulisset: & hæc quidem commoda alioqui erant; eamque ob rem, quò minus efficacia fuissent, nequaquam illorum imbecillitate factum esse videbatur. Postquam igitur ego ista percepissem, simulque à retentione sanguinis quartum iam mensem præterisse animadvertentem, denuò cum Medicis illis congressus, ut ad venæ sectionem sese converterent, persuadere eis conatus sum. Cum autem id facere noluissem, illorum animum demirabar; maximèque cum eniterentur, ut omni conatu apertis circa uterum venis, quamplurimis sanguinem superfluum illinc evacuant: si verò alia quæpiam vena secaretur, noxiam ex eo evacuationem futuram arbitrarentur. At iis respondentibus, quòd vel absque talis auxilii præsentia sanguis exuperans sola inedia evacuari posset; taciturnus discessi; nihil bonæ spei de muliere propter tussim, & spirandi difficultatem concipiens. Aut enim rupto

(a) Gal. lib. de venæ sectione adv. Erasistrateos cap. i.

pro vase ipsam ex thorace, pulmoneve sanguinem sputo ejecturam; aut synanche, aut laterali inflammatione, vel peripneumonia correptam iri præmeditabar. — Atque ex his contingit vasis disruptio — Dum enim illa vehementius tussiret, sanguis etiam unâ extra prodiit. Atqui jam vel vulgò non pauci Medicos obiurgabant (in quo ego maximè gaudebam; videbantur enim mihi triumphum canere) quòd illi mulierculæ venam incidere vetuissent: sperabantque omninò futurum, ut etiam si id prius non fecerint, hoc tamen tempore verecundia ducti, usum præfati auxilii concederent. Cæterum cum hi neque tum quicquam commoverentur; sed potius vincula membrorum fortius adstringerent, iuberentque utrum remediis irritare, ac mulierem in ediam sustinere; ego ob ætatem, & celebre nomen virorum, nihil me amplius profuturum credens, illinc discessi. Mulier quæque ipsa non ita multo tempore interjecto, insanabili spirationis difficultate coercita, propter ulcus, & ut consequens fuit, saniei in pectore copiam interiit.

WILL. Multa quidem omissa sunt à Medicis in curatione hujus mulieris, quæ principio similiter, ac puella Chiensis, laborasse videtur tumore, sive tuberculo in pulmonibus, aut parte alia proxima; primùm exiguo, postmodum majore: ex cujus disruptione sanguis, vel etiam ut sæpe accidit, unâ cum sanguine aliquid aliud prodiit circa partem affectam collectum: ac tandem ob ulcus, sanieque, & partis corruptionem, difficilemque respirationem extincta est. Fieri potuit, ut ex catameniorum suppressione vitium aliquod sanguis contraxerit, ex quo postea malum hoc ortum habuerit in pulmonibus. Quòd si sanguinem mittere illi dignati non sunt; ea tamen adhibere, quæ vitium corrigerent sanguinis, & parti affectæ essent proportionata, non in vinculis tantum spem ponere debuerunt: licet ego hæc quòque in sanguinis rejectione, & aliis in morbis usurpaverim; quorum non mediocrem sum expertus efficaciam. Ac (1) novi nonnullos à febre intermittente, certissimè curatos nodulo ex lino, aut charta involutis (a) arctèque compresso, & carpis, ubi pulsus micant, adeò strictim alligato; ut in ea parte sanguinis circulatio aliquatenus inhiberetur.

ERAS. Quidquid sit de vinculis sive laneis, sive aliis, ego quoque existimo multa fuisse omissa in hujus mulieris curatione propter Medicorum imperitiam, & efficaciorum remediorum ignorationem. Existimo etiam ab iis, quæ ab utero primùm fluere debuissent, potuisse sanguinem vitium aliquod contrahere, quod corrigendum fuerat. Sed omnium minimè censeo, quòd ob omissam sanguinis è venis, in quibus nihil restagnabat, evacuationem mulier mortua sit. Nequè video, ut mulier ista sanguinis missione è venis in quibus nihil restagnabat, sanari potuerit.

WILL. Ac quidem ab adversariis tuis, Galene, in principio sanguinis missio non erat sic obstinatissimè condemnanda; cum à te probaretur: sicuti Pullarium, qui committendi prælii diem differebat, nequè contemnere, nequè omninò floccipendere debuit Flaminius Romanorum Dux; cujus exercitus tribus horis concisus, atque (b) ipse interfectus est. Quinimò sectio erat ultro

(a) Will. de febr. lib. 3. cap. 4.

(b) M. T. Cic. de divin. lib. 1.

(1) Ligaturæ an aliquid possint in morbis.

ultra admittenda; nequē profectò ex ipsa, mulier protinùs mortua esset; Verùm quòd tanto tempore, quo ægritudo perduravit, usque ad mortem proximam, id solùm conatus fueris, ut sanguis mitteretur, probandum non est.

ERAS. Malum vel non habuerat ortum à sanguinis copia; vel progressu temporis morbo, & inedia, copia defierat. Vel vitium non erat in sanguine, iis vasis contento; in quibus nihil restagnabat (ut sunt vasa, quæ secari solent) vel si in sanguine aderat vitium, missione, & detractione unius portionis non poterat corrigi. Missione exiguæ quantitatis nihil; aut cum illa in magna copia fuisset, vix aliquid detrahi poterat ex parte affecta. Tu autem, Galene, cum nihil opportunè addere cognoveris iis, quæ à Medicis fiebant, in eadem efficaciorum remediorum ignoratione videris versatus. Et sanguinis tantùm multorum mensium spatio, & ad mortem usque missione insistens; ac postea promulgans, ob omissam sanguinis detractionem foeminam fuisse mortuam, nequaquam aliud voluisse videris, quàm plausibilem nactus occasionem, Medicos facere ridiculos; ac fatidici, & probatissimi viri nomen tibi comparare.

GAL. Etsi adipiscendæ gloriæ occasiones omnes, quas mihi fortuna dedit, nunquam fuerim aspernatus, Erasistrate, (a) ut discipulos etiam meos similiter facere docuerim; tunc cum retuli *quam fortuna mihi viam præbuisset, quæ apud Glauconem clarum nomen adipisci possem*: tamen non istud tantùm me hac vice movit; verùm etiam quoniam dum de his cum medicis tunc loquerer, & illi te in testimonium adducerent, qui puellæ Chienfi, & Critoni nunquam sanguinem detraxeris, superveniens Theutras commilito meus, quique mei defendendi causa, si quid accidisset, illuc advenerat; non flectes (b) istos unquam, inquit, ut qui eò usque stoliditatis, processerint, ut & illos in memoriam revocent, qui Erasistrati opera interierunt. Quid enim, inquit, aliud in causa esse potuit, quòd illi, quos nobis isti proponunt, perierint; nisi quod in eis prætermisissimum sit venæ sectionis auxilium? -- Quin etiam sequenti die idem miles tua de divisionibus commentaria in publicum producta coram universo philosophorum cœtu relegabat. Cum multi autem philosophi dicantur, scis tu, Erasistrate, qui philosophi de his rectè dejudicare possint. Relegebat autem tua commentaria Theutras, partim (c) ut indicaret tua culpa & Critonem, & puellam illam Chiensem periisse; partim, ut medicos natu grandiores ad colloquium provocaret. Verùm illi quia decertare cum adolescente infra dignitatem illorum putabant, non comparuerunt. Ego verò eorum, qui juventutem meam aspernabantur, mihiq; semper infensi erant, indignatus gravitatem, ea tunc dixi, quæ videbantur ab occasione, quam Theutras dederat, exposci: scilicet, ut cœtui suaderem Critonem, & puellam Chiensem ob omissam sanguinis missionem periisse: & illa eadem postea ipsius Theutræ monitu literis mandavi.

Nevè credas me nunc tibi, aut doctrinæ tuæ assentari, Erasistrate, scito (ingenuè enim fatebor) me complures vidisse, atque observasse simili morbo, ac puella Chienfis, (1) & muliercula Romana, ægrotantes; nullum tamen mea opera, meaque methodo fuisse servatum; neque ulla industria, ullove remedio,

(a) Gal. de locis affectis lib. i. cap. 7.

(b, c) Gal. de ven. sec. adv. Erasistrateos cap. i.

dio, quod prænoscens periculum, ego noverim applicare, à faucibus orci aliquem illorum revocare potui.

Methodo, qua ego medendo sum usus, eorum, qui ulcere pulmonis laborarent; & vel ietu; vel casu ab alto; vel tussi nimia; vel quòd immodicè clamaverint; vel pondus supra vires sustulerint; vel ob aliam similem causam sanguinem rejicerent, nonnullos quidem sanavi: quorum tamen ante tertiam, vel quartam diem curationem susceperim. Nequè his omnibus sanguinem detraxi; ut patet in historia, quam lib. quinto methodi medendi cap. decimo tertio retuli, splendidæ mulieris Romanæ. Quæ, cum audivisset ex iis, quæ ego tunc temporis docueram, principiò omninò obstitendum sanguinis reiectioni, antequam ulcus phlegmonen contraheret: aliàs omnem postea operam futuram inutilem; cumque *sive (a) ex catharro, sive vehementi tussi paululum quiddam per noctem expuisset, illico ad me misit, præbere se promptam, asserens, ad faciendum quidquid ego voluissens*. Huic quidem mulieri, quæ iam *(b) quatrimum propter catharrum propemodum sine cibo egisset, venam incidere non placuit*; sed aliis usus sum remediis.

Ex iis verò, qui tribus, quatuorve diebus sanguinem rejecissent *(c)* aliquibus eorum insanabile ulcus fuit. Quotquot autem phlegmone sic occupavit, ut iam febricitarent, horum nullus est in totum persanatus. Atque ex his quidem omnibus, illi maximè insanabiles, & nullam ex mea methodo operam sperare potuisse vili sunt; qui non ab ietu, non ex nimio clamore, non ex aliqua repentina extrinseca causa; sed *(d) ex vitiosi succi erosione ulcus in pulmonibus habuerunt; quorum aliqui ceu falsilaginem sputum suum sentire se ajunt: nam longo, arbitror, tempore omninò opus esse, ut succi corrigatur vitium*.

Vitium autem sanguinis nequaquam missione corrigitur, ut pluries docui; sed vel purganti pharmaco, diversas facultates habente; vel medicamento diaspermato à me appellato; vel iis, quæ capiti, vel aliis partibus, à quibus malum procedat, provident medicamentis.

Cum autem in pulmonibus, vel in aspera arteria, vel in alia parte pectoris disrumpitur, aut eroditur aliquid; aut in tuberculum, grandinesque cogitur; & postea vel suppuratur, vel aliter corrumpitur, aliquando contingit nihil per os expurgari; & in principio aliquando nequè quidem tussunt ægrotantes; nequè difficulter respirant: ut accidit Antipatro Medico Romano. Sed multi non rarò primò pituitam tussi reiciunt, postea sanguinem, deinde pus etiam. Alii verò primò sanguinem expuunt, postea pus; vel unà cum pure sanguinem, & quid aliud permixtum. Alii eodem tempore sanguinem, & pus ex disrupto in pectore abscessu emittunt; nonnunquam quid aliud cum his permixtum, sive pituita, sive ichor illud fuerit. Non pauci autem cum parùm, vel nihil prius tussiverint; aut si tussi fuere molestati, cum vix aliquid notatu dignum ejecissent, pus primùm reicere visi sunt, cui nihil sanguinis in posterum permixtum apparuit. Et hæc quidem facta sunt, vel cum antecedenti doloris perceptione, vel sinè omni dolore. Ac mea medendi me-

Tom. I.

L

thodo

(a, b) Gal. lib. meth. med. lib. 5. cap. 13.

(c, d) Galen. Meth. med. lib. 5. cap. 14.

(1) Galenus neminem servavit ex iis, qui simili morbo, ac puella Chien-sis, vel muliercula romana laborarunt.

thodo nullus ex his sanatus est. Proinde facile (a) cognovi pulmones, aliasque partes internas sæpe numero haud absimili affectu laborare, qualem in externis partibus videre solemus; cum à putrefaciente quopiam humore inficiuntur: quæ licet sanguinis missione minimè curentur, verùm (b) has, & abscindere, urere possumus; pulmoni verò horum auxiliorum neutrum adhibere licet; quapropter omnes perire necesse est.

ERAS. Non ego hoc unquam dixerim, Galene, eos omnes perire necesse esse, qui his malis laborant: etsi ultro admittam eosdem sanguinis missione minimè curari posse.

HISTORIA TERTIA.

Ægrotantis, & affectu interno pectoris extincti.

GAL. **Q**uidam, humorem (c) repentè expuit, liquidæ bili in colore perquam similem: medium videlicet inter flavum, & pallidum; at nulla acedine infectum; atque ita quotidie maiorem ejus quantitatem expuit. Deinde, levi suborta febricula, tabescere incæpit; adeò ut purulenta excrearet. Postea tractu temporis, quatuor videlicet mensium, exiguum cum pure cruorem rejecit; atque sic aucta febre, magis consumebatur: ac iterum, atque iterum plus expuebat; adeò ut magnam sputi quantitatem redderet. Quòcirca magis increscente febre, ac resolutis viribus, eorum, qui tabe marcescunt, exemplo, mortem obiit.

ERAS. Hic similis est puellæ Chienfi, nisi quòd non præcesserat menstruæ purgationis suppressio; nequè purgationum muliebrium temporibus rejeccio exacerbabatur. At hic tuus ægrotans vir erat, non fœmina: ac proinde huic non crescebat malum ex iis, quæ præparabantur in utero.

HISTORIA QUARTA.

Aliorum, similiter mortuorum.

GAL. **D**einde (c) alium vidi, eodem ferè modo sex mensibus, ac alium quòque diutius laborantem. Igitur cum primus, quem conspexi nihil quidem mali habere; sed tandem affici visus est: & alter nobis cum occurrisset, statim ab initio cognito malo, præsentì medicamento succurrere tentavimus, ac multò magis etiam tertio. At quamvis multo negotio utrumque liberare conaremur; nihilominus horum nullus, neque alius post eos servari potuit. Mea saltem, dixerim, methodo, Erasistrate, nullus servari potuit.

ERAS. Cùm igitur videris mortuos, Galene, quotquot ad manus tuas eodem planè, similique morbo laborantes pervenere, quo puella Chienfis,

aut

(a b) Gal. de locis affect. lib. 4. cap. 8.

(c) Gal. de lo. affectis lib. 4. cap. 8.

aut muliercula Romana ; temerè tam asseveranter affirmasti , illas fuisse mortuas ; quoniam sanguis ipsis missus non fuerit.

His , qui mortui sunt , vel abstulisti , vel non abstulisti sanguinem ? Ut-
eunque respondeas ; illud consequitur , illas quòque tua methodo curatas pe-
rire debuisse . Nequè suppressa menstrua morbum in his faciebant levio-
rem . Nequè sanguinis missio vias aperit uteri ; nequè vitium ipsa corrigit , quod
sanguini, aut aliis humoribus certo ut plurimum tempore impertitur ab utero.

Ac licèt principio mulieres istæ nullum fortè damnum accepissent à non
magna sanguinis missione ; stultum tamen fuit , postquam lapsu multorum
mensium nimis , atque nimis extenuatæ erant , auxilii aliquid ex detractio-
ne sperasse . Et splendida illi alteri mulieri Romanæ , quoniam quatrduo
tantum parum cibi sumpsisset , licèt adhuc non esset morbo , & tempore exte-
nuata , venas minimè secasti : ut certò coniiciam , te his etiam vix circa pri-
mas dies sanguinem detrahare fuisse ausurum , si illarum curationem à prima
die suscepisses . At Medicorum quibuscum concertabas , ut poteras sumendæ
erant pœnæ ; & quæ Theutras dixerat , defendenda erant ? Nescio an hæc te,
quantum opus est , excusare valeant.

HISTORIA QUINTA.

Critonis angina laborantis.

CRito autem , quem meministi , in (a) *synanchicam plenitudinem iam*
inciderat ; cui , cum ut imminuerentur humores totius corporis , tum ut
corrigerentur , catapotium præbui ; quod præter alia castoreum habebat ; quo
(b) *alvus commodè illi subducta est* : ut nequè tu quidem , Galene , de alia
plenitudine ; quàm ea , quæ circa fauces propter obstructionem meatuum
confederat , dubitare debueris . Parti autem applicanda curavi , quæ mihi
visa sunt magis convenire . Sed , ut accidit in plerisque aliis affectibus , &
frequenter in peripneumonia , & in pleuritide , qua correpti aliis postmodum
malis laborare solent , angina prehensus Crito , tum pulmonibus , tum hepate ,
tum etiam capite affici visus est . Quem febres etiam , pluribus repetitis insul-
tus principiis invaserunt . Et circa decimam diem tum obversio cervicis
Critoni accidit ; *tàm nna hora transacta , tanta (c) insensibilitas hominem in-*
vasit ; ut & lotium per lectum emitteret : ac demum mortuus est .

An anginosa , cujus meminit autor lib. tertii epidemiorum , mortua
etiam est ; quoniam sanguis illi missus non fuit ?

HISTORIA SEXTA.

*Alterius anginosæ, quæ est apud Hippocratem lib. tertio
Epidemiorum. Agroto septimo.*

A Nginosæ, inquit, quæ (a) apud Bitonem agebat, primum à lingua cæpit obscura esse vox; lingua rubens desiccata erat. Primo die horrida, incaluit. Tertiò rigor, febris acuta; tumor colli, & pectoris ex utraque parte subruber, durus; extremitates frigida, & livida; spiritus sublimis; potus per nares effluebat; devorare non valebat; dejectiones, & urinae substituerunt — subdito balano, atque clystere alvum subducere tentavit Medicus ille, quisquis fuit. Verùm quarta die cuncta (b) exacerbata sunt. Quinta periit anginosæ.

GAL. Commentariis ego Hippocratis libros de morbis vulgaribus illustravi: ac in anginosæ, quæ apud Bitonem agebat, memini me adnotasse, probabile esse, Hippocratem omisisse in narratione, cum alia remedia ægris adhibita, tum sanguinis missionem; solum verò clysterem huic anginosæ, & balanum subditum non principaliter, cæterum obiter scripisse.

ERAS. Concedamus⁽¹⁾ hoc; mulieri huic anginosæ venam semel, aut bis, aut pluries, si velis, fuisse sectam; attamen illa periit. Cum multi angina correpti, quibus etiam vena inciditur, pereant tamen; an illi, quibus vena non secatur, immortales esse debent; ut lycophanta Theutras aliquis hoc non audeat affirmare, si moriantur, ob omissem venæ sectionem fuisse mortuos?

Fortassis objicies, Galene, graviori morbo laborasse mulierem Hippocratis, quàm Critonem. Ego dicam graviori ægrotasse Critonem; quoniam mulieri, quæ apud Bitonem erat, tumores extrinsecus apparuere: cum Critoni fuerint intrinseci. Dicam; pejùs postea fuisse mulieri ob detractum sanguinem, cum tu detractum affirmes; Critonem autem supervixisse usque ad decimam diem; quoniam vena illi minimè secta fuerit: cum mulier, cui, ut tibi videtur, Hippocrates venas fecavit, quinta die sublata fuerit.

Ac⁽²⁾ quidem illud videtur certum, sive in principio, sive in statu, vel morbi declinatione omnes perire posse ex sanguinis detractione incongruas; cum nullus omnino ob plenitudinem decima die à morbi principio pereat: etiamsi illud concedatur, in morbi initio vasa, in quibus nihil restagnat (hæc enim sunt, quæ inciduntur) humorum plenitudinem habuisse; Nam ipso lapsu temporis, & morbi vi, si quid plenitudinem faciebat in his vasis, absumptum est. Ac semper eo, quod reliquum est, quantumvis detrahatur (cum semper in circulum agi debeat, donec homo vita fruitur) tumor alicubi

(a, b) Hipp. de morb. vulg. lib. 3. ægr. 7.

(1) Vel Hippocrates non fecavit venas in angina; vel missionis non æmimit, tanquam inutilis, aut etiam perniciosæ.

(2) Post primos dies nullus perit ob plenitudinem; quovis autem tempore quovis perire potest sang. miss. incongrua.

bi consistens, crescere potest: videlicet si creseat vasorum, & meatuum obstructio circa partem affectam; & rarefiat id, quod circa illam est. Ac ⁽¹⁾ eo, quod, sive ex detractioe, sive ex continua insensibili transpiratione, sive ab omni alia evacuatione reliquum est, tumores, qui prius non extiterant, fieri possunt: videlicet si aliqua, quæ prius non aderat, fiat meatuum obstructio. Hinc est, quod in fine morborum, cum corpora jam sunt nimis, atque nimis extenuata; tunc cum nulla est substantiarum in circulum ætarum abundantia, parotides, alique tumores, qui in principio non aderant, observentur.

Quamobrem ⁽²⁾ in morbis ferè omnibus, maximèque post primam, aut secundam diem ab initio eorum, non quantum adsit in vasis nihil restagnans habentibus; sed quale illud sit videndum est.

Cumque detractio non auferat, nequè corrigat vitium ejus, quod reliquum est, remedia, si rectè curare velimus, sunt invenienda, quibus vitium illud corrigatur. Quod si homines in magna, tum naturæ morborum, tum remediorum ignoratione versantur, abstinere saltem debent ab iis, quæ non solum incerta sunt; verum etiam sapissimè nocent.

Cum enim repetenda hinc minimè sint, quæ aliàs à nobis dicta sunt, exemplum tantum adducam; quod fortè alienum non est à rei natura, de qua agimus.

In fluminibus, licet aliquando ob maximam aquarum copiam, qua velocius feruntur, alvei ripæ tum disrumpi, tum superari queant ab aquis; & licet arva, quæ prius proximo flumine fecunda nimis, atque herbida erant, in lacus, & paludes mutari possint: si hæc tamen non adsit maxima aquarum vis; vel etiam si aquæ deficient potius, quàm abundant in satis capaci alveo; non idcirco circumposita arva ab omni erunt tuta periculo. Fieri enim potest, ut lutulentæ, & limosæ vehantur aquæ; quæ arenas, & terram, & paleas, & divulsas arbores, atque alia similia, alveum alicubi obstruere apta, deponant. Impuritatum autem, & alienarum substantiarum depositio esse potest in una potius ripa, quàm in altera; Undè aquæ, quæ prius profluebant liberè, oppositam ferient ripam; & alia quidem, atque alia inutilia, & perniciofa arvis, non à copia, sed ab impuritate aquarum accidere possunt. In quo casu cum non expediat omne avertere flumen, & siccare alveum; humore enim destituta arva circumposita continuo sterilefcent, erunt effœta, & veluti mortuæ; nequè expediet non superabundantem in alveo aquarum copiam magis, ac magis imminuere, etiam si speres auferendo aliquid aquæ turbidæ, terræ simul te aliquid auferre: nam quod plus auferes, aut derives aquarum non superabundantium in alveo; & quod minori, atque minori copia aquæ feruntur, eo majus imminet regionibus periculum. Enim verò in fluminibus cum minor aquarum copia, minori velocitate feratur; quidquid limosi, & lutulenti, & alieni illa habent, facilius deponitur: ac si quid prius depositum fuerat, difficilius reassumitur. Quamobrem majori facta depositione multò sanè facilius

(1) Tumores fieri possunt etiam si deficient potius, quàm excedant humores.

(2) Frequentissimè in morbis non quantum, sed quale sit id, quod in venis est, considerari debet.

cilius alveus alicubi obstrui; & cursus aquarum inhiberi, vel ad oppositas partes deflecti poterit. Aquæ autem quantæcunque illæ fuerint impedito ex una parte alveo diffluent & excurrent in regiones flumini prius incognitas; & segetiferas terras convertent in paludes; & lacus alicubi efficient; & alias, atque alias sibi postea quærent vias, nonnunquam manifestas, aliquando occultas, & subterraneas; & quædam arva, quæ prius à flumine fecunditatem, & vitam, ut sic dicam, accipiebant, exarescent, & multa alia fient, non sinè magno regionum detrimento. Non igitur diminuendæ sunt fluminum aquæ; cum ea, quæ imminent damna, non proveniunt ab aquarum copia; sed ab impuritatibus purgandæ, & rectificandæ sunt aquæ; ac qua melius fieri potest industria, si alicubi obstruetus, vel impeditus alveus est, expediendus. Non raro etiam, si fieri potest, velocior aquis motus concedendus est, majori exempli gratia alvei declivitate; & nonnunquam etiam novarum & puriorum aquarum additione: tunc enim aquæ, & minùs deponent impuritatibus; ac si quid prius depositum fuerat, facilius reassument illud, & in mare unà secum devehent.

Hæc autem in animante sic sunt accipienda. Animal sinè sanguine, ac sinè humoribus omninò vivere nequit. Humores autem in vasis aut nunquam, aut raro abundant; vel si quando abundant, quantum quis magis cogitare potest, & nonnullarum horarum lapsus expectari possit, citò hæc etiam desinit abundantia. Undè cum animal ægrotat vix unquam propter hanc suppositam abundantiam citò vena secari debet. Consideranda autem ferè semper in morbis est ipsa sanguinis, & humorum constitutio; quæ varia, atque varia esse potest.

Nequè nunc omnia nos percurrere æquum est; sed ea tantùm innuamus, quæ ad Critonem, aliosque similes ægrotantes pertinent. Sæpiissimè humores aliquid continent, quod facile alicubi, & præsertim in glandulas deponatur, & obstructions faciat. Potest etiam ipsa sanguinis aliarumque substantiarum natura, & constitutio esse effœta, fatua, ignavior, atque ineptior; quàm opus est ad pleraque vitæ munia ritè, atque rectè obeunda: ac si talis non est, perquàm facile liberali missione ex aperta vena id, quod remanet in vasis, tale sit; quale diximus, ignavum, & effœtum. Nequè igitur in his vena secari debet: etiam si speres te aliquid impuri, & crassi detracturum, Galene. Nam sanguis, qui per vasa fluit, semper habet plus permeabilis, & non deponendi, quàm non permeabilis, & deponendi; & detractio semper auferes plus boni, quàm vitiosi: sicut si è currenti flumine quantumvis lutulento, modò aquarum sit flumen, fidelia excipias aquam, semper habebis plus aquæ, quàm terræ, & arenarum, quæ alicubi fuissent depositæ. Aliàs sanguis non fluere; maximè cum sanguis non quidem, ut fluminum aquæ, gravitate feratur per vasa corporis animatis. Porro detractio non fit sanguis reliquus minùs effœtus, aut minùs ignavus: pro ut à te pluries dictum est; ac libros tuos audi, frequenter hoc ipsum docere.

Illud igitur in his similibusque faciendum superest; alia industria, aliisque remediis vitium, si quod est, corrigere in sanguine; & humores reddere efficaciores, &, ut sic dicam, robustiores ad superandam causam morbi; & ad solvendum, atque in circulum rapiendum, & ad resolvendum in tenues auras id; quod in faucibus, exempli gratia, facit anginam; in membrana

suc-

succingente pleuritidem; in pulmonibus peripneumoniam; in aliis verò partibus alios similes producit affectus. Quæ (¹) quidem non perficiuntur detractione fortuita boni, & mali finè discrimine; & multò minus detractione plus boni, quàm mali; sed additione potiùs particularum utiliorum & efficaciorum ad id, quod opus est. Sunt autem pleraque, quæ in minima quantitate hoc præstent; ut nequè timere debeas additione crescere humorum quantitatem, quæ etiam semper corporis transpiratione diminuitur.

Verùm hæc Medicinæ pars, quæ remedia reperit morbis appropriata, & reliquis utilior est; minimè omnium est exulta, non finè magno ægotantium detrimento.

Cæterùm, (²) Galene, nequè medicamento, quod tibi præbuit puer lupinis pastus; nequè succo corticum nucum; nequè eo, quod ex nitro parare consuevit Helmontius; nequè spiritu vini anginas omnes sanari posse existimo. Siquidem tumores, qui fiunt circa fauces sæpiissimè ejusdem naturæ sunt; ac illi, qui in plerisque aliis corporis partibus extrinsecus, cutique proximis fieri consueverunt. Enecant autem illi ratione loci, quem obsident: obstruendo scilicet viam, qua cibus in ventriculum; & multò faciliùs si illam obstruant, qua aer in pulmones deducitur. At cum pars aliqua extrinseca, & cuti proxima tumefieri incipit; nequaquam semper novit Medicus (nequè ipsum excipio Esculapium tuum, Galene) impedire ne tumor aliquantulum crescat; nequit homo tumores omnes curare per resolutionem, atque solutionem, ejus, quod alicui parti impactum, & coagulatum est, nequit finè suppuratione tumores omnes curare: ac cum suppurantur; nequit efficere, quin aliquantulum sese extollat pars affecta, & crescat tumor. Qui si constiterit in faucibus, illud parum, quod crescit tumor, satis est ad hominem præfocandum; in collo vesicæ; in meatu cholidoco, aut in aliis partibus illud parum satis erit ad aliquos impediendum motus; ex quo postea mors sequatur: ut ex hoc etiam constet frequentissimè nullam necessariam esse humorum, aut alterius substantiæ abundantiam ad hoc, ut animal extinguatur; atque ex causa, quæ sit molis exiguæ, maximum non rarò fieri morbum.

Postquam (³) vidimus immerito te, atque Theutram dixisse, puellam Chiensem, & mulierculam Romanam periisse ob omissam sanguinis missionem; dignare nunc Galene, si alios non habes ex hac eadem causa mortuos, vivos referre ob detractum sanguinem; & illos quæso enarra, qui propter sectam venam curati tibi visi sunt.



(1) Additione sæpè sanguis perficitur.

(2) Non datur medicina pro quocunque sive angina, sive pleuritide.

(3) Historia examinantur celebriores ægotantium, quos servatos dixit Galenus ob detractum sanguinem.

HISTORIA SEPTIMA.

Mulieris fluxu sanguinis è naribus restituta.

GAL. **E**odem tempore, quo hæc mihi, & Theutræ Romæ acciderunt; aliam mulierem illi venæ (a) sectionis hostes retentione menstruæ purgationis non paucò tempore gravatam, eodem pacto ad interitum ferè pertraxerant. Nam primis tribus diebus ipsam in inedia conservabant, feбри enim laborabat continua. Quarta verò luce pauxillum quid sorbitionis exhibentes; quintam sinè cibis transigere iusserunt: in qua illa gravissimè exacerbatā, desipiens profliebat; & clamore iam extra fores ab illa sublato vix tandem ab iis, qui eò confluxerant retineri potuit. Verum hanc natura copioso sanguine ex naribus effuso servavit. Et dabatur occasio, qua non sinè admiratione discere potueramus, quantam habeat facultatem ad huiusmodi affectuum medellam ipsa sanguinis subtractio: mox enim post sanguinis è naribus prurptionem mulier ab omnibus symptomatibus libera evasit.

WILL. Non expedit, Galene, huius meminisse mulieris. Nam etsi dicas eam menstruæ purgationis retentione non paucò tempore fuisset gravatam; id tamèn, quo fluxus menstruus movetur, respondebit, ut aliàs Erasistratus, cum fuerit ex aliqua causa retentum, nequaquam sectione venæ evacuatur: nequè si quam labem ex eo sanguis accepit detractio- ne emendatur. Ego autem repetam, quod aliàs monui *Ἀπαραπορεύειν à natura* (b) institutos casus nonnullos extare, quos medicina neutiquam imitari, nequè si fortè deficient phlebotomia supplere possit. Nulla sanguinis missio crisi, & spontaneo sanguinis fluxui è naribus, quo mulier servata est, æquivalens fuisset. Ac licèt ego quoque huic forsan mulieri sanguinem detraxissem; Erasistratus (c) tamen dicere posset quòd pejus illi futurum fuisset ex secta venā; nam crisis, vel non supervenisset, ob revocatam sanguinis missione naturam ab opere, quod moliebatur; vel tardiùs sanè supervenisset, & minori cum ægrotantis emolumento. Hæc eadem, & his planè similia non semel tu etiam docuisti, Galene in scriptis tuis.

Cum autem verissimum sit capite potissimum mulierem istam laborasse; placet attexere historiam Medici, quem in libris Methodi notasti ad exitum ferè perductum ex sanguinis missione in vehementi capitis dolore.

(a) Gal. de venæ section. adv. Erasistrateos c. i.

(b) Will. de phlebotom.

(c) Sanguinis detractio sæpè, aut impedit, aut retardat crisin.

HISTORIA OCTAVA.

*Medici, cui conquievit quidem, sanguinis missione, capitis dolor;
verum postea multa pejus se habuit.*

Medicus (a) quidam, scripsisti, quinquagenarius, cum iam septimanæ noctem ægrotaret, nec viribus admodum valentibus esset; dolore illi capitis vehementi in dextro potissimum tempore oborto, non expectans dum amicorum quispiam ad se veniret, sibi ipsi nocte venam incidit. Itaque dolor illi protinus conquievit: cæterum longo tempore, tum decolor, tum viribus imbecillis, tum exilis mansit, eliquatoque corpore desit (Atrophiam græci vocant) sic, ut vix pristinum habitum receperit.

GAL. Sic equidem accidit iis, qui symptomata, non affectum, causasque respiciunt: & dum Medici symptomati medendo, & deliniendo, vel moderando in ægroti gratiam, & adulationem quandam intenti nimis sunt; neglecto interim affectu, & causa ejusdem, morbos faciunt contumaciores, & curatu difficiliores. Alii verò dum (b) animosi videri voluerunt, ob id ipsum perierunt, quòd fortiter, ac viriliter contra dolorem semper sunt renixi; nec quòd eum leniret quicquam ceperunt: sed in asperis, & ut ipsi interpretabantur, affectum destruentibus auxiliis perseverarunt. Quos sanè spatio longiore curatos esse satius fuisset, quàm brevi viriliter mori: ut disertissimè explicui in eo ipso loco, quem adduxisti, Willis. Ac novi quosdam sanguinis detractione à doloribus absque ullo discrimine citò liberatos.

HISTORIA NONA.

*Sive potius fabula ægrotantis à dolore beneficio sectionis
arteriæ liberati.*

ERat quidam, qui diuturno vexabatur dolore in ea maximè parte fixo, qua jecur septo transverso connectitur. Monitus ego per quædam (c) insomnia, quorum duo perspicua visa sunt, accessi ad dextræ manus arteriam inter indicem, & pollicem sitam, sinique fluere, donec sanguis spontè resisteret; nam ita somnium præceperat. Effluxit autem non tota libra. Subito itaque diuturnus extinctus dolor est in illa maximè parte fixus, qua jecur septo transverso committitur.

(a) Gal. I. 12. meth. med. cap. 1.

(b) Gal. meth. med. lib. 12. cap. 1.

(c) Gal. I. de cur. rat. per sang. miss. cap. 23.

HISTORIA DECIMA.

Sive potius fabula :

AT Minister (a) Dei Pergami diutino lateris cruciatu laborans , liberatus est , arteria in summa manu incisa . Aggressus , & ipse illud insomniæ monitu .

HISTORIA UNDECIMA.

Oeconomi Divitis cujusdam Romani, ab oculorum inflammatione curati.

OEconomus autem cujusdam divitis Romani , cui cæcitatis imminerebat periculum ob oculorum inflammationem , sanguinis missione sanatus est . (b) Ubi enim juvenem multi sanguinis cognovissem ; ac oculos quidem nondum ulceratos habere : ceterum phlegmonem maximam , fluxionemque ; tum in ambabus palpebris densitatem ; atque in altera quasdam etiam asperitates : à quibus oborta caligine ærotus magis , magisque dolebat ; ac phlegmone , fluxioneque exacerbabantur . His inquam conspectis — prima protinus detractioe tres sanguinis libras exhausti ; deinde hora nona aliam . A quibus mirificè refectus , inunctus est postero die mollium collyriorum copia ; cui admixtum erat , quod vinum habet , sicuti in ejusmodi facere consuevimus ; illitu sub palpebris facto specilli cuspide in summo medicamen impositum ferente . Idque ter eadem die factum est . Post quas inunctiones sub occasum Solis in balneum ductus est . Postero deinde die palpebris extra versis inunctus est majore copia collyrii illius , quod vinum recipit , molli illi collyrio admixta : dein ad vesperam lotus est . Postridie verò oculis apertis , phlegmoneque , ac fluxione planè liberis , divitem obvium dominum salutavit . Verum ex palpebris testabant extergendæ laboranti , tum densitates illæ , tum asperitates . Ceterum id fieri non poterat citrà medicamentum mordax . Atqui ferre illud neutiquam potuisset , nisi prius purgato corpore .

ERAS. Historias (1) rogavi eorum , qui certò à morbis extractione sanguinis fuerint curati : Tu verò , Galene , vel fabulas obtrudis ; vel eos narras ægotantes , de quibus maximè dubitandum est ; an aliquod acceperint à missione sanguinis auxilium !

Conjicere aliquid ex ægotantis somniis non videtur alienum ab hominum prudentia . Sed illa somnia fuerunt tua , non ægotantis . Quænam fuerunt perspicua somnia ista tua ; quibus monitus arterias secasti manuum ? Quis Minister Dei Pergami ? Minister certè cacodæmonis ille fuit ; & fortè ejusdem , qui tibi assistebat , dum libros illos conscribebas !

WILL.

(a) Gal. l. de cur. rat. per sang. miss. cap. 23.

(b) Cap. 17.

(1) Gal. vel decipiebat tantum ; vel etiam ipse decipiebatur .

WILL. Nimum hoc est Galene : aut decipiebas, cum non decipereris ; aut decipiebas alios , & decipiebaris idem !

ERAS. Elige jam quicquid ex his velis , quæ dicit Willis .

Tanta tibi in his obstinatio , & pervicacia fuit , ut Deorum etiam jussu, atque consilio, non venarum modò, sed arteriarum quòque sectione ægrotos te persanasse deprædicares ! Et reperti nè sunt , qui tibi crederent ; & ut nos fidem habebimus reliquis , quæ nobis narraſti , & quæ narraturus es ?

Præterquamquod (1) Oeconomus ille Divitis ; etsi quatuor librarum sanguinis detractio reſectus tibi viſus fuerit , cum multò verisimilius sit fuisse diſiectum ; nequè tamen ab ophthalmia ſanatus eſt . Væ illi nili pluries medicamentum ipſi oculo adhibuiſſes , quod vinum accipiebat . Et pluries etiam lotus eſt ager ille , nequè tamen his omnibus rectè ſanatus eſt : licet dicas , quòd melius ſe habuerit . Reſtabant enim abſtergendæ adhuc tum denſitates , tum aſperitates in oculis ; exigui ſcilicet tumores , & fortassis etiam ulcera exigua aded , ut vix intenta oculorum acie conſpiciantur . Quæ non ſanantur miſſione ſanguinis ; ut non ſanantur quæcunque aliæ denſitates , & aſperitates ; & quicunque alii tumores ; & quæcunque alia ulcera , quacunque in parte corporis ſedem habentia . Eſtne ulcus, aut tumor aliquis, cujus , ſanguine quantumvis detractò , poſſit Medicus promittere curationem ? nullus planè ! Eſt ne aſperitas , ſivè ſcabrities aliqua , aut denſitas cutis , quæ tollatur miſſo ſanguine ? nulla proſectò ! Cum tamen paſſim ſcabies ulceribus , aſperitate , & ſcabritie cutis moleſtiſſima ; & paſſim alii tumores , alia ulcera , & aliæ aſperitates , medicamenti ſanantur ; quæ nihil ſimile habent cum ſanguinis miſſione ; & nihil ſimile præſtant . Ac quidem in ſcabritie , & aſperitatibus tunicarum oculi œconomi morbus conſiſtebat .

Ægrotus iſte tuus tibi videtur reſectus quatuor librarum ſanguinis pondere detractò ! Mihi nequè videtur reſectus ; nequè videtur ſanatus ab ophthalmia ; ac ſi levatus eſt , medicamento videtur levatus , quòd præter cætera vinum accipiebat . Et tutemet aliàs nobis teſtatus es , medicato ſanguine per vini potationem meracioris , te pluries diſcuſſa obſervafſe , & ſoluta ea , quæ in oculis ophthalmiam facere conſueverunt ; abſque alterius medicamenti uſu . Nequè mirum eſſe debet , ſi non rarò hæc eadem habeantur beneficia medicamento , quod ipſi oculo applicetur . Et venulæ quidem oculorum nonnunquam brevî tempore replentur ſanguine , & oculi videntur rubicundi ; mox detumeſcunt eadem venæ , & occultantur , & oculi apparent , ut ſi eſſent ſani ; & poſt breve tempus iterum conſpicuæ fiunt , & ſanguine replentur eadem venæ .

In Oeconomo igitur cum dicere non poſſis miſſione largiſſima ſanguinis eum fuiſſe ſanatum ; nequè dicere debueras , quòd eadem fuerit reſectus . Conquievit fortè illi aliquantulum dolor ; quod etiam ſæpè fit abſque tanto totius vitæ diſcrimine ; ſed mox à ſanguine miſſo , facile pejus ſe habuiſſet ; niſi medicamentum , ſivè collyrium ex vino adhibuiſſes .

GAL. Meam in his ſtatui tibi hodie præſtare operam , Erasistrate . Qui cum mea non probes , haud tamen improbabis ea etiam , quæ ab Hippocra-

M 2

te

(1) Sanguinis detractio nullius tumoris , aut ulceris , aut aſperitatis , & ſcabritiei particulæ alicujus curatio promitti poteſt .

te (a) in Anaxionis historia narrata sunt.

Huic, etsi *inconcoctissima* (b) *conflictabatur pleuritide*, octava die incubito Hippocrates fecit venam; & dolores ipsi facti sunt leniores.

ERAS. Atque idem Anaxioni pleuritis facta est crudior, & minus coctibilis eo sensu, quo tu dicis *inconcoctissima*. Viginti sex post sanguinis missionem laboravit diebus; in quibus pluries melius, pluries pejùs se habuit. Sudavit; multa per os expurgavit, primum liquidiora, postea magis concocta; purulentæ, albæ substantiæ non exiguam quantitatem unà cum urinis emisit; ac trigesima quarta demum die toto corpore sudore perfusus integer factus est.

HISTORIA DUODECIMA.

Anaxionis pleuritide laborantis.

Alderæ Anaxion, inquit scriptor ille quisquis fuit, in febrem acutam incidit. Dextri lateris assiduus eum dolor cruciabat; tussim habebat aridam, nequè primis diebus expuit; sitibundus erat, & insomnis; urinae boni coloris, multæ, & tenues. Sexto die delirabat; & fotibus nihil remittebatur. Septimo magis laborabat: quippè febris intendebatur, nec imminuebantur dolores; simulque tusses infestabant; difficulter etiam spirabat. Octavo cubitum secui: multum ut debebat; effluebat: leniores ibi evaserunt dolores; sed tusses aridæ permanebant. Undecimo febres fuerunt mitiores; aliquantum circa caput sudavit; etiamnum tusses durabant: & quæ à pulmonibus exibant, liquidiora erant. Decimo, & septimo cepit pauca concocta expuere; & levatus est. Vigesimo sudavit; febre liberatus est. A iudicio rectius habuit; siticulosus verò erat, & à pulmone non bonæ purgationes. Vigesimo septimo rediit febris; tussit; multa excreavit concocta; in urina multa subsidebant alba; desiit sitire; dormivit. Trigesimo quarto, toto corpore sudavit; cessavit febris; in totum est iudicatus.

Huic octava die missus est sanguis, cum minus conveniebat. At vos non desissetis in hoc morbo sanguinem mittere, donec planè extinctus fuisset Anaxion. Hippocrates autem semel misit. Fertur missio hujus ægrotantis sedasse dolores; sed certò certius morbus factus est crudior: & causa morbi facta est contumacior, & minus resolubilis, quàm fuisset, si sanguis non fuisset detractus: ut accidit Medico à te relato, qui in dolore capitis sibi venam aperuit, & penè extinctus est. Nequè in hoc ægrotante detractio, morbi causam respicere potuit. Febribus Anaxion (febribus enim; ut ait Hippocrates complures morbi sanantur) sudoribus; iis, quæ per vias urinarum expurgata sunt; nequaquam sanguinis missione sanatus est.

Verùm animadvertisti, Galene, quæ habet idem scriptor de morbis popularibus, libro sexto, sectione septima.

(a) Hipp. de morb. vulg. lib. 3. ægr. 8.

(b) Galen. in comment.

HISTORIA DECIMATERTIA.

Multorum angina, & inflammatione pulmonum laborantium, qui nullum auxilium à venæ sectione acceperunt.

TUssis, (¹) inquit, cæperunt circa solstitium hybernum — ex frequenti australium, & aquilonarium, ac (a) nivorum transmutatione. Ex his aliæ breviores, aliæ diuturniores fiebant; & post has multæ peripneumonicae affectiones. Ante æquinoctium rursus plerisque revertebantur; quadragesima, ut plurimum ab initio die — aliquibus autem fauces inflammatae sunt. Quibusdam anginæ obortæ. Quibusdam leves syderationes: aliis nyctalopes — Cæterum mulieres non similiter à tussi afflictæ sunt — & ex his valde paucae ad peripneumoniam affectionem devenerunt; atque hæc seniores — At anginæ liberis duabus oboriebantur; atque hæc mansuetissimi moris erant: gravius autem famulas corripiebant; quibus, & violentissima fiebant: ipsasque celerrimè perimebant. Viris verè multis fiebant; qui partim evaserunt; partim perierunt — Quibus verò etiam venæ circa tempora, & cervicem attollebantur, his aliquantulum malæ erant: pessimæ verò his, quibus spiritus sublimis coelevabatur, ubi febrili rigore insuper riguissent. Postea subdit autor ille. His nequè reprimèntia medicamenta; nequè ventris perturbatio, nequè venæ sectio, nequè quæcunque usurpaverim, ullum notabile auxilium attulerunt. Secui enim & in cubito, & sub lingua venam; & per superiora etiam purgavi. Atque hæc quidem in æstate, quemadmodum etiam alia multa, quæ proruperant, extiterunt.

Verisimile autem est, eum qui hæc conscripsit, non omnia adhibuisse remedia; quæ humores maximè corrigere, & sic ægrotantibus opem afferre potuissent: sed quicquid sit de aliis medicamentis, sectio venarum nullum omninò præstitit beneficium.

GAL. Commentariis complexus sum, quæcunque notavi in hoc libro Hippocratis. Hujusmodi (b) autem erat pestilentis aeris constitutio; ut quæ maximoperè prodesse debuissent præsidia, minimè profuerint.

ERAS. At multi sanabantur, & multi peribant; & tùm isti, tùm illi, inquit scriptor, nullum notabile accipiebant à sanguinis missione auxilium.

WILL. In peste, (c) ac febribus malignis; ac consequenter in pestilenti aeris constitutione, quæ tales morbos progignit, à phlebotomia (d) omninò abstinendum existimavi. Præterea ubi causa morbi, aut vomitionem (e) immanem; aut affectus dysentericos cieat; vel extus propulsa, variolos, morbillos, aliavè exanthemata illatura videatur, talis quicunque naturæ impetus, si bonus non perturbari, si malus non in pejus incitari per phlebotomiam debet.

ERAS.

(a) Hipp. de morb. prop. lib. 6. sect. 7.

(b) Gal. comment. in l. 6. Hipp. de morb. vulg. sect. 7.

(c, d, e) Will. de phlebot. fol. mihi 172.

(1) In angina, & peripneumonia populari, nihil profuit secasse venam.

ERAS. His,⁽¹⁾ inquam, similibusque rationibus vestris ferè in omnibus aliis morbis parcendum esse sanguini. Nequè enim difficile esset in omnibus ferè morbis has item adducere rationes, & similiter in omni ferè casu vestros istos aptare sermones pro damnanda semper venæ sectione. Quin ipsa ex se res manifesta fiet, si unquam dilucidè explicabitis; quid intelligatis per verba illa *pestilens aeris constitutio; pestis; febris maligna*; quid, cum dicitis *causa morbi vomitionem immanem, aut affectus dysentericos, aut alios similes ciens*; vel *extus propulsa, exanthemata*, vel quos appellarunt juniores *variolos, & morbillos*, illatura videatur; ac cum *naturæ impetus si bonus non perturbari*; si *malus non in pejus incitari per phlebotomiam debet*! Hac, inquam, & similia verba cum fuerint à vobis clarè, & dilucidè explicata, manifestò ex ipsis vestris rationibus constabit, venas aut nunquam, aut rarò esse secandas. Cumque in morbis ferè omnibus aliquis semper sit naturæ impetus, & conatus: in omnibus item sermo ille adaptari potest, si bonus est talis naturæ impetus, & conatus *non perturbari*: si *malus non in pejus incitari per phlebotomiam debet*. Sic postquam per alia verba, quibus utimini, quid intelligatis, explicatum fuerit; facilè ex ipsis vestris rationibus concludemus, per quam rarò profectò convenire sanguinis derractionem. Sed ⁽²⁾ si mihi, Galene, liceat divinare, ut alia multa, nunquam tua methodo, in quo consistat aer pestilens explicabis; ut nequè qui possunt transmutationes ventorum australium in boreales, & nivosos, constitutionem aeris facere pestilentem. Si unquam hoc facies, eris mihi magnus Apollo. De his tamen nunc non est disputandum.

Illud autem prætereundum minime est; constitutionem, quam appellas, Galene, aeris pestilentem (quicquid tandem pro aere pestilenti intelligas) non quidem tantùm haberi à ventorum oppositorum mutationibus repentinis, & pluries repetitis, quibus universæ regionis aer inficiatur; sed propter aliquas particulares causas reperiri posse in aliqua fovea, è qua quis de recenti terram excavet; in aliquo antro; in aliquo puteo, in quo homo aliquis pluries in die immorari, & ab illo aere in alium dissimilem aerem transire debeat; potest esse in aliqua domo particulari, propter peculiare aliquas causas, quæ circa illam tantùm domum reperiantur; cum urbs, & regio omnis circumposita, & circumambiens urbem, cœlum nihil hujuscemodi habeat.

Utatur (3) jam unus, vel alius homo noxiò aere sive foveæ, sive antri, sive putei; vel pluries ab uno in multo sanè dissimilem aerem transeat; & fiat ipsi propter hoc vel angina, vel pleuritis, vel peripneumonia, vel morbus

(1) Verbis quidam utuntur obscurissimum, sive occultum habentibus significatum: quæ si unquam per ipsos explicentur, facilè constabit perquam rarò convenire secare venas.

(2) Ad iactandam scientiam rerum, quibusdam verbis sæpè utitur Galenus, quæ suis principiis sunt inexplicabilia.

(3) Si cum eorum plures, angina, peripneumonia similibusque morbis prehenduntur ob pestilentem, quam appellant, aeris constitutionem, non expedit de trahere sanguinem, neque hoc idem conveniet, cum pauci tantum læduntur ob minus latè diffusam similium morborum causam.

bus alius. Huic multi conducere existimant sanguinem mittere. Plerique doctores multum huic homini sperandum esse censent à sanguinis detractione; quoniam in tota urbe, inque tota regione unus tantum, vel alter, aut pauci admodum sunt, qui sic ægrotent sive angina, sive pleuritide. At si regioni, aut urbi circumfusus aer gravis sit, & pestilens vestro more dicatur; & quamplurimi eodem tempore angina, aut peripneumonia laborent, his, quoniam plures sunt; existimandum erit nullum notabile auxilium sanguinis missionem afferre: in his pro ut deducitur ex his, quæ habet Willis, abstinendum omnino est à detractione, tanquam noxia potius, quam utili.

Rudis profectò, atque ridicula philosophandi ratio! Enim verò quod accidit uni potest accidere omnibus; & quod accidit omnibus, potest contingere uni tantum. Cum autem civitati, aut regioni lues accidit, qua multi eodem tempore, similive ægrotent morbo; tunc sive aeris, sive aquæ, sive alicujus edulii, quo multi utantur, pestilens, gravis, & maligna accusatur constitutio; & plerique sapientum ægritudinem putant sanguinis missione nequaquam curari posse. Si verò idem simileve malum uni, vel alteri tantum fiat; tunc iidem sapientes censent, maximum remedium esse secare venas: quasi id, quod fit à causa universalis multos lædente; fieri nequeat à causa particulari, quæ unum tantum offendat.

Diversa causa, inquit, diversa exposcit remedia, etiam si morbus videatur similis. Ita sanè nos quodque plerunque dicendum existinamus: verum hæc causæ diversitas, propter quam varia exposcantur remedia, non consistit in majori, aut minori, regionis, urbis, aut obsessi loci amplitudine. Et quæ causa unum afficit hominem; potest, si latius pateat, eodem tempore homines afficere universos. Et quæ multos lædere apta est, si angusto tantum reperitur mundi in angulo, unum, vel alterum, & quandoque neminem offendet. Cum autem morbi causa quamplurimos afficit; tunc pestilens, & maligna accusatur aeris constitutio: cum verò unus tantum afficitur; nihil cogitatur de hujusmodi causæ similitudine, quæ omnes lædere posset, si latius pateret. Et diversis utendum censent remediis, cum quamplurimi, ac cum unus tantum læditur: quasi id quod reperitur in universa aliqua regione, non possit reperiri in singulari domo, vel domus angulo; ut nemo, vel unus tantum, aut alter homo afficiatur.

Sed (1) cum Hippocrates nulla adducat signa, quibus anginæ, pleuritides, & peripneumoniæ, quæ quamplurimos sustulerunt, distingui valeant, & internosci ab iis, quæ minùs latè grassantur, & pauciores offendunt; argumentum est, eas fuisse ejusdem generis, ac illæ, quæ uni tantum, vel alteri accidere possunt.

Sed in illis, cum plurimi essent, qui similiter afficerentur, facillimum fuit cognoscere sanguinis missionem nullum beneficium præstitisse: quod non æquè facilè cognoscitur, cum unus tantum, aut alter afficitur. Atque illud, quod præcefferant venti, tum australes, tum aquilonares; nihil aliud concludit, nisi quod causa fuerit universalior, & latè patens; qua plurimi eodem tempore potuerint affici. Unde omnino vanum est existimare, sanguinis

(1) Morbi, qui in Thaso eodem tempore quamplurimos sustulerunt; non videntur dissimiles iis, qui passim paucos molestare solent.

nis missionem, quæ quamplurimos nihil juvit, uni, vel alteri similiter affe-
cto, præsidio esse posse.

Et hæc quidem omnia clariùs, uti dixi, patebunt, posteaquam, saltem
facta aliqua hypothefi, explicaveris, Galene, quid pro pestilenti intelligas
aeris constitutione. Quæ (¹) verba, & alia similia, nisi priùs explicentur (pro
ut à nemine, quem noverim, sunt explicata) nihil significant; & non sunt
satis ad distinguendum morbum à morbo; nequè satis sunt ad ostendendum
remedia, quæ cum causa erat universalis, quamplurimis non profuere; uni
vel alteri, cum causa particularis est, opem afferre posse.

Vereor (²) autem, ne dicas, te pestilens aliquid, & malignum causari
solitum in morbis gravioribus; cùm causæ illorum principiis tuis, calido, &
frigido, humido, & sicco explicari nequeunt. Ego autem, inquam, tibi, qui
illis principiis fueris philosophatus, non magis occultam esse pestis essentiam,
atque causam; quàm scabiei. Potes nè tu, disertissime, Galene (jam non
est, qui nos audiat mortalium) potes ne principiis illis tuis nè dum pestis, sed
scabiei naturam dilucidè explicare? Vide quæso si meliora habeas!

GAL. Omnia patienter ferre mihi animus est. Erasistrate, quæ acer-
bè dixeris; quoniam læsus prior es: patientia tamen rogo ne abutare mea; ac
quidem ne abutaris, quantum possum tibi morem geram.

Difficillimum (³) autem est morbum reperire, in quo ex sola sanguinis
detractione, sanitatem Medicus ægrotanti homini certo promittere possit: ita
ut dicere valeat, sanguinem detrahito, & sanus eris. Ac difficillimum est
morbum concipere, in quo missio sit adedè necessaria; ut alia medicamenta
necessitati ægrotantis corporis satisfacere nequeant. Ac Medici quidem senio-
res, qui tunc erant, cùm ego illa Romæ scriberem, venas nunquam seca-
bant; aliis tamen evacuatoriis præsidiiis utebantur: ut frictionibus; ambula-
tionibus, aliisve exercitiorum generibus; balneis non unius naturæ; cucur-
bitulis; clysteriis; iis, quæ per urinas, vel per alvum ducunt, vel sudores
promoveant; & omnium maximè à te edocti abstinentia utebantur. Quæ (^a)
*idem, quod & venæ sectio; verùm longiore tempore efficere poterant: nisi si ob af-
fectæ partis dominium, & plenitudinis excessum; mors ægrotum præoccuparet.*
Casus autem hic, in quo mors præoccupet ægrotantem, antequam aliis re-
mediis, & insensibili transpiratione, dum ille à cibis abstinet, humorum co-
pia diminuatur; vel nullus est, ut aliàs dixisti, vel rarus admodum; & suf-
ficit, omisso prandio, vel cœna, nonnullarum horarum, vel dici lapsus, ut
homo non ampliùs ex plenitudine vasorum sanguiferorum laboret; sed ob alias
causas: ut accidit ebriis, & iis, qui crapulis indulgent; quibus nisi interim
aliud fiat in corpore vitium, abstinentia unius, vel alterius diei sanat ebrie-
tatem, & plenitudinem. Et quidem cùm juniores Medici meam tunc fuerint
citò amplexati sententiam, credentes facillimum esse, rectè decernere quando
sanguis mittendus, & qui mittendi modus sit, quamplurimos enecabant;
plures

(^a) Gal. de venæ sectione adversus Erasistrateos cap. 6.

(¹) Verba quædam, nisi priùs explicentur, nihil significant.

(²) Calido, & frigido, humido, & sicco, non est magis inexplicabilis pestis
natura, quàm scabiei.

(³) Multa visa sunt Galeno id ipsum efficere boni; quod sanguinis missio.

plures(a) enim hac ratione perierunt—meorum discipulorum incitia,—quorum quibus non fuerat vena secta à senioribus illius temporis medicinarum professoribus.

Verum enim verò etsi hæc ita se habuerit ; ac licet Hippocrates in libris Epidemiorum , in quibus magnam sanè ægrotorum multitudinem describit, semel tantum , aut bis meminerit sanguinis missionem proficuum fuisse ; & in his etiam dubitare possis , an re vera missione sanguinis ægotantes fuerint adjuvi : attamen libro primo describens ea , quæ in Thaso acciderant propter varias in cœlo tempestates , & aeris mutationes ; ex quibus quamplurimi ægotarunt ; febribus (b) autem , inquit , ardentibus hæc accidebant. Quibus ritè , ac largiter sanguis per nares erupit , ea de causa maximè servabantur : nec ullum novi , si rectè ei erupisset sanguis , in hoc statu quenquam mortuum — Quibusdam autem morbus regius accidit sexta die . Verum his purgatio ; aut alvus turbata profuit ; aut larga sanguinis eruptio — sanguis autem plurimis erupit ; maximè adolescentibus , & in vigore constitutis ; & talium plerique perierunt , quibus sanguis non erupit — Qui multa sanguinis eruptione facta , in dysentericum statum delapsi , superstites manserunt — Plurimis itaque in mensibus febres apparebant . Quibusdam verò ex naribus sanguis erupit ; & virginibus multis id primum factum est . Quibusdam , & ex naribus sanguis , & menses proruperunt . Nequè ullam mortuam novi ex his , quibus aliquid probè factum esset.

Cum igitur omnes , quibus sanguinis eruptiones acciderunt , servati fuerint : ac iis , qui mortui sunt nihil tale acciderit ; oportet existimare , plerumque in morbis sanguinis eruptiones arte paratas , & ritè institutam sanguinis missionem , non paucos servare , & morti eripere.

WILL. Non semel his factum est satis , Galene ; nequè est , quod in his multum defatigari debeat Erasistratus ; spontaneas enim , salutare sanguinis eruptiones ; imitari non possumus ; nequè , ut pluries monui , phlebotomia quæcunque pro illis supplet.

ERAS. Febres , morbi que non uniusmodi speciei ea tempestate vulgari ter grassabantur in Thaso : ac præcipuè ortum ducebant à tumoribus , abscessibus , turberculis varii generis , similibusque aliis corporum affectionibus ; ut latè , atque clarissimè patet ex ipsa lectione illius scriptoris. Qui etiam inquit , quibusdam circa judicationem sanguis non erupit , sed tubercula juxta aures excitata — Abscessus (c) ad sanguinis eruptionem fiebant — Statim ab initio febris acuta ; parum insuper rigeant ; vigiles erant ; siticulosi ; anxii ; parum exudantes circa frontem , & claviculas , nullus per totum ; multum delirabant , tumores , tristitiæ , & extremitates subfrigidae , pedes summi , & maximè manuum summæ partes . Quæ omnia contingunt , ubi tumores , & abscessus , & suppurationes fiunt . Cumque his tumores , sive abscessus , & tubercula aliquando extrinsecus etiam apparuerint ; absque dubio quamplurimis , quibus non apparebant extrinsecus , interni erant . Atque omnes qua-

(a) Gal. de venæ sectione adversus Erasistratos cap. 6.

(b) Hipp. in lib. Epidem. lib. I.

(c) Hipp. in lib. Epidem. lib. I.

druplici servabantur via: videlicet (a) si sanguis è naribus probè erupisset; aut urinae multæ, & multam subsidentiam habentes per vesicam prodissent; aut per ventrem turbatum biliosa tempestivè processissent; aut qui dysenterici facti essent. Acciditque multis, ut non ex uno præscriptorum signorum judicarentur, sed per omnia percurrerent; & gravius quidem habere videbantur: conservabantur autem omnes, quibus hæc accidissent.

Etenim verò, Galene disrupto abscessu, vel tumore in capite, si sanguis, vel sangninolenta substantia, aliis permixta humoribus meliùs abludentibus, partem affectam, & morbi causam secùm advehentibus, per nares erupisset, servabatur homo. Quòd si in capite, pectore, infimo ventre, vel alia parte corporis abscessus factus esset; qui per urinas, & iis, quæ copiosè subsidebant in urinis, postea expurgatus esset; humoresque corporis hac via fuissent re-ctificati, servabatur item homo. Si verò in infimo ventre tumores, sive abscessus contigissent, & venter fuisset exturbatus; diarrhœa, vel sanguinolento fluxu morbus solvebatur: vel ab aliis partibus ad intestina delatum id, quod expurgandum erat; una cum alvi fæcibus excernebatur; & similiter ægroti sanabantur.

Ex his autem iisdem, qui servati sunt, si sanguis ipsis missus fuisset, multi mortui essent; tum propter causas, quas alibi diximus; tum propter vestras rationes, quòd constitutio aeris pestilens tunc fuerit: tum quia, ut dicitis, naturæ (b) impetus si bonus non perturbari, si malus, non in peius incitari per phlebotomiam debet; tum etiam maximè, quoniam eorum omnium, quæ utilia fuerunt, nihil præstat sanguinis detractio. Ea enim confusè, & absque ulla partium electione bonum, malum; utile, & inutile; & quicquid casu circa foramen reperitur, vel ad foramen accedit; absque eo, quod chirurgus retinendum nè potius illud sit, an evacuandum cognoscere possit, emittitur. Atque in iis, quæ per venas feruntur, dum homo vivit, verissimum est plus utilis, quàm inutilis substantiæ reperiri: & sæpè utiliter retinentur, & sinuntur etiam in vasis, quæ aliquod habent vitium: cum scilicet meliora intrudi nequeant.

Urinæ, & ea, quæ subsidebant in urinis, quorum excretionem morbi illi solvebantur, vix fortè exæquebantur decimæ tantum parti eorum, quæ in renibus percolabantur; reliquæ novem partes utiliter retinebantur in vasis: ut ex his facilè constet, pertusa vena in his ægrotantibus sive pedis, sive brachii, novem partes utilium humorum effluere debuisse; vix unam tantum inutilem.

Quadruplici (1) via, inquit scriptor ille, morbi judicabantur, & ægro-
tantes, quibus ritè aliquid hujuscemodi contingebat, sanabantur. Cur non, Galene, addidit idem scriptor quintam viam, venæ sectionem? Quæ si his, similibusque evacuationibus æquivaleret, utique omnes, vena secta, potuissent sanari. Cumque pluries, Galene, dixeris Hippocratem iis etiam venas secuisse, quibus non meminit fuisse sectas; nunc hac vice consilio utere meo;

ac

(a) Hipp. in lib. Epid. lib. i.

(b) Will. loco supra citat. de phlebot.

(1) Iis, qui in Thaso ægrotarunt, vel omisit Hipp. sanguinem mittere, vel non profuit missio.

ac pernega, his, qui mortui sunt, sanguinem fuisse detractum: melius enim causam defendes tuam; quàm si dicas fuisse sectas venas. Cur enim omisit Hippocrates hoc quintum illorum morborum remedium; cur omisit hanc quintam ad sanitatem recuperandam viam; nisi quia, si fortè aliquibus sanguis detractus fuit, citius perierunt?

WILL. Cur (1) non, Galene sexto Antonini (a) Imperatoris filio venas secasti; sed vaticinatus, crisin per sudores expectasti? Cur juveni, in quo nequè ætas; nec tempus anni: nec virtutis imbecillitas; nec denique victus, qui morbum antecesserat, *adversabantur*; (b) *sed uno consensu omnia sanguinis missionem significabant*, secari venas minimè passus es? nequè quinta quidem præterierat dies! Tu autem futuram crisin per sanguinis è nare dextra eruptionem, veluti sybillinis edoctus versibus vaticinatus, expectari voluisti. Nequè eruptionis temporis momentum, nequè horæ minutum te fefellit; sed iussisti cum jam sanguis fluxurus esset, ut quidam occultum, quod sub veste habebat, vas supponeret, sanguinemque exciperet. Fortè & crises etiam expectavit Hippocrates in morbis, qui fuerunt in Thaso.

ERAS. Quis non credat, te viventem cum Æsculapio commercia habere solitum!

WILL. Revocare scilicet noluisti naturam à futura crisi, nullam aliam evacuationem, æquè utilem existimans.

GAL. Ità profectò; At palæstræ perito juveni; & alteri, qui toto die multum laboraverat, & in febrem inciderat, venas quidem secavi usque ad animi deliquium; magno cum opere pretio!

HISTORIA DECIMA QUINTA.

Ægrotantis Palæstritæ.

Palæstrita autem ægrotare incœperat hora prima noctis. Postridie (c) eum mane, circiter horam diei tertiam vidimus. Cum autem invenissem febrim admodum calidam; sed pulsus æquales, & maximos, & celeres, & frequentes, & vehementes; tum caloris qualitatem, quæ tactum minimè morderet; iam verò & urinas, tum crassitudine; tum colore à naturali habitu non multum alienas; audiens præterea hominem circiter triginta dies exercitationis consuetudinem intermisisse, pridie tamen exercitasse se vehementius, cæterum non multum; sumpsisse autem solitos cibos, atque eos concoxisse; quamvis tardè, & agrè, utpote cum febris vespere occupasset; cum interim rubicundus plenusque homo appareret; atque etiam plenitudinis sensum se percipere diceret: faciente interim quodam eorum, qui aderant, de secunda vena mentionem; visum mihi est, eius auxilii considerationem in aliud tempus remittere;

N 2

simul

(a) Galen. ad posthumum cap. 10.

(b) Cap. 13.

(c) Gal. lib. 9. meth. cap. 4.

(1) Cum crisin expectabat Galenus, non secabat venas.

simul ut certiùs sciremus, cuius generis febris esset; simul necessariò propter eam, quæ præcesserat concoctionis tarditatem.

WILL. Accurata quidem, diligens simul, atque docta ægritudinis narratio! Sed concurrentibus illis omnibus signis; ut potuit tantula concoctionis tarditas impedire sanguinis missionem? An quia alius prior mentionem fecerat de secanda vena, tibi visum est in aliud tempus auxilii hujus considerationem remittere? Tu enim consueta divinandi arte: qua præter ceteras pollebas, quamve Siculum Medicum invisens ægotantem, ostendisti; adeò ut Glauco, qui aderat, & Medicus ipse ægotans propter admirationem exclamassent, prima hora, quæ palæstritæ futura erant præcognoveras. Hac tamen vice sedulus potiùs, atque gravis; quàm vates videri maluisti.

GAL. Desine joculari Willis. Cum autem (a) vespere similem vigorem tueri febris est visa, ceu nihil sensibilibiter remittens, suspicio jam erat synochon esse; hancque ex obstructione, & sanguinis abundantia, & præ carnis copia, stipatione. Ac cum parem magnitudinem per totam noctem febris servaret, postero die visum est Medicis omnibus, qui inviserant, sanguinem esse mittendum.

ERAS. Vel hæc non acciderunt Romæ; vel si Romæ facta sunt, acciderunt quidem post secundum adventum tuum; cum jam libelli de sanguinis missione incredibili dicendi facundia evulgati essent: nam ante hoc tempus, ut tu dixisti, Seniores Romæ sanguinem non mittebant.

GAL. Nihil interest, ubi hæc facta sint. Discordia (b) verò orta de tempore, & vincentibus, qui in sequentem diem sanguinis missionem differendam suaderent; febris per totum illum diem evidenter visa est vigorem suum augere. Mox tertia sequente nocte, alia quidem accessio minimè incidit, quæ primæ ad proportionem responderet: erat tamen æstus ipse laboranti intolerabilis, urgebatque eum tensio ipsius corporis, nupote repleti; tum capitis pulsatio; atque ob hæc gravis vigilia, juvene in aliam, alias se figuras iactante.

ERAS. Imminebat fortè morbi iudicium.

WILL. Fortè aliqua imminebat crisis.

ERAS. Videbimus quò res evadet.

GAL. Vocatus accedo ad ægotantem hora circiter octava noctis. Invenioque febrem (c) calidissimam, pulsumque, qualem prædixi. Quoniam autem, nec in hoc; nec in lotio, nec in ipsa caloris qualitate indicium aliquod humorum putrescentium apparuit.

ERAS. Homo scilicet jam jam erat futurus sanus.

GAL. Optimum factum visum est (d) venam incidere, antequam putredo inciperet. Aufero itaque ab homine eo usque de industria sanguinem, quo ab animo liqueretur: maximum planè ubi valentes vires sunt continentis febris remedium; id quod, tum ratione, tum experientia didici. Primum nanque in contrarium statum agitur corpus, celeriter ex animi defectu refrigeratum: hoc verò nemo invenire potest, neque quod ipsis ægris; neque naturæ, quæ animantes gubernat, jucundius, utiliusve sit.

ERAS. Jucundius quidem dixerim; quoniam cum animi defectus sit
veluti

veluti mors brevis, omnes in eo cessant molestiæ: utilius autem non dixerim.

WILL. Atque ego quidem eorum qui (a) sanguinem usque ad leipophymiam haurire non verentur; praxi non facile assentiam.

ERAS. Sed audiamus quò res evadet.

GAL. Postmodum in ejusmodi corporibus necessario supervenit alvi dejectio; nonnunquam etiam bilis vomitio: quas res statim à toto corpore madores, sudoresve excipiunt. Quæ nimirum omnia cum huic quòque palæstritæ contigissent protinus febrem extinxerunt.

WILL. Causa cecidimus, Galene! Dicam tibi, ut olim tu mihi dixeras cum viam ostendi, per quam lentescens humor, qui peripneumoniam facit, facto particularum agmine, ad pertusam fertur in brachio venam.

GAL. Dormivit etiam (b) multis horis palæstrita; & dormiendo sudavit.

WILL. Causa cecidimus nunc etiam: etsi evidenti patris tui insomnio, ad Medicinæ studium excolendum datus fueris mortalibus.

ERAS. Vide quæso, Galene, an ego, licet prior læsus, patientia abutor tua; an tu, qui me læsisti, nunc etiam mea abuteris! De somniis sive tuis, sive genitoris, nihil quæro; ut neque de somno palæstritæ, qui jucundè nimis ex sanguinis missione, usque ad animi deliquium potuisset quidem æternum dormire; quod non semel, ut audiui, accidisse aliis expertus es.

Et facile quidem quisquis tibi concedet, alvi dejectione; bilis vomitu; madoribus; somno; sudoribusque e toto corpore emanantibus, quæ omnia palæstritæ supervenerunt, ejusdem febrem fuisse extinctam, ut ais; sive decessisse febrem, & conquievisse cor.

Ac (1) licet ante sectam venam illa nocte, quæ ægrotanti molesta nimis fuit, quamve vigil habuit, & ex alia in aliam figuram se jaectans, tum vomitus, tum dejectio, tum sudor potuerint præparari, non agam tecum rigidè, Galene; sed ex liberalissima sanguinis detractione, propter gravem animi affectum; qui non rarò illam consequitur, potuisse hæc omnia concitari admittam. Compertum enim mihi est, & multorum experientia, nisi fallor comprobatum, vehementiori aliquo animi affectu, & præsertim timore graviore, frequentissimè non solum alvum lubricam fieri; verum etiam incontinentem: necnon etiam eodem affectu homines, non solum balbutire solitos esse; sed vomitu etiam molestari; & frigidum etiam sudare; & canos etiam, & calvos brevi tempore fieri. Verumtamen (2) hæc, atque similia nequaquam omnia omnibus eodem modo contingunt: sed pro ut varia est affectio, & ab alia, atque ab alia occasione suscitata; & prout prius corpus esse potest prædispositum ad unum, vel ad alterum, vel ad plura ex his, aliud, atque aliud fit; & unum potius, quàm aliud; & non eodem modo, nequè omnibus similiter.

Sunt

(a) Will. de phlebotom.

(b) Gal. lib. 9. meth. med. cap. 4.

(1) Detractione sanguinis, potest excitari vomitus; alvi dejectio, sudor, & alia similia.

(2) Nullus peculiaris animi affectus necessario dum sanguis mittitur, sed facile aliqui s determinandus ab aliis simul concurrentibus causis excitatur.

Sunt autem nonnulla ex his, quæ fiunt propter varias animi affectiones, non unquam salutaria; non rarò verò omninò mortifera, & perniciofa. Accidari quidem possunt casus, in quibus sudores, dejectiones alvi, vomitiones, & alia similia ab animi affectu aliquo concitata, morbos auferant; & integrè vindicent ægrotantes, atque restituant.

Nequè negandum est sanguinis missionem, & hoc ipsum cognoscere hominem sibi detrahi sanguinem; varias in illius animo excitare posse graves affectiones: quæ quidem facillimè ex quavis etiam occasione; & sæpè omninò ad mentis libitum, absque ulla extrinseca occasione possunt suscitari. Nulla tamen est affectio, quæ necessariò fiat homini ex sanguinis missione.

Hinc est, quòd alii dum cognoscunt sibi sanguinem detrahi, ira exardescunt, & hi pauci sunt; alii mœrent; alii timent tantum; alii animo etiam linquuntur, etiam si parva quantitas detrahatur; aliis nihil ex his fit, etiam si magna sit effusio. Sunt etiam, quibus aliquid ex his fit, ne dum sibi ipsis, sed dum aliis sanguis mittitur: Homo scilicet aliquis dum videt, atque cognoscit alteri homini sanguinem detrahi, vel irascitur; vel commiseratur hominis illius conditionem; vel mœret; vel sibi timet, etiam si sibi non detrahatur; non rarò videntem effundi sanguinem deficit anima hominem; cui aliquando ad hæc satis est detractus à pecude sanguis.

Placet igitur tùm concedere, tùm affirmare, tùm quòque credere (id tamen quod possibile fuit) ex illo animi defectu; & ex aliqua, quæ consecuta est largiorem profusionem, animi affectione (quin ipse defectus ejusdem animi est affectus quidam) alvi dejectionem, vomitum, sudoresque fuisse promota, & his palæstritam conquievissè. Temerarium tamen, & crudele est hoc inventum, sinere venas effundere sanguinem, donec anima deficiat; ad hoc, ut si qui postea ad vitæ redeunt munia, vel faciliùs secedant; vel vomitu evacuent morbi causam; vel sudore perfundantur! Temerarium (¹) omninò inventum, quoniam nihil ex his promitti potest; & casui, fortunæ, vè vita hominis committitur. Fieri enim potest ex illo eodem animi defectu, atque affectu, prout rem diversimodè accipit animus, & prout corpus diversimodè est dispositum, ut, si qui priùs aderat alvi fluxus, sistatur; sistatur; & vomitus. Fieri potest, ut non solùm nullus provocetur maior, sed etiam, qui profundebatur sudor, compescatur, & retineatur. Sic nequè faminæ semper solvitur uterus eadem occasione animum movere potenti; nequè eadem semper reducitur, cessatque fluere; nequè eadem semper exarescunt mammx, quæ lacte priùs turgebant. Crudele equidem, & temerarium inventum; ad sollicitandam alvum; vel ad ciendum, & provocandum, sive vomitum, sive sudores, tantum profundere sanguinis, donec anima deficiat! quo scire nequeas, an rediturus sit æger! quo nonnulli nunquam rediere! Non (²) pauci enim, pro ut varia est animorum fortitudo, magnanimitas, pusillanimitas, spesque, desperatio, audacia, timor, fides, infidelitas, & alia similia; quæ nequè semper eidem homini sunt

(1) *Temerarium, atque crudele est, ut vel sudor, vel vomitus fiat; vel ut alvus sit incontinens, sanguinem mittere usque ad animi deliquium.*

(2) *Alii quidem ex parva, alii nonnisi ex magna sanguinis detractiōe patiuntur deliquium.*

sunt eadem, non prius animo linguuntur ex magna licet sanguinis effusione, quam re vera moriantur; animi scilicet fortitudine, atque constantia non aliis corporis viribus vitam protrahunt. Sic Alexander Avi mei discipulus animi fortitudine, qua alios maximè superavit, in eodem habitu (a) corporis, in quem se composuerat, cum admissurus milites esset, perduravit; donec à toto exercitu illo ad ultimum per salutatatus est: dimissoque vulgo, velut omni vitæ debito liberatus, fatigata membra rejecit, & paulò post vita functus est.

GAL. Ego etiam novi animi mores multum valere ad confirmandam, alterandam, vel destruendam corporis temperaturam: ac novi nonnullos deficere, pauca detracta sanguinis quantitate; alios non item. Quamobrem pluries monui, digitos pulsanti alicui arteriæ admovendos esse, semper ac sanguis mittitur; ut cognoscat Medicus an deficiat, & quando deficiat homo. Sed palæstrita ex plenitudine laborabat humorum adhuc non putrescentium.

ERAS. Quid (1) nunc cum istac tua corporis temperatura? quid cum plenitudine humorum adhuc non putrescentium? hæc sunt ex illis vocabulis tuis, quæ maxima indigent explicatione; & antequam clarè explicentur, nihil omninò significant: & satè superne Helmontius humoristarum tuorum, & tuasmet in his indicavit deceptiones. Sed dicamus de plenitudine, quæ quidem concipitur facilè, dummodò non addas putrescentium humorum, vel palæstrita non laboravit ex plenitudine, vel tertia die plenitudo jam defierat: velut desinit plenitudo ex ebrietate, propter excedentem nimis vini potum. Refer potiùs alium, quem spoponderas; & videamus an illi ex sanguinis missione soluta fuerit alvus, an vomitus, an sudor factus fuerit.

HISTORIA DECIMASEXTA.

Alterius agrotantis, similiter, ut ait Galenus, ac palæstritæ febrientis, ubi infelices narrantur casus, ex largiori sanguinis missione.

GAL. **N**ihil ex his accidit alteri. Is cum (b) tota die multum laborasset deinde levatus pauca comedisset, cepit nocte febricitare; totum etiam continuans sequentem diem. Hunc nos post secundam noctem vidimus; in cæteris quidem omnibus iam dicto juveni palæstritæ similiter affectum; verum putrescentium humorum evidentes præbentem notas. Itaque vena quòque huic protinus incisa, usque ad animi defectum evacuavimus.

WILL. Palæstritæ cum majori fiducia aperuisti venas; quia nullum putrescentium humorum signum in illo apparuisset. Huic item in quo evidentes putrescentium humorum apparebant notæ, sanguinem eduxisti usque ad animi defectum. At hic, qui tota die multum laboraverat, & pauca comederat, vel non fuerat evacuandus, vel secundum Hippocratis decreta pharmaco evacuandus fuit, quoniam putrescentium humorum evidentes in ipso apparebant notæ.

ERAS.

(a) Q. Curt. lib. 10.

(b) Gal. lib. 9. method. cap. 4.

(1) Putredo in sanguine, & putrescens humor sunt voces, quarum adhuc non patet significatio.

ERAS. Post jucundam, utilemque animi defectionem; supervenit ne huic defectio; & bilis vomitio? madoribus, & sudoribus statim post hæc perfusus ne est ægrotans; conquievit ne etiam illi febris?

GAL. Nihil ex his: sed idoneo (a) interposito spatio cibavimus primum malsa; deinde una interposita hora ptissanæ cremore. Atque hæc omnia intra quintam acta sunt horam. Cum autem similis sibi perseveraret febris, synochon eam fore ex putredine expectavimus.

WILL. Non (†) hoc cognovisti primo ægroti intuitu, ut solitus aliàs fueras? si cognovisses, utique tam largè sanguinem non evacuasses. Duos (b) namque in his Medicorum manibus perire vidisti (an manus illæ tuæ fuerunt, Galene?) qui (b, c) postquam animo liquerentur, nunquam revixerunt. Multi verò, etsi non protinus, ac postea propter virtutis infirmitatem perierunt; quos si quis citra ejus resolutionem evacuasset, minimè periissent. Quin etiam alii in morbos inciderunt longos, postquam immodica inanitione, resoluta naturalis vis fuit. Aliis cum immodicæ evacuationis noxam sarcire non potuissent, in omne reliquum vitæ tempus totius corporis temperamentum redditum est frigidius. Ex qua refrigeratione facile ex quavis occasione læsi, alii decolorati, ac malo corporis habitu vixerunt; alii ex eo ipso in morbos deciderunt exitiales aquam intercutem & orthopnoeam; & jecinoris, & ventriculi imbecillitatem, & apoplexiam, & deliria. Hæc tua sunt, Galene, si rectè meministi in eo ipso scripta libro, in quo palæstritam memoras.

ERAS. O' dignum caput, Galene, tuum, quo omnia sunt in voluminibus confarcinata bona, & mala, recta, & absurda! cujus ex ore oracula multa; sed omnia invicem pugnantia!

GAL. Apologiam ad hæc omnia meditor, Erasistrate; quam mox audies.

ERAS. Audiamus prius Willis, à quo multò sanè meliora sperare debeo. Atque in te quidem ego, Willis, non tam veneror, atque suspicio penitissimam rerum anatomicarum, aliarumque multarum rerum notitiam; quàm tùm vitæ integritatem, tùm morum ingenuitatem, atque candorem: & licet Helmontius aliquid conqueratur de te, tu tamen ea dixisti, quæ ex animo sentiebas; & quæ meliora, & quæ potiora tibi videbantur: quod est boni viri. Tuas rogo, Willis, observationes eorum, qui missione sanguinis curati visi sunt. Utq; (2) faciliùs de illis judicium feramus, opus est non unum, vel alterum referre ægrotantem, qui tibi, vel aliis missione curatus visus fuerit; nam hac etiam ratione multos reperiemus, qui superstitionibus, & vanis quibusdam signaculis à morbis vindicati dicantur: oportet ægrotantes referre quamplurimos simili planè morbo, haud curatu facili, laborantes, qui omissis aliis medicamentis, sola detractione sanguinis restituti fuerint; quive omissa detractione spontè minimè fuissent persanati.

WILL. Rigidè nimis rem istam agis Erasistrate.

ERAS.

(a) Eodem loco.

(b, c) Gal. lib. 9. Menth. med. cap. 10.

(†) Mala multa sunt ex sanguinis detractione usque ad animi deliquium.

(2) Multi vanis etiam quibusdam signis, & superstitionibus non minus ac aliis, sanguinis missione dicuntur sanati.

ERAS. Non (¹) quidem rigide, Willis; sufficit enim mihi si recenseas, morbum gravissimum, & periculosissimum, sed morbum levissimum quo ad vitæ periculum; ex iis tamen, qui spontè sanari minimè consuevere (puta scabiem) in quo promittens Medicus sanitatem, sive ratione, sive experimento edoctus, sciat, saltem ut plurimum se suam liberare fidem. Quod equidem difficile non est, si de aliis interrogem præsidii, quæ ab homine in morbis usurpantur.

WILL. Vera quidem loqueris; suntque quamplurima talia medicamenta. Ferè omnes, qui lue venerea laborant solo mercurio sanari possunt: estque lues venerea ex iis morbis, qui ut plurimum minimè spontè curantur.

ERAS. Ferè omnes, qui à vipera demorsi sunt, solius theriacæ ex vino usu sanari possunt: estque morbus ex morstu viperae non solum ex iis, qui ut plurimum haud spontè curantur, verum etiam ex iis, qui ut plurimum citò enecant.

WILL. Ji omnes, qui scabiè de recenti maximè communicata laborant, ferè semper sanantur solo mercurio diversimodè parato: estque scabies ex iis, qui periculo quidem carent morbis, sed qui ut plurimum non sanantur absque remedio.

ERAS. Ferè omnis quartana, myrrha, pipere, succo cyrenaico, gentiana, aliisque similibus, ut plurimum sanatur; quive aliquo ex his uti novit, suam liberat fidem, si quartanario promittat sanitatem: estque quartana ex iis, quæ sæpius longo tempore durant; & non spontè desinunt.

WILL. Ac reperti sunt Medici, qui unico remedio, quod febrifugum dixerunt, quartanarios ab aliis destitutos perfectè restituebant; fidemque, quam agrotanti sponsaverant, absq; alio medicamentorum usu solvebant.

ERAS. Suntque quamplurima alia his similia: atque indubitatum est, alia multa inveniri posse homini huc usque incognita; quibus similiter morbi plerique curari valeant.

Verum enim verò cum morbis ferè in omnibus quamplurimi Medicorum, maximè qui post Galenum fuerunt, & Galenum secuti sunt, venas secaverint; iidem isti nullum huc usque morbum cognoverunt, in quo sanguinis missioni satis fidendum esse existimaverint. Cumque multi antiquiorum, & multi, qui post me fuerunt, de re Medica volumina scripserint; nullus, ut audio, virorum maximè celebriorum morbum cognovit, in quo ex sanguinis missione absque aliis remediis sanitas promitti possit.

Quisquis, (²) quem ego audiverim, vel noverim, sive in febre aliqua, sive in tumore, sive in morbo alio, vel ex gravioribus, vel ex levioribus sanguinis missionem commendat, semper addit, & hoc aliud, & hoc aliud insuper faciendum est. Ex quo manifestum fit, huc usque nullum esse cognitum morbum; in quo sanguinis missioni satis fidendum sit. Non inquam nullum cognitum esse morbum, quo si plerique laborent, omnibus sanitas promitti possit ex detractiōe; sed quod non possit promitti, nequè uni tantum

Tom. I.

O

tum

(1) Nullus est morbus, in quo certè misso sanguine, sanitatem Medicus promittere possit.

(2) Qui sanguinis missionem commendat in morbis, sanguinis missioni haud satis fidunt.

tum ex multis simili ægrotantibus morbo, qui haud spontè curari consueverit. Secus sulphuris usu, non quidem omnibus, sed ferè omnibus, ubi quamplurimi scabie de recenti maximè communicata laborent, sanitas promitti potest: estque hic morbus ex iis, qui non consuevere sanari spontè.

Præterea illi, qui sanguinis missionem commendant, semper addunt, nisi hoc; vel illud aliud; aut aliud quidpiam obstat: cum contra remedia sint non pauca, quæ cum laudantur, nihil tale opus est addere. Ex quo etiam patet, eos, qui venas secant, nihil satis comperti; nihil adhuc certi habere.

Ac nos ratione hæc investigantes, ex hypothesi, quam fecimus, sanguinem posse superabundare, & nimis rarefieri; cognovimus tunc expedire aliquid detrahare; vel ut disruptio vasorum præcaveatur; vel ut effluxus in sinus internos minor sit. Quæ mittendi occasio, si unquam datur, rarò quidem datur; & brevi tempore durat.

WILL. Si hæc omnia sunt attendenda nunquam, aut rarò conveniet sanguinem mittere. Et ego non memini, me morbo in aliquo, ex innumeris, quorum therapejam tradidi, tantam habuisse in detractione fiduciam, ut superflua; & non potius necessaria visa fuerint alia remedia. Referam tamen, quæ memini, & eo ordine, quo memini.

Historiæ examinantur celebriores, à Clarissimo Tho:

Willis descripta ægrotantium, de quibus dubitari potest, an missione sanguinis fuerint adjuti.

I.

Narratio eorum, quæ in duobus Asthmaticis fuere observata.

SEnex perhonorificus, qui (a) multis annis, hyemis tempore, tussi obnoxius erat, & sputum moderatum, & satis benignum habebat; Autumno anni, qui mihi fuit apud vivos novissimus, ob frigus in longo itinere, uti putabatur, minus rectè valebat. Quærebatur (b) enim de dolore in medio pectore, juxta sternum excitato; qui vesperi quàmprimùm lecto incalesceret, ingravescebat somnum perturbabat; & plurima nocte valde molestus erat: sine quavis tamen dyspnœa, aut asthmatis signo evidenti. Ad dolorem hunc tollendum, & purgatio, & phlebotomia celebrantur; pectoralia, & antiscorbutica quotidie exhibentur; loco dolenti linimenta, & fots applicantur, sine magno tamen fructu, aut levamine. Nam quæ deinceps alteratio contingit, potius in deterius cessit; & dolori paulo remissius habenti, respiratio difficilis, & impedita supervenit: ita ut à primo somno, aut appulsu ejus statim asthmaticus fieret, atque anhelus, & circa præcordia laborans, in lecto erectus sedere cogeretur. Sanguinem misisse huc usque haud existimo tibi videri, Erasistrate, fuisse proficuum; etsi dolor illis omnibus factus fuerit remissior — Porro hujusmodi (c) dyspnœa, & spirabilium agitatio convulsiva, non modo quovis vesperi redibant: sed in dies immaniores factæ, longius durabant. At nocte quadam à primo som-

no

no evigilans, asthmatis paroxysmo gravissimè affectus, quo vix non periit, phlebotomia (a) ab ipso sepulchri ore revocatus, revixit. Revixit quidem, vel propter detractionem revixisse visus est: ipse enim tunc non eram præsens; & priores paroxysmi delierant ex se; fortè potuit huic etiam, etsi gravior spontè cessare, vel utilis aliqua animi affectio, ut tibi placet, phlebotomia excitata est. Postea tùm spiritu gummi ammoniaci cum sale armoniaco destillati; tùm julapia, & decocta pectoralia; & eclegmata; & haustus cervisiæ cum absinthio, & cochlearia, tùm elixiris proprietatis tartarificati guttæ nonnullæ; tùm coffee ex decocto salviæ pluribus diebus exhibita sunt. Sanguis iterum missus; & enemata injecta; & blanda cathartica propinata sunt. His quidem omnibus asthmatici paroxysmi mitiores facti sunt. Cumque multa alia remedia, vel à Medicis proposita, vel ab ami cis clanculum oblata essent; honorabilis senex, aut penitùs respuit, aut citò fastidivit: & ex his, quæ retuli ore sumenda, modò hæc, modò illa usurpavit. Sed licèt paroxysmi asthmatici noctu leviores essent, & minùs infestarent hominem; tamen (b) ob pulmones plurimùm infarctos, & humorem serosum in pedes delapsum citatius incedere, aut loca acclivia ascendere sinè grave dyspnæa, & præfocationis periculo nequibat: iamque dum, hæc, atque similia de sene scribebam morti ego proximus, deinceps non (c); tam asthma, aut phthisis, quàm hydrops timendus visus est.

Quantum igitur huic ægrotanti conduxerit sanguinem mittere, utemet decernere potes, Erasistrate. Ego autem subnectam alium ægrotantem, quæ procerus, torosus, & antea satis sanus cum esset; postquam à casu latus sinistrum solido cuipiam allisisset, exinde tunc noxam; & postea labem asthmaticam contraxit — ut quibusdam temporibus haud certis, primò dolor circa locum istum ingravesceret, & subinde statim dyspnæa gravissima, cum spirabilium omnium contentione laboriosa, & diuturna insequeretur: adeò ut durante paroxysmo, ægrotus in ipso mortis agone versari putaretur. Cui quidem ego nullam omninò præscripsi sanguinis missionem, licet torosus esset; sed aliis medicamentis longo tempore usurpatis integer factus, & sanitati restitutus à me fuit.

II.

Narrantur, quænam evenerint ex sanguinis missione ægrotanti copioso sanguinis fluxu ex naribus, & hæmorrhoidibus.

Cumque asthma spasmodica affectio mihi visum fuerit, non erit alienum ea narrare, quæ ex sanguinis missione contigisse observata sunt in homine, qui crebras; & immanes sanguinis eruptiones, modò ex naribus, modò è venis sedalibus patiebatur. Huic (d) phlebotomiæ ex amicorum suasu frequenter celebratæ nihil profuere: imò sæpissimè post venæ sectionem in sudores frigidos, ac leipothymias incidens, atque sanguinis eruptionibus nihilominus obnoxius, multò deterius habere solebat — Nequè melius illi fuit ex iis, quæ sanguinem refrigerant. Conjiciens ego sanguinem è naribus, atque hæ-

morrhoidibus frequenter erumpere, non quidem propter copiam, aut turgentiam ejusdem; sed propter spasmodicam affectionem fibrarum, quibus vasa sanguifera contrahuntur; (a) omissis aliis remediis; usu pulveris ex rad. pœoniæ maris, corall. rubr. margar. ebore, oculis cancri, lapide hæmate, & lapidæ prunellæ, necnon usu aquæ cerasorum nigrorum, melissæ, cinnam. theriacalis, & syr. è coralliis, & adhibitæ etiam per intervalla fuerunt ligaturæ quibusdam locis, brevi tempore, absque recidiva illum sanavi.

ERAS. Hic non solum restitutus non est, verum etiam à sanguinis missione non leviter læsus est; & longiori tandem tempore convaleuit. Animadversione autem digna sunt, Willis, quæ dixisti, de spasmodica fibrarum affectione in sanguinis reiectione; & puto illam magni esse momenti, cum locus saltem leviter prius disruptus, aut exulceratus est.

I I I.

Th. Will. nihil proficientibus venæ sectionibus, pleuritide, & peripneumonia ereptus est. Mulieri autem pluries pleuritico dolore tentatæ, quæcunque alia remedia sinè sanguinis missione minimè proderant.

WILL. **I**N pleuritide verò an expertus dicam proficuum esse sanguinis missionem ego, qui pleuritide, & peripneumonia affectus, immaturè è vita decessi! Autumno enim anni 1675. tussi primùm, quæ tunc temporis Epidemia erat, ego ipse laborans, citò postea in pleuritide, & in peripneumoniam incidi. Sanguis mihi (b) pluries missus est; aliaque medicamenta diligenter adhibita fuere: à quibus cum non relevarer, amicis meliora ominantibus, ultimum vale dixi.

Attamen matura viro pulcherrima quædam mulier, quæ pluries quolibet anno pleuritico dolore torquebatur; non quidem sanata est detractione; sed quoties recidivam morbi pateretur, plurimùm sectione venæ levari visa est. Hæc juvenis, & sanguinea, à quavis levi occasione, & errore; sive in cibo, & potu; sive in motu, & quiete; sive in somno, & vigilia; sive in excretis, & retentis; aliisque similibus; & ex mera anni, aut aeris mutatione; & sæpè ex aliquo animi affectu in febrem incidere solebat. Cui mox (c) dolores pleuritici cum tussi, & respiratione difficili, & plerumque convulsiones horrendæ superveniebant. His tam graviter primis annis affligebatur; ut non (d) rarò quotannis per, aut supra sex menses intra cubiculum se continere cogeretur. Postea verò sequentibus annis rariùs quidem, sed hæc eadem pluries passa est. Dolor pleuriticus latus dextrum constanter occupabat. Pulmones verò conciciebam esse illi satis firmos, ductusque habere patulos, ut sanguis per eos utut lentescens sinè remora trajici posset. Huic (e) nulla remedia sinè phlebotom-

(a) Will. de hæmorrh. ejusque remedio.

(b) Postscripto in præf. oper. posth. Willis.

(c, d, e) Will. de pleuritide.

botomia prodesse consuevere; quæ semper adeò potissimum (a) necessaria visa est, ut unaquaque ægrotationis vice, invitis omnibus eam ter, aut quater, imò interdum sæpius repetere cogeremur. Cruor emissus in superficie pelliculam viscidam, & albicantem constanter habebat.

Verum enim verò præter administratam sanguinis missionem, tum spiritus salis armoniaci, cum gummi ammon: tum julapium ex aquis cardui, ceraforum nigrorum, hystericæ, & saccharo; tum pulvere ex oculis candente aprug. & sale prunellæ; tum apozema ex radicibus graminis, eringii, rasuræ eboris, cornu cervi, corticibus pomorum, passularum folis in aqua fontana addito syrupo violaceo, & sale prunellæ sumpsit. Enemata etiam ex lacte, & syr. viol. pluries illi injecta fuere. Nequæ his omnibus sanata, sed melius habere visa est. Atque hoc in ægrotante ista consideratione dignum visum fuit; quod (b) si quando ad sopiendum dolorem opiata utut mitiora fuerant exhibita, dolor, & torpor capitis, atque affectus convulsivi gravissimè eam exinde infestare solebant.

Difficiles profectò, plusquam ego existimaverim, sunt morborum omnium æthiologiæ: ac me quòque deterres, Erasistrate, si quando Galenum provocas ad scabiei naturam ritè, clarèque explicandam. Si quid tamen nunc conjectura assequor; Innupta hæc formosa mulier, non quidem ex sanguinis copia laborabat; etsi sanguinea videretur: potuisset enim facilè sanari; ac si hoc non novit Medicus, copiam imminuere, nihil planè novit Spinosum nisi fallor, ut Helmontius dicere solitus est, erat illi latus dextrum; in quo recurrentes per intervalla dolores sedem habebant. Sed spina perpetuò, etiam cum non doleret, lateri infixa permanebat. Recurrebant autem dolores ex levi occasione, & errore in sex rebus non naturalibus, uti appellant; quoniam his omnibus cum alteretur sanguis, & multa alia fiant in corpore, facilè in ea parte, in qua spina aderat, dolor fuscitabatur. Animi verò affectiones, quæ etiam inter sex res non naturales connumerantur à Medicis, tum sanguinem agitare, & perturbare; tum fibras nerveas in latere dextro corrugare; aut aliter circa morbosam spinam movere poterant, ut dolor denuò excitaretur.

ERAS. Et quidem animi pathemata non infundunt, nec addunt vas sanguinem; genæ autem animi affectu rubescere, & pallescere possunt; & alia, atque alia iisdem affectionibus, tum in genis, tum in aliis partibus quibuscunque fieri possunt.

WILL. At invitis omnibus terque, quaterque ad mitigandum dolorem venas adaperire Medici cogeabantur, quoniam ab aliis remediis sine missione, nullum levamen ægrotans percipere ajebat; & ab opiatis pejùs se habebat. Et propter hoc fortassis illa soli venæ sectioni maximè fidebat.

Quid (1) in hac ægrotante potuerit opinio; quidve fides; aut aliquis alius animi affectus; anve ipsa ex se profuerit venæ sectio, mihi planè incertum est: & jamdudum dubitavi multa contingere posse homini, cui sanguis mittitur; non quia hic mittitur; sed propter hanc, vel illam opinionem, quam habet homo, circa hanc chirurgicam administrationem, & propter fidem

(a, b) Will. de pleuritide.

(1) Propter ægrotantium opinionem, aliquando juvat venas aperire.

fidem & credulitatem ejusdem hominis . Ac multa hujus rei adduci possunt exempla ; adducam quod frequenter currit per ora virorum ; sectionem scilicet venæ salvatellæ perquam nimium prodesse illis , qui Melancholici appellantur . Ego equidem *quomodo (a) venæ salvatellæ apertio levamen , prout dicitur , adeo insigne conferat , me nescire fateor ; attamen existimo , quod si (b) melancholicis firmiter persuasum sit phlebotomiam hanc præ quibusque aliis curaturam , forsitan juvabit . Affectiones autem , quæ corpus , sive in meliorem , sive in pejorem statum mutare , aut alterare valeant ; facile , & momento temporis ex quavis occasione excitari possunt .*

GAL. Cur igitur ministro Dei Pergami , & cuivis alio , maximam in me , & in somniis meis fidem habenti , lateris dolor , ex secta in manu arteria non potuit cessare ?

ERAS. Hoc quidem contingere potuit . Est enim dolor animi affectus quidam , qui alio affectu aboleri potest : & uno affectu quædam moveri possunt in corpore , quibus alius tollatur , & sistatur affectus . At tu , Galene , ni voluisses me dubitare te quodque nobis imponere velle , monere debebas hominem illum ob animi affectum ; & propter fidem , quam in te habebat ; & propter vehementem spem , quam posuerat in sectione , non ex simplici detractione , quam somnii monitu celebrasti , fuisse sanatum ; & tibi quidem leniter respondiſsem .

GAL. Monendum ⁽¹⁾ quidem hoc erat : sed non ego didici multa breviter , & veluti unico hiatu omnia dicere ; & cum non urgeat necessitas non omnia omnibus sunt manifestanda : sed postmodum de his ; nunc autem circa animi affectus . Plato (c) *inquit quando mens humana rem amat aliquam licet naturaliter non iuvativam , sibi eam prodesse certificat . Ex (c) sola autem mentis intentione res illa iuvat corpus : verbi gratia , si quis incantationem sibi prodesse confidat , qualiscunque sit , eum tamen iuvat .* Potest tamen , ut reor , amor , & confidentia nimia aliquando obesse ; potest odium , & timor aliquando juvare : ac similiter de aliis omnibus animi affectionibus existimandum censeo ; quod aliquando juvent , aliquando noceant . Nescio an omnia , quæ de his scripsi , ad vos pervenerint , Willis .

WILL. Multa scriptorum tuorum injuria temporum perierunt ; sed extant adhuc integri libelli , extant & fragmenta nonnullorum , qui desiderantur , in quibus hæc , & similia leguntur à te notata , atque tradita posteris .

GAL. Oportet igitur priusquam Galenum damnetis , totum Galenum legere ; vel ea omnia audire , quæ à Galeno scripta , vel dicta sunt .

ERAS. Ex iis , quæ audiui , ea damnavi , quæ damnanda visa sunt : si saniora afferas , probabo item : & nisi prius alia narrare velit Willis , æquo animo apologiam exspecto tuam .

WILL. Non quidem multa supersunt , neque ea sunt , quibus certò , & sine hæsitatione dicere valeamus , detractione quempiam servatum : nam illi , quibus sanguis detractus est , alia multa sumpserunt medicamenta ; &

alii

(a , b) Will. de melanc.

(c) Lib. de incantat. abjurat. & suspens. Gal. a scripto extra ordin.

(1) Quæ ex se non iuvant , opinione sunt iuvativa.

alii servati ; alii mortui sunt . Referam tamen alias observationes , de quibus vos decernite.

GAL. Judicium ⁽¹⁾ planè eorum, quæ in ægrotante corpore observantur , difficillimum est ; Cum ex hoc quòd corpus nostrum *Valdè* (a) *mutationibus obnoxium est ; nequè à causis externis tantum , sed ab internis etiam facile alteratur ;* tùm ex hoc , quòd eodem tempore multa fiunt , & multa administrantur . Ac si fortè contigerit *quempiam* (b) *benè dormiisse ; deinde clysterem , vel spontaneam alvi dejectionem habuisse ; deinde cibos assumpsisse ; vel sudasse etiam ; vel sanguinem illi fuisse detractum , & (c) post hæc omnia sensisse iuvamentum , vel detrimentum , non facile dictu est ; quidnam eorum , quæ circa ipsu n facta sunt , aut juverit , aut nocuerit.*

IV.

Peripneumonia , vesicantium maximè beneficio sanata.

WILL. **I**TA ⁽²⁾ quidem in duobus ægrotantibus peripneumonia laborantibus ; cum tùm sanguis pluries detractus, tùm quamplurima alia medicamenta fuerint adhibita ; non facile dictu est , quidnam eorum , quæ circa ipsos facta sunt , juverit.

Uterque servatus est . Ex his autem alter , ut existimo , vesicantium maximè beneficio est sanatus . *Ulcuscula in brachiis brevi (d) sanabantur ; in tibiis verò excitata , non tantum aperta manebant ; verum post quinque vel sex dies in immensum fluebant ; & deinceps ferè per mensem ichòris acerrimi copiam ingentem quotidie profundebant . Interea pulmones sensim melius habuere ; & demum sarcina omni immunes evasere.*

ERAS. Id , quod ex ulcere fluit , non est sinè aliqua particularum ex iis substantiis , quæ ad ulcera appellant , selectione ; ut possit dari casus, talia evacuari ab ulcere , quæ hominem à plerisque morbis liberent ; potest , & contrarium accidere , ut in his etiam non minima requiratur Medici prudentia.

V.

Ex binis ægrotantibus pluries , atque copiosè sanguinem expuentibus , alter nihil adjutus est à sanguinis missione ; alter gravius , atque manifestò pejùs se habuit.

WILL. **T**Heologus quidam spatio quindecim annorum tussi pertinacissima , & cruento ; falsoque sputo Cum (e) gravi anhelitus fœtore cocyten propemodum emulante laborans , in arctissimum carcerem coniectus loco

(a, b, c) Galen.com. i. aph. i.

(d) Will. de peripneum.

(e) Will. de sang. sputo.

(1) Judicium de iis , quæ accidunt ægrotantibus difficillimum est .

(2) Vesicantia in peripneumonia aliquando iuvant.

loco potus ordinarii meram aquam bibens, præter omnium spem, & expectationem revaluit; adeoque supra decennium mediocriter sanus perstitit. Postea vel ob aeris inclementiam, vel ob alias causas, non solum sputo cruento, falso, & graveolenti, verum etiam ventriculi languore, inappetentia, & nocturna febre molestatus est. Deinde, cum mala hæc remissiora viderentur, quodam (a) die, cælo de repente in frigidissimum mutato, sub noctem magna pectoris angustia, difficillima respiratione, pulsu celeri, & imbecilli infestatus; cumque spirituum omnium (quasi iam moribundus fuisset) fatiscencia incesceretur, non est tamen mortuus: sed per hæmoptoen copiosam, & moræ diaphoresin satis uberem citò evasit. Ex eo tempore sputum minus foetidum, & minus falsum factum est. Sed sanguinis per os repetitæ copiosæ excretionis, vires sensim deiciebant. Cumque (b) paulò ante obitum, propter acutum lateris dolorem vena tunderetur, cruor adeò deficere videbatur, ut ferè nullus efflueret sanguis.

Difsecto cadavere (quod sanè mirandum est) nequæ cruentæ expuitionis copiosæ; nequæ foetidissimi anhelitus signa, aut vestigia ulla apparuerunt. In pulmonibus non ulcus; non cavitas ab ulcere, non continui solutio observata sunt; nulla uspiam (c) puris, aut materiæ putidæ, aut foetentis collectio. Sed latus tantum sinistrum à tumore scirrhuso obriguerat.

ERAS. Religio erat perire ægrotantem sinè sanguinis missione! At dolor lateris urgebat acutus? Sed non quidem à sanguis copia, quæ nulla erat in homine, qui tandiù sanguinem largè expuisset! Nequæ cum is ex hoc morbo esset morti proximus, cordis motus poterat esse concitator. Atque idèò sanguinis missio non poterat lenire dolorem; nisi fortè propter aliquem animi affectum, qui ex illa fuisset excitatus. Quòd sinè magna virium jactura, in tanta sanguinis penuria, nequæ potuisset accidere. Huic tamen missus quòque sanguis est! Vide quæso, si quos habes, certò servatos propter detractum sanguinem.

WILL. Secta quidem illi vana est, sed propter inopiam nihil ferè sanguinis effluxit.

Alteri vero hæmoptoico, præter omnem Medicorum spem, atque præter omnem rationem sanguinis sputum sectione venæ exacerbabatur. Juvenis hic erat; qui cachexia priùs scorbutica, & paralyti affectus; dehinc catharro, & tussi molesta nimis affligtus, sputum etiam habuit sanguinolentum. Varia sumpsit ad hæc remedia, & meliùs se habuit. Verum ubi per (d) sesquimensensem in aquis calidis quotidie balneatus esset denuò tussim, & paulò post hæmoptoen horrendam contraxit: adeò ut nycthemeri spatium sanguinem creberrimè, & copiosè extussiens in vasta quantitate effunderet. In hoc statu eum invisens, facta totius provisione, statim revulsione gratia phlebotomiam præscripsi. A qua tamen administratione, & tunc, & postea semper sputum sanguineum aut repetebat, aut exacerbabatur. Revulsione quidem gratia. Galene, jussi venam secari; sed nulla planè facta revulsio est. Hypnotica etiam parùm, aut nihil juvabant. Ligaturæ circa brachia, (e) & crura adhibitæ (quibus maximè usus es Erasistrate) primò hujus morbi tyrannidem coercebant: ac aliis adhibitis medicamentis, & recta victus ratione supra (f) biennium

satis

satis rectè valuit . Postmodum verò cum in cœtu forensi stipatus valde incal-
sceret , rursus in hæmoptoeⁿ terribilem incidit , Ascitus Medicus livè , ut san-
guinis copiam imminueret ; sivè ut ejusdem fervorem compesceret ; sivè &
ille quòque revulsionis gratia , ut ego feceram ; sivè propter alias rationes
ex brachio sanguinem detraxit . Verùm sanguinis sputum (a) atrocius factum
est : Cumque die dein secundo , ac tertio sanguinis missio repeteretur ; quaque
vice malum exacerbabatur . Tandem ligaturis uti primò adhibitis , atque de-
cocto pectorali , & linctu sedulò assumptis , morbus illicò remisit , & brevi pe-
nitùs cessavit . Cùmque usus esset decoctione pectorali , & dieta tenui , omis-
sis omninò carnibus per sesquimensem ; tribus annis (b) ab hoste suo inducias
obtinnit . Postea verò cùm interdum à vini potu , aut (c) victu lautiori , san-
guis turgescens , è pulmonibus erumpere cœpisset ; statim à ligaturis , ac insimul
decocti , & linctus usu , & dieta tenui , impetus ejus reprimi solebat . Deinceps
cùm copiosi sanguinis sputum recurreret , proprio consilio hedera terrestri
usus , maximè juvatus est : necnon etiam auxilio pulveris è summitatibus ,
& præsertim è pilosis excrescentiis cynosbati, tussi (d), catharro, & sputo cruen-
to prorsus immunis factus est .

Post hæc sibi paralyfin curaturus . cùm multa usurpasset medicamenta ,
rediit sanguinis sputum copiosum : adeo (e) ut nyctihemiⁿ spatio supra tres libras
sanguinis spumosi extussiret . Medicus alius nihil edoctus ab iis , quæ priùs
in ægrotante observata fuerant , suas etiam experimento probare voluit ra-
tiones : & vel ut revelleret , Galene , vel ut evacualet ; vel ut sanguinem
attemperaret ; vel propter alias rationes suas , venam secuit . Evacuatus
quidem sanguis est ; sed nequè revulsus , nequè attemperatus . Nam hæmoptoe
remitti (f) incipiens , uti priùs semper assolebat , rursus exacerbabatur : quæ
tamen à ligaturis adhibitis ; atque linctu ; & decocto pectorali sedulò assumptis
statim mitigabatur ; & propediem penitùs cessabat : atque aliis usus medicamen-
tis , maximè dieta tenui , pristinam valetudinem recuperabat . Jamque in eo
statu contra morbum istum crudelem , adeò triumphans , ut plures hæmoptoi-
ci hunc velut oraculum consulant ; & curationis gratia , hujus methodum , &
vivendi genus , posthabitis Medicorum consiliis , imitanda proponant .

Hic non solum nunquam detractiōe relevatus est ; ac semper ab illa
pejus se habuit : sed , quod mente exciderat , nunquam hyeme sanguinis spu-
to tentatus est .

GAL. Multa in hoc ægrotante notata digna sunt ; sed illud est admi-
ratione dignissimum , quòd pluries , atque pluries post sectam venam , per os
sanguis majori copia rejiceretur ; ac quòd si defuisset sputum sanguineum ,
detractiōe ipsa ex secta vena redibat ! An debuerat mitti ex pede Willis ; ex
brachio enim meministi fuisse detractum ?

ERAS. Modò (1) non contendatis , sanguinis missionem iis esse profi-
cuam , qui sanguinis sputo laborant ; Ego nequè hoc affirmabo , quod vos ul-
tro conceditis , à simplici detractiōe ex vena sputum sanguinis in hoc ægro-

Tom. I.

P

tante

(a,b,c,d,e,f) Will. de sanguin. sputo.

(1) Occasione detractiōis sanguinis aliquandò sistitur , aliquando exacer-
batur sputum sanguinolentum , aliquandò neutrum ex his fit . Similiter de mul-
tis aliis dicendum est .

tante fuisse exacerbatum. Sistitur sæpenumero sanguis, vel exacerbatur ejusdem fluxus ex iis, quæ nequaquam necessariò venæ sectionem consequuntur; quapropter aliis sistitur; aliis exacerbatur; aliis, quod ut plurimum accidit, nequè sistitur, nequè exacerbatur.

GAL. Fortè, inquis Erasistrate, sunt quædam veluti incantationes; quæ ex se nequè juvant, nequè nocent: & tamen utrunque præstare possunt (tùm conducere scilicèt, tum obesse) pro ut diversimodè illa accipit animus; & pro ut nunc noxia, nunc utilia illa eadem sibi facit.

ERAS. Et his quidem aliqua non aspernanda inest veritas. Ac profecto ea, quæ haud necessariò consequuntur incantationes, quas tu appellas, Galene, sæpissimè nequè animadvertuntur; nequè cognoscuntur, tum ab iis, qui adsunt; tum ab eo ipso, cui incantationes illæ fiunt. Ex quo facile decipitur mens hominis; qui non rarò credit ab aliis causis extra ipsum positis fieri quamplurima, quæ in ipso, & ab ipsiusmet animo fiunt: occasione tamen rerum variarum diversimodè acceptarum.

V I.

Robustæ mulieri febricitanti, & maximè insanienti, nihil profuit sanguinem mittere.

WILL. **A**lias persequar, viri Clarissimi, quas memini observationes ægritudinum, in quibus sanguis missus est; ut videamus tandem an missione aliquis servatus fuerit.

Ancilla quædam robusta sanè; sed febricitans, & summè insaniens erat; ut oportuerit vinctam illam in lecto continuò detinere; cui copiosè sanguis semel, atque iterum missus est; enemate pluries alvus subducta est; aliaque, in hoc casu administrari solita, ordine celebranda præcepi, (a) *nec non etiam iulapia, emulsiones, & hypnotica propinari. Verùm his parum, aut nihil juvantibus per septem, vel octo dies illa insomnis usque, & furiosa admodum perstitit; potum frigidum ejulando, & clamando perpetuò exposcens. Quapropter hydropotia ad libitum, imò ad satietatem concessa; quibus nequaquam sedatior, aut sitibunda minùs facta est.*

In tanta rerum difficultate placuit experiri, an profundo immersa mulier fluvio, erat autem tempus æstivum, auxilii aliquid ab aquis acciperet? Fitque hoc uti præceperam; funisque circa nudum corporis truncum, ne fortè submersa interiret, illigatur. Sed puella, hujusmodi minimè indiga retinaculi, spontè natabat, veluti priùs probè natare edocta fuisset. Post (b) *tertiam, aut quartam horæ partem, sana, & sobria aquis eximitur; dein lecto commissa dormivit, & copiosè sudavit; posteaque sinè alio quovis remedio convaluit.* Non igitur missione sanguinis sanata est puella; sed humectatione, & infrigidatione ab aquis.

ERAS.

ERAS. Haud leve circa ægrotantem istam mihi nascitur dubium; & nescio, an domi etiam si copiosa frigida fuisset abluta, similiter sanitati restituta esset.

GAL. Nonnè sanguinis missio refrigerare puellam; & hydropotia ad libitum, & ad satietatem concessa, atque intus assumpta poterant melius, quàm extrinseca aqua tùm refrigerare, tùm humectare? An atra huic erat bilis per corporis habitum dispersa; & proinde profuit balneatio in currenti flumine?

ERAS. Dementia, animi affectus est: atque illud demergi corpus flumine profundo; illud insurgere animum ad movendum membra, pro ut in natatu opus est; quid aliud præstant, quàm simplex refrigeratio, & humectatio. Ac audivi quartanarios flumine demersos aliquandò ritè convaluisse; cum nequè refrigeratione, nequè humectatione opus habeant quartanarii.

V I I.

Juveni febricitanti, vel non profuit, vel nocuit potius sanguinem misisse.

WILL. Superior insipientis fœminæ historia, cui nihil profuit sanguinis detractio, in memoriam revocat juvenem studiosum, qui cum priùs mente constaret, post sanguinis missionem deliravit. Hic ætatem agebat annorum circiter viginti quinque, vultus erat *luridi*, & pro majori intelligentia, Galene, tua, uno verbo dicam, *temperamenti melancholici (a) sine manifesta occasione Augusto anni 1656. ægrotare cœpit. Primò de intemperie febrili cum siti, lassitudine spontanea, & inappetentia quærebatur: die secundo insuper de dolore in latere dextro, & distentione utriusque hypochondrii, item vomitu ferè continuo, vigiliis, & immuni capitis dolore. Die tertio accersito Medico illicò sanguis ad uncias duodecim mittebatur. Vesperi magis incaluit, & deliravit.*

GAL. Licèt intemperies adesset febrilis, & tùm latus dextrum, tùm caput dolore infestarentur; continuus tamen vomitus missionem sanguinis contraindicabat; & attractio fortassis facta est humoris peccantis à primis viis, venisque mesenterii in majores venas; indèque ad cor, & ad caput delatus humor, febrem majorem accendere, & mentem turbare potuit.

ERAS. Nihil istorum necessum fuit; & fortè delirasset, etiamsi sanguis non fuisset missus. Sed audiamus quæ acciderint.

WILL. Postea (b) sudore, licèt exiguo, succedente, manè proximo melius habuit Die quarto vomitu eorum, quæ assumpserat; & ferè continuo vomendi conatu tentatus est: & injecto enema, sex cùm habuisset sedes parum (c) alleviari visus est. Nocte sequenti aliquantulum dormivit. Die quinto vomitio fuit crebra, & sitis intolerabilis: intus extuabat; sed extrinsecus calor immodicus minimè percipiebatur. Vesperi sumpsit diaphoreticum: nocte sequenti (d) dormivit; & à copioso sudore succedente symptomata mitiga-

ri visa. Die sexto cuncta exacerbata sunt: calor in toto, sitis, & præcordiorum æstus immaniter urgebant. Die septima & octava *pulsus* (a) *erat inæqualis; & inordinatus; plerunque delirè loquebatur; & si in lecto fuisset commotus, in syncopen incidebat.* Die nono hæc eadem aderant; atque insuper tendinum in carpis contractio; aliæquæ partes motibus convulsivis tentabantur: ut penè de salute desperaremus. Sumpsit spiritus corn. cerv. 3. j. unica vice in julapio cardiaco. Exinde per quatuor horas valdè inquietus, & furibundus, vix in lecto contineri potuit: postea tamen somno obrepente plurimum sudavit; & res extra periculi aleam subito constitit; brevi enim, paucis quibusdam aliis assumptis ad sollicitandam diaphoresim, convaluit.

ERAS. Sudoribus hic, & iis, quæ sudores promovere potuerunt, maxime sanatus est. Cæterum, Willis, licet observationes istæ rerum Medicarum studiosis non sint inutiles; eas tamen adhuc expecto, ex quibus melius, ac hætenus factum est, deducere valeamus; ex ipsa detractione, si-ve ex iis, quæ necessariò consequuntur sanguinis missionem, nonnullos fuisse servatos.

WILL. Meliora quidem non habeo, Erasistrate: ac licet cum de febribus agerem, & passim alibi multa notaverim; ea tamen non sunt meliora, aut evidentiora his. Præterquàmquod in febribus intermittentibus, pluribus edoctus experimentis, dogmatica curatione, *medicamentis* (b) *ut plurimum vomitoriis, catharticis, necnon sanguinis missione instituitur, ægrotantes affirmavi miserè excruciaci; & morbum rarò profligari: ut meritò hic affectus Medicorum opprobrium dicatur.* Ac pluribus satis indicavi venæ sectionem non esse re vera ex se febris remedium; etsi ego non semel eandem usurpaverim.

ERAS. At plerarumque febrium non intermittentium natura similis profectò iis febribus est, quæ intermittunt; nisi quod in illis antequàm conquiescant ægrotantes à priori paroxysmo, excipiuntur ab alio. Dogmatica igitur curatione, quæ vomitoriis, catharticis, & sanguinis missione instituitur, tum illi, tum isti miserè excruciantur; & rarò morbus profligatur.

V I I I.

Ephemera laborantes.

WILL. **E**phemera verò prehensos duos notavi ægrotantes. Alter, qui ab (c) *immodico vini generosi potu in febrilem intemperiem, cum siti, calore, & insigni præcordiorum æstu, incidit: & phlebotomia celebrata, aquæ fontanæ ingentem quantitatem ebibit; indèque sudore copioso statim insequente brevi convaluit.*

ERAS. Hic aquis temperavit vinum, & copioso sudore evidenter sanatus est: Nequè ephemera ista à vini potu, Medici, aut Chirurghi indigebat opera

(a) Will. de febrib. cap. 11.

(b) Will. de febrib. cap. 3.

(c) Will. de febrib. cap. 8.

opera. Nequè ex hoc, quòd mortuus non est, sanguinis missione; quæ, ut tu, & Galenus, si rectè memini, monuistis, periculosa est post vini potum, servatus dici debet.

GAL. Sic Cassius quidam Medicus Romanus febricitanti (a) cuidam, & magna siti affecto; cum post ebrietatem eum premi cœpisse cognosceret, aquam frigidam ingessit. Qua ille epota, cum vini vinum miscendo fregisset; protinus febre & sudore discussit.

WILL. Alter cum in (b) sole æstivo supra modum se exercuisset; de capitis dolore, inappetentia, præcordiorum æstu, & intemperie febrili per totum suffusæ quæri cœpit; cui, cum medicinam omnem callidus aversaretur, abstinentiam, nisi à cerevisia tenui, & hordeatis præcepi. Die secundo, ac dein amplius tertio symptomata paulatim se remittebant; quarto demum sine quovis medicamento à febre immunis evasit.

IX.

Narratio eorum, quæ tertiana laboranti acciderint.

Julvenis autem biliosi temperamenti, febre (c) tertiana intermittente correptus, ingruente paroxysmo plurimum bilis flavæ, & viridescentis evomebat. Dein cum insigni cardialgia, calore, & siti intensissima per plures horas graviter molestabatur. Huic intermissionis die sanguis ad uncias octo fuit missus.

GAL. Nisi corroborato prius ore ventriculi, sanguinem non detraxissem; vidi enim quosdam (d) ex hoc interiisse, alios ad extremum periculum fuisse perductos.

WILL. Post meridiem clyster injectus, & victu tenuissimo ex hordeatis est usus: & postmodum qualibet nocte hora somni opiatam sumpsit; quæ ex conserv. ros. vitriol. diascord. & sale absinthii parabatur, addito cochleari succi aurantii; Sed eventus ab his minimè ex animi voto fuerunt. Redibat (e) enim paroxysmus nonnihil remissior, sed cum vomitu atroci, ut prius. Quamobrem die quadam intermissionis sumpsit potionem ex infuso senæ, rhabarb. & santal. citrin. cum sale absinth. in aqua Fontana; à qua (f) decies purgabatur cum levamine. Mane proximo tribus horis antequam paroxysmum expectaret, epithemata febrifuga carpis admovi; & sanguinem denuò misi ad uncias sex: ex quo accessione febrili caruit; & dein iterum eodem modo purgatus integrè convaleuit.

ERAS. Prima (1) vice huic bilem evimenti circa morbi initium venam secasti, & sanguinem misisti, ut mitteres tantum; nam in narratione de sanguinis abundantia, quæ visa fuerit diminuenda; aut de alio, quod de-

(a) Cornelius Cels. lib. 1.

(b, c) Will. de fabrib. cap. 4.

(d) Galen. ad Glauc. lib. 1. cap. 14.

(e, f) Will. de febr. cap. 4.

(1) Multa facta dum imminet paroxysmus, paroxysmum inhibent.

designaveris, nullam mentionem fecisti: misisti, ut mitteres. Secunda vero vice secasti venas, & sanguinem misisti, non ut mitteres; sed ut paulo ante paroxysmum multa faceres, misisti. Ego etiam nonnihil boni expectassem à ligaturis circa brachia, & crura, & ab aliorum quorundam administratione, tunc dum imminebat paroxysmus; & tutius quidem, atque certius, quàm à venæ sectione.

WILL. An tibi superstitiosum videtur, quòd illis tribus horis ante paroxysmum febrifuga usurpaverim, & sanguinem detraxerim? Mihi autem persuasum est hujus febris curationem maximè sperandam ex febrilis accessionis inhibitione per remedia, quæ sanguinis fermentationem sistunt: quæ sæpè efficaciora sunt cum imminet accessio febrilis, & circa initium; quàm alio tempore.

Remedium verò, quod fermentationem sistit, licèt *empiricum*, (a) *amethodicum*, & valde infidum apud Medicos audiat; tamen mihi compertum est, has febres hoc modo sæpè numero curari, cum pharmaca non omninò prodesse. Qualia sint hæc remedia, & quo ritu absque veneficii suspitione procurando hoc morbo levamen præstent, in meis scriptis annotavi. Hic (a) solum adverto, horum usum post pharmaca, & venæ sectionem (si ea opus fuerit; nam non semper opus est) esse (b) maximè proficuum; & nisi hæc ritè præmittantur, ista altera rarò paroxysmum inhibere.

ERAS. Nihil addo de medicamentis febrifugis, quæ non detrahunt, sed addunt; & sæpè efficaciora sunt, si propinentur, dum imminet paroxysmus; quod etiam haud difficulter nimis, tum concipi, tum explicari potest. Sed de sanguinis missione dico, quòd prima vice misisti, ut mitteres absque eo, quod rectè aliquid animo designaveris. Secunda vice non ut mitteres, misisti, sed ut paulò ante febrilem insultum mitteres; quo tempore multa, atque penè dixerim infinita, sive eorum, quæ detrahunt; sive eorum, quæ neutrum ex his præstant, febrem inhibere possunt. Dicam clariùs, ipse tua non tam debuit esse in detractione, quàm in tempore, quo detrahebas. Voluisti scilicet multa facere, dum paroxysmus imminebat, ut si unum non juvaret, prodesse alterum. Et quidem tunc maximè temporis aliquod ex multis, quæ fiant, fortè proderit. Ad hoc tamen ea sunt eligenda, quæ minimè ex se nocere possunt. Et inter hæc sunt multa ex se omninò vana, & ex se omninò inutilia; quæ tamen propter occasionem, quam præbent, juvare possunt: ut, exempli gratia, animus nimis intentus alicui operi, quodcunque illud sit, si non causa, est saltem aliquando occasio, qua malum aliquod in corpore evitetur. Sunt, inquam, alia multa hujuscemodi, imò infinita, quorum alia ex se sunt omninò vana, & ignava: alia non item ex se sunt vana, & ignava; sed ipsa quòque aliquid ex se præstant præter eam, quam præbere possunt occasionem; qua benè, vel malè homini fiat. Sed hæc non sunt nunc ex professo tractanda.

An imminente paroxysmo vitiosum detrahitur, & relinquitur bonum; vel plus vitiosi, quàm boni detrahitur: non imminente verò detrahitur bonum non vitiosum? Quocunque tempore in hoc morbo secetur vena, & in quacunque hypothese, ex iis, quæ fluunt per vasa plus boni, quàm mali evacuari mihi videtur.

Præ-

Præterea, (¹), si rectè conjicio, Willis, non ipsa detractio tibi videtur febrifugum. At circa idem tempus febrifuga sunt admota: ut ab his potius, quæ febrifuga sunt, quàm ex detractioe, quæ febrifuga non est, paroxysmum febrilem fugatum crediderim. Ego tamen non detractioem ipsam, & ipsam sanguinis diminutionem proficuum esse: sed illud secari venas; illud sanguinem detrahi; sedulitas adstantium; chirurgi diligentia, quæ in his adhibetur; & cætera, quæ tunc fiunt; ut etiam deligari; vel perfricari; vel deliniri; vel concuti; visa; audita; & alia multa; etiam, quæ ex se omninò vana sunt, occasionem præbere posse existimo, qua paroxysmus inhibeatur: adeòt aliquandò unum, vel alterum ex his febrifugum dici possit. Sic in bello sæpè numero quædam, quæ ex se omninò vana sunt, & inutilia, victoriae, aut cladis præbent occasionem: nequè video cur aliquandò non possit similiter contingere in ægitudinibus. An paucae aquarum guttulæ genas madefacientes ex se præcavent lipothymiam, vel excitant hominem à lipothymia? Non ego hoc credam! At aspersione aquæ, veloci maxime motu facta, multi à lipothymia excitantur? Excitantur quidem; sed non est ipsa aqua, quæ illos excitat; occasione tamen illius aspersiois excitantur, & multa alia hoc idem præstare possent; sed optimè aqua eligitur, tanquam, hoc modo aspersa, ex se innocens. Sic Vipera, vel Scorpius non solum carnibus admotus hominis, scæminæ præsertim; sic alia multa præbere possunt occasionem, qua alius fiat epilepticus; alius sanetur à quartana: cùm neutrum ex his vipera ex se facere possit. Ac si quæras rerum memoriam, percurrasque omnes animi motus, multa his similia contigisse comperies: & aliud quidem aliis; aut eidem ab alio fit aliud. An non sanguinis missio aliquid simile præstare poterit?

WILL. Potest equidem, Erasistrate, & non aspernanda multa ego his addere possem; sed non sunt omnia hujus loci. Nequè te morabor ea referendo, quæ in duabus virginibus (*a*) motibus convulsivis ægrotantibus à me sunt observata; mira profecto symptomatum series; mira affectionum animi in corpus deprehensa potestas. Quarum altera, cùm duobus singulis diebus paroxysmis afficeretur, ab uno saltem liberari phlebotomia visa est, tribus horis ante convulsivum affectum celebrata. Omitto rationes, quibus hoc contingere potuit; cùm tu aliquam saltem circa hoc admittas rationem. Omitto historias ipsas; sunt enim longiores. Verùm persequar alios febre correptos, quorum historias memini me notasse.



Fe-

(*a*) Will. de morb. convuls. cap. 9.

(¹) Non raro quædam ex se vana, & inutilia occasionem præbent, qua paroxysmus inhibeatur.

X.

*Febris, quam synochum putridam dixit Willis historiae quedam;
in quibus, nequè certò, nequè manifestò profuit sanguinem
mittere.*

Febbris est à me descripta, quam synochum appellavi putridam; cujus multas enumeravi species; & septem historias ex ipsa laborantium in tractatu de febribus adduxi: quarum unam jam retuli; estque illius, qui post sanguinis missionem magis incaluit, & deliravit. Reliquis sex sanguis item missus; & inter hos mulier triginta circiter annorum; quæ post varia morbi accidentia, & usurpata medicamenta, die decima obiit. Hæc ut servata non est, ita nequè illam dixerim propter detractionem mortuam.

Verùm quidem juvenis (a) robustus, & eusarcos circa solstitium æstivum post immodica exercitia, indèque frigus subitaneum calori superveniens, malè habuit. Primo inappetentia, nausea, sævo capitis dolore; necnon siti, & calore intensiori afficiebatur. Die secundo dolor acutus in latere dextro cum tussi, & respiratione difficili invasit. Sanguine statim è brachio ejusdem lateris copiosè detractò, dolor iste nonnihil remisit, qui tamen vespere cum tussi, & sputo cruento atrocior factus rediit.

ERAS. Occasione fortè detractionis dolor nonnihil remissior factus. Sed non erat sanguis, qui detractus fuit, is, qui dolorem excitabat. Nam cum detractus semel, non fuerit iterum vasis additus; cum inquam, non redierit sanguis in venas; cur vespere ejusdem diei rediit dolor, & atrocior factus est? Spasmus scilicet dolorificus accidere potest, etiam dum sanguis deficit potius, quàm abundat.

WILL. Nox infomnis, & valdè inquieta successit. Die tertio sanguis denuò missus; linimenta, & fots lateri dolenti applicata; pulveres, julapia, & decocta antipleuritica intus sumpta. Sub noctem (b) dolor ferè in totum cessavit. Sed mox cephalalgia immmani cum vertigine æger afficiebatur. Die quarto fuit sanguinis stillicidium è nare dextra ad duas uncias, à quo affectus isti capitis planè cessabant. Vespere autem dolor in latere prius affecto cum majori atrocitate rediit, & pulsus jam erat parvus, & debilis; ac proinde nè vires deicerentur magis, in exigua quantitate phlebotomia celebrata est. Sed fots, & cataplasmata lateri diligenter applicata sunt, ac sumpsit æger spiritus cornu (c) cervi guttas viginti in julapio cardiaco; post sex horas totidem alias sumpsit. Nocte ista copiose sudavit; & dolor plurimum remisit. Sputum erat parvum, cruore interspersum; quod intra diem, dolore etiam sensum evanescente, omninò cessavit. Cæpit æger bis in die ejusdem spiritus cor. cer. scrup. j. & sinè omni recidiva intra paucos dies integrè convaleuit.

GAL. Cur non potius pleuritici appellasti morbus, quàm synochum?

WILL. A causa (d) evidenti, scilicet pororum constrictione fuit hæc febris synochus simplex appellanda, ac pleuritis mihi visa est accidens alterius morbi.

ERAS.

ERAS. Sive pleuritis, sive synochus potius ægritudo fuerit dicenda, sanatus is est sputo cruento; stillicidio è naribus; sudoribus copiosis; spiritu cor. cervi, & antipleuriticis aliis medicamentis; quibus sanguis corrigi, & sudor promoveri; & solvi potuit id, quod morbum faciebat. Quid si nihil istorum factum esset, etsi robustus esset homo; missionibus sanguinis citius periisset; quoniam detractio nihil præstitit eorum, quibus ægrotus manifestò juvatus est.

WILL. *Matrona (a) sexagenaria cum linteis non satis à madore exiccatis lecto instratis quadam nocte discubisset, malè habere cæpit. Primò afficiebatur catbarro suffocativo, ut præ serosa colluvie in laryngem exundante, vix ei respirare, ne dum dormire licuisset. Postridie nausea, & inappetentia cum aliquali siti, & caloris excessu suborta est. Die tertio dolor acutus in latere cum tussi, & febre acuta invasit. Urina fuit rubicunda, & clara cum hypostasi laudabili: pulsus inæqualis, & intermittens; Medico vocato, sanguis ad decem uncias detrahebatur. Etiam isto die ab enemate immisso alvus copiosè soluta est. Sub noctem dolor evanuit, & mediocriter dormivit. Urina tunc erat rubicunda, & turbida, & contentis saturata.*

ERAS. An soluta alvo, & iis, quæ per turbidam urinam, contentisque saturatam expurgata sunt, mulier hæc levata est?

WILL. Fortè sic fuit: nam die quarto febris nonnihil auctior; vesperi tussis valdè molesta; succedente mox dolore acuto, ut prius, in eodem latere: urina iterum clara, & cum hypostasi apparuit.

ERAS. Hac die scilicet sive pus, sive aliud collectum in parte affecta per urinas, aut per alias vias non fuit expurgatum.

WILL. *Dolor (b), sanguinis missione denuò celebrata, brevi cessavit. Die quinto febris remissior, nox tamen inquieta cum calore, & iactatione corporis; verum sinè dolore. Mane proximo copiosè sudavit, & alleviata est. Dein victu adhuc tenui per aliquot dies usa, & semel expurgata sinè recidiva convaleuit. Observatione dignum fuit, quòd urgente dolore urina erat clara, & cum hypostasi, nec à frigore turbata; quæ tamen, eodem sedato, statim crassa, magisque rubicunda, & contentis saturata evasit.*

ERAS. Quivis mente sanus, sudore, & excretionem eorum, quæ in urinis observata sunt, mulierem sanatam potius affirmabit, quàm à sanguinis missione. Ac observatione, & consideratione etiam dignum est, nullum te hucusque enarrasse morbum, qui propter ipsam potius detractiorem sanguinis, quàm propter alias causas sublatus dici possit.

WILL. *Juvenis (c) eruditus, gracilis habitus, & pallidi vultus ineunte vere, nullius errati circa victum conscius (d) quæri cæpit de lassitudine; & impotentia ad ambulandum, etiam de capitis torpore, & somnolentia. Die secundo insuper, siti, inappetentia, & præcordiorum æstu torquebatur. Die tertio sumpto vomitorio pluries vomuit, & biliosa deiecit, & alacrior factus est, & nocte mediocriter dormivit. Quarta die stillicidium passus est in exigua quantitate: sitis, & calor aucti. Urina erat rubicunda cum sedimento copioso, & aliquali hypostasi. Natura videbatur oppressa, & ideo sanguis ad (e) septem uncias mittebatur; & exindè plurimum alleviari visus est. Vesperi ta-*

Tom. I.

Q

men

men omnia exacerbabantur; & exinde per tres dies febris usque intendi videbatur.

ERAS. Heu quàm brevi duravit utilitas ex sanguinis missione! Mane sanguis missus est, vespere omnia exacerbata.

WILL. Die (a) septimo de gravi torpore in capite, & caligine oculis obversante querebatur. Post meridiem hæmorrhagia copiosissime successit; ut præ immenso sanguinis dispendio æger ferè viribus exolveretur. Et ad listendum sanguinis fluxum, non quidem venæ sectio in brachio; non ligaturæ; non epithemata tum capiti, tum imo ventri adhibita; non alia multa medicamenta quicquam profuerunt. Tandem mulieris (b) illuc occurrentis suasu, nari stillanti ferrum ignitum admovebatur; & de repente à vapore sanguinis torrefacti in nares suscepto istius fluxus sistebatur. Et licet intermittenti postea quotidiana æger laboraverit, demum restitutus est.

ERAS. Spontanea sanguinis hæmorrhagia, de qua pluries locuti sumus, huic profuit ægrotanti, non sanguinis missio.

WILL. Reliquis duobus syncho putri laborantibus sanguis quidem missus est; alteri ad uncias octo: & fuit hæc (c) nobilis matrona quinquaginta circiter annos nata, gracili corporis habitu; alteri ad uncias decem: & fuit hic (d) Clarissimus vir, rei literariæ studio addictissimus; neuter tamen sensibile, aut notabile emolumentum, quod ego memoriæ tradere potuerim, à sanguinis missione acceperunt. Sed servati sunt, postquam pluries sudassent; & utriusque vomitorium insuper propinatum fuerat.

XI.

Narrantur, quæ ex sanguinis missione evenerint duobus ægrotantibus ex variolis.

Variolis autem deprehensum memini robustum hominem (e) habitus corporis Athletici, vultus tamen pallidi, & temperamenti, Galene diceres, frigidioris; necnon etiam sceminam illustrem, juvenem, vultus floridi, & temperamenti, quod dixisses, calidioris. Ac licet instante variolorum eruptione sanguinis missio olim inter nostrates veluti res (f) sacra audiebat; neque sub ullo necessitatis prætextu admitti solebat; nuper⁽¹⁾ autem experientia duce, si credere fas est, Erasistrate, in quibusdam casibus sanguinem mitti omnino utile, & necessarium esse comprobatur. His itaque missus est. Viro cum (g) in exigua quantitate mitti præscriberetur pseudo chirurgus accersitus ferè ad sesquilibram detraxit: sceminæ verò detractus est ad uncias circiter sex. Ille licet robustus, maximum subiit vitæ discrimen; & multa quidem gravia symptomata spatio viginti dierum passus est. Postea (h) varioli in singulis partibus corporis sparsim erupere; & tunc primò febris in totum remittit.

(a,b,c,d) Will. de febribus cap 11.

(e,f,g,h) Will. de feb. c. 15.

(1) Will. tract. de phleb. & loc. sup. cit. f. 216. Damnat in variolis sang. miss. estq; liber ille scriptus post librum de febribus.

mitti cœpit. Fœminæ verò post detractiōnem (a) calor nonnihil remisit, usque tamen vomitus cum dolore atroci in lumbis perstabat; Etenim cum his affectibus, & cum calore, & siti intensissima incœperat ægrotare; eratque illi (b) pulsus celerrimus cum vibratione forti, & vehementi; & insuper utero gerebat. Sumpsit postea laudani dimidium grani; dormivit; sudavit; & tandem apparuere varioli consitissimi, & benè se habuit.

XII.

Quæ observata fuerint in puerperis.

N Evè tuam videar agere causam, Erasistrate, prolixius narrare hic omit-
tam; quæ notaverim dum de puerperarum febribus agerem. Dicam
(c) tamen breviter quinque fuisse puerperas; quibus venæ minimè fuere se-
ctæ; una tantùm periit. Binis vena secta fuit, perierunt ambæ.

Omittam alia multa; nam potiora adduxi, quæ memini? nequè præ-
clariora, & præstantiora ex sanguinis missione beneficia adducere possum.

ERAS. Si (1) meliora non habeas, hæc satis sunt, Willis; & à te qui-
dem obtinui, quod speraveram, ingenuam, & liberalem eorum, quæ obser-
vastis, narrationem. Ex qua concludere licet, non solum nullum hucusque
esse cognitum morbum, in quo promittens homini sanitatem, misso sangui-
ne suam solvat, & liberet fidem; verùm etiam nullum esse morbum, in quo
ipsa detractio certò, & manifestò proficua sit. Nam inter eos, quos narra-
stis à te fuisse observatos, nullus planè fuit ægrotus, qui detractiōne confestim
sanus factus fuerit: cum contra quivis mediocriter peritus, usu singularis ali-
cujus alterius remedii, vel administrationis medicæ (habentque Chirurgi
propemodum infinitas) asserere possit se multos sanitati restituisse. Illa etiam
Muliercula calenti fumo supra ignitum ferrum torrefacti decidui sanguinis
plures hæmorrhagias se sanasse fateri potest: cum contra hæc, aut similia be-
neficia ex ipsa sanguinis missione à te minimè observata fuerint. Multos co-
gnovisti febre curatu difficili correptos, sola compressione arteriarum, quæ in
carpis micant, fuisse servatos; cum contra nullam cujuscumq; generis, aut speciei
retuleris febrem; quam similiter sanguinis missione curatam observaveris.

Cumque principio rogaverim, ut eos referres, Galene, quos in meis li-
bris fortè notaveras mortuos esse propter omissam sanguinis missionem; ipse
memorans, quos Theutræ adjutus opera notavisses, unum vel alterum recen-
suisti, iis laborantes ægritudinibus; quibus cum plerique temporibus tuis
fuerint deprehensi, nullum ipse, sanguinolentus licèt, servare potuisti!

Addidisti tertium Critonem, decima die, Angina, aliisque interioribus
tumoribus mortuum: cum contra multi similiter ægrotantes, quantumvis
sanguis mittatur, secunda, tertia, quarta, aut quinta die extinguantur.

Item duos in ipsis Medicorum manibus perire vidiisti ex largiori sangui-
nis missione; alios verò paulò post; alios ad extremum vitæ periculum fuis-

Q. 2

(a, b) Will. de feb. cap. 15.

(c) Will. de feb. cap. 16.

(1) In nullo morbo ex misso sanguine sanitas promitti potest.

se perductos . At quibusdam larga missio est binæ , tresve , quatuorve uncia; quibus dimissis animo linquuntur . Willis, etiam cū nullum propter mediocrem sanguinis missionem viderit sanatum ; observavit tamen ex largiori robustum hominem ea infectione , quam variolorum vos recentiores dicitis, laborantem , extremum subiisse vitæ discrimen, & vix post viginti dies erupisse variolos.

GAL. In libris methodi mei fortè legit Willis me observasse duos sic mortuos ; at si rectè memini in libro de cur.rat.per sang.missionem cap. 12. ego scripsi fuisse tres : duos mares ; & tertiam fœminam.

ERAS. Nequè profectò in his nimis rigidus fui , ut rebaris , Willis. Nam cū manifestò constitisset , palæstritam, quem recensuit Galenus , non propter ipsam largam sanguinis missionem ; sed alvi dejectione , vomitu , & copioso sudore fuisse sanatum ; potuissem illud tantū dicere , hæc omnia prius in corpore palæstritæ , & antequam sanguis mitteretur , fuisse præparata , & nihil insuper addere ; vel etiam dicere potuissem , oportuisse palæstritam esse nimis validum , qui postea non succubuerit : attamen liberè , & ingenuè fassus sum , ex animi affectu peculiari, qui licet nequaquam necessariò, aliquando tamen consequitur detractionem , tūm alvum turbari ; tūm vomitum , & sudores provocari potuisse : ac his omnibus illum postea sanatum. Et his quidem nequè Galenus , qui mentem dixit facere utilia , quæ corpori ex se utilia non sunt ; nequè tu Willis es refragatus : dixisti enim sanguinis missionem è salvatella vestra illi fortè profuturam insigniter, qui nimis credat hanc præ cæteris omnibus sibi profuturam evacuationem ; videlicet fide , quæ animi affectus quidam est ; præparatus prius animus , facile postea ex missione alium suscipere potest affectum , quo juvetur corpus .

Affectiones (¹) autem animi , tūm salutare , tūm noxiæ , vel etiam mortifera excitari possunt non solum detractionis occasione ; verū etiam occasione aspectus cujuscumque, sive auri; sive gemmæ, sive viperæ, & scorpionis, nequè mordentis , nequè pungentis ; & perceptione contactus eorundem; quovis viso ; quovis audito , sive tristi , sive læto nuncio ; quovis signaculo; & aliis infinitis : at non necessariò , sed pro ut animus hæc accipit; atque ideo ex iisdem occasionibus , aliis aliud fit ; nunc salutare ; nunc mortiferum .

Porro occasiones aliæ sunt vehementiores , & efficaciores ; aliæ leviores, & ignavæ ; aliæ quibusdam sunt efficaces , quibusdam aliis ignavæ , & impotentes ad hanc , vel illam movendam affectionem, maximè si animus non sit prius præparatus ad illam . Et equidem illud secari venas ; illud profilire sanguinem ; Tuque (²) dicere posses , Willis , illud evacuari partem animæ sensitivæ , non est levis occasio ad movendum animum , & ad excitandos in eo varios affectus ; maximè si alio affectu sit prius animus dispositus , & præparatus ad hanc , vel illam affectionem.

Sunt (³) autem affectus quidam in animo , qui nequè ab homine in quo

re-

(1) Affectiones animi, vel salutare, vel noxiæ , & quandoque etiam mortifera facile excitari possunt .

(2) Quæ tamen sententia ponens plures animas in eodem homine , auterî improbat .

(3) Affectiones quædam animi non animadvertuntur.

reperiuntur; nequè ab astantibus cognoscuntur, aut animadvertuntur: alii cognoscuntur ab homine in quo reperiuntur: nequaquam ab astantibus: alii demum cognoscuntur, & animadvertuntur ab astantibus; nequaquam ab homine in quo reperiuntur, qui sæpè insanit, & non cognoscit se insanire. De quibus tamen non est nunc prolixius agendum; & amplior sanè est hæc quæstio; quàm quæ huic sermoni inseri possit.

Quòd (1) si quis sectione venæ noveriteum excitare in animo affectum, qui salutaris sit ægrotanti; noverit ejusdem animum præparare ad illum affectum suscipiendum; & alia industria hoc idem melius, atque tutius effici nequeat, secet idem venas, & mittat sanguinem in quocunque morbo: ita tamen ut non possit ipsa detractio ex se nocere.

Plerique autem, etsi celebres, dum venas secarunt, vel aliud quidpiam fecerunt circa ægrotum; nequè quidem per somnium his de rebus cogitarunt: undè sæpè absque ulla Medici providentia, boni, vel mali fuerunt eventus. Suntque, qui propter ignorantiam, & incultum nimis, & minimè expolitum ingenium, nequè possint quidem, etiam si velint, hæc animadvertere in morbis: & id omne spernant, quod supra ipsorum captum est. Suntque alii, qui etiam si hæc minimè spernant, haud tamen videant, quas potissimum animi affectiones exoptare debeant in morbis; & ut ad illas præparetur animus. Ac vidi aliquando meis temporibus Duces non magnæ turmæ, & tyrannos exigui, & sterilis plagi, melius novisse inflectere, & trahere quàm voluissent animos suorum, quàm illi, quibus hoc ex re magis fuisset propter nobiliores, & graviores artes, & disciplinas, quas profitebantur. Socrates autem juventutem docens, in his fuit maximus: nequè hac arte movendi animos, videtur abusus. Alii verò etsi multum in ea valuerint, sunt tamen quàmmaximè abusi. Videbimus in apologia tua, Galene, an tu hac arte fueris abusus.

Verùm enim verò etiam si aliquis ad excitandam, quàm velit in animo affectionem, sectione venarum uti possit; tamen quantitas, quæ detrahitur, nunquam tanta esse debet, quæ ex se nocere possit. Non est enim sanguinis missio, quæ hoc tantum possit, occasionem præbere naturalibus affectionibus animi: ut est, exempli gratia, signum pentagoni, quod ex se nequè juvat, nequè lædit. Sanguinis diminutio, facta hypothese quòd ille superabundet, & nimia copia, & amplitudine, seu rarefactione lædat, ipsa ex se juvat. Et in hoc casu videndum etiam est, an satius sit expectare lapsum nonnullarum horarum, quo tempore per habitum corporis, respirationemque insensibilem sanguis non quidem sinè partium selectione quadam diminuatur; & repetitis circuitibus, dum convenienter abstinet homo, vel iis tantum utitur, quæ appropriata sunt, perficiatur, & corrigatur, reddaturque efficacior ad superandas plerasque morborum causas. Secus detractio ex secta vena nihil istorum præstat: & facta hypothese, quòd nullum excitet animi affectum nequè salutarem, nequè mortiferum, aut magis, minusve noxium; quoniam vires non sunt independentes à sanguine; quin imò quoniam ex iis est sanguis, ex quibus maximè dependent vires corporis, propter virium majorem, minoremque jacturam (nisi dicatur aliquandò dari morbos in qui-

(1) Ut missio sanguinis convenire possit in quocunque morbo.

quibus molesta adsit superabundantia virium) ex se semper nocebit detractio: atque ideo nisi in gravi necessitate, occasioneque imminentis ex nimia distensione vasorum disruptionis periculi, usurpanda minimè erit.

WILL. Cæterùm, Erasistrate, alii multi, qui medicinam pertractarunt, & frequenter venas aperuerunt, conqueri poterunt, quòd ipsis prorsus inauditis, nos hæc determinaverimus. Quapropter æquum esset, illorum nos audire rationes, atque etiam aliorum omnium observationes examinare.

ERAS. Si qui conqueruntur, respondebis, Willis, faciliùs ipsos potuisse decipi, quàm Helmontium, atque Erasistratum. Respondebis insuper, in observandis, atque recensendis iis, quæ ex sanguinis missione acciderunt ægrotantibus, te, atque Galenum fuisse accuratiores, & diligentiores, ut non opus sit audire alios. Et sermo quidem iret in infinitum si omnes audiendi essent; oportetque etiam convocare Japponenses, aliasque gentes, quæ semper damnarunt sanguinis extractionem; & confusio magna fieret.

Vel, Willis, brevius respondebis, quicquid sit de aliorum tùm rationibus, tùm observationibus, tuas, atque Galeni sive rationes, sive observationes pro admittenda venæ sectione nihil omnino concludere.



A P O L O G I A

G A L E N I

*Qua præcipuè fit manifestum secundum Galeni
Regulas rarò venas esse secandas.*



Tinam, Erasistrate, nunquam aliquid de me somniatus esset Pater: utinam etiam nequè de Æsculapio aliquid somniari potuisset: ego enim ad Medicinæ studium animum non appulissem; vel nequè literas didicissem; vel etiam nequè fuisset. Puer enim iis primùm, quæ à Patre audiui, vanas hausi opiniones. Postea Medicinæ potissimùm studiis operam dedi, & cum Medicis mihi semper concertandum fuit, & nunc etiam mortuus, eorum, quæ in vita egerim, rationem sum redditurus.

De quibus autem priùs conquerar? de iis, qui meo tempore vivebant; an de iis, qui me secuti sunt? de iis, qui me, & meam doctrinam damnarunt; an de iis, qui cum non intelligerent omnia, quæ à me scripta sunt, perniciosiora quæque, & quæ minùs constarent, amplexati sunt? Si mihi veniam velim, his omnibus concedendam puto. Sunt enim latentia quædam, & quamplurima efficacissima adversus animi virtutes venena; à quibus difficillimum planè est sibi cavere hominem: & eò faciliùs bibuntur, atque hauriuntur; quò minùs cognoscitur, in quibus consistant; & quò magis ignoratur, ne eorum mortiferæ vires in animum admittantur.

Et Laus, & gloria, & ambitus, & dignitatum insignia; honesti etiam, & honorifici tituli, sæpè sufficiunt ad animum corrumpendum, sufficiunt sæpè cæremoniæ aliàs vanissimæ, & nullius virtutis. Quibus omnibus, etsi oculi nequaquam fiant magis acuti, nequè aures magis purgatæ, nequè nares emunctæ magis, nequè ingenium fiat acrius; animus tamen inficitur, & venenum ebibit: quo postmodum homo multa credit de semetipso, quæ non sunt; & putat se quid aliud esse, quàm re vera sit; & vel oculis, vel auribus, vel ingenio, & acri iudicio præcellere existimat: cum in his adhuc sit veluti unus de plebe, & quandòque alicui de plebe inferior.

Aliqua deinde in corpore sumpti veneni se produnt indicia. Et non minùs ac cum rabiem canis ebibit, sive concipit animus hominis, postea homo torvè, & hircinis oculis intuetur, quæcunque aspicit; deinc aquas averfatur, quibus maximè sanari posset; demum aliis hominibus insidiatur; & vel ad insultandum corporis membra movet, vel ad latrandum, vel ad mordendum in canis similitudinem. Ità, inquam, non pauca alia in ritibus, & cæremoniis, & dum alicujus dignitatis suscipiuntur fasces, & insignia; & dum laurea aliqua accipitur, non rarò hominis animus venena ebibit, sive

concipit; quibus primum ipse animus occultè corrumpatur; postmodum extrinsecus etiam sumpti veneni signa ostendantur: pectus scilicet non parum consuetum tumidius; vultus; & incessus alius; sputa rotundiora, cultus corporis, aspectus, vox, quæ non sonent priorem hominem. Progressu temporis aliæ, atque aliæ assumpti veneni malignitates manifestantur: unde observamus nonnullos temerè aggredi, quæ minimè omnium norunt: se nimium habere; omnibus infestos esse; & cum fortè alios nequeant, semetipsos miserè divexare; & excruciare; & ad quascunque meliores sententias surdos, & cecos esse.

Et ex his quidem superstitiones, & vanarum rerum disciplinæ omnino inanes ortum habent; ex iis etiam scientiis, atque artibus, quibus veri non nihil inest, crassa superinducitur crusta fallaciarum; quæ veritatis abscondat nucleum, & occasionem aliis præbeat deceptionum. Ex his bella, & regionum devastations, contentiones, odia, rixæ, & quæcunque hominum genus malè exercent.

Quid fasces, quid insignia, quid laurea, quid tituli honestiores vani proficiunt; ubi res ipsa desit, cui illa convenient? Nihil aliud his efficitur, nisi quòd temeritatis, & ambitionis, avaritiæ, & superbiæ, malignitatis, & vitiorum omnium latenter venenum accipitur; quo semel assumpto difficillimum postea est ad meliora revocare animum; ut ab iis abstineat, ad quæ acclivis jam factus est.

Præter hæc, non rarò rei domesticæ angustia, & turpis egestas incitat, & calcaria addit; maleficiorum exempla adhortantur; & popellus ad se decipiendum paratus invitat, adeò ut sæpissimè, etiam si meliora cognoscantur, homines tamen deteriora sequantur. Estque hoc ipsum difficillimum, & vix paucis concessum, postquam multa præjudicia, & falsæ opiniones mentem præoccupaverint, meliora cognoscere. Nam in infirma potissimum ætate, cum omnia animi instrumenta sunt magis flexibilia, & magis obsequentia, latenter multa hauriuntur præjudicia; quæ postea cum organa sunt firmiora difficulter deponuntur: adeò ut propter malam dijudicandi in pueritia jam acquisitam consuetudinem, postea multa veluti coactus malè peragat homo; & ex habitu, jam acquisito, ad peccandum, & ad semetipsum, atque alios decipiendum promptior fiat.

Excusandum igitur potius est genus humanum, quàm condemnandum; quoniam nihil ipsi æquè facile, aut familiare est, ac posse decipi. Cumque homines ferè omnes, ut plurimum decipiantur, nequè una sit deceptio, aut decipiendi via (acquiescerent enim in eo, in quo omnes æqualiter deciperentur) postea propter varias deceptiones altercantur inter se, & acriter disputant, quærentes quisnam re vera sit deceptus; nequè facile inveniunt; nam quisque; ut plurimum, ne deterior fiat ejus conditio, proprios defendit errores.

Quòd si nonnullos reprehensione dignos existimare velimus, Erasistratte; ex iis, qui meo vivebant tempore Principes, & divites, & qui rerum habebant habenas maximè reprehendendi visi sunt; est enim ferè semper penès istos culpa malorum omnium. Quod satis expressit Homerus, cum clades, & pestes tum Græcorum, tum Trojanorum cecinit propter Regnum sive lasciviam, sive superbiam, sive avaritiam, sive incuriam, sive temeritatem.

Sed

Sed , ne omnia me his complecti velle tibi videar , Principum , & Magnatum , & divitum mei temporis mores referam ; quibus non solum iis , qui medicinam exercebant , sed aliis etiam professoribus , ipsos tūm malefaciendi , tūm disciplinas , & artes minū rectē excolendi , non leves occasiones dedisse , manifestum fiet.

Erant autem Romani , qui rerum tunc potiebantur ; quorum luxuria , & oscitantia , & incuria bonarum artium unā cum imperio creverant . Antiquiores enim multa quidem retinenda existimaverunt , quæ essent veluti frenum animorum ; sed aliquem posuerunt modum , ne vanitates , & superstitiones , malæque artes crescerent in urbe . Cūque divinandi artibus , & Medicinæ multum tribui observarent ; & difficillimum esset cognoscere , atque distinguere , quid in his esset boni , quidvè mali (bonum autem retinere , & malum evitare apud illos religio erat) circa divinatorias decreverunt ; *ut de (a) Principum filiis sex singulis Aethruriæ populis in disciplinam traderentur ; ne ars tanta divinandi propter tenuitatem hominum à religionis auctoritate abduceretur ad mercedem , atque quæstum .* Aethruria enim in extis inspiciendis , & in interpretatione fulgurum , & portentorum , tunc habebatur peritissima ; ac multa populo Romano , multa cæteris civitatibus vera prædixisse ferebatur . Circa medicinam verò nullum hujusmodi decretum , aut alia provisio satis visa est ad moderandam audaciam professorum , & ad præcavenda damna . Quamobrem jure merito P. Rom. Medicinæ exercitium damnavit ; non quidem artis odio , sed artificum ; qui aliquid habent , quod non est aliis commune : & ad annum ultra sexcentesium ab urbe condita medicis Roma caruit : verū non caruit medicina . An fortè Numen aliquod , quod medicina vocari potuerit , Romanorum saluti tunc præfuit ; ut essent sinè Medicis ; sed non sinè medicina ? Nequaquam iis P. R. caruit Medicis , *Qui sui quæstus causa fictas suscitans sententias , & omnia se nosse affirmant .* Verū non caruit Medicina ; nequè morborum vi plures eo tempore mortui sunt . Quoniam complures , divites maximè , qui hoc non auderent , sese Medicos appellare , propriæ , & totius familiæ saluti studebant ; & accuratè observabant , quæ acciderent in morbis ; & quæ prodesse , sive sibi ipsis , sive filiis , sive servis , sive pecori , quæve nocerent notabant : ac filiis postea tradebant , quæ cognita habuissent , ac filii aliquid aliud addebant ; & tradebant posteris , eratque Medicinæ studium unum ex iis , quæ pertinent ad rem familiarem . Quòd si quis , & sibi , & uxori , & filiis , & servis meliùs consulere novisset ; alii ad illum accurrebant , consiliumque petebant , quidquid ille cognovisset : pro ut nunc etiam fit circa res alias , licèt minoris , & sæpè nullius momenti .

Postea verò corrupti sunt mores ; & maxima desidia , & ignavia mentes divitum , atque Principum occupavit ; & rem quisque suam familiarem minū rectē curabat . Defuit etiam Senatus in his providentia : aded ut cuique licitum esset , vel conjectorem , & divinatorem facere ; vel Medicinam exercere . Res postea , ut audio , in deterius dilapsa est : sed non attingam , quæ non spectant ad mea tempora . Fuit autem , nonnullis annis antequam ego in Italiam venirem , Theffalus quidam Medicus , qui sex mensibus Me-

Tom. I.

R

dicinam

dicinam docere profitebatur, tanquam nulla bonarum artium, qui Medici futuri sunt, opus habeant, Verum enim verò, qui meis temporibus Medicinam exercebant, rudes adeò, & ineruditi erant; ut non immeritò dixisse Theffalus videri possit: sex mensibus se illa omnia docturum, quæ illi noverant.

Theffalus quidem peccavit, qui sic dixisset; peccabant, & alii disciplinarum professores: sed multò magis profectò peccabant divites; quorum inscitia, & rei domesticæ incuria occasionem præbebat illis malefaciendi. Divites enim cum se (a) totos voluptatibus addicassent; voluptatum artifices ditabant, admirabantur; & eò usque extollebant; ut histrionum, & aurigarum simulacra secus Deorum imagines etiam collocaverint. Disciplinarum verò peritos tanti faciebant, quantum (b) indigebant eorum opera. Nequè enim quid singulis artibus pulchri, bonique inesset animadvertabant; nequè ut eas accuratè discerent tolerare poterant. Verum Geometria, & Arithmetica tantum utebantur, quantum extruendis ædibus, & computandis expensis conducit; major autem pars, nequè hoc noverat; sed ad omnia, quæ ipsis domi opus essent; conductitios vocabant artifices, etiam ad computanda expensa. Astrologia (c) verò, & divinatione utebantur quantum ad prævidendum faceret, quorum hæredes esse debuissent, vel ut conjicerent in publicis muniis administrandis, quibus ipsi succedere possent. Item (d), & musica quantum ad oblectandum aures sufficeret. Quæ verò has omnes artes constituit, demonstrandi facultas curæ ipsis non erat; nisi quatenus dicendi studium quosdam adigebat cavillandi peritiâ discere; ut litibus, & forenlibus controversiis alii semper irretiti, & occupati essent. Nam artium (e) omnium parentem philosophiam non modò non audiebant, sed reliquis etiam omnibus disciplinis deteriorem arbitrabantur; cui operam dare non absurdius esse putabant, quàm si quis granum milii perforare velit. Hi sunt qui Medicinæ usum solummodò respiciunt, non tamen rectè; sed, ut inquit Plato in Gorgia, sicut pueri, vel imprudentes homines, à quibus si judicaretur, quisnam potior esset Medicus, an Coquus; non minimum præstare Coquus Medico censeretur.

Divitum, inquam, atque principum socordia angustus primùm collis, postea amplior, demum amplissima, & latissimè patens via adaperata est ad maleficia. Hinc numerus crevit eorum, qui tales videri potiùs, quàm esse volebant. (f) Hinc neglecta sunt, quæ in disciplinis erant præberrima; dataque est opera, ut ea dicerentur, & fierent; quibus divitum gratiam iniussent; & ab eis approbarent. Dico autem quibusvis adulari; quotidie salutare divites; per urbem comitari; principes domum reducere; in conviviis discumbere; atque in eis tum ministrare, tum iocos, & facetias referre.

Nequè opus tunc erat veritatem exquirere; quin maximè obstabat: undè non pauci si quid verum, atquè bonum assecuti fuissent, illud occultabant, ne à gratia, & ab amicitia caderent divitum: & iis tantum utebantur; quæ ad illorum, & vulgi, & matronarum præcipuè captandam, & tuendam opinionem, & benevolentiam apta essent. Hoc enim perpetuum est, ut ignavissimi omnium eos maximè admirentur, & adjuvent, atque tutentur, ex quorum consuetudine ignorantia ipsis non exprobratur.

Ac

Ac tali tempore, Erasistrate, ego Romam adveſtus, ignarusque inorum illius gentis cum eſſem; cœperunt Medici mihi maledicere; ac in colloquiis mihi ſemper detrahebant; alii præſtigiatores, alii deceptores, alii vaniloquum; alii aliis nominibus me appellabant: & ſæpè aſtu, dolis, aſſentationibus, omni genere vaſritiei, & verſutiæ, tres, quatuorve ſimul conveniebant, ut mihi adverſarentur; & ipſi præponerentur; & meridiculum facerent apud eos, quorum iudicium perſtrinxerant; & apud eos, qui de rebus minimè dijudicare valebant. Iſtorum audacia minimè ferenda viſa eſt; ac, ne Græcis imbutum artibus hominem in his etiam, qui ſub auxilii conferendi ſpecie libertatem abſtuliffent, illius temporis Romani vincerent, conſimili arte mihi opus eſſe cenſui. Effugiebant autem difficultates, quas ego proponebam; & mirabili aſtu, ac calliditate, totiusque corporis deriſoriis geſtibus, illudebant me in congreſſibus. Igitur adverſus tam diram hominum procellam, tempeſtatemque contra nitendum exiſtimavi: & ne tam facilè, effugerent; & ut ingenium, artemque dicendi meam oſtenderem, id maximè probandum ſuſcepi, quod ipſi maximè omnium improbabant: venæ ſcilicet ſectiorem. Nequè me deterruit cauſa; noveram enim, ſi ſemel vaſritiem illi omittere debuiffent, cum imperitiſſimis rem me fore aſturum; qui neque id, quod maximè probari poſſet, defendere ſcirent: & quidem præter auctoritatem, nomenque tuum, Erasistrate, nihil illi adducebant memoratu dignum pro tuenda ſententia de non mittendo ſanguine.

Idcirco illud mihi oſtendendum fuit, te non fuiſſe eum, qui in Medicina non potueris decipi; ut nequè fuit Hippocrates, licèt ab aliquo dictus fuerit tam fallere, quàm falli neſcius: & tu quidem non inferior Hippocrate habebaris. Atque, ut ex eadem fidelia ambos dealbarem parietes, librum conſcripſi, titulumque appoſui *de venæ ſectione adverſus Eraſiſtratum*: videlicet adverſus hominem clariffimum; & circa rem tam ſacram, qualis erat tunc venæ ſectio; ad hoc, ut calliditati, & vaſritiei non eſſet ampliùs locus; & non eſſet mihi cum umbris ſemper contendendum, argumentorum vim tantùm deridentibus. Res evenit, ut fueram imaginatus; tanta enim fuit hominum imbecillitas, ut nullus aliquid contra ſcribere auſus fuerit. Ac juniores, qui adhuc longo artis exercitio non erant adſtricti ad defendendam illam ſententiam, ſanguinem mittere in omni ferè morbo, & in principio cujuſcumque febris aggreſſi ſunt; & ut hoc ipſis magis liceret; incœperunt affirmare, te quidem ſanguinem mittendum eſſe exiſtimaviſſe, ſed omiſſiſſe in libris tuis apertè hoc monere, atque oſtendere. Sed ego nequè hoc concedere volui; & ut illos magis divexarem, alium librum Evulgavi *de venæ ſectione adverſus Eraſiſtrateos* ipſos: in quo id, quod minimè conſtare poterat, demonſtrandum ſuſcepi, te nunquam venas ſecaviſſe in morbis; nec non etiam pervertere Eraſiſtrateos tuam doctrinam; & ea ipſa non intelligere, quæ tu ſcripſeras; ac ipſos nullos eſſe, qui nequè propria induſtria aliquid noviffent; nequè ex te, cujus libros non intelligebant, aliquid didiciſſent.

Nequè in his dicendi vim, atque copiam, quibus ſum uſus, damnare debes, Erasistrate; Nam licèt hæc quærenda non ſint in Medico, non ſunt tamen coterminanda; maximè quia in illis libris non tantùm Medicum me præſtabam; ſed meam agebam cauſam; inimicorum ſcilicet meorum audaciam reprimebam.

Nequē tu nunc eorum, qui te secuti sunt causam defendere debes; tūm quia nihil hoc refert; tūm quia tutemet scis, non paucos sectatores nostros dedecori potius nobis fuisse, quā honorī. Qui sapissimē multa perversē sunt de nobis interpretati; nostro nomine, nostraque auctoritate popello imposuerunt, & pecunias multas extorserunt: ac plerique cūm volumina nostra nunquam legerint, nostris uberibus, nostraque doctrina se educatos, enutritos, atque edoctos dixerunt. Alii verō complures, quod minū con-
stanter à nobis dictum est, amplexati sunt; solidam, veramque doctrinam perverterunt. De tuis sectatoribus egomet sum tibi oculatus testis, Erasistrate, quod non quidem re; sed nomine tantūm te fuerint imitati; quod frequentissimē me præsente, & me audiente ipsorummet errores tibi tribuissent: quod eō confidentiū faciebant, quod vidissent neminem de principibus literarum adeō fuisse studiosum, ut de illis dijudicare potuisset. Theophrastus autem tuos secum deferrebat libros; ut cūm opportunitas esset, ostenderet, te nequaquam ea docuisse, quæ ipsi faciebant; tūm etiam, ut illis hoc eriperet diverticulum ad te, auctoritatemque tuam immeritō confugiendi.

Tertius autem liber, cujus titulus *De curandi ratione per sanguinis missionem*, non quidem mea voluntate scriptus est; sed ut illis obsequer, qui post disputationes plerasque cum Medicis habitas, & post illos duos priores libros aures obtundebant meas; rogabantque, ut docerem, quibus in morbis expediat sanguinem mittere, & ut venæ sectio sit instituenda: nam jam non ampliū fidebant in Medicis suis. Ego autem circa hæc omninō me referre volebam ad ea, quæ in aliis libris à me etiam scripta erant, in quibus etsi pluries, atque pluries affirmaverim convenire in morbis nonnullis sanguinem mittere; tantas tamen addidi difficultates pro noscendo morbo, in quo conveniat; & pro noscendo tempore, & pro determinanda vena; tot addidi cautelas, & circumstantias; tot, tantaque contraindicare sanguinis missionem passus sum, etiam si morbus illam exposcat; ut manifestum sit (modō ea servantur, quæ ego docui) aut nunquam, aut rarō expedire sanguinem mittere; ac omninō difficillimum esse cognoscere, quando conveniat. Cum tamen illi rogare non destitissent; & precibus (a) me suis obtundere non cessassent complures amicorum, quos pigebat, ut mihi videbatur curandi librum à me editum, aliaque scripta mea perlegere: coactus tandem sum ad hæc scribenda descendere, ne scilicet iuvideere illis viderer. Memini tamen in hoc ipso libro de cur. rat. per sang. missionem me hæc adjecisse verba. Verū, quoniam haud (b) mea voluntate hunc aggressus sum sermonem, si quod dictorum peccatum eveniat, ipsi culpam ferent, qui auctores fuerunt, ut hoc onus susciperem, sicuti si rectē, atque ex sententia accidat, utilisque appareat, laudem illis omnem cedo.

Quid nunc blaterant? Malum ne aliquod ex illo libro factum est? illi videant qui me ad scribendum compulerunt; ego enim omnibus abrenunciavi laudi, & gloriæ, culpæ, & infamiæ, quæ ex libello evenire potuissent.

At dices, Erasistrate, hæc non esse satis ad me excusandum, nisi fort.
apud

(a) Galen. de cur. rat. per sang. miss. cap. 2.

(b) De curan. rat. per sang. miss. cap. 5.

apud homines, quibus ex meliore luto effinxit præcordia Titan; alii namque mea opera decepti sunt. Apud illos quidem me excusatum volui. Indocti autem ex quavis occasione, sive benè, sive malè dixeris, ipsi sese facillimè decipiunt.

An mea culpa aliorum sectatores facti sunt ferè omnes, qui post me fuerunt? cùm ego omni semper contumelia sectatores omnes affecerim, servos, viles, ignavos, furdos, cacos, & qui veritatem nunquam assequi possent, continuò eos appellans!

An mea culpa disciplinarum professores; Geometria, Arithmetica, Mechanice, aliisque similibus artibus, quæ demonstrativam methodum habent, minimè usi sunt? Cum ego has omnes, Medico quidem necessarias, aliis verò perutiles esse, semper deprædicaverim!

Quidam à rudi populo habiti sunt sapientes, quòd dixerint nivem nigram; alii quòd dixerint eandem calidam; alii ex hoc, quòd dixerint se nihil scire, vel hoc unum scire, quòd nihil scirent; alii, quòd dixerint se omnia scire, & veluti ex tripode cuicunque quæsito respondere posse affirmarent. An mea quòque opera decepti sunt, qui ex his omnibus aliquem existimaverint sapientem adèd fuisse, ut illius verbis, tanquàm infallibilis oraculi, standum esse opinati etiam sint?

Dixi sanguinis missionem multùm, atque multùm prodesse; & revocare homines ab orci faucibus; dixi equidem: verùm pluries, atque pluries à me quòque dictum est, eandem nimium obesse; quamplurimos missione in maximum vitæ discrimen fuisse perductos; non paucos fuisse enecatos. Videndum igitur, quandò prosit, & quandò noceat; & ut hoc cognosci possit?

Ego autem in eo ipso libro, qui est de cur. rat. per sang. mis. enumeravi multa, quorum cognitio necessaria esset ad rectè aliquid determinandum circa utilitatem, aut damnum, quod missio afferre potest: ac omnia quidem sunt cognitu difficillima; quædam verò sunt omninò impossibilia.

Tanta igitur cùm sit difficultas in his cognoscendis: & quædam, quorum cognitio necessaria est, ut rectè missio instituatur, homini sint cognitu impossibilia, si meo consilio uti voluissent Medici, abstinuissent semper à venarum sectione.

Primò cognoscere oportet recessum à statu naturali *in statum* (a) *præter naturam* eo sensu, quo hæc accipiebam, quod quidem difficilè cognoscitur.

Secundò quænam sint affectiones evacuationem poscentes: *deinde* (b) *quænam ex iis venam incidi postulent*, nequè hæc in quacunque hypothesis facile cognoscuntur.

Tertiò cognosci debent generationum principia. Atque hoc est non solum difficilè; sed etiam fortè impossibile, quod ab homine cognoscatur. Nequè ante me quisquam principia hæc certò cognovit; nequè post me quisquam; nequè aliquid huc usque de illis determinatum est. Dixi quidem *principia* (c) *in rebus omnibus pro materia quatuor habere elementa; quæ per sese mutuò tota misceri, inque invicem agere sunt nata*: sed quis hoc novit, an ità se habeat! Dixi me ostendisse Asclepiadis elementa esse falsa; an propterea mea sunt vera? Quid, qui dicunt esse quinque rerum omnium elementa; quid

quid qui tria ; quid , qui duo ; quid , qui unum ; quid , qui affirmant esse infinita ? Et de his quidem , quæ minimè possunt determinari ; ex mea sententia Medicus priùs decernere debet ; ut aliquid postea de secunda vena rectè determinet !

Quartò oportet cognoscere , quot sint qualitates effectrices ; quod non solum cognosci nequit ; sed nonnulli affirmant omnem de qualitatibus doctrinam esse purum figmentum. Nequè satis est me dixisse esse quatuor , *quarum* (a) *nomina sint caliditas , frigiditas , humiditas , & siccitas* ; nam non raro multò aliter loquutus sum : & aliquando dictum etiam à me est , facultates , si vè qualitates appellare me solitum occultas rerum causas ; quas scilicet ego adhuc minimè cognoscerem : qui igitur potuerim alios docere ; quæ ipse ignoraverim !

Quintò oportet cognoscere humorum , tùm differentiam , tum generationem. Estque hoc etiam eorum , quæ hætenus minimè cognita sunt : & humoristas meos jurè derisit Helmontius ; non quia non conduceret illorum cognitio , sed quoniam nullus adhuc illos cognovit .

Sextò ex mea sententia utilis (b) quoque in rem præsentem tractatio de temperamenti est , elementorum sequens tractationem . Cùmque elementorum numerus sit incertus ; & etiam si conveniamus de numero , disputetur hætenus quænam , & qualia sint elementa , incerta erit quodque doctrina de temperamenti ; & plerique quicquid de elementis , & de temperamenti à me dictum est , non sinè aliqua ratione putant esse figmentum.

Septimò verò omnium maximè , dixi , utilis est liber (c) de plenitudine , in quo ostensa est ; & ut ad vires plenitudo ; & ut ad capacitatem , in qua continetur . Atque hæc , quæ de plenitudine à me dicta sunt , tu fabulas esse existimas , Erasistrate ; & vis plenitudinem semper referri debere ad vasa .

Hæc & alia similia lib. de cur. rat. per sang. miss. cap. 3. alia passim alibi : quorum cognitio necessaria mihi visa est ad sanguinem rectè detrahendum : Sed omnia præter morem breviter in hoc lib. de cur. rat. per sang. miss. Semper enim dimisi lectorem ad alios meos libros , tùm ut illi ostenderem me non fuisse , neque esse spernendum ; tùm ut rem efficerem difficiliorem ; tum etiam ad hoc ut si libros alios legerent , cognoscerent tandem rem esse difficillimam , atque sæpè cognitu impossibilem . Ac circa finem hujus capituli memini me adjecisse hæc verba : nec verò (d) mirum cuiquam videri debet , si tantis sit opus , ut probè de vena secunda contemplari liceat ; non enim ad hujus tantum auxilii inventionem , sed & aliorum omnium necessaria est eorum , quæ modò recitavimus cognitio . Nam si citrà illorum notitiam rectè curare possemus ; haud esset cur ea tanti faceremus . Magni quidem facienda est cognitio eorum , quæ à me recitata sunt ; sed hoc opus , illa cognoscere .

At libro de venæ sect. adversùs Erasistrateos cap. 6. cognoscens ego quosdam existimare facilè decerni posse , secunda ne sit vena , an non ; hæc protuli : inhibendum (e) censeo illis , qui hætenus venas temerè secarunt , ne eas in posterum penitus secent . Ut enim Plato ait minus aberrare eos consentaneum est , qui ea non aggrediuntur , quæ non norunt , quàm qui illa tractant , qua

nun-

(a,b,c,d) Gal. de cur. rat. per sang. miss. cap. 3.

(e) De venæ sect. ad Erasistrat. cap. 6.

nunquam didicerunt : nam hoc idem , & isti faciant , sibi ipsis persuadentes ; quòd , & quibus venam secare expedit , & cætera id genus , quæ à me recitata sunt , inventu facilia existant .

Ponamus me dixisse multa hominem commoda habere posse ex volatu ; multa faciliùs atque citiùs volatu perfici posse , quàm pedibus ambulando . Ponamus me dixisse cognitam mihi esse volandi artem , illam tamen esse difficilem satis ; ut re vera difficilis est . Dixerim etiam ut volandi artem assequatur , oportere priùs cognoscere quid sit gravitas , & quæ sit vis ; quæ corpora compellat ad centrum ; & an vis ista crescat , vel decrescat unquam , dum grave descendit ; & ut crescat , vel decrescat : item oportere aeris cognoscere gravitatem in quavis tempestate , & temperie , sive mavis dicere constitutione ejusdem aeris : oportere cognoscere corpulentiam , & resistantiam aeris , tùm respectivè ad motum gravium , tùm etiam respectivè ad alios motus , percussionesque , librationesque , quæ in ipso fiunt . Item posito quòd addiderim ad volandi scientiam acquirendam , non solùm physicam disciplinam , verùm etiam necessariam esse Geometriam , Arithmeticam , Musicam , Mechanicam , aliasque facultates ; quibus machina inveniatur ; qua facilè tùm aeris resistantia superet corporis gravitatem , & quibusdam motibus corpus in aere librari possit ; tùm etiam ipsum idem corpus grave ad dexteram , vel ad sinistram inflectatur ; ascendat , vel descendat pro labitu hominis . Ponamus , quòd hæc , atque similia dixerim : an si quis cùm nihil istorum noverit ; spe tamen rectè volandi è sublimi se dejiciat ; præcipitetur , & moriatur ; mea culpa dejicitur ; mea culpa præcipitatur ; mea culpa moritur ? quoniam ego dixi dari artem volandi : sed eam esse difficilem nimis ; & omnium aliarum artium , & disciplinarum egere auxilio ? stultus procul dubio est , qui mea culpa mala illa accidisse dijudicabit .

Haud profectò dissimiliter de sanguinis missione locutus sum ; quòd utilis sit ; sed quòd multarum rerum captu difficillimarum , & impossibilium cognitio requiratur , ut illa rectè instituatur : adeò ut minus , atque minus errent illi , qui nunquam sanguinem mittunt ; quàm qui , tanquam si inventu facilis esset opportunitas mittendi , temerè mittunt .

Quid aliud postea fieri potuit ! Is fuerat , Erasistrate , fervor , & disputationis calor , ut obstinatè , & summa cum pervicacia dicentibus illis , qui maximè mihi maledicere , & detrahare soliti fuerant , nunquam omninò , nequè directè , nequè indirectè conducere sanguinem mittere ; nequè adhæc ullam propter imperitiam satis probabilem adducerent rationem : parùm sanè dicere visus essem , si apertè dixissem rarò convenire ?

Ità igitur locutus sum ; ut aliis viderer credere semper admittendam esse sectionem , aliis nunquam ; aliis verò , & prudentioribus rarò eandem convenire viderer existimasse : verùm tamen rem adeò esse intricatam affirmavi ; ut ipsi ex sese crederent penes me tantùm esse artem de his benè determinandi , & sectionem rectè administrandi .

Qua quidem ratione nequaquam alios offendere mihi animus fuit , præter eos , qui me offenderant . Nequè aliud præstitisse videndus sum ; nisi in summa illa concertandi occasione mihi non defecisse . Atque ideò , modò æquo sis animo , dijudices , spero , jure merito à me sic factum . Res enim
ipsa

ipsa sic tulit; ut cum illi lingua, gestu, & omni obtreptionis genere mihi infensi fuerint, & ad hoc simul ipsi convenirent; & principio omnia damnerent, quæ tu non dixeras probanda; postea nihil defenderent eorum, quæ dixissent: ego contra omnia sumerem, quæ vellem; & ut eò magis illorum ignavia ostenderetur, pro ut impetus disputationi ferebat, amplissimam habuerim orationem; nihil ex adverso ego mihi timens ab illis; ubi calliditas jam non esset amplius ex usu. Atque simili quidem pacto sæpè multa acciderunt: videlicet cum non rarò homines aliquid sine limitatione, & distinctione temerè negassent; postea sine limitatione illud idem quod negaverant, temerè concesserunt, & temerè etiam in usus admiserunt.

Et equidem hanc fuisse Aristotelis fortunam audiivi. Primum ejus scripta tanquam ab oraculo exarata in veneratione maxima sunt habita. Ex quo data est occasio nonnullis, ut diligentius illa examinarent: reperta sunt quædam absurda. Crevit postea paulatim istorum numerus, qui animosè de Aristotelis operibus crism ferrent; & vel quia multa non intelligerentur; vel quia multa re vera absurda essent, totus tandem Aristoteles visus est absurdissimus. Adeò ut, Erasistrate, disertissimi Avi tui scripta, tanquam omnino erroneam, & perniciosam, ac pestilentem continerent doctrinam, judicis decreto publicè igni concremarentur: edictumque sub gravi pœna est, ut si qui exemplaria, haberent igni traderent. Sed hoc ipso factum est, ut quædam exemplaria diligentius custodirentur; & quidam curiosius examinare cœperunt; an re vera Aristotelis doctrina tam absurda esset. Viderunt primò non omnia esse absurda. Dehinc benigniori animo illa perlegentes viderunt, & hoc, & hoc aliud rectè posse interpretari. Brevi postmodum doctrina, & eloquio visus est summus Aristoteles: moribus autem re vera nunquam commendandus visus est. Post hæc sancitum est à principibus, ut pueri omnes secundum Aristotelis doctrinam instituerentur: & factus est Aristoteles veluti Numen infallibile; & Philosophus per antonomasiam dictus est, & in magnis controversiis, si quis protulisset hæc verba, *dixit Aristoteles*, omnes acquiescebant. Demum audiivi alios insurrexisse; qui hæc ipsa maximè turbaverint; & iterum habeatur Aristoteles apud aliquos insulsus, & fatuus, & nihil solidè, nil rectè, sed omnia pravè docens.

Et mihi, & tibi similia acciderunt, Erasistrate, culpa ignavissimorum sectatorum nostrorum, qui nos nunquam potuisse errare crediderunt. Tui quidem dederunt mihi occasionem, ut in illis tribus libris tibi maledixerim. Mei verò occasionem dederunt Helmontio detegendi omnia ulcera, quæ fortè sunt in meis scriptis. Ego enim etsi magnificè de me passim sim locutus; & famæ, & gloriæ fuerim perquam avidus; de memetipso, tamen nunquam hoc credidi me non potuisse, & non posse errare; nequè cujusque privatim naturam me satis exploratam habuisse, sum unquam opinatus. Sed redeam ad sanguinis missionem.

Pro coronide autem tum libri de cur.rat.per sang.miss. tum libri contra te, & alterius contra tuos bina addidi somnia; quæ dixi mihi conspicua visa esse; & illorum monitu arteriarum sectionem me fuisse aggressum. An dicam me credidisse, detractione opus habuisse ægrotantes illos; cum multi, atque multi jam a principio morbi transacti essent dies? Illud certè volui, ut auditis somniis meis, & consiliis deorum mihi per somnia communicatis,
fide,

fide, & vana licet animi religione maximè juvarentur ægrotantes.

O malè factum exclamasti, Erasistrate, ubi somnia audivisti; & sic decuit exclamasse ingenuam umbram. Sed vide, quæso, an simplex potius, quàm ingenuus sis appellandus. Nulla unquam fuit gens, quæ superstitiones suas, & opinionum vanitates non habuerit. Ac ridiculus omninò est, qui mundum sperat ab omni præjudicio, & vanitate liberare. *O curas hominum, o quantum est in rebus inane.* Vanitas, & omnia vanitas, & hoc quòque vanitas. Sæpè pro uno præjudicio, quod auferatur, multa intrant in hominum mentes; ut meliùs sit sinere illos, cum iis præjudiciis, quæ habent. Præterquam quòd minimè omnium hoc tutum est, auferre præjudicia, & hominum adaperire oculos! ac nisi inter umbras de his agerem, timerem sanè, ne mali aliquid ex his iisdem mihi accideret.

Omnibus in rebus, & tempus, & mores, consuetudinesque, & vanitates eorum, quibus cum agas, & occasiones à prudentioribus sunt attendenda; nam quæ uno tempore aptè sunt, & iustitiam habent; alio tempore nequaquam fieri debent, & sunt iniusta. An tu putas impium Drusum, atque sceleratum, quia non monuit exercitum, lunæ claro cœlo defectum, ex naturalibus causis nihil cum seditione commune habentibus, dependere? Non ingenuus, sed in illa occasione ridiculus planè fuisset; & simplex nimis, si monuisset. At ille *quæ (a) casus obtulerat in sapientiam vertenda ratus* seditionem sedavit; superstitioneque, vanoque timore deficientis lunæ prudenter usus, milites ad obedientiam, inque ordines reduxit. Ita pius Medicus vanitatibus, & falsis opinionibus uti potest; veruntamen ut meliùs sit ægrotanti, & ut citiùs ille sanetur. Sic vomitorium exhibitum cuidam fuit, qui serpentem gestare credebat; & dum vomeret, serpens injectus est in vas; & omnes adstantes, ab ore ægroti prodiisse, exclamarunt. Quibus quidem deceptus est ægrotus; sed hac eadem deceptione servatus, & sanitati restitutus est. Simplicitas, & imprudentia, & summa ingenii stoliditas est, nunquam decipere hominem; qui sæpè numerò tunc maximè juvatur, cum maximè decipitur.

Atque hæc quidem quæ, voce, verbo, atque scripto ego tunc dixi de his, aliisque somniis, sive meis, sive patris, aliorumque, non fuerunt iniquè accepta; & non levem ex his ego mihi fidem comparavi. Nam illo tempore hac vanitate, & superstitione perculsæ hominum mentes credebant multa à Diis per insomnia homini revelari; & casus nonnulli prudentioribus etiam accidisse narrabantur admirabiles; & religio erat negare mihi quòque aliquid similiter potuisse manifestari.

Sive Medicus, sive Imperator, sive alius fuerit, vanis hominum opinionibus summo jure, & summa cum gloria uti potest; ad eum tamen finem, ut meliùs sit gentibus. Ac illi sunt maximè reprehendendi, qui vanitate utuntur opinionum, ut malè sit homini; vel ut aurum extorqueant, exempli gratia, vel ut pudicitiam expugnent: ut factum est sub Tiberio Cæsare. Isis nanque ministri, ut pudicitiam expugnarent Paulinæ clarissimæ, & castissimæ Romanæ, dixerunt nescio quod Numen (b) Anubim Ægyptium ca-

Tom. I.

S

nino

(a) Tacitus annalium I.

(b) Joseph antiquit. jud. lib. 18. cap. 70.

nino capite, illius expetere concubitus. Retulit illa marito; qui valdè gavisus Numen cum ipso velle Paulinam communem, obtemperandum mandavit. At Iſidis miniſtri pro Numine divitem juvenem ſuppoſuerunt; à quo aurum acceperant. Re autem comperta, meritò Tiberius, & Iſidis miniſtros, & templum ejuſdem, ac turpem delevit anicula, quæ hæc cum miniſtris tractaverat. At Ego in nullius hominis, aut perniciem, aut dedecus vanitate opinionum gentium ſum uſus.

Pulchrè autem liber clauſus, & ornatus eſt ſomniis illis: nam prudentiores rhinicerotis naſum habentes, providum, & ſagacem animum in me potuerunt admirari; Indocti, ſtultique debuerunt credere, oportere ad rectè mittendum ſanguinem, ut Numina revelent, quibus, & quando, & ex quo vaſe mittendus ſit: & ego interim audaciam, & petulantiam, ac ſummam malignitatem ſectatorum tuorum reſpreſi. Fateor tamen in his, aliſque quamplurimis, nequè ſupremum corticem, nequè ſuperficiem doctrinæ meæ cognoviſſe non paucos meorum.

Verùm enim verò minimè æquum eſt ex his tantum, quæ in rixa illa a me ſcripta ſunt de meis moribus, & doctrina mea iudicium ferre; cum ſapè, tunc etiam cum ſcribebam contra te, & contra tuos, ad alios libros me retulerim a me quòque, ſed pacato magis, atque tranquillo animo conſcriptos. In quibus ſanè multa ſunt, pro quibus, & laudari, & commendari mereor. Præteream multa; & quòd rei medicinæ ſummam difficultatem ſapè ſapè ſapè oſtenderim; & quòd monuerim futuro medico maximè neceſſariam eſſe demonſtrandi artem; & quòd rectè indicaverim, quibus in diſciplinis hæc demonſtrandi facultas reperiatur, & quòd, his ego licèt inſtructus, tamen ſaſſus fuerim me nullius ſingularis (a) hominis naturam perfectè cognoviſſe; & quòd affirmaverim unumquemque ſectas omnes prius perdiſcere debere, ut de illis aliquid poſtea rectè decernat; & quòd ſectatores, & ignavos ſemper increpaverim. Omittam & alia multa; illud tamen prætereundum non eſt, multum mihi debere omnes, quotquot poſt me fuerunt, atque erunt poſteri; quòd volumina ipſis reliquerim omni eruditionis genere reſerta; quòd conatibus meis omnem de re medica doctrinam, ab antiquioribus traditam, habeant; quòd fideliter aliorum ſententias tradiderim; & quòd ferè omnia, quæ ab aliis ante me ſcripta fuerant; & in dialecticis, & in phyſicis; & in re medica; & in ſimplicium, atque compoſitorum medicamentorum hiſtoria; & quidquid de re anatomica ad mea uſque tempora compertum fuerat, libris meis complexus fuerim: atque ideò volumina a me conſcripta ſint veluti ampliffima bibliotheca; omnia, quæ ab aliis, & à me etiam, utcumque cognita fuerant, complectens.

Et in his quidem, aliſque ſimilibus, non ſolum poſſeri me laudare debuiſſent, atque debebunt poſthac; verùm etiam vos mortui, qui ante me fuiſtis, tum laudare me, tum ſummas mihi debetis, & agere, & referre gratias; quoniam veſtrum ſapè ſinè invidia, & ſinè livore meminerim: multaue veſtra omninò periſſent, niſi ego eorum mentionem feciſſem.

Tuque, Eraſiſtrate, tanquam unus de plebe, quæ ſapè immeritò hunc, vel illum infeſtatur, & vanis movetur rumoribus, mihi es ingratiffimus.

Nam

(a) Gal. meth. med. lib. 3. cap. 7.

Nam si hæc excipias circa sanguinis missionem, & pauca alia; multa honestè, & dignè; & perquam honorificè de te locutus sum; quæ potuissem omittere, si qualis in alios fertur avus tuus, iniquus ego in te fuisset. Celeberrimi (a) Medicorum omnium tu, Erasistrate, atque Hippocrates mihi visi estis; quod posteritati publicè testatum volui. Te ego morum (b) probitate, & modestia non ineleganter fuisse præditum affirmavi. Inter eos te numeravi, qui destitutam (c) ab aliis rem anatomicam restituerunt. Inter ceteros recensui te legitimæ (d) gymnasticæ autorem. Te cum Hippocrate, paucisque aliis rationalis sectæ (e) autorem memoravi. In tui maximam gloriam hoc seculo cedit, quod retulerim, te quempiam ex humoribus vitium esse, calidum, frigidum, humidum, aut siccum appellare. Nisi ego tui meminissem, Erasistrate, nequè tituli extarent librorum, quos conscripsisti; vix fortè nomen ad secula pervenisset tuum. Ego enim monui posteros te de febribus; (f) de vulneribus; de alvi, tum affectibus, tum curatione; de rejectione sanguinis; de resolutionibus; de salutaribus; de divisionibus; deque aliis multis libros composuisse. Meo munere viget fama, nomenque tuum inter vivos. Erasistrate. Tibi verò propter levissimam injuriam, quæ si occasionem spectes, nequè injuria appellanda est, beneficia erga te mea, laus, honos, gloria, decus, nomen, quod ex meis scriptis consecutus es, omittenda videntur, & nihili æstimantur! Quod si sæpè multa ex tuis, & ex aliis improbavi, humanum hoc est; nequè cujuspiam alterius sanctiones probavi semper. Homines namque tum inter sese sapissimè dissident; tum idem homo aliis temporibus à semetipso discors, & dissentiens est: nequè omnia, quæ à me scripta sunt egomet probo: quid mirum igitur, aut nimis a probo viro alienum si tua aliquando improbaverim! Nec tamen irascor; quis enim succenset tibi, cui aspera tantum, & prava de me sectatores nostri retulerunt?

Sed videamus an vera loquantur; & videamus an ego tam largus sanguinis profusor fuerim, ut isti deprædicant!

Cum autem variis temporibus multa à me scripta fuerint, in quibus fortassis non paucæ reperiri possunt repugnantes sententiæ, si quid tamen constantius unquam scripsi, id est sanguinem nequaquam secta vena mittendum esse, ubi ille notabiliter vitiosus existit; ac quò magis vitiosus ille est, eò minùs convenire detractionem. Fidem igitur prædunt hominum illi, qui cum sanguis vitiosus nimis est, à me inquiunt fuisse edoctos, oportere, secari venas. Verum enim verò, cum sanguis superabundat quidem (si unquam superabundat) sed vitiosus non est; vel haud multum, aut vix recedit à naturali, sive utili, & laudabili ejusdem statu, tunc aliquando, non equidem semper, convenire detractionem existimavi.

Ex his igitur patet, Erasistrate, ex Galeni tui sententia sanguinem mittendum

S 2

-
- (a) Gal. de consuet. cap. 1.
 - (b) Gal. de atra bile cap. 7.
 - (c) Gal. de Hippoc. & Plat. decret. lib. 8. cap. 1.
 - (d) Gal. lib. ad Thrasybulum.
 - (e) Gal. Medicus sive introductio.
 - (f) Galen. de Hip. & Platon. decr.

tendum esse cū homo benè se habet, vel cū non ægrotat ex sanguine, vel si ex sanguine laborat, leviter, & iis morbis laborat, qui spontè sanantur absque Medici, Chirurgive opera.

Cūque sanguinem ex quatuor humoribus, cum quatuor elementis, igni nempe, aere, aqua, & terra analogiam habentibus constare dixerim; tunc cū humores isti quatuor proportionem non servant, vitiosum esse sanguinem affirmavi; & tunc etiam purganti pharmaco, facultatem habente educendi excedentem singularem humorem, evacuandum esse corpus asserui.

Præterea sanguificatio eorum, quæ cibo, & potu sumuntur, coctio quædam mihi visa est; & quatuor illi humores rarè probè cocti mihi visi sunt; ut sanguis ex iis constans, rarè omninò utilis, & laudabilis, & absque ullo vitio dici mereatur: Sæpissimè autem eosdem humores, vel crudos esse ob caloris defectum; vel coctos nimis, propter ejusdem caloris excessum: ac nequè cū crudi sunt, nequè cū cocti nimis, utilem esse sanguinis missionem existimavi.

Quæ quidem omnia, præter quàm in locis alibi adductis, apertissimè docentur in libris de sanitate tuenda, ubi memini me sic scripsisse: *Nam quoniam alii humores prius quàm (a) ad exactum sanguinem nutrimentum pervenit, veluti semicocti sunt; alii prorsus incocti, crudique, alii paulò absunt à sanguinis forma: rursus alii sanguinis faciendi, sive, ut ita dicam, sanguificationis veluti ultima pars, qui utique excessu caloris proveniunt; quorum alii paululum; alii plus; alii plurimum à sanguine recesserunt; ubi paulum vel citra sanguinem restitum; vel ultra processum est, audacter mittendus sanguis est.* Hoc est ubi ægrotantes benè se habent, vel ubi non quidem ex sanguine laborant; vel si ex sanguine ægrotant, iis morbis ægrotant, qui facile spontè curantur; ut Medici, Chirurgive, non indigeant languentes auxilio, tunc venæ sunt aperiendæ. Ubi verò sanguis plus recedit ab optimo statu (b) consideratius agendum; ubi plurimum in his nullus omninò mittendus est sanguis.

Item ego his exponens locum illum Hippocratis: propter inclinationem, sive propensionem; vel ut alii, & rectius interpretantur, propter conversionem non item sanguis exit; sed pro humoris cognatione talia expiunt: hoc est, dum sanguis è pulmonibus per os expuitur; si spumofus (c) appareat, pituitosus ille est, vel in pituitosum degeneravit; pallidus autem expuitur, cū biliosus est; niger verò si melancholicus; aut pro alia humoris affinitate nequaquam purus prodit: cūque non his omnibus venæ secandæ sint, ut scriptor ille præcepit; ego regulam tradidi, quæ mihi melior tunc visa est: videlicet *expedit, dixi, horum (d) aliquibus sanguinem detrahi, quibus scilicet is copiosus est, & nondum insigniter ad alterum humorem conversus. Non detrahendus est autem, in quibus iam mutatus est.* Quæ verba illud idem sonant, quod prius dictum est, ex Galeni sententia mittendum esse sanguinem, cū homo benè se habet; vel cū non laborat

ex

(a) Galen. de sanit. tuend. lib. 4. cap. 4.

(b, c, d,) Gal. in lib. Hipp. de morb. vulg. lib. 6. com. 3. text. 42. 43. & 44. atq; idem Gal. com. 3. lib. de humorib. text. 30. 32. & 33.

ex sanguine; vel si laborat, leviter, & iis morbis laborat, qui spontè, & abstinencia duodecim horarum, vel unius diei curantur. Enim verò si lapsu unius diei morbus non desinat, evidens signum est; vel hominem non ægrotare ex sanguine, vel non ex copia, & abundantia ejusdem ægrotare: sed ex vitio, quoniam vel pituitosus est, sive lentescens, & crassus, ut ait Willis; vel biliosus, vel melancholicus; vel quoniam sales, & sulphura, & spiritus, & aqua, & terra, quæ principia sunt Willis, vel unum, vel plura ex his sunt exaltata, vel depressa nimis. In quibus omnibus ex Galeni sententia non expedit sanguinem detrahere.

Atque tuam fortè inibo gratiam, Erasistrate, si non omittam verba illa ejusdem scriptoris: *Impedimentum* (a) *in cruenta spuentibus*, hoc est ad sanguinem mittendum, *tempus anni phlegmone lateris, sive pleuritis, bilis*. Quæ intelligenda dixi circa pleuritim, si illa fuerit levis, & benigna. Tu autem dicere potes, cum levis pleuritis in sanguinem spuentibus impediatur venarum sectionem; multò magis eandem non esse admittendam, cum illa fuerit gravior. Sed fortè, nunc inquam, voluit scriptor ille in pleuritide cum cruenta expuitione adjuvandam esse hanc per os expurgationem; quæ sanguinis missione cohiberi, & retardari potest. Verùm, quidquid sit de his, illud non est dubio vertendum, tempus anni, sive nimis frigidum, sive nimis calidum, qua de re fusiùs postmodum, impedire sanguinis detractionem; etiam si hæc propter alias rationes convenire videri possit; nequè in omni pleuritide eandem proficuum esse, etiam si vires consent, & cætera consentiant, nequè eandem convenire si bilis excedat; ac similiter in aliis, de quibus dictum est.

Egone sanguinolentus, Erasistrate, qui senex confirmavi hæc, quæ junior scripseram! In libris enim methodi inter alia multa notavi hæc: *Ubi* (b) *æqualiter inter se sunt adaucti, id, & plethos, & plethoran*. Græci vocant, latini plenitudinem, & succorum redundantiam appellant: ubi verò, vel flava bili, vel nigra, vel pituita, vel serosis humoribus refertum corpus jam fuerit; cum habitum cacochymiam, quasi succorum vitium dicas, non plethoram nominant. Ergo plethora tùm sanguinis missione curatur, tùm frequenti balneo, tùm exercitatione, tùm frictione; præterea digerentibus medicamentis, & præter hæc omnia, inedia: de quibus in iis, quæ de sanitate tuenda sunt prodita, dictum abundè est. Succorum vitium purgatione, quæ cuique superanti succo sit accommodata, corrigitur. Quæ etiam Hippocratis sententia fuit, ut fusè explicavi in aphorismis lib. 2. aph. 8. At succorum vitium frequentissimum est in morbis: humorum autem abundantia sine vitio, sive plethora; in qua succi æqualiter inter se, & servata proportionem sunt adaucti, vel non datur, vel est quid rarissimò contingens; ac si contingat, tùm balneo, tùm exercitatione, tùm frictione, tùm digerentibus medicamentis, tùm etiam, præter hæc omnia, inedia diminui; & quantum opus est, moderari potest: igitur ex Galeni sententia vel nunquam, vel perquam rarò convenit sanguinem detrahere; ac si aliquando conveniat, non est adeò necessum, ut

quam-

(a) Gal. in lib. Hipp. de morb. vulg. lib. 6. com. 3. text. 42. 43. & 44. atque idem Gal. com. 3. lib. de humorib. text. 30. 32. & 33.

(b) Gal. meth. med. lib. 13. cap. 6.

quamplurimis aliis remediis id ipsum habere nequeamus, quod sanguinis præstat missio.

Atque hæc eadem in illis ipsis libellis, quos de sanguinis missione ab amicis incitatus composui, pluries à me (a) confirmata sunt. Et quodam in loco istorum librorum, quod alibi etiam dixeram; *at ubi (b) crudi succi exuperant, dixi, antequam morbus invaserit cautè evacuabis: sed ubi iam febris corripuerit, ut antè monui, nequaquam.* Stolidi autem sectatores mei, me etiam adhuc inter vivos agente, febres cunctas in principio venæ sectione indigere (c) putabant; & non mediocri profectò noxa ægrotos afficiebant; *plures enim hac ratione perierant; quàm quibus non fuerat vena secta.* Ex his autem si æquus es, facile conicies, Erasistrate, posteros omnes, qui meo nomine dicti sunt, me etiam Doctore, debuisse existimare, venarum sectionem in febribus esse, ut plurimum perniciosam: nam plures moriuntur ex iis, quibus mittitur, quàm (d) ex iis, quibus non mittitur. Cumque sæpè crudi succi exuperent, & postea febres fiant; ratione febris minùs convenit sanguinem mittere; quàm si febris non accessisset.

Si quid igitur constanter magis à me scriptum unquam est, Erasistrate, id est sanguinem, ubi is vitiosus est, minimè detrahendum. Nam vitium nequaquam missione corrigitur. *Nec (e) obstructio, quæ secundum nonnullos, ex binis generibus morbos omnes comprehendentibus, causa est morborum omnium ad unum genus spectantium, quos clausos appellant; nec putredo (f) curari per sanguinis missionem potest: ut quæ alia remedia desiderent: sicut in libris methodi demonstratum est.*

Non est autem cur te nunc morer, Erasistrate, explicando quid sit putredo, & in quonam consistat; res enim est putredo captu difficillima: Ac licèt multa ego de illa scripserim; si quis tamen sectatorum meorum clarè nunc doceat, quid sit putredo; quod maximè sum averfatus, spondeo me fore illius sectatorem. Illud tamen dubitandum non est, me statuisse febres omnes, hæctica, & paucis aliis exceptis, à putredine fieri: ut, & illud etiam concludere liceat, febres ferè omnes sanguinis missione minimè curari posse; quoniam, nequè putredo, nequè obstructio, quæ febrium ferè omnium causæ sunt, sanguinis detractione curantur.

Ac si dicamus non à putredine fieri morbum quempiam; dicamus etiam in eo humores non esse notabiliter crudos: nequè superexcoctos nimis; sed veluti in medio statu consistere; & item superabundare; eamque plenitudinem premere corpus affirmemus, in qua servata proportionè inter singulos succos, tota earundem simul sumptorum excedat quantitas: non tamen semper mittendum esse sanguinem dijudicavi: siquidem, nisi gravis aliqua urgeat necessitas; atque, ut tu dicere solebas, Erasistrate, nisi tutò nonnullarum horarum lapsus expectari nequeat; multa esse poterunt pro varia morborum

(a) De cur.rat.per sang.miss.cap.9.& 10.& alibi.

(b) De cur.rat.per sang.miss.cap.10.

(c) Gal.de sang.miss.adv.Erasistrateos cap.6.

(d) Loc.supra citato.

(e,f) Gal.lib.11.meth.med.cap.14.d.loco cit.11.meth.cap.14.

borum natura hujus plenitudinis remedia ; balneum , (a) exercitium , & motus , maximè propriis factus viribus ; frictio ; gestatio ; solventia medicamenta ; febris ipsa ; vigilia ; dolor ; abstinencia à cibo , & potu ; & alia multa . Ex his quædam quandoque magis conveniunt ; & rectius administrantur , quàm sanguinis missio .

Præterquàm quòd plerisque in morbis nequaquam id omne , quòd excedit in vasis detrahendum est ; sed reponi (b) sanguinis aliquid ad curationis spatium debebit ; quo minùs intempestivè nutrire necessitate ulla cogamur : ea maximè ratione , quòd non rarò quibusdam in morbis , aut morborum temporibus periculosum est cibum offerre ; ac si offeras , cum is non possit ab ægrotantibus visceribus ritè præparari , sæpè pro meliori sanguine , qui educitur , imperfectiones : & vitiosiores humores in vasa intruduntur . Quæ coincidunt cum iis , quæ tu , Erasistrate , libro de sanguinis rejectione Chrysippum laudibus extollens , contra eos scripsisti , qui in sanguinis rejectione venas secabant ; ut exinanitæ , faciliùs postea reassumerent , quòd extra eas illapsum est . At Chrysippus , scripsisti , Erasistrate , consultius agit , ut qui , non solùm id , quòd instat , præ oculis habeat ; verùm & impendentis periculi curam gerat . Huic enim periculo , quòd ex rejectione est ; periculum inflammationis proximum est , in quo offerre quidem non facile . Ei verò qui post venæ sectionem longo tempore sine cibo permanserit , periculum est ne exolvatur . Potuisses autem alios addere morbos , in quibus similiter grave est offerre cibum maximè pleniorē .

Multa tamen contra hæc à me dicta sunt tempore illiberalis illius controversiæ , quam ego , & Theutras suscepimus : tunc inquam , cum exclamavi ; si nequè apud (c) Hippocratem ; nequè apud Dioclem ; nequè apud Euriphontem ; nequè penitus apud quemquam alium qui ætatem tuam præcesserunt , tale genus auxilii in scriptis reperiretur ; fortè suspicari quis posset te tanquam de eo , cuius usus nondum fuisset inventus , aut apud celebres Medicos approbatus iure optimo verba non fecisse . Verùm enim verò si idcirco de sanguine mittendo nihil scriptum reliquisti , quoniam rarò conveniat eundem mittere ; non inficiabor , quòd tu Medicorum (d) celeberrimus Hippocratem , aliosque celeberrimos fueris imitatus , qui rarò sanguinem detraxerunt . Sed quicquid sit de hoc , doctrinam tuam , atque Chrysippi ego confirmavi verbis illis reponi (e) sanguinis aliquid ad curationis spatium debebit ; quo minùs intempestivè nutrire necessitate ulla cogamur , ut unum omnes , idemque hæc de te sentire videamur .

Credidi tamen , quòd tu etiam fortè reris , Erasistrate , aliquando , etsi sanguis non superabundet , convenire detractionem ; ut cum (f) lapsus ab alto qui sit , aut aliàs plaga aliqua contusas vehementer corporis partes habuerit ,

(a) Gal. meth. med. lib. 13. cap. 6. in l. Hipp. de vict. rat. in morb. acutis com. 4. Text. 19. & alibi .

(b) Erasist. rel. à Gal. l. adv. Erasist. cap. 1. & contra Erasistrateos cap. 7 .

(c) Gal. contra Erasistr. cap. 1 .

(d) Galen. de consuet. cap. 1 .

(e) Gal. meth. med. lib. 11. cap. 14 .

(f) Gal. meth. med. lib. 4. cap. 6 .

rit, *Quamquam idem homo paulo ante sanus fuerat, prorsusque redundantis sanguinis expertus*. Huic eadem casus hora, aut prima, secundave ad summum die, dices Erasistrate, detrahendum esse sanguinem: aliàs postea missio, si non damnosa, videbitur, saltem inutilis. Ego autem nequè his omnibus mittendum existimavi; ac semper excepi pueros, quatuordecim annis minores; & eos, quorum virtus imbecilla est: quos nequè tu semper excipis; dixisti enim sanguinis missionem varias, atque varias excitare posse animi affectiones nunc salutes, nunc perniciosas; quòd si quis ea uti norit, ut illi excitentur affectus, qui salutes sunt, nequè tantum mittatur sanguinis, ut detractio ex se noceat; semper illa convenire poterit.

At si quæras quidnam fuerit hoc, quòd deceperit plerosque sectatorum meorum, ut me crederent sanguinis largissimum profusorem? an isti decipiant alios, cum ipsi non decipiantur?

Ego quidem sic existimo, quòd decipiant, & decipiantur. Complures etiam audio meo nomine vocari Galenicos, qui nunquam viderint meos libros; nequè si viderint intelligere potuissent, quæ ego scripsi: nam si intellexissent; nequè in mea profectò, nequè in ullius alterius jurassent verba magistri.

Fortè fuit, quod istos decepit, id quod dictum est, sive ab Hippocrate, sive ab alio, qui multa addidit libris Hippocratis; *sanguinem detrahes (a) si vehemens videatur*. Quod ego item pluries confirmavi; atque dixi idem penè esse si magnum, aut si vehementem dixeris morbum.

Id tamen, nisi fallor, displicet nonnullis, qui dicere possunt, morbum vehementem minimè consistere posse sinè totius corporis, aut saltem partis alicujus vitium robore: contra verò dari posse morbum magnum cum totius corporis, aut ægotantis saltem particulæ maxima virium imbecillitate, ut est gangrena digiti. Quamobrem observetur, plerasque febres minùs esse vehementes, cum ægotantes sunt morti proximi; ac dolores esse vehementiores, cum sensus organa non sunt nimis, atque nimis læsa; adeò ut ex vehementi, mitior factus dolor non rarò argumentum sit auctæ quidem, non diminutæ morbi magnitudinis. Quo sensu acceptis his vocibus, non omne prodest, quod facit morbum minùs vehementem; nam omne quod frangit vires, & corpus, aut partem aliquam mortificat, semper morbos facit, minùs vehementes quidem, sed non semper minùs lethales: Hæc tamen parerga nunc sunt; Ego enim quantum memini, non semel vehementem pro magno; & magnum morbum pro vehemente accepi, ac præsens apologia ea potissimum continere debet, quæ magis constanter à me scripta sunt circa sanguinis missionem.

Morbus magnus exposcit sanguinis missionem. At prudentis est, fortè inquiunt aliqui sectatores mei, cautè agere, & morbos leviores curare ut magnos. In omnibus igitur morbis convenit sanguinem mittere. Nam si nihil aliud præstemus, tutiores erimus à calumnia; siquidem fieri potest, ut moriatur æger ex morbo; qui videbatur levis: ac si sanguis detractus non est, vulgus obstrepet ob omissum remedium; morbo magno profuturum. Quòd si sanguis missus est, & postea æger moritur; licèt semper turpe sit di-

cere

(a) Hipp. de victus rat. in morb. acutis Gal. com. 4. & passim alibi.

cere non putabam, morbum scilicet esse magnum: attamen si dicamus, morbus quidem non videbatur magnus; sed cautè, & prudenter omnia gesta sunt; & ea omnia ritè, canonicèque sunt administrata, quæ morbo magno convenire videri poterant; conquiescunt illicò homines, irasque deponunt, & gratias habent.

Scitè quidem sic proprio consulunt nomini; haud tamen saluti consulunt ægrotantium. Nam sanguinis missio non est eorum auxiliorum, quæ nocere non possunt; quin sæpè, sive ex se, sive ob suscitatum aliquem affectum, hominem interimit. Nequè in quocunque morbo magno utilis est detractio; multi enumerari possunt morbi tum magni, tum non magni, in quibus sectio venarum est perniciofa. Nequè levis morbus habendus est, ut magnus, & multi, qui magni non erant, medentium manibus (ut (a), qui facere aliquid semper videri velint, quòd sic se maiorem mercedem accepturos sperant) magni, & lethales facti sunt. Si quid tamen temerè audendum, vel faciendum est; id est, ubi morbus fuerit magnus, & omnis alia auxilii spes sublata fuerit.

Idem sectatores mei potuere etiam decipi ab iis verbis. *saluberrimum (b) igitur est in febribus venam incidere non continentibus modo; verum etiam aliis omnibus, quas putrescens humor concitat; ubi præsertim nec ætas, nec vires prohibent. Levata nanque, quæ corpus nostrum regit natura, exoneratoque eo, quo velut sarcina premitur, haud ægrè, quod reliquum est, vincet. Itaque proprii muneris haud oblita, & coquet, quod concoqui est habile; & excernet, quod potest excerni.* Atque audio plerosque verba hæc accipere, tanquam universalissimè pronunciata; ut jurè proinde longè nimis eosdem à recta ratione remotos existimem. Enim verò illo eodem loco, & principio ejusdem capitis, in quo illa continentur, quod alibi pluries feceram, veluti cachinnis notavi, & derisi illos, qui in omnibus febribus sanguinem mittunt; quorum sapientiam his paucis versibus comprehendi dixi; *Qui febricitant, si (c) valentes viribus sint, omnibus sanguinem ab initio mittes: profusosque oleo post tertiam accessionem, vel mulsa cum alica nutries, vel sorbitione. Deinceps verò alternis cibabis diebus, sed cataplasma ex artomelite prius impones; ubi verò alvus adstricta fuerit, clystere hanc duces.* Eos tamen hoc eodem loco maximè increpavi, qui priusquam corpus sit evacuatum, cataplasmatibus, aut perfusionibus præcordia calefaciunt; excalefacta autem viscera, vitiosos humores, & excrementa ad se trahunt, phlegmonemque contrahunt, quod præcavet tempore opportuno missus sanguis; Et toto illo capite de his maximè loquor, quibus aliqua imminet interni visceris inflammatio, sive tumor celerem habens motum; ut tu ajebas, & de his, quibus in una particula putredo consistit, vel facilè in unam particulam deponi potest. Et de his intelligenda sunt verba illa; non verò de iis omnibus, qui putridis febribus laborant. Quod manifestum est ex eo, quod paulo ante præcedenti capite docueram, nequè putredinem, nequè (d) obstructionem sanguinis missione curari posse. Ac rursus voveo, atque spondeo, si quis sectatorum meorum

Tom. I.

T

clare

clarè doceat, quid sit putredo, vel putridus, vel putrescens humor; me fore illius sectatorem.

Sed quid omnia enumerem, quibus sectatores mei decipi potuerunt? Multas quidem fateor ego dedi occasiones, quibus deciperentur: sed ipsi ex se se facile decipiuntur. Quod vivens cognoveram; atque idè inhibendum censui illis, qui meis temporibus venas temerè secabant; ne (a) eas in posterum penitus secarent; ad hoc ut minùs errarent. Illi autem, nequè mea, neque tua servabant praecepta; sed nostris nominibus, pro ut poscebat occasio, fidem sibi quærebant.

Ego autem Glauconi scribens, non inquam, viro consulari; speciosi etenim tituli dignitatum non addunt scientiam homini, sed philosopho doctissimo, & in Platonis doctrina satis instructo, in tertiana, (b) quam nuncupavi exquisitam, non dixi mittendum esse sanguinem. In notha verò tertiana post multa, quòd (c) si sanguinem dixi mittere oporteat, nequè hoc quoque omittendum; sed ab initio statim adhibita earum rerum, quas scis, distinctione, tantum mittendum, quantum præsens exigat status. Non igitur absolutè in hac febris specie mihi visum est mittendum esse sanguinem; sed dari posse casum, in quo conveniat sanguinem mittere. Circa quartanas autem ab initio dixi iplas mediocriter, ac leniter (d) tractare oportet, nullum fortè medicamen, aut evacuationem exhibentes, nisi fortè sanguis vehementer superabundans appareat. Et si, incisa vena, is, qui fluit niger videatur, ac crassus, audaciùs mittendus est: quòd si flavus, aut tenuis apparuerit, statim supprimendus. Nequè igitur in quartana existimavi sanguinis missionem utilem esse, nisi fortè detur casus ex incisa vena nigrum, crassumque effluere sanguinem, qualem ego credidi esse eum, qui quartanas progignit. Quotidianæ verò febris Glauconi tradens ego curandi rationem, nequè verbum quidem unum feci de (e) mittendo sanguine. Cæterum in febribus continuis si accidentibus careant, sanguinem (f) dixi mittere oportet, & ob morbi magnitudinem, & quibus rubor multò plusquam naturæ conveniat; & major quam pro consuetudine totius corporis tumor, & venæ eminentes, atque extensæ. His omnibus est auferendus, nisi vires, aut ætas, aut aliquid eorum, quæ pluries Glauconi commemoraveram prohibuerint. Igitur nequè absolutè in continua febre sanguis mittendus est, nisi fortè multa concurrant.

Verum enim verò si Galeni, re quidem, ac licet non in omnibus, pro majori saltem parte amici tui, Erasistrate, standum est verbis, ac si omnia servantur, quæ ego servanda volui; per quàm rarò profectò venas secabunt Medici.

Inter scopos mittendi sanguinis est ætas (g) vicens, quæ si desit, mittendus non est; etiam si morbus videatur magnus.

Excipe igitur senes, quorum ætas non est vicens, & propter virtutis (h) imbecillitatem non ferunt sanguinis detractionem. At memorabit aliquis.

(a) Galen. advers. Erasistrateos cap. 6.

(b) Gal. lib. 1. ad Glau. cap. 9.

(c, d, e) Gal. lib. 1. ad Glau. capitib. propriis. 9. 10. 11. 12. 13.

(f) Gal. lib. de lib. prop. cap. 4. & cap. 1. lib. 1. ad Glau.

aliquis dari aliquando robustum senem? Non, inquam, impossibile est dari robustum senem; sed erit ille veluti Æthiops albus.

Excipe etiam pueros, quorum nequē vigens est ætas, quivē quanquam (a) vitali facultate valeant, tamen nequē hi sanguinis sustinent missionem: promptē enim eorum substantia, tūm propter humiditatem, tūm propter temperamenti caliditatem evaporatur; detractōne igitur sanguinis non egent, qui connatam habent à temperamento evacuationem. Pueri autem sunt illi saltem omnes, qui quartum decimum annum hætenus non attigerunt: quibus propterea secundū Galeni tui præcepta vena minimē secanda est, etiamsi morbus videatur magnus. Hac eadem ratione vel parcē, vel omninō mittendus non est iis, quorum corpora candida sunt, & carnes habent molles, teneras, & facile diffiabiles, quales (b) Galli sunt. At Gallis his temporibus audio venas maximē exhauriri.

Exhauriantur quidem, quantum volunt; dummodo non dicant ineniti doctrina, qui hoc faciunt.

Tertius scopus mittendi sanguinis (c) est virium robur: undē quocunque morbo laborent, & quamcunque vivant ætatem, iis, quorum virtus est imbecilla, venæ minimē sunt aperiendæ, etiamsi sanguis superabundet: nam (d) melius est virtutem non exolvere, quā sanguinem evacuare redundantem.

His, quæ docuit Hippocrates, & ego commentariis illustravi, ne quid deesset in oratione illa. In acutis autem morbis sanguinem detrahes, si vehemens morbus videatur, vigeatque ægrotantis ætas, & virium adsit robur, adjeci, & eum, (e) qui ab ambiente nos aere desumitur, scopum, cum fuerit, & calidus, & siccus, ita ut citō ab eo corpus evaporetur. Nempe tunc à sanguinis missione abstinemus, etiamsi morbus magnus fuerit, vicensque ætate homo. Quod etiam aliis in locis tūm Hippocrates, tum ego pluries docuimus. Atque memini me sic scripsisse Glauconi. Omnes quibus Medici nihil (f) omninō de temporum statu cogitantes sanguinem abstulerunt, interierunt. Si verō valdē frigida fuerit temporis constitutio, tunc quidem sanguinem mittere est formidandum, cum non ignoremus non parva ex similibus sequi pericula. Interierunt autem nonnulli, qui in calidis admodum constitutionibus non rectē evacuati sunt, ex syncopa vocata, & dissolutione: in frigidis verō cum accessiones incipiunt, nimium refrigerati non ampliū relevantur. Ob hæc igitur, nequē in locis supra modum calidis, aut frigidis sanguinem mittere audemus. His, similibusque referti sunt libri, quos posteris reliqui; hæc atque similia legi poterunt in ipsis libris, quos adversus te, atque tuos, & de curandi ratione per sanguinis missionem conscripsi, ut non sit dubio vertendum me existimasse in regionibus nimium calidis, vel nimium frigidis, & in anni con-

T 2

stitu-

(a) Galen. comm. 4. in lib. Hipp. de vi&rat. in acut. text. 19.

(b) Gal. de cur. rat. per sang. miss. cap. 14.

(c) Gal. in lib. Hipp. de vi&rat. in acutis com. 4. Text. 19. & alibi.

(d,e) Lib. citat. com. 2. text. 10.

(f) Galen. ad Glauclib. 1. cap. 14.

stitutionibus similiter, vel calidis, vel frigidis, non esse homini, bovi, equo, aut mulo venas aperiendas.

Verùm licet in regionibus intemperatis, & in cœli statu nimis calido, vel frigido abstinendum sit à sanguinis missione; miraberis tamen, Erasistrate, me scripsisse, *Omnes, quibus Medici nihil omninò de temporum statu cogitantes sanguinem abstulerunt, interiisse*. Quod nequè tu, nequè ipse Helmontius unquam affirmasset; enim verò nequè omnes pereunt, quos momordit vipera.

Fortè, inquam, quando hæc Glauconi scripsi, ea fuit illius anni cœli constitutio, tempore medio inter canis ortum, & arturi, ut omnes, quibus sanguis fuerit detractus, perierint. Non enim singulis annis, iisdemque mensibus eadem similiter nocent, aut profunt. Hippocrates autem non omninò lethales, sed difficiles dixit sub cane, & ante canem esse purgationes omnes.

Nequè abs re erit alia breviter percurrere, quæ iis frequenter accidunt, qui febre corripuntur, & venarum prohibent sectionem; quorum pariter Glauconem admonitum volui.

In febribus, cum æger aliqua de causa afflictum percipit os ventriculi, vel si etiam humorem aliquem malum evomuerit, & in hujus transitu non parum fuerit offensus; adeò ut graviter se habeat, atque anxie: non quidem hic ad febrem tantum respicere debemus, nequè multitudinem; si illa adest, evacuare tentabimus; nisi prius ori ventriculi fuerit provisum. Ac multos sæpius (a) vidi, qui ita affecti erant, quosdam interiisse, alios ad extremum periculum fuisse perductos, cum Medici eos evacuare tentassent, antequam os ventriculi corroborassent, & de ea maximè evacuatione, quæ fit per sanguinis. sunt hæc intelligenda.

Sed nequè (b) si fuerit febris cum profluvio ventris, alia est opus evacuatione: verum hæc sola sufficit, quamvis non sit pro multitudinis ratione: quicunque enim his plus adimere fore necessarium putantes, aut sanguinem mittere, aut ventrem movere tentaverunt, in graviora pericula duxerunt.

Et distentio (c) item nervorum aliquo pacto secundum mea placita impedit in febribus sanguinis detractionem, ut nihil, aut certè minus, etiam si aliàs conveniat sectio, sit detrahendum.

Ita etiam (d) si vehementissimæ vigiliæ, aut dolor intensus ægrotum infestant, cavendæ sunt subitæ, ac multæ evacuationes. Ac subitæ sunt, quæ secta vena administrantur: & licet parum detrahi possit; attamen exigua quantitas parum lædere, & nihil juvare valet ægrotantem: ut proinde sit saltem inutilis, nisi fortè detur casus, in quo is excitetur animi affectus, qui dolorem demulceat, vel ægrotantem postea consopiat.

In his autem circa dolorem videbor sectatoribus meis alicubi contrarium dixisse; & præcipuè in iis, quæ contra Menodotum Empiricum habui; qui in sola plethorica appellata syndrome sanguinem mittendum asseverabat. Ego autem quandòque, ea non existente, venam secandam esse existimavi: ut cum (e) dolor vehemens hominem statim prebenderit, dixi, vel pars aliqua
fra-

(a, b, c, d) Gal. lib. 1. ad Glauco. cap. 14.

(e) Gal. de vic. rat. in morbis acutis comm. 4. tex. 19.

fracta fuerit; vel os ex loco pulsum sit, vel alius quispianz articulus contractus, reductusque sit. Sententiæ tamen istæ non opponuntur; nam cum dolor vehemens hominem *statim* prehenderit, vel os ex loco pellitur, nisi altera, atque altera, vel etiam plures præterierint dies ab initio morbi, non solet esse corpus exinanitum, & extenuatum, & ex validiori pulsu cordis, sanguinisque uberioris motu dolor incrementum accipere potest; idemque nullo sanguine potest alleviari. Secus verò in doloribus, qui non *statim*prehendunt hominem, quive fiunt in corpore jam aliquo pacto extenuato, cavendæ sunt subitæ, ac multæ evacuationes; ut Glauconem docui.

Cui etiam præter ea, quæ dixi de Regione, & cœli constitutione, si calida, & sicca, sivè frigida nimis, & de observandis ægotantium consuetudinibus; propter quas, ut variæ, atque variæ sunt, varia requiruntur remedia, & ab iisdem, & si morbus videatur similis, alii læduntur, alii juvantur: & quidem evacuationibus assueti, si reliqua consentiant intrepidè evacuari possunt; insolitos verò: *nec si omnia (a) id suaserint*: & præter ea, quæ addidi de ætate ægotantis (non enim quælibet ætas sanguinis missionem, sinè noxa ferre potest, saltem secundum meam sententiam) dixi pariter considerandum esse corporis habitum; Nam qui (b) *densa, & solida carne constant*, his habitus mihi visus est *haudquaquam facilis pati*; quare non oportet vereri ipsos evacuare ex toto, siquidem, & alia id jubent. Sed qui mollem, & humectam, ac diffluentem habent carnem, hi mirum in modum sunt ad patiendum habiles: quare, & si reliqua omnia sanguinem esse minuendum persuadent; non tamen id facere audendum est: sed & aliis evacuationibus, quantum moderatè, & cautè fieri potest utendum est. Eodem modo; & quicunque supra modum crassi sunt, aut macilenti, nam & his venam incidere cavendum est; aliasque evacuationes integras vereri oportet. Hos inquam omnes, nequè semel, nequè ex toto; sed paulatim oportet evacuare, non (c) inquam mittendo sanguinem, sed inediis moderatis, & frictionibus, & clysteribus mollibus, humectationibusque, & cataplasmatibus, & balneis. In aliis libris constanter hæc, atque similia docui; & in libris methodi medendi: Si ille, dixi, cui sanguis mittendus est, quoniam morbus missionem exposcere videatur *triginta (d) annos natus sit*; sed *laxus, & mollis, pinguis, & albus*, ac *gracilibus venis*, huic, aut planè sanguinem non mittes, aut parum detrahes: & omninò quidem non mittes in tempore æstatis, & regione æstuosa, & cœli statu calido, ac sicco; parum detrahes in reliquis tùm anni temporibus, & tùm regione, tùm cœli statu.

Res adèò plena discrimine mihi visa est sanguinis detractio, ut monuerim debere Medicos secunda vena (e) pulsanti arteriæ admoveere digitos; ad hoc ut si videant, quod frequentissimè contingit, dejici pulsus, fluentem cohibeant sanguinem: tanta inquam res non est committenda barbitonsoribus, ut nunc committi audio: meis autem temporibus ipsi Medici chirurgi erant, & venas ipsi secabant, cum secandæ videbantur.

In-

(a,b,c) Gal. i. ad Glauconem. cap. 14.

(d) Gal. meth. med. lib. 11. cap. 14.

(e) Gal. de cur. rat. per sang. miss. cap. 12. & alibi.

Insuper, secta vena, inspiciendum duxi, an is, qui effluit sanguis, casu, vel fortuna aliqua sit is, qui morbum facit; aliàs statim suppressendus est. Qua de re multa cùm possint disputari, maximè post compertum sanguinis motum; quæ hujus loci non sunt; omittendum tamen non est aliquando, vel casu, vel etiam medici solertia venam incidi varicosam, vel varicosæ proximam; è cujus foramine non tam sanguinis, quàm quid aliud restagnans in illo vase educatur, quod morbi alicujus causa sit: ac si sanguis appelletur, meis tamen vocibus si fas est illud nominare, melancholicus dicendus est. Ac quidem si conjectura medicum fefellit, & incisa vena, *tùm (a) fluens sanguis non videatur melancholicus*, qualis in venis varicosis contineri solet, *statim supprimatur*: Quæ consentiunt iis, quæ ad Glauconem, cùm de quartana loquerer, scripsi.

Et venæ quidem, quas ego aperui mulieri jam octo menses purgationis menstruæ suppressione laboranti, quæve extenuatissima erat, varicosæ videbantur; quales circa sedem, & pudendum, & aliquando in tibiis fieri solent iis, quibus menstrua supprimuntur. Quas ego secui, *eminebant venæ sanguinis plenæ, colore lividæ*: scilicet varicosæ erant, restagnanti melancholico sanguine repletæ. *(b) Resciso autem vasculo, liquidæ pici, & colore, & crassitudine similis sanguis emanabat: ob id ipsum sanè multò magis visus fuit largiter esse evacuandus*. Ac tutemet facile affirmabis, Erasistrate, sanguineum illum fuisse aut omninò, aut magna ex parte restagnantem, & quem ego melancholicum appellare solitus fui; ac qualem in hæmorrhoidalibus venis aliquando colligi in superioribus sermonibus nostris tu dixisti.

Enim verò si hujusmodi, non fuisset humor in illis vasis coadunatus, utique non profuisset detractio.

Possem his, quos supra adduxi alios addere, qui pulsum habent arteriarum, in *(c)* magnitudine, & vehementia inæqualem: qualis contingit iis, qui crudis abundant humoribus; & qui pulsum habent similem pulsui Antipatri Medici, quem tradidi in libris de locis affectis. Possem addere alios multos. Sed non est cur te diutiùs morer, Erasistrate; res enim nunc facile ad exactum calculum deduci potest: ut inde cognoscatur, Ego ne, an plerique eorum, qui immeritò Galenici nuncupantur, sanguinem sinè ulla recta ratione profundant ægrotantium. Vide quæso. Erasistrate.

Quinque sunt Mundi plagæ; binæ frigore, geluque semper rigentes; tertia Solis semper exusta calore: in quibus propter intemperatam nimis aeris constitutionem, quantum mihi visum fuit, sanguis mittendus non est.

Remanent aliæ binæ; utraque inter alterum tropicorum, & alterum polarium circulorum comprehensa, quæ licet aliarum respectu temperatæ dicantur; regiones tamen habent, quarum, quæ sunt torridæ Zonæ proximiores fervidum item, & ipsæ aerem habent; quæ verò altiore, quàm reliquæ supra horizontem aspiciunt polum, & ad semper algidas magis accedunt Zonas, frigoribus item ipsæ, nivibusque, geluque infestantur; & in
his

(a) Gal. de locis affectis lib. 3. cap. 7.

(b) Gal. in lib. 6. Hipp. de morb. vulg. com. 3. text. 29.

(c) Galen. de cur. rat. per sang. mis. cap. 4. & lib. 12. meth. cap. 3.

his etiam mihi visum fuit sanguinem non esse detrahendum.

Reliquæ verò Regionēs , quibus maximè sermo noster adaptari debet, propter solis accessum , atque recessum ab uno ad alterum tropicum circa solstitia, calores , aut frigora patiuntur : suntque, qui nonnullorum astrorum aspectus , atque exortus non parum ad hoc contribuere existiment ; ut canis , & caniculæ , ex. gratia, quibuscum quando oritur sol dies esse consuevere calidiores , & sicciores , & circa sanitatem magis periculosos , & his quidem temporibus nequè convenit sanguinem mittere : ut supra dictum est.

At ex iis , qui reliquis temporibus ægrotant , subtrahendi sunt illi , qui ex defectu potius , quàm ex copia humorum nullibi restagnantium malè se habent : quibus nequè convenit detractio , sed vel reficiendi tantùm sunt ; vel reficiendi simul , & alterandi.

Ex iis ægrotantibus , qui supersunt , subtrahendi etiam sunt illi , in quibus superabundant quidem humores nullibi restagnantes , sed vitiosi , & aut nimis crudi , aut nimis superexcocti sunt : in quibus , ut supra dictum est , tùm per ea , quæ docuit Hippocrates , non sanguinis missio , sed pharmacum convenit , excedentem particularem humorem educendi facultatem habens. Et quandòque nequè pharmacum est exhibendum his ; ut fusè explicavi tùm alibi ; tùm meth. lib. 12. cap. 3.

Ex reliquo numero subtrahe numerum eorum ægrotantium , in quorum corporibus *reponi sanguinis aliquid ad curationis spatium debet ; quò minùs intempestivè nutriri necessitate ulla cogamur* : & eorum subtrahe numerum , qui non laborant Magno , sive vehementi morbo : eo sensu , quo verba hæc accipi debent.

Ex reliquo numero , eorum subtrahendus numerus est , qui vigentem ætatem non habent . Subtrahendi sunt pueri , qui decimumquartum annum non attigerunt ; subtrahendi sunt senes : quibus omnibus , ut dixi non convenit sanguinem mittere , etiam si morbus videatur magnus.

His subtraetis , ex iis , qui supersunt , demendus est eorum numerus , qui corpora habent imbecilliora ; virium enim robur requiritur ad missionem ritè celebrandam.

Subtrahe item ex reliquis tertianâ exquisitâ laborantes ; subtrahe tertianâ spuria ; quartanâ ; quotidianâ ; & continuâ laborantes ; quibus nisi multa concurrant , ut Glauconem docui , & supra expositum est , non debet mitti sanguis ; ac si incisa vena non is fluat , qualis opus est , ut educatur sistendus est fluxus.

Subtrahe etiam ex reliquis eos , qui os ventriculi afflictum habent ; & eos , quibus in transitu alicujus substantiæ , quæ vomitu rejecta est , os ventriculi offensum habent.

Et eos etiam subtrahe ex reliquis , qui febres habent cum ventris profluvio aliquo , *quamvis non sit pro multitudinis ratione* , qui omnes sanguinis detractioe *in graviora pericula ducuntur* , Subtrahe eos , qui vigilias , & dolores passi sunt diuturniores ; & eos , qui abstinentiam diu toleraverunt , & eos , qui magnam aliquam evacuationem habuerunt.

Ex reliquis , Erasistrate , subtrahe , qui mollem , & humectam , & diffluentem habent carnem . Deme eos , qui supra modum crassi sunt ; & maci-

macilentes. Subtrahe, Erasistrate, corpora laxa, mollia, pingua, & alba; ac gracilibus venis.

Hos omnes si subtraxeris; pauci profectò supererunt, quibus sanguis mitti debeat: ut illud mea etiam doctrina manifestum fuerit, quod non semel monui, pluries errare, qui frequentius sanguinem mittunt, quàm qui omninò abstinere à sectione venarum.

E I N I S.



I N D E X

Rerum notabilium in Erasistrato.

A

Abscessus est locus determinatus ad de-
positiones. 72
in Thaso. 97
Abstinencia quæ mala progignat. 28
quæ bona. 30
ut præcaveantur mala. 31
Aciditas tumorum causa; imaginata stu-
pefacit dentes. 35
non omnia acida coagulant, ac acido,
& aciditate non explicatur rerum na-
tura. 35
Addendum sæpè sanguini, ut melior sit. 87
adduntur multa, mutata tamen spe-
cie. 9
Aegroti non sanantur sanguinis missione:
ac illi, quibus non mittitur, non sunt
idcirco immortales. 80
Aere sanguis perfici potest. 38
Aeris mutationes. 93
Aer malignus, & pestilens non explica-
tur. 93
æstuosus, & nimis frigidus non ad-
mittit sanguinis missionem. 147
Ætates non admittentes sanguinis missio-
nem. 146
Angina. 33
remedia Galeni. 83. 56
aliquando curari nequit. 87
non sanatur sanguinis missione. 93
Animal finè humoribus non potest vive-
re, nequè diù ægrotat ex abundan-
tia. 86
omnibus animalibus quid analogum
menstruo muliebri movetur in ute-
ro. 69
Animi affectus mutant sanguinem. 15
non sunt finè corporis motu, faciunt,
& curant morbos. 52
excitantur sanguinis missione. 101
deliquium ex non magna sanguinis
missione. 103
Animus res non jувativas facit jувати-
vas. 110
Animi affectiones, sive salutares, sive
noxiae, aut mortiferae, facile quando-
que excitantur. 124
Animi affectiones quædam non ani-
madvertuntur, nequè ab ægrotantibus,
Tom. I.

nequè à medicis. 125
Animus intentus alicui operi juvat, no-
cetve. 118
Animum corrumpentia. 127
Anxietates non semper sedandæ. 30
Apologia Galeni. 127
Aqualitates superabundantes faciunt tu-
mores. 47
Aquarum impuritas non copia sæpè no-
xia est in fluminibus. 85
Aquæ purgandæ, & adaugendæ sæpè
sunt, non diminuendæ. 86
Archeus. 8. 35
pacato, vel indignato sistitur, vel
augetur fluxus sanguinis. 56
Argumentum desumptum à multitudine
testium fallacissimum. 42
Aristotelis varia fortuna. 136
naturæ definitio. 63
Ars movendi animos magna in Socra-
te. 125
volandi difficilis, sed non impossi-
bilis. 135
Artifex nihil novi ponit in natura. 64. 65
Asclepiades damnabat purgantia 20
ajebat plenitudinem non esse conti-
nentem morborum causam. 26
observavit Romæ pleuriticos pejus se
habere à sanguinis missione. 41
Asthma. 106
Astrologi. 60
Aves quæ meliora pariant ova. 69

C.

Calor naturalis. 50
Caloris perceptio plerunque est effe-
ctus, non causa morborum. 33
non est causa inflammationum. 36
Calefaciat nè, an refrigeret sanguinis
missio? 19
Canes abstinencia sanantur à multis mor-
bis. 30
Caro mollis, & cæt. vide corporis habi-
tus. 349
Causæ magis, minusve latè diffusæ sæpè
non differunt. 51
Chrysippus non secabat venas,
ne nutrire cogeretur, in quo imita-
tus aliquo modo à Galeno est. 41. 143

V

Cir-

Circulatio multarum substantiarum in animante.	9
Circumcisio non est Symbolum phlebotomiæ.	40
Cleomenes illudens vanitates Aegyptiorum.	76
Combinatio mala.	57
Concretus in parte affecta potest esse humor, cum reliqui humores in aliis partibus sunt liquidiores, & rarefacti.	39
Coagulationes in parte determinata.	72. 73
Cogitatio movet uterum.	70
Corporis qui habitus non exposcat sanguinis missionem.	149
Cornu cervi spiritus in febre cum delirio.	116
Crisis prohibetur, vel retardatur sanguinis missione.	37. 38. 99
quandoque impedienda, vel retardanda.	38
per sanguinis eruptionem.	72. 97
cui non æquivalet venæ sectio.	73. 89. 93.
Crudior sanguis non exposcit sanguinis missionem.	18. 29. 140
Cucurbitulæ scarificatæ.	55
applicatæ hypochocondriis, non choibent fluxum sanguinis.	55

D.

D ecedunt, & adduntur semper multa animanti, mutata tamen specie, atque forma.	9
Deceptiones hominum circa res graves.	42
Deliquium animi.	102. 103
Delirium.	114. 115
Densitas cutis.	30
Destillatione eliciuntur multa, quæ prius non inerant rebus.	16
Diatritarii.	30
Diocles de vi rerum cognoscenda.	11
Disruptio vasorum.	32
Dissipatur semper aliquid in animante.	6
Divites causa malorum.	100. 128.
Dolor, sæpè est effectus non causa morbi.	33
est animi affectus quidam.	34
deliniendus quidem aliquandò, aliquando verò non.	39
Dolor factus remittit sanguinis missione, non tamen à sanguine illo excitabatur.	120
quando exposcat sanguinis missionem.	143

E.

E rasistratus diligens, ac curiosus non meminit sanguinis missionem.	3
Señatorum ejusdem inanes rationes.	5
facultatis nomen rejiciebat.	8
cujus doctrina floruit Romæ.	41
multa scripsit, quæ perierunt.	139
non appellebat humores calidos, aut frigidos.	97
secabat corpora vivorum.	75
fuit nepos Aristotelis.	63
falso accusatus à Galeno, & Teutra.	77. 78
clarus probitate morum, & doctrina.	139
Erysipelas.	257
Evacuatione semper indigent animalia.	5
varia sunt, quæ evacuantur, etiam pro vario exercitii genere.	6
quæ evacuationes aliquandò tentandæ sunt.	74
Eventus, & experimenta sæpè narrata sunt, quibus vanitatibus, & falsis disciplinis videri possit adhibenda fides.	43
Experimenta quædam sæpè narrantur, quæ in dubium revocari debent.	43

F.

F acultates appellabat Galenus incognitas rerum causas.	8
Febris cum humorum cruditate non admittit sanguinis missionem.	42
Febris natura.	7. 9
non est primarius effectus.	7
sanat plerosque morbos	92
in statu sive totius morbi, sive paroxysmi non admittit sanguinis missionem.	32
malignæ.	93
cum delirio.	114
ephemera.	116
tertiana.	117
febrilem paroxysmum inhibent multa facta ante paroxysmum.	117
synochus.	120
quibus in febribus vena secundum Gale. incidenda sit.	145
tertiana.	146
quartana.	146
continua.	146
Fides.	146
Fides, & confidentia.	137
Figuræ minimè fieri possunt.	64
infinite sunt in corpore quovis.	64
Fluento rapidiori facilius aufertur, quod alicubi impactum hæret.	5
Flumina purgari debent non averti addendæ sunt semper ipsis novæ, & purio-	45

- puriores aquæ , ut minora inferant
damna. 95
- Fluxus sanguinis è naribus , & hæmor-
rhoidibus non curatur sanguinis mis-
sione. 107
- concitatur spafmo fibrarum. 108
- Fortuna , & casu , quæ fieri dicuntur. 55
- dum sanguis mittitur boni , vel ma-
li aliquid fit. 64
- Frigido cœli statu , & in frigida tempera-
tura , non convenit sanguinem mit-
tere. 18
- Frigiditas à misso sanguine. 104
- G.
- G**alenus mittebat sanguinem cum
parum recederet à naturali statu. 17
- duplicem ponebat plenitudinem. 17
- neminem servavit eorum , qui pul-
monum ulcere laborassent , aut diu-
tius sanguinem expuissent. 81. 82.
- decipiebat , & decipiebatur. 92
- erat medicus. 100
- Galenii principii non magis inexplicabi-
lis est pestis natura , quàm scabiei. 96
- Galenii Apologia. 127
- Galenus , quam occasionem habuit scri-
bendi contra Erasistratum. 131
- librum conscripsit de cur. rat. per san-
guinis missionem non ex sua volun-
tate. 132
- difficultates multas posuit in mitten-
do sanguine. 133
- Galenii laudes. 138
- quidam ejus sectatores , quibus ver-
bis decipiantur. 144
- Glandularum ductus cogniti antiquio-
ribus. 7
- Glauco vir consularis , & phylosophus.
146.
- H.
- H**æmorrhagia sistitur sanguinis fu-
mo. 122
- Hæmorrhoidalium venarum fluxus ut
fiat. 70. 108
- ut juvet. 71. 72
- eo retento fieri possunt morbi. 72
- præstat aliquando diutius fluere hæ-
morrhoidas. 71
- non tantum sanguis fluit ab hæmor-
rhoidibus. 71
- Hæmorrhoidali fluxu non æquivalet san-
guinis missio. 71
- nequè idem curatur sanguinis mis-
sione. 107
- Helmen. febris essentia. 8
- inflammationum causæ. 35
- Hepar non sanatur sectione salvatellæ.
55
- Higmore sententia circa affectiones hy-
stericas. 74
- Hippocrates varii , & ejusdem non sunt
ea , quæ dicuntur Hippocratis. 3. 11
- quando mittebat sanguinem. 17
- secabat salvatellas affecto liene , vel
hepate. 55. 56.
- raro secebat venas. 41
- vinum præbebat in quibuscumque
inflammationibus. 56. 57
- Historia puellæ Chienfis. 77
- Mulierculæ romanæ. 78
- Alterius mulieris sanguinem expuen-
tis. 83
- Aliorum Hæmoptoicorum. 111
- Critonis. 83
- Alterius anginosæ. 84
- Anaxionis. 92
- Aliorum pleuriticorum. 92. 108
- Capite , & latere dolentis. 120
- Peripneumoniæ. 111
- Asthmaticorum. 106
- Palestritæ , & alterius febricitan-
tis. 103. 121
- Febris cum delirio. 114
- Febris ex vini potu. 116
- Ex immodico exercitio , & insolatio-
ne. 117
- Tertianæ. 117
- Synochi. 120
- Capitis torpore , & somnolentia labo-
rantis. 121
- Variolis laborantiam. 122
- Puerperarum. 123
- Mulieris febrientis hæmorrhagia sa-
natæ. 138
- Medici cui caput dolebat. 89
- Samniorum Galeni. 90
- Ophthalmia laborantis. 90
- Homo credulus in dubiis propensior
est ad faciendum , quàm ad non facien-
dum. 4
- facile decipitur. 42. 75. 76
- decipiendus non raro est. 137
- sæpè timet , aut sperat ab iis , quæ
omniò vana sunt. 76
- plures habet naturas. 61
- Humores crudi , aut aliter vitiosi non
exposcunt sanguinis missionem. 48
- Hystericæ affectiones non sanantur san-
guinis missione , quin non raro sunt
graviores. 74
- Hydropicorum aquæ non sunt assatim
evacuandæ. 31
- I.
- J**apponenses non secant venas. 51
- Ignis in corde , vel ejus analogum non
roboratur , nequè fulcitatur sanguinis
missione. 23

Imaginata aciditas stupefacit dentes. <i>Vide animi affectiones.</i>	
Incantationes.	104. 110. 114.
Inflammatiō.	7
quid sit.	33
causæ ejusdem <i>eodem loco, & sequentibus</i>	
excitari potest à re molis exiguæ.	35
item <i>fol.</i>	43
mutationes in inflammatione, quæ sint.	34. 35
plenitudinem dicit in parte affecta.	35
plerarumque remedia inflammatorum.	45. 56
quando admittat sanguinis missionem quidve exposcat.	39
ab aquositatibus.	47
Inquietitudines quandoque sedandæ non sunt.	30
Insensibilis transpiratio sufficit ad humores diminuendos.	31
Intemperantia causa multorum malorum.	57
Judicium difficile.	111

L

L Entor sanguinis.	50. 51
L Ligaturæ.	79
in sanguinis sputo.	112
Loci salubritas ab extorum inspectio- ne.	43

M

M Arinus anatomicus cognovit ductus proprios glandularum.	7
Medicamentorum, aliarumque rerum vires omnes non possunt dignosci ab odore, sapore, similibusque.	11
Medici numquam secantes, semper secantes venas Galeni tempore.	4. 31
Clariore raro, vel numquam secantur.	40
veluti vates, & conjectores, & augures sæpè contraria affirmant.	42
Clariore sunt si populo obsequantur.	4
eorum judicia de sanguinis bonitate, aut malitia plerumque vana.	11
imitatores naturæ.	63
quomodo illa debeant imitari.	69. 67
sæpè excusandi si non sanent à morbo.	87
Medicorum mores Galeni tempore.	131
Medici sibi consulentes.	144
Mens hominis an possit aliquid absque corporis concursu.	61
res non jувativas facit jувativas.	110
Menstrua pargatio ut fiat.	68
deficiente nihil prodest sanguinem	

mittere.	69
non est omnibus similis, & quare.	70
quibusdam fit etiam dum utero gerunt, & quare.	70
Mercurius ad luem Veneream, & ad scabiem.	105
Modi varii videntur facere corporum varias naturas.	62
Mollia Corpora non ferunt sanguinis missionem.	18
Morbus est natura.	62
qui fit à copia sanguinis sanatur sponte naturæ.	28
à Causa universali, sæpè non differt ab eo, qui fit à particulari.	95
non est qui, nullo sanguine certò curetur.	43. 284. 105
in morbis non quantus, sed qualis sit sanguis videndum est.	88
Morbus sæpè non admittit Medicinam.	88
Morbus <i>Magnus, & vehemens</i> an idem.	144
minus vehemens quandoque periculosior.	<i>ibidem</i>
Mores hominum Galeni tempore.	130
Mors, & vita natura sunt.	63
Mortui multi sanguinis missione; nullus ob omisam sanguinis missionem.	76
Mulieri menstrua moventur propter ea, quæ præparatur in utero.	68
non à copia sanguinis, quæ sit in toto corpore.	69
Mulercula Romana quam refert Galenus non est mortua ab omisam sanguinis missionem.	76

N

N Aturæ variæ definitiones.	53. 59. 60
Universi.	63
Aristotelis definitio.	63. 66
Naturam cum dicant quidam, veluti Demonem intelligant.	60
Natura omnia comprehendit, & præter naturam nihil est.	60. 63
omnia fiunt.	67
Natura corporum videtur diversa propter varios morbos.	63
Natura rei, est ipsamet res.	60
Naturarum concursu vario, varia fiunt, vel salutaria, vel perniciofa.	63
Natura ignis non est ascendere, lapidis non est descendere.	66
Naturæ imitator medicus, & quivis alius.	64
Naturam singularis rei difficulter imitari possumus.	68
Natura non debet perturbari.	98
an semper <i>vidi fol.</i>	63. 68
Nervorum dissentio.	143
Norma, qua possit dignosci an juvet sanguinis missio.	75

O

- O**bftructio, aut densitas cutis numquam tanta est, quin multum dissipetur. 30
in inflammationibus. 33
Occasiones, quibus animi affectus exci-
tantur. 124 125
Ophthalmia. 56. 57. 87
Opinio juvat, & nocet. Vide *animi affe-
ctus varis*.
Os ventriculi affectum prohibet sangui-
nis miss. 148

P

- P**aronychia, & alia levis inflammatio non sanatur sanguinis missione. 45
non differt à pleuritide nisi ratione loci. 43
Parotides non fiunt à plenitudine vaso-
rum sanguiferorum. 83
Pars affecta locus est ad crism suscipien-
dam determinatus. 38
Paulina decepta ab (isidis) Sacerdoti-
bus. 137
Peccatum nihil ponit in natura. 61
Pectoris morbi nonnulli curatu diffici-
les. 81. 82
Peripneumonia. 34. 50. 93
vesicantibus sanata. 111
Perceptiones molestæ sunt animi affectus,
qui non fiunt sine aliqua in corporis
organismutatione. 34
Pestilens, & malignum quid dicatur Ga-
leno. 94. 96
Plenitudo. 17
malè comparatur viribus. 19. 33
nisi immineat disrutionis periculum,
non exposcit sanguinis missio-
nem. 24
quò ad vasa, quibus contingere pos-
sit. 25
post unam, vel alteram diem a morbi
princ. pio non datur. 25
nemo perit plenitudine vasorum, in
quibus nihil restagnat. 34
Plenitudo partis affectæ in tumoribus. 35
Plenitudinis remedia. 142
non tollitur sectione venæ, etiam si
proximæ. 39
Populi facile admittunt superstitiones, &
vanitates. 43
Præcipitationes in sanguine. 72. 73
Principes sunt malorum causæ. 128
Principia Medica nonnullorum compa-
rantur, & iisdem urgentur difficulta-
tibus. 16
an iisdem positis conveniat sanguinem
mittere *ibidem*, & 47
Depressa cum sunt non est sanguis mit-

tendus.

19

quantum timenda eorundem exalta-
tio. 51Profluvium ventris prohibet sanguinem
mittere. 148

Puellæ Chienfis historia. 77

Pueris Galenus non secabat venas. 147

similibus rationibus nequè aliis sunt
secandæ. 145Putredo, & utrescens humor sunt voce s
quarum adhuc non patet significa-
tio. 113

Difficulter explicantur. 42

Q

Qualis sit humor in vasis videndum est
non quantus. 85

Quartana. 105

an exposcant sanguinis missionem. 146

R

Rapidiori fluento sæpè facilius libe-
ratur pars affecta. 45

Rarefactio repentina sanguinis. 24

in parte determinata Corporis. 72. 73

Rationibus iisdem quibus aliquando san-
guis mittendus non est, unquam mit-
tendus. 94Refrigerat potius, quàm Calefaciet san-
guinis missio. 19

Reges malorum omnium causa. 128

Romanorum providentias circa divina-
torias. 129Romani caruerunt Medicis, sed non Me-
dicina. 129Romæ pleuriticos pejus habere à sangui-
nis missione observavit Asclepiades. 41Regiones, quæ non admittunt sangui-
nis detractionem. 147. 150.

S

Salivales ductus cogniti antiquiori-
bus. 8Salvatellæ adapertio juvat illis, qui fi-
dem habent in hac sectione. 110Sanguis constat, ex partibus heteroge-
niis. 16

non circumducitur gravitate. 86

Sanguini aliquid permiscetur in Cor-
de. 33

arterialis differt à venali. 23

Dum animal sine se habet non est
semper sibi similis in vasis. 10

videtur tamen similis. 10

potest in vasis esse vitiosus. 12

ulteriori elaboratione in vasis lique-
scit magis, & fit fluxibilior. 52

San-

- Sanguis comparatus lignis viridibus, aut
siccis. 23
incrementum, vel decrementum ejus-
dem non ponit necessario vires majores, vel minores. 21
non est accipiendus ut pondus extrinsecum. 20
inter ea numerandus, in quibus vires consistunt. 20. 22
ad vitam conservandam est magis necessarius, quam brachia, & crura. 21
Sanguis glutinosus. 50
detractus à pleuriticis, pellicula ablicante obducitur. 45
Sanguis an possit superabundare in vasis. 17
Sanguis sæpissimè additionibus perficitur. 86
perficiendus, non diminuendus. 37
Sanguis utilior pure & aquis, hydropicorum, quæ sæpè non sunt confertim evacuandæ. 31
Sanguis ab hæmorrhoidalibus fluens. 70
ab utero. 68
spontè ab aliis partibus. 74. 97
Sanguinis motus, atque via describitur. 52
Sanguinem non misisse, non fuit causa mortis. 76
Sanguis, qui mittitur secta vena semper habet plus utilis, quam inutilis substantiæ. 86
Sanguinem detrahere, non solum, an non noceat, sed an profuturum sit, videndum est. 5
Sanguinis detractione nihil aliud necessario fit, nisi quod reliquum sanguis minus est. 10. 13. 15
Sanguinis detractione an vomitus excitari, sudor, urina provocari, & alvus sollicitari possit. 102
Sanguinis missio, vel retardat, vel impedit crifim. 37
retardat variolorum eruptionem. 122
nisi adfit virium superabundantia semper nocet. 45. 50
Sanguinis missio occasionem præbet animi affectionibus, & potest ex se nocere. 1. 25
nullus peculiaris affectus, sed omnes eadem excitari possunt. 101. 125
Sanguinis missione non reassumitur facillimè in vasis id, quod alicubi impa-
ctum morbum facit. 45. 55
non detrahitur aliquid a parte affecta. 52. 54
Sanguinis missione propriè, nequè sistitur, nequè exacerbatur sputum, aut fluxus alius sanguinis. 70
eademque torquentur miserè ægrotantes febribus intermittentibus. 116
non aperiuntur venæ uteri. 78
non detrahitur vitiosum potius, quam utile. 86
Sanguinis missio nullius morbi est remedium certum. 41. 104. 116. 123
in ea nunquam satis fidendum. 195
non prodest cum quædam præcipitantur, aut coagulantur in parte corporis determinata. 73
an unquam sit necessaria. 96
in morbis convulsivis. 119
fortuna, & casu aliquid præstat boni. 56
juvat aliquando, vel nocet veluti signum pentagoni. 33. 104
Sanguinis missione liberaliori tres vidit mortuos solus Galenus. 124
damna liberalioris sanguinis missionis. 104
Sanguinis missio an possit semper prodesse, & quomodo. 124. 125
an conveniat in quacumque sanguinis abundantia. 28
minus convenit cum morbus est in parte aliqua determinata. 36
Sanguinis rectè mittendi difficultates, quas posuit Galenus. 133. 134
Sanguinis missio post potum largiorem liquoris vinosi. 28
facit leipothymias. 29
non convenit in tempestate frigida, aut calida nimis, in cruditate humorum, stomacho malè affecto, ut nequè corporibus mollibus, & humidis. 19
Sanguinem detrahere, & cibos offerre sæpè idem est, ac meliores liquores educere, & peiores intrudere. 30
Sanguis quando mittendus. 27. 105. 124
Secundum Thomam Willis. 12. 44. 46
quando secundum Galenum. 139. 140. 143
dum mittitur pulsus arteriarum sunt observandi. 59
Sanguine crudo, & notabiliter vitioso non est secanda vena secundum Galenum. 17. 140
nequè quævis abundantia optimi sanguinis venæ sectione diminuenda est. 141. 142
Scopi mittendi sanguinis. 146
Secatores. 132. 136
Senioribus venæ minimè secandæ. 147
Somnia Galeni. 55
haud iniquè accepta. 96
Ægrotantium aliquando possunt denotare. 91
Spasmus dolorificus sine copia humorum. 76
Spiritus non sunt omninò separati à partibus crassioribus. 16
Sputum sanguinis exacerbatum venæ sectione-

atione . 56.112
 Superstitiones passim admiffæ . 42
 an possint juvare , & quomodo . 110.
 76
 circa somnia , vide *Vanitates* .

T

Terræ atomi in animali præcipitantur
 ab humoribus in una potius corpo-
 ris parte , quàm in alia . 73
 Tertianæ exquisita , & notha an exposcat
 sanguinis missionem . 148
 Theriaca ex vino ad viperæ morsum . 108
 Theutras Galeni Commilitio . 79.80.83.84
 Timor facit spasmus cynicum . 68
 Tumor in quo mutationes sunt celeres .
 34.35
 plenitudinem dicit partis affectat tan-
 tum . 35
 sæpè est pars determinata ad exci-
 piendum inutiliores partes sangui-
 nis . 37.72
 fieri potest deficientibus , quàm abun-
 dantibus humoribus in toto corpo-
 re . 85
 sæpè tumores non admittant mede-
 lam , non sanantur missione sangui-
 nis . 91
 Tumores in thaso . 91

V

Vanitates passim admiffæ . 119.42.75
 an possint juvare . 110.105
 aliquando inhibent paroxysmum fe-
 brile . 119
 Variolis laborantium historiæ . 122
 sanguinis missio . 94
 Vasa in animante multas pati possunt
 repletiones , & inanitiones sine incom-
 modo . 25

possunt de repente intumescere , &
 disrumpi . 36
 inanita non reassumunt faciliè id, quod
 extra ipsa alicubi hæret . 55.54
 Vasa disruptio in parte determina-
 ta . 28
 Vasa turgidiuscula conferunt viribus . 22
 Venæ, quæ secari solent in pleuritide , &
 peripneumonia . 52
 salvatellæ sectio juvat illis , qui cre-
 dunt in illa . 110
 Ventriculi vires dependent ab humori-
 bus in ventriculum confluentibus . 20
 Vesicantia . 111
 Veteres ex iis quæ cognoverunt , facile
 potuissent deducere sanguinis mo-
 tum . 7
 cognoverunt ductus proprios Glandu-
 larum .
 Vires animalis in quibus consistant . 227
 suntque hæc in quibus consistant, velu-
 ti in circulo dispositæ . 22
 inter hæc , & sanguis . 30.31
 an detur virium superabundantia ,
 quam exposcat sanguinis missio-
 nem . 45.46.50
 virium robur in sanguinis missione .
 93
 Ulcus pars determinata ad excipiendas
 inutiliores sanguinis particulas . 72
 Universi natura est ipsum universum . 63
 Voces quædam sæpè usarantur nihil si-
 gnificantes . 94
 Vota sunt ponderanda Medicorum . 42
 Urina contentis saturata . 97.121
 Anaxionis . 92
 Uterus non purgatur venæ sectione . 55
 Willis in re anatomica celeberrimas . 104
 circa hystericas affectionis senten-
 tia . 74
 ejus Mors . 103

LUCAE ANTONII
PORTII
OPUSCULA,
Et Fragmenta varia.

D E

T U M O R I B U S

P R Æ T E R N A T U R A M.

I.



ULTÆ conspiciuntur in corporibus bene valentibus eminentiæ, tumoresque, ut mammarum, & musculorum contractorum, præcipuè dum in opere sunt, qui cum nullam afferant molestiam, neque corpus turpe faciant, sed potius utilem aliquem præstent usum; secundum naturam appellantur. At si hujusmodi non sint; medicinam expolcunt, qua auferantur.

I I.

AT, exceptis Philosophis (*a*) quibusdam, vel vulgaribus, etiam manifestum ex Physicis est, nihil in tumorem attolli, vel utcunque crescere posse, nisi additione, vel additionibus, nihil detumescere, vel decrescere posse, nisi detractiōe, vel detractiōibus. Quoniam autem sæpe sæpius in tumoribus præter naturam moles potissimum aucta consideratur; patet etiam iis omnibus, quæ corpora sunt, & corpora dici debent, (*b*) quæcunque illa fuerint partium quarumque, molem majorem fieri posse, & omni eo quod corpus est tumores præter naturam posse generari.

I I I.

Cæterum de tumoribus præter naturam in corporibus animalium sermo cum sit institutus; necessum est ea omnia supponere, quæ in corporibus animalium dissectionibus, diligentique contemplatione reperiri, & observari consuevere.

X 2

Præ

(*a*) Sunt Philosophi, qui dicant saltem rarefactionibus, & condensationibus multa crescere, aut decrescere sinè ullius substantiæ additione, vel detractiōe.

(*b*) Confirm. hæc, iis, quæ Gal., aliique tradidere vix esse aliquid, cui non sit aliquando simile in abscessibus repertum, terrarum species variæ, lapides, tophique, melli, pulti, aliisque similia multa. Sed nos neque solidi, neque liquidi quicquam excludimus, non ipsum tenuissimum æthera.

PRæ cœteris autem constat, multa continuò, & manifestò per datas vias fluere, quas arterias, atque variorum generum venas appellamus. Sed præter manifestos liquores, manifestasque fluxus, aut etiam saltem nonnullarum substantiarum refluxus vias; multis argumentis jam satis edocti multos alios liquores, multasque fluxus, aut etiam refluxus (a) vias omnem sensum, visusque aciem effugientes, omnino concedere debemus. De quibus omnibus ex principiis philosophiæ, & ex organicis etiam in animalium corpore observationibus constat, multa sæpe numero, quæ fluere deberent, non fluere, aut minus fluere, aut per alias, quàm conveniat vias fluere: item & ductus nonnunquam obstructos omnino, vel constrictos omnino, vel quacunque de causa angustiores, & minus patentes esse; nonnunquam verò, vel secundum omnem longitudinem, vel alicubi ampliores, laxiores, & ad accipiendum, vel ad dimittendum aptiores esse; vel etiam disruptos, & ea non retinentes, quæ per ipsos fluere nata sunt; vel alio nomine hæc omnia vitiosa sunt, & minus apta ad bonam vitam conservandam, prorogandamque.

V.

Antiquioribus hæc magna parte cognita fuisse pronunciamus. Enim vero Galenus, qui nihil volens, & ex industria perperam antiquorum tradidit, clarè retulit multorum sententia fluxu & clauso morbos omnes contineri: & methodicorum appellat hæresim opinionem, quam multi defendebant, inflammationes omnes, & tumores alios omnes passiones esse adstrictas, & in adstricto, sive clauso consistere. Qui lib. 2. ad Glauc. cap. 2. methodicis opponit dogmaticos, & empiricos; inflammationes plerasque, qui affirmabant, in fluxu potissimum consistere, & rheumate, hoc est fluxione, sive rheumatica dispositione aliqua concitari.

V I.

Verùm Galenus dogmaticis, & empiricis hac in re favens, nunquam mechanicam docuit rationem, qua fluxionibus tumor aliquis fieret. Ac quidem in rheumate ex. grat. ad nares, vel ad fauces semper dubitandum an in aliis partibus pororum, & viarum facta aliqua obstructio sit; & quia per has minùs fluat, majori copia aliquid fluat ad fauces, vel ad alias partes? Insuper fluat aliquid, influatque in partem quantumlibet; nisi prius demonstretur effluxum, aut etiam refluxum humorum à parte minorem esse influxu; nunquam constabit influxu partem illam in tumorem attolli debere. Sed mea quidem sententia nisi pro fluxu, sive pro fluxione motus intelligatur, ad quem possint referri mutationes omnes possibiles in corporibus, pro clauso verò, sive adstricto quies intelligatur, & cessatio, aut saltem motus diminutio; non omnia, quæ in tumoribus contingunt illis vocibus explicari, aut intelligi possunt. Ut si alicubi vena ampliatur, & varix fiat, reliqua autem omnia se habeant, ut priùs; cum tantum influat, quantum effluat, refluatque à varice sic accepta, in rheumate ne aliquo, an in clauso tumorem illum consistere dicemus? Neutrum mihi idoneum videtur ad rem omnem rectè explicandam. Scio autem adstrictione aliqua, & impe-

(a) Nam etiam per ossa fluit aliquid, refluitque.

impedimento in latere, vel cavitare venæ, quod malum clausum dicerent methodici, ad ejusdem ampliacionem dari nonnunquam occasionem: ac proinde sæpè sæpiùs dicendum putem methodicorum constare rationem.

V I I.

Consultò autem multa omittens hinc inde disputabilia, tumorum inquam varias dari species varietate eorum, quæ fluunt, & varietate eorum, quæ in canalibus per quos fluxus fiunt considerari possunt; nec non varietate eorum, quæ in illis, quæ fluunt, & in viis, per quas fluxus fiunt utcunque contingere possunt.

V I I I.

Galenus quatuor posuit humorum species in corporibus animalium; & quatuor ex illis fieri dixit tumorum varias, atque primarias species: ex sanguine scilicet; ex bile utraque, ut dicere solitus est; & ex pituita. At si rerum tantùm materialitas consideranda sit; superfluum fuit dixisse quatuor esse humores, ex quibus tumores fiant: ac satis fuisset asserere ab omni eo, quod corpus est, partem quamcunque intumescere posse. Si verò præter corpulentiam, & materialitatem, modi insuper in infinitum variabiles considerandi sint in corporibus; non fuit satis dixisse humores esse quatuor, & quatuor proinde esse tumorum varias species. Quod neque posset defendi, etiam si concederemus in toto Orbe quatuor tantum esse liquidarum substantiarum species: nam ne dum humore, sive liquido corpore; sed corpore quovis solido tumor potest consistere: ut inflatis aere buccis, vel quovis alio corpore, sive fluido, sive solido, repleto, distentoque ore, necessum est genarum apparere tumorem aliquem. Ac tam multa vidi in tumoribus, & tam multa referuntur in abscessibus, etiam ab ipso Galeno observari solita, lapides, terra, limus, fœx, melli, ceræ, vino, aliisque similes substantiæ; ut stultum existimem omnia ad quatuor illos humores conari referre. Præterea Galenus tumorum non rarò meminit flatulentorum; & pro flatu sæpè sæpiùs idem intelligit, ac pro aere, & pro spiritu: aeris autem mihi non videntur pauciores differentiæ, ac humorum, & liquidorum in terra variæ sint species.

I X.

Ceterum ad sermonis hujus auditionem prophanos non admitto, quorum eos maximè arceo, qui ut aliquid videantur, cum secundum Galeni optimas regulas, quibus doctos viros contornatos voluit, minimè omnium sint instituti, Galenici, vel ab alio multò levioris doctrinæ dicuntur, quos non semel audaciæ dispudere deberet. Verùm enim verò cum stultos agere profiteantur audaces sunt, & impudentes: quoniam sic apud stultos præstant. De Galeno autem hoc ferre soleo iudicium; ejus industria nos habere fere omnia, quæ ab antiquioribus de re medica cognita fuerunt, quorum maxima pars periisset, & ejus voluminibus bibliothecam continere, omnigena eruditione refertam, in qua tamen multa sunt inania prorsus, & inutilia, & si non pauca etiam sint omni planè dignissima laude.

X.

Sed revertar ad rem, de qua nunc ago. Satiùs mihi videtur eorum, quæ fluunt in corporibus animalium, differentiam indicare per valorum, perque aliarum viarum differentiam. Quod discrimine fluidorum minùs mihi

mihi videor opus habere aliquid admittere eorum, quæ adhuc non constant; & re vera, ut plurimum satis est differentia vasorum ad humorum differentiam aliquam notatu dignam indicandam: ut si multis indicibus sanguis, qui fluit per arterias similis videatur sanguini fluenti per venas; satis sit differentia arteriarum, & venarum ad suspicionem saltem aliquam nobis indicandam differentiae utriusque sanguinis: quo indicio, re melius examinata, non parum differre arteriosum à venoso sanguine comperiemus.

X I.

Possibile autem est fluentem per arteriam aliquam sanguinem nihil omnino differre à sanguine, qui per sociam fluat venam; vel quia quandoque nihil interim in transitu diffletur, nihil percoletur, & nihil secernatur, dum ex arteria in sociam venam transit sanguis, vel propter aliam causam, quæ semper, aut fere semper morbosa mihi videtur. Attamen quicquid illud est, quod fluit, vel fluere debet, modo differant vasa, differant viæ, satis hoc est ad tumorem ex vitioso fluxu, sive cessante, sive diminuto, vel alio, differentiam aliquam faciendam. Neque enim exigui momenti est ad istam, vel alias in aliis morbis differentias faciendas magis artificiosam esse arteriarum, quam venarum constructionem, & arteriarum multò minus ampliabiles esse tunicas, & motum fluentis sanguinis necessariò multò velociorem esse per arterias, quam per venas; & ex amplioribus arteriis in angustiores motum esse fluentis sanguinis; cum contra in venis ex minimis, & ex occultis planè, & sensum sæpe sæpiùs effugientibus viis in ampliores sanguis fluat venas. Neque etiam minimi momenti est, pulsare arterias ad cordis motum; & omnes simul cordis motu, multò sanè diversa ratione concuti, & palpitare; quam venis, & aliis partibus ex illo eodem motu accidat. Necessum autem est ex una eademque causa haud similia fieri in iis, quæ similia non sunt: ut si sanguis per arteriam, aut per sociam venam, ex simili causa non fluat; novo semper urgente sanguine haud profectò similiter omnino tumores fieri debeant.

X I I.

In impedito autem sanguinis fluxu, sive per arteriam, sive per sociam venam illud commune accidit, nisi fortè exiguum nimis malum fuerit, insolenter arteriæ, sive arteriolarum in illa corporis parte percipi pulsationes: ac etiam si non ipsa arteria, sed socia vena obstructa sit, cum non effluat liberè id quod in membrum influit, necessariò sanguis redundare debebit in arteria, ac novi sanguinis impulsu, cum exiguum nimis malum non est vi illata fibris, & irritatione, quæ perceptibilis non erat in sano statu, insolenter perceptibilis fit arteriæ pulsatio. Ac cum Galeno *quodam modo* membri febrem dicere possumus affectionem istam, (a) quam præcedere, & comitari solent aliæ molestæ sensationes tendi, contundique caloris aut frigoris majoris minorisve, & vicissim nunc caloris, nunc frigoris sensationes; hinc motus cordis irritatio, & febris universalis. Color insuper mutatur; qui in mali vigore multò rubicundior apparere solet, & gravius aliquid indicatur si in livorem, vel in nigredinem convertatur. Quorum maxi-

(a) *Ad Glanc. l. 2, cap. 1. f. l. H.*

maxima pars cognoscitur ab adstantibus, qui retinentiam aliquam in membro observant, & omnia, vel ferè omnia percipiuntur ab ægroto maxime si in membro haud omninò obtusi sensus illa contingant.

X I I I.

Sed ponamus fieri molestias ex illa causa in parte sensus acuti, vel saltem non obtusi non insolenter percipi pulsationes arteriarum; cessare molestias, & conquiescere dolores sæpè sæpiùs bonum; non raro signorum est pessimum: & aliis circumstantiis in examen revocatis decernitur, utrum sit. Nam si cessent molestiæ, quoniam fluxus, & refluxus sublata sunt impedimenta bonum signum illud est; si verò ideò cessent, quoniam pars, jam mortua est, vel jam jam est moritura, in quo casu neque consuetò pulsant arteriæ, pessimum signorum omnium illud est.

X I V.

Galeno maxima parte hæc cognita fuere, qui sanguinis, & aliarum substantiarum si fortè motum perceptum habuisset, nobis concors omnia superiùs exposita cognovisset. Ex sanguine enim nonnunquam *optimo conculto*, tamen inter partes alicujus membri, ob aliquam scilicet in viis fluxus, refluxusque difficultatem, inflammationes exquisitas fieri dixit (a) *vehemens tunc dolor*, inquit, *Galenus arripit hominem, nisi membrum sensum omnino hebetem habuerit; pulsusque in profundo molestus accidit, tendique omnino, ac contundi membrum apparet*, (b) & *vehementem calorem persentit, adeò ut comburi videatur, & refrigerari desideret; talisque rubor per summa viget qualis ex balneis advenit, aut ex igne, aut quovis alio modo calefactis*. Gangrænam autem, quæ quandoque fit ex magna aliqua inflammatione, curari, inquit, (c) *evacuantibus nobis, quàm possumus plurimum sanguinis, qui in membro patiente compactus est, cuius causa sunt mortificationes, ob id, quod arteriæ ex angustia loci nequeunt se attollere*.

X V.

Sed præter sanguinem complures aliæ substantiæ sunt, quæ suas habent in animalium corporibus vias, per quas fluunt: & planè nescio an membrum sit, etsi exiguum, per quod sanguis tantum fluat. Quin etiam omnino certum puto aliud fluere per fibrillas, ex quibus componuntur ex: grat. arteriarum tunicae variae, ac per ejusdem arteriæ cavitatem fluat. Quorum omnium, quæ sanè innumerabilia sunt, fluxu impedito pro varietate eorum aliud, atque aliud tumorum genus oriri manifestum est: siquidem aliud est id cuius fluxus impeditur, aliud est id, in quo fluxus impeditur; alii, atque alii sunt modi, quibus fluxus impeditur. Sed de iis maximè dicendum est, in quibus nulla magna cadere potest disputatio, atque ambiguitas.

X V I.

In hepate præter quam manifesta est partium laxitas, consistentia, & structura, multò sanè diversa à musculorum ex: grat. natura; Præter nervulos quorum fila non sunt veluti aenea, vel ferrea, per quæ nihil internè fluit, nisi æther; sunt veluti ex gossypio, vel ex lino, per quæ humor aliquis intrinsecùs etiam fluat, & præter portam venam, & parvas arterias sangu-

(a) *Sunt qui rigeant, & frigus percipiant.* (b) *Ad Gl. lib. 2. cap. 1.* (c) *Cap. 9.*

guinem afferentes ; sunt & venulae ad similitudinem coronariae cordis in cavam, sanguinis portionem aliquam referentes in portam, & praeter insignes in hepate cavae radices, ac multa lymphatica, sunt suimet ipsius hepatis propria vasa, per quae singulariter in hepate secreta fluat bilis, & icholidoca proinde appellantur quia bilis cholera etiam dicta est. Cum igitur multis nominibus alia sit musculi, ac hepatis structura, alia sint vasa, & alia sint, quae fluant, & alius, atque alius sit eorum, quae fluunt usus; necessum est alia nonnunquam fieri in hepate tumorum genera, quae non fiunt in musculo, vel in alia dissimili parte: ut sunt ex. grat. saltem tumores ex impedito bilis per propria hepatis vasa fluxu; & alia ex his consequi mala necessum est; quoniam saltem descendens in intestinum bilis ad multa ignavus non est usus. Nec non alias mutationes, corruptionesque suscipere potest bilis, quas non suscipiet sanguis, aut lymphæ ex: grat. non minus ac de iis, quae diversa sunt in citrio pomo dicendum est, in quo quandoque à cortice flavo, quandoque ab acida pulpa, quandoque ab alba substantia incipit, & utcunque incipiat, totius demum citrii non semel sequitur corruptio. Verum insuper cum multa similiter sint in hepate, ac in aliis plerisque partibus, necessum est quandoque non pauca similiter fieri in hepate: quorum non deficiunt multa exempla; Sed hydatidas non praeteream, quae in hepate, in pulmonibus, in renibus, in liene, & in aliis partibus frequenter observantur: frequentius tamen contigit mihi illas videre in hepate, & in pulmonibus: quod vel casu factum est, vel quia lymphatica multa per hepar, & per pulmones excurrunt; & quidem facile accidere potest in originibus lymphaticorum divulsu membranulae, vel dilatatione aliqua lymphatici vasis, aut alia ratione hydatidas tumorum species creari.

X V I I.

IN memoriam hæc revocant pancreas, quoniam etsi multa similiter ac in aliis partibus observentur in pancreate; habet sua propria vasa pancreas, habet, & proprium ductum à Wirsungo dictum, quo aliquid deferretur confundendum bili ad novi alimenti perfectionem. Cumque multò dissimilis sit succus pancreaticus à bile; æquum est asserere vitio hujus succi, vel vasorum ejus, vel alia quacunque ratione impedito succi pancreatici per suas vias fluxu aliud fieri tumorum genus diversum ab aliis, & ab aliis diversa ex eo sequi incommoda: idque non solum varia vicinitate partium, connexionem, & consensu; sed quoniam alterius naturæ, & alias facultates habet pancreatis succus à sanguinis, bilis, lymphæ, & aliorum liquorum natura, & facultatibus diversas.

X V I I I.

Similiter de liene dicendum, etsi lienis videri possit minime necessarius usus ad vitam prorogandam, quoniam eo exsecto aliquod animal diutissimè superstes, & incolume fuerit; attamen praeter alia diversa in liene omnino credendum est propria ipsi inesse vascula per quae peculiare aliquid fluat diversum ab aliis plerisque, & ex impedito hujus substantiæ fluxu quibuscunque de causis peculiare nasci tumorum genus: & quidem Galenus, aliique fatentur non parùm differre lienis, hepatis, aut aliorum viscerum tumores: longa item rerum experientia compertum est specifica commendari varia in tumoribus pro viscerum varietate. Ac non quidem unquam

pernegaverim id humoris, quod peculiare in liene concipere possumus humorem malancholicum rectè dici: modò ex hoc nomine non nascantur errores. Error autem esset inexcusabilis per ductum splenicum humorem illum ab hepate deferri in lienem, & per venas sanguiferas aliquid à liene deduci ad ventriculum, vel item per sanguiferas aliquid à liene deferri ad intestinum rectum.

X I X.

His similia multa dicenda sunt de testibus, quibus præter alia multa propria sunt vasa, per quæ fluit semen: & omninò necessum est concedere his obstructis, aut quomodolibet impedito spermatis per suas vias fluxu diversum ab aliis omnibus tumorum genus fieri. Etenim maximè differt semen ab omnibus aliis, quæ per corpora animalium fluere consuevere; & alias, atque alias suscipere potest semen mutationes, quas non suscipiet sanguis, aut alius humor; & multò sanè diversa ratione semen, sive bonum, sive vitiosum alterare potest corpus animalis: quod maxima parte manifestum est in eunuchis, in quibus veluti sexus mutatio quædam fit.

X X.

Similiter dicendum est de mammis, deque propriis mammarum vasis, de lacte, & de tumoribus, qui fieri possunt propter impeditum lactis per suas vias fluxum; de saliva, & de viis propriis salivæ, & de iis tumoribus, qui fiunt ex impedito salivæ per suos canales fluxu; ac de aliis multis, ut etiam de impedito urinarum, & fæcum alvi per suas vias excursu similiter dicendum est.

X X I.

Quin etiam per nervos, quos diximus non esse veluti ænea, vel ferrea fila, per fibras, per membranas, per ossa, & per partes omnes majori tamen, minorive velocitate aliquid fluere concedendum est, cui cum effluxus non est æqualis aliquid crescere necessum est: quod non rarò rectè fit, in iis scilicet, quæ rectè crescunt. Impeditis autem fluxus viis, nisi omnia jam mortua, vel jam jam moritura sint, cum novi aliquid semper urgeat; in tumorem partem attolli necessum est. Quæ omnia parte maxima ab omnibus admittuntur; omnes enim affirmant universum corpus, & partes cunctas nutriri: quo verbo indicatur aliquid influere in partes omnes, & quidem influxus non est sine fluxu. Præterea in ulceribus variarum partium magna est saniei à sanie diversitas: videlicet varia sunt, quæ corrumpuntur, & diverso modo corrumpuntur.

X X I I.

Quamobrem vel rerum considerata tantum materialitate dicere debemus ex omni eo, quod corpus est, etiam si optimum multitudine tumorem aliquem fieri posse: vel si aliæ considerandæ sint etiam circumstantiæ non est satis quaternarius. Nam sanguis, flava bilis, lympa, succus pancreaticus, id quod in liene separari omninò credibile est, semen, lac, saliva, urina, & non pauci alii liquores rectè ad quatuor reduci minimè possunt: nam si saltem spectemus virtutem, major differentia est inter semen, ex: gra: , & quemcunque alium humorem, quàm sit inter bilem, & sanguinem.

XXIII.

AC quidem si non rectissime, rectius mihi dixisse videor, melius esse in animalibus humores distinguere secundum vasorum, & viarum per quas fluunt, aut fluere debent, notatu dignam differentiam aliquam. Nam licet in his aliquæ etiam dari possint deceptiones; longè tamen plures eas existimo, quæ in doctrinis dantur eorum, qui alia utuntur norma. Ac illud, quod dixi, extra corpus tum animalium, tum plantarum verum quodque sæpè sæpius est: ex uno enim aquarum fonte non rarè variarum aquarum habemus rivos, colore, sapore, apparentiis, virtutibusque aliis diversos: idque ex eo tantum, quod variæ sunt fluxus viæ. Cum autem viam dico, non nudam, simplicemque dico semitam, neque geometricè vocem acceptam volo: quod exemplis, quæ adjungam clariùs fiet. Sic ex radicum, corticum, foliorum, oculis etiam ipsis manifesta structura varia; ita, & ex seminum etiam in variis herbis varietate, melius in eis succorum differentiam distinguimus, quàm ex iis, quibus hortus irrigatur: quæ nonnunquam nihil aliud sunt, quàm simplex aqua. Et ex uno uvarum succo, vasis tamen condito pluribus, varia frequenter habemus vina colore item, sapore, apparentiis, virtutibusque aliis diversa: atque ad id nonnunquam locorum tantum satis est differentia, in quibus plures cadi statuti sunt. Nam situ, aspectuque variorum corporum Mundi, & iis, quæ circumposita sunt, locus loco semper similis non est, non ventilatio, non lumen, non luminis defectus umbra, non noctis, & diei mutationes ubique locorum eadem, aut omnino similes sunt: quomobrem, vel locorum tantum, in quibus vasa collocantur, diversitas satis aliquando esse possit, ad differentiam aliquam indicandam in vinis. Verùm in vegetantibus, & præcipuè in animalibus multæ fiunt liquorum cribrationes, separationesque partium variarum, multæ fiunt mitiones, quibus non uno nomine aliud, atque aliud fit. Quod gravissima conjectura in musculorum etiam motu concedi potest: etenim dum turgescit musculus, qui in opere est, tam repentina mutatio, non nisi repentina explicatur, aut mitione, aut additione aliqua substantiarum: quæ fortè dum miscentur maximè rarefiunt.

XXIV.

Pæsentis tamen instituti nostri est eas tantum in corporibus animalium considerare eorum, quæ fluunt, aut in vasis, & viis, per quas illa fluunt mutationes, ex quibus præter naturam tumor aliquis fit. Quæ omnes cum semper aliquid urgeat, difficultate aliqua ad fluxum, effluxumque, & impedimento comprehenduntur. Quæ vera etiam sunt si cæteris bene valentibus membri vitio, multa in ipso rarefiant adjectis ab aere; nam opus est supponere plura adiici, quam in aerem reddantur. Arteriarum, insuper vitio tumores diximus contingere dissimiles iis, qui venarum vitio accidere possunt: quoniam non minima est inter arterias, venasque differentia. Similiter dicendum puto de reliquis omnibus particulis solidis, non exceptis minimis variorum generum fibrillis, quæ multipliciter variant, multipliciter lædunt, multiplicique vitio non rarè laborant: & varia proinde ex
iis,

iis, quæ accidunt partibus solidis animalium contingere possunt tumorum genera. (a)

XXV.

Res ipsa satis ex se manifesta est, & fidem facit; quod si his adhuc clarior facta non est, timeo ne pluribus fiat obscurior. Non tamen pigebit addere fibrillas, aliaque in partibus consideratu digna aliquando contrahi, corrugari, & siccari, sive aliquid amittere, quo sicciora dici debeant, angustiora, minora, vel etiam pauciora habere interstitia, solito minus accipere pro irrigandis, renovandisque particulis interioribus, quæ proinde magis densæ invicem, & in minus spatium coactæ dici possint: quibus omnibus, aliisque similibus parva aliqua regio, quæ nonnunquam minor est ciceris magnitudine, non solum non sit tumidior; sed minor potius mole sit, quam natura esse soleat, & dura fiat. Dura, vel potius durior fiat, quam in recto statu esse consueverit, & communione, protensioneque fibrarum ab illo loco ad alios locos partes alias in consensum trahat; atque alia circumposita similem jam expositæ acquirant naturam, minus irrigentur, minus turgeant, particulæque, ex quibus constant, densatæ, & in minus spatium coactæ dici debeant, & omnia in parva illa regione vitiosa (quæ paulatim amplietur) jam mutata à naturali statu minus tumida potius, quam tumidiora fiant. Ac quidem non semel vidi hujusmodi vitium in profundo mammillæ incrementum sumpsisse, & in consensum traxisse postmodum extrinsecam cutem, quæ tenaciter postea adhæsit corpori illi duro, quod erat in profundo mammillæ. Non hac, illac ductilis erat supra corpus illud durum cutis; sed tenaciter inhærens veluti unum facta sunt. (b) Fibrillæ omnis generis in cute contractæ, corrugatæ, & minus ductiles, minus irriguæ, & minus irrigatæ apparebant; eratque ibi cutis multo minus tumida, quam in naturali statu esse solet. Color erat mutatus in variegatum, in rubrum, vel subrubrum, in lividum, vel sublividum, aut alium: non enim omnibus similiter fit. Morbus appellabatur (c) in initio canceri initium, progressu dictus cancer est, & nominatus est tumor ab humore melancholico progenitus. Non quicquam nunc de humore melancholico; sed verum fatear me sedem vidisse primam vitii hujusmodi durum esse corpus, minus succosum, minus irriguum, minus turgens, quam in naturali statu esse solet: omnia contracta potius, & corrugata, & in minus spatium coacta potius videbantur, quam tumidiora. Morbus erat cancer, in quo postea circum apparuere venæ turgidiores, quæ speciem facerent pedum canceri.

Y 2

(a) Quæ confirmantur longa experientia, quæ docuit varia esse variis tumoribus magis, minusve specifica medicamenta.

(b) Sarmentum vegetum, vel plus, minusve vegetum, & non una similive ratione minus vegetum, sarmentum mortuum, & non una semper similive ratione mortuum, infusum aquis dissimiliter madescit aquis, dissimiliter accipit aquas, dissimiliter nutritur aquis, dissimiliter corrumpitur aquis.

(c) Sæpè audiivi tributas humori, quem dixerunt melancholicum, aquas fortis virtutes, quibus fiant in parte vitia similia vitiis, quæ descripsimus.

cri. (a) Morbus erat cancer, in quo ulcus factum est veluti in ambustis, in quibus cutis apparet corrugata, contracta, densata, minus ductilis, & agglutinata, atque adhærens nimis partibus profundioribus. Morbus erat cancer: in quo postea partes circumpositæ diversimodè tumidiore factæ sunt, & totum reliquum mamillæ tumidius apparuit. Verùm sedes mali, vitique nonerat in partibus mamillæ tumidioribus, sed in duro, partiumque minus ductilium, & minus irriguarum, quàm natura esse soleant, corpore; quod descripsimus, ac diximus in principio quandoque minorem habere magnitudinem, quàm sit magnitudo ciceris.

XXVI.

O Portet autem imaginari non pauca alia dari vitia his multis nominibus similia; vel etiam his multis nominibus dissimilia. Sed cum omnia sigillatim persequi difficile sit; ne videar, quam plurima omisisse, eos moneo, qui hæc legent, in arboribus saltem vitia observare, quæ floribus, frondibus, aut fructibus contingunt, quæve accidunt cortici, quæve ligno, quæ in trunco, vel in ramis fiant: existimo enim multa ipsos reperturos esse exempla; quibus explicentur, & evidentiora fiant, quæ supra indicata sunt. Alicubi totum folium; alicubi areolas tantum in folio, vel fibras, nervulosque tantum malè habere observabunt. Tubercula, & excrescentias varii generis alias magis, alias minùs duras, & quasdam prorsus fungosas, & plantas majoribus adnatas plantis sæpè sæpius observare dabitur. Videbunt regiones quasdam nunc majores, nunc minores, vel etiam minimas syderatas, aut exsiccatas: videbunt in regionibus corruptionum varia genera varium eructantia vitium, profundius in ligno non apparens in cortice, vel vitium in cortice, non transmissum ad lignum, & in his, atque etiam manifestò in fructibus vitia quædam esse nonnunquam serpentia, ut brevè totum perdant fructum; nonnunquam non serpere, aut minus serpere videbunt. Integras partes aliquando veluti expuere vitium, & separationes fieri puri ab impuro, & aliquando ligulas, ut sic dicam, vel fibras regionis morbidæ sic insertas, & commistas integris partibus observare licebit, ut neque gladio facile sit ab istis illas abscindere, aut separare; Verùm impossibile est cuncta, quæ observabuntur enumerare.

XXVII.

Spectabiles autem in arboribus nodi sunt, è quibus nova erumpunt folia, novarum gemmarum tutamen, & ornamentum, ac multis in plantis, puta in vitibus è nodis admirabiles capreoli, & potissimum circum circa obrutos terra nodos novæ nascuntur radices: ut maxima appareat in nodis plantæ vis. Mutatione, insitione, aut etiam nodorum permissione omnino admirabilia, & monstruosa fiunt in plantis: (b) ut in composito citro aurantio pomo videre est. Novos nonnunquam in veteri trunco notavi nodos, è cortice in tumorem elato erumpentes. E vitis gemmula similis, ut plurimum

(a) Sed in ambustis frequenter vitiosum separatur ab integro; quoniam vitiosum illud uno tempore totum, & ferè æqualiter vitiosum factum est: secus in cancro, in quo etiam protensa fibræ veluti radices ponunt in circumpositis partibus.

(b) Florentinorum la Bizzaria.

mum nascitur matri vitis. E semine autem vitis, hoc est uvarum acinis, dissimilis ut plurimum nascitur matri vitis: sed nequaquam in omnibus plantis similia his, aut similiter fiunt. Cum autem plantæ, & animalia non omnino dissimili vegetent ratione, hac occasione placet in corporibus animalium, nonnulla notare aptissimè nodos appellanda. Est liber inscriptus *de Anatomia vivorum* Galeno tributus, in quo traditum est credidisse antiquos cerebrum, hepar, pulmones, & stomachum tanquam nodos esse propinquos primæ radici, supra quos, & circa quos deinde, & nodi alii secundarii naturales, scilicet, & utiles elevantur. Ac Auctor *Finitionum Medicarum* ganglium definivit, nervi, sive fibrillæ, nerveæ præter naturam convolutionem, sive nodum quendam. In statu optimo animalis nodos plerisque dari omnino manifestum est: ac si dixerim pluribus in locis hæderæ in morem conscendentis arborem multas fibras in animalium corporibus complicari, colligari, & nodos facere, omnino verum dixerim. Plexus sæpe sæpius vocant anatomici partes quasdam in animalibus: suntque plexus reticulare opus vasorum, & consequenter fibrarum, ex quibus constant vasa, multipliciter complicatorum, & ligatorum, in quibus vel nudis oculis nodos observare liceat, nodulis similes, qui observantur in fibrillis foliorum arboris. Neque profecto est in re anatomica tam mediocriter versatus, qui ignoret, nedum dari, verum etiam passim observari nervorum nodos plerisque; (manifestissimè circa stomachum, quem nodum dixere antiqui) & ex nerveis fibris reticulare opus efformari: in reticulo autem nodi semper sunt supponendi. Nodi item supponendi iis in visceribus, in quibus aliquid separatur ab iis, quæ appellant. Acini dicti in hepate nodos habent. Glandulæ omnes, etiam minimæ nodis, vel nodo constant vasorum, & fibrarum. Nodis potissimum novæ fiunt machinæ, quibus novi aliquid in animalibus molitur natura. Non minima parte cognoverunt hæc antecessores nostri, & nodos in tumorum doctrina frequenter nominaverunt. Qui etiam cum aliqua vidissent veluti nova germina in animalibus materiæ multitudinem accusaverunt, & formatricem virtutem ad senium usque extremum perdurantem: verum quot quot ego legi, neque rudem rerum istarum mechanicam exposuere rationem, neque quisquam verum saltem adumbrare est aggressus: inter quos M. A. Severinus etsi disertus planè, & in dicendo ornatus. At mihi omnium minimo maximi Dei munere datum est, ne dum hæc, atque similia concipere, verum etiam ex uno, atque solo filo gossipino, vel lineo, vel laneo, vel alio diversimodè tamen contorto, & variorum generum nodulis instructo varia conficere organa ad aliud, atque aliud opus magis, minus apta. Ac mihi daretur animus ex uno gossipino hujusmodi filo varias ostendendi confectas machinulas, aliud, atque aliud facere perpurgare, & percolare aptas, quæ fortassis iis etiam, qui mustum percolant nota sunt.

X X V I I I.

Sed non solum, qui natura dantur nodi præter naturam variare possunt in animalibus, novi insuper oriri, novæque possunt machinæ pullulare, & crescere, in quibus aliud, atque aliud fiat, & ab iis, quæ appellant ad novam machinam aliud, atque aliud separetur diversum ab omni eo, quod in corporibus animalium reperiri solitum est. Antiquioribus, quibus jus fuit, rebus nomina imponendi, casus datus est experiundi nonnunquam in his reperiri

periri substantiam melli, aut pulticulæ, aut sebo similem: quamobrem quosdam tumores dixere mellicerides, alios atheromata, steatomata alios, à similitudine eorum, quæ continebantur facta denominatione. Attamen præterquam quod in his multæ sunt magnæ differentiæ, quæ alias, atque alias possent constituere tumorum inferiores species, non minus, ac solius pulticulæ ex: grat: ex variis farinis multæ revera extra animalium corpora observari possunt nimium differentes species, nonnunquam corpora reperiuntur in tumoribus melli, pulticulæ, aut sebo omninò dissimilia, ut sunt carboni terræ, aliisque similia: atque ideo si à contentis sumenda sint discrimina istorum, similiumque tumorum, necessum sit concedere multò plures tribus esse illorum species. In his, similibusque tumoribus, ut plurimum manifestò apparet corpus esse adnatum parti, in qua tumor factus est; idemque vasorum, complicationemque habere fibrillarum tanquam radicem. Ut plurimum tumores hujusmodi cystim propriam, atque folliculum habent, & cystici propterea appellantur. Ut plurimum in his similibusque satis non est studio quocunque, & medicamentis quibuscunque auferre, & abscindere tumorem, nisi nodus, & radix ejusdem simul solvarur, aut corrumpatur, sive utcunque auferatur, & omninò extirpetur. Observatum enim sæpè sæpius est abscissum, & sublatum tumorem aliquem ex his, iterum, atque brevi, & nonnunquam in majorem molem succrevisse; quoniam nodus intactus relictus fuerat; radix videlicet tumoris intacta relictæ fuerat. Præter cysticos varios, verrucæque non paucæ, & ii tumores, qui ab exiguo pendent pedunculo, & angustam habent basim, alique non pauci ad hoc genus tumorum, ex novo prodeuntium nodo referri possunt.

X X I X.

Porrò omittendus in his non est aeris usus maximus. Ac quidem legimus apud antiquos arterias undique aerem accipere circumfusum, quo calor natus attemperetur: quæ sententia castiganda aliquantulum est; nam sic, ut fertur, multas easque graves patitur difficultates. Præterea est liber *de utilitate respirationis*, qui Galeno inscribitur; ac, ut censor quidam dixit, *multa in eo vera sunt, sed magna ex parte Aristotelica*. Quo fatuitatem nonnullorum memini me non semel fuisse admiratum; qui ea, quæ ab Aristotele rectè de natura tradita sunt in medicinam verentur admittere; quoniam repugnant iis, quæ in medicina docuit Galenus. In hoc libro *de utilitate respirationis* flammam legimus in continuo motu esse in modum fluvii; & plus nutrimenti flammam habere ex aere, quàm ex quocunque alio: quæ omnia vera sunt. Aerem legimus in eodem libro semper influere ad ignem; ac necessum esse plus aeris influere, quàm sit ignis effluens, qui reparandus ex eo est. Quoniam non ex toto aere, sed ex solis igneis partibus, quæ sunt in aere fit ignis, fitque ex plurimo aere multò minor ignis. Quæ etiam omninò vera viderentur, si pro igneis partibus, partes dicerent ad nutriendum ignem aptas: non enim necessum est id, quod nutrit, tale esse, quale est id quod nutritur. Et in igne quoque (ut in aliis multis) machina concipienda est qua ex iis, quæ ignis non sunt, apta tamen sunt ignem facere, fiat ignis: non minus, ac in plantis organum concipiendum est, quo ex iis, quæ semen non sunt, fiat semen: simili ratione, ac ex ferro, quod terebra non est fit terebra: quæ omnia (si quid hoc etiam est) omninò consentiunt iis, quæ ab Ari-

Aristotele de materia tradita sunt. In eodem libro legimus *fumum non fieri ex sola aqua, sed plurimum habere aerem, in quo disseminatae sunt aquae particulae*: vel credere, quis posset rectius dictum, fumum elevatum ex aquis simplicioribus aquarum habere partes turgidas, quibusdam substantiis æthereis ab aere, vel ab igne, vel ab eo, quod ignis in hoc casu vim habet, acceptis: quibus fumus est aere levior, ascenditque per aera fumus. Qui, vel elevatus ab aliis corporibus, vel aliis turgens substantiis, ut in crypta canum dicta propè Agnanum est aere gravior, & fertur ad decliviora: ut fumo accidit in organo, sive machina Boylei, postquam aer exhaustus est. Sed jam æquum est sermonem contrahere, ne ad multa ferar, quæ non sunt hujus loci. Neque tantum ignis, aut fumus multum substantiæ ipsis congruentis ab aere accipit; verum multis, atque multis aliis corporibus idem, aut simile contingere existimo: quin etiam affirmo semper nonnulla reperiri in aere, vel alia aliis corporibus circumfusa substantia, quorum maximus sit in natura usus, quorum quædam cuncta permeent solidiora corpora. Fluxus autem substantiarum, quas innuo, in aliis evidentior in aliis obscurior est, & in quibusdam corporibus argumento tantum, & gravi conjectura deprehenditur. Ac sunt, & fiunt quotidie multa partim igni dissimilia, partim igni similia, in quibus uno, vel alio modo ludit aer, vel ut rectius dicam, unum, vel aliud ludit eorum, quæ in aere, vel in alia, aliis corporibus circumfusa substantia sunt. Phosphori, de quibus admirabilia vidimus, magnes, vitrum, & ferrum, uno, vel alio modo organizata, temperata, aut intemperata appellant, & illud ferrum, in quo novam quamdam machinam magnes impressit, omnia electricam vim habentia, quæcunque maxime è longinquo odorandi vim movent, campanæ quando sonitum edunt, & alia, atque alia multa hujusmodi sunt: ut si lusum quendam nonnullarum substantiarum non admittamus in illis; ea explicare, & intelligere nequeamus, quæ in iisdem observantur. Similiter inquam dicendum est de corporibus animalium, deque nonnullis animalium partibus, & de plerisque, quæ in corporibus animalium de novo fiunt: videlicet, quod in nova aliqua machina consistant, in qua aer, aut aliquid eorum, quæ in aere reperiuntur novo aliquo ludit modo. Ac ut paucis rem universam comprehendam; quæcunque, inquam, fiunt in corporibus, quibus aer, vel aqua, vel alia substantia circumfunditur, aliquo modo ab aere, vel ab aqua, vel ab alia dependent circumfusa substantia.

XXX.

HIs, quæ hætenus dicta sunt, præter alia, quibus non est hic locus, nonnunquam contingit ea, quæ feruntur ad partem aliquam in transitu vitia concipere delataque ad partes alias, alios facere morbos; nonnunquam accidit hæc eadem in transitu, non id accipere, quod aptum fuisset multis usibus; nonnunquam accidit hæc eadem in parte affecta, aliud, atque aliud à circumfuso aere accipere, quàm conveniat; nonnunquam accidit ex iis, quæ prætereunt non rarefieri aliquid, quod melius fuisset rarefactum esse, & pro machinæ in parte aliqua diversitate; nonnunquam accidit ex iis, quæ prætereunt minus, aut plus, aut aliud, atque aliud rarefieri, quàm conveniat, vel expediat. Nova machina partis alicujus non semel fit ex iis, quæ in circulum aguntur, aliud, atque aliud dissipari, quàm expediat.

diat, & totum corpus plerisque utilibus privari substantiis, nonnunquam fit aliquid minimè dissipari, quod utiliter fuisset dissipatum.

XXXI.

AC quidem mihi non semel in partis nova machina, quæ erysipelas vocatur, multis argumentis clarè conjicere licuit, quicquid roboris erat in corpore fuisse extinctum, aut per partem illam permixtum substantiis ab aere acceptis fuisse evacuatum, atque dissipatum: (a) non multo sanè dissimili modo, ac quicquid olei in lucerna est per machinam, organumque in elychnio impressum, quod flammam nuncupamus, dissipatur, absumiturque.

XXXII.

IN his similibusque aliis multis maximè periti, expertique hominis est noxias machinas corrumpere, alias non noxias innovare, sive imprimere. Ut si apum, vel potius vesparum aculeo aliquid infusum est, vel alio quovis modo nova machina facta alicubi in cute est, qua pars intumuit; prudentis est ficulneum lac, vel aliud simile superimponere, quo nocens illa machina corrumpatur. Cum igne ambustum aliquid est in animali, novaque machina facta est, quo malum serpat ad partes integras, prudentis est novum, noxiumque corrumpere organum: quod plerumque factum vidi aqua, in qua vitriolum fuerat dissolutum. Ac quidem hac eadem aqua extinctum non semel vidi erysipelas. Verum nolim, quia extinctum dixi erysipelas, aut quia aliis aliquando ob penuriam utor vocibus, quæ aliter accipi solent, omnia omninò me velle dicere, quis credat igni similia. Nam neque ignis est omninò igni similis; neque phosphorus omninò phosphoro similis est.

XXXIII.

EX his demum facile deducere licet ad tumores præter naturam curandos nonnunquam necessum esse vias expedire, aliena, & impedimenta ad motus auferendo, & obstructa aperiendo; nonnunquam ampliata nimis restringenda sunt, adstricta sunt amplianda, vitiaque quæcunque maximè per specificorum inventionem sunt corrigenda; nonnunquam cum gravis conjectura est specifica non fore satis, ut in canceri initio, igne, & gladio si pars patiatur, malum excidendum, vel si malum non fuerit in initio, & pars excissionem non patiatur, res in longum trahenda est. Nodi item ex quibus tumores plerique germinare solent, solvendi, corrumpendique sunt. Quod etiam dicendum similiter est de iis novis organis, in quibus modo noxio ludit aer: videlicet, quod mutatione aliqua facta in membro, innoxia, vel etiam proficua particularum organizatio introducenda est. Placet autem exemplum apponere, quo constet sæpe sæpiùs facili negotio similia his fieri, modò constet modus: qui si ignoretur omnia difficillima sunt. Charta ex grat. qua utimur guttarum olei affusione faciliùs respuit aquas, & lumen transmittit. Vitrum asperum non transmittit, aut vix transmittit lumen, quod per lævigatum vitrum facile transmittitur. Atque his sexcenta alia similia possem adducere.

ÆGRI-

(a) Non multo sanè dissimili modo, dictum ne quis credat omnia similiter fieri.

ÆGRITUDINUM SPECIMINA QUÆDAM.

ÆGRITUDINES dicimus corporis constitutiones, quibus, vel molesta aliqua nascitur sensatio, vel ad aliquod opus præter solitum inepti sumus, vel forte, si placet hoc addere, deformes finis. Constitutiones autem corporis appellamus organizationes, & constructiones quascunque, machinamenta, sive machinationes quascunque partium corporis, passionisque earumdem.

Omniū autem possibilium corporis constitutionum, in quibus morbi consistunt, quædam sunt in conceptione, quæ saltem temporis progressu absque ulla extrinseca causa, vel molestas excitant sensationes, vel ad aliquod opus hominem ineptum faciunt: quas omnes enumerare non possumus. Verum consequuntur ea, quæ in homine primis maximè conceptionis diebus fiunt.

Ex his ea est ab ipsa conceptione corporis constitutio, ex qua fames nascitur. Estque fames molestarum sensationum una, quam malè nonnulli definiunt; quod sit calidi, & sicci appetitus. Fames non est appetitus, sed ex fame sæpe sæpius fit cibi appetitus: remedii scilicet appetitus. Id enim, quo fames fit, cibo commixtum sæpe sæpius desinit esse molestum: ac proinde cibus est remedium illius molestæ sensationis, quæ fames nuncupatur. Puer etenim adhuc in utero, vel ora distorquens propter famis molestiam, vel casu aliquo adaperto ore aliquid accipiens ab his humoribus, in quibus natat, expertus sibi cessare famem; postea tum in utero, tum exclusus, si unquam famem patitur, recordatur remedium, labia scilicet, & linguam ad aliquid deglutiendum movere. Quo cum fuerit etiam delectatus, fortè non solum in fame, sed in aliis quoque molestiis hoc sibi quærit oblectamentum, tanquàm malorum suorum medicinam. Fieri tamen potest, quod aliquando famis molestiam cibi delectatio præcedat. Hinc est, quod pueri vix editi mammas norunt sugere, & facilè si aliqua parte doleant suctu quærant levamen aliquod. Et his quidem similia de molesta illa sensatione, quæ sitis appellatur, dicenda videntur.

Verum fames, & sitis, quæ tamen modum non excedant, ut etiam molestæ sensationes, quæ fiunt ab urinis vesicam replentibus, vel ab excrementis ultimum intestinum molestantibus, nisi omnem vitam morbum appellare velimus, nequaquam dicendæ sunt dependere à morbo aliquo, sive corporis ægritudine. Siquidem illæ sumpto cibo, & potu, vel egestis iis, quæ infensa erant, statim, & facilè desinunt: præterea iis monemur, quibus corporis necessitatibus servire debeamus, ut utiles potius, quàm inutiles hæ sensationes, licèt molestæ appellari debeant.

Simili ratione de plerisque aliis molestis sensationibus affirmandum est, quod non sint à morbo, qualiscunque sit corporis constitutio, ex qua illæ ortum ducunt: ut sunt iracundiæ, mœroresque minus graves, & lassitudines, & ab exercitiis defatigationes modum non excedentes; quibus mo-

nemur, quod conquiescere ab animi affectu, vel cessare debeamus ab opere.

Sed aliæ fiunt homini molestæ sensationes, quarum causæ latent, similiter in conceptione, sive in ipsis reperiuntur conceptionis principiis; quæ tamen à morbo esse creduntur, & ea corporis constitutio, ex qua illæ dependent, morbus, sive ægritudo nuncupatur: inter quas dolor est, qui absque ulla extrinseca causa, aut in vita errore pueris fit circa septimum mensem à dentium eruptione, & circa septimum annum, quo tempore decidere solent veteres dentes, & alii prodeunt.

Est autem apud non nullos medicos dentium eruptio morbus: & profectò illa sæpissime graviter affliguntur pueri, convelluntur, & non rarò pereunt: quæ mala graviora esse consuevere septimo mense; nam septimo anno tum firmioribus pueris, tum aliis decidantibus, aliis prodeuntibus minori cum molestia hæc dentium renovatio absolvitur: præterea hoc in negotio aliquid est assuetum jam esse hominem cibos solidiores dentibus, & gingivis conterere, & fortè si puelluli ante septimum mensem durum quidquam in ore frequenter detineant, quo gingivas affricent, facilior illis, ac minus discriminosæ erit dentium eruptio.

Non dissimili ratione à nativitate, & sæpissime à conceptione multæ esse possunt corporis constitutiones, quibus ad aliquod opus inepti sumus: non inquam ad volatum, nam cum de homine loquamur, & homines omnes aptam corporis constitutionem ad volatum non fuerint sortiti; si qui similiter nascantur ad volandum minimè apti, non dicuntur morbo aliquo laborare. Sed si quis ea non possit, quæ ab aliis hominibus peraguntur; malam habet corporis constitutionem, quæ ægritudo nuncupari debet: ut si quis nascatur cui alvus, vel vesica, aut quid aliud simile sint imperforata, quæ aliquando possint, vel non possint Chirurgi manu, aut aliter adaperiri, & non rarò brevi tempore vix natis pereundum sit: vel si quis ineptus nascatur ad motum progressivum: vel ad videndum: vel ad audiendum: vel ad aliud quid simile tum ex iis, quæ manifestò in sanis fieri videntur, tum ex iis, quæ fiunt quidem in sanis, sed non manifestò fiunt: qualis est motus nonnullarum fibrarum in cerebro, quo ex iis, quæ aut manui, aut pedibus applicantur, multa percipiuntur, & id, quod inspirato aere præter compressionem vasorum, quibus continetur, fit in sanguine, quod quidem non est satis manifestum. Sic alia multa certo fiunt in sanis, quæ tamen manifesta non sunt, & nasci possunt homines cum omnimoda, vel cum aliqua impotentia ad hæc, atque similia, & proindè ægrotantes dici merentur.

Cæterum Corporis constitutiones, sive à nativitate, sive à conceptione illæ fuerint, vitæ decursu infinitis plane rationibus diversimode mutari, & nunc commodiores, nunc minus commodæ, & meliores, & pejores fieri possunt. Hinc molestiæ quædam sæpe cessant, & sæpe quæ prius non erant molestiæ adveniunt. Nonnunquam illud idem potest homo, quod prius efficere nequiverat: & frequentissimè impotens fit ad illud idem, quod priusquam corporis constitutio mutaretur, tum facile, tum valide peragebat.

Primum ex his, quæ dicta sunt, non rarò præstantur consuetudine, qua ipsi etiam dolores fieri consuevere mitiores. Consuetudine fragorus præruptarum aquarum cursus, & rotarum strepitus, & campanarum tinnimenta desinunt esse molesta. Consuetudine fortassis motus cordis, & arteriarum,

motus

motus pectoris, & pulmonis in respiratione molestus non est: qui tamen levi mutatione in corporis constitutione molestissimus fieri potest: ut in aneurismate, in temporibus, ut dicitur, in paronychia, in qua tenuis arteriola motus torquet hominem; hominem, qui à valido, perennique cordis motu nullam patitur molestiam? Et quidem hæc ipsa si non accidant per intervalla, progressu temporis propter consuetudinem molesta sensui minime sunt: & rectè à nonnullis affirmatur, quod malum sæpe consuetudinis beneficio vertatur in naturam, & quandoque non expediat illum curare.

At surdus à nativitate, & qui cum non posset propter surditatem hominum sermones imitari, mutus quoque dicebatur, mutata corporis constitutione audiens fieri potest, & loquax. Et qui cæcus erat aliquando mutata imperfecti oculi constitutione fieri potest videns. Et qui proxima quidem videbat, sed remotiora minime intuebatur, mutata itidem oculi constitutione non rarò longe remota conspicit, proximiora non distinguit.

Sed ex his, atque similibus quædam rarò contingunt, & tunc forte fiunt, cum mala corporis constitutio, propter quam aliquis aut non audit, aut non videt, non concipit prolem, aut ad aliud impotens est, non differt multum à recta, qua hæc fieri possunt, ac sensu differentia hæc, qua ponitur, vel non ponitur effectus, percipi nequit.

Porro alia sanè à nativitate esse potest homini alicui partium constitutio, quam sit cæteris hominibus: aut etiam si eadem similisque fuerit in nativitate; multas postea suscipere potest mutationes, quibus homo potens fit ad pleraque eorum, quæ ab aliis hominibus fieri nequeunt, & multa sentiat, quæ ab aliis hominibus minime sentiuntur.

Omittam hic funambulos, & somnambulos, & eos, qui dormientes pugnare, & vincere, remis insistere, in præcipiti ambulare, terram fodere, incitato satis equo vehi possunt, & alia multa faciunt, quæ fieri à ceteris hominibus per somnum nequeunt. Omittam musicæ peritos, qui in cantu multa exaudiunt, quæ alios fugiunt. Omittam homines, & fœminas præcipue, quæ odores percipiunt ex rebus maximè remotis. Et de illis etiam sermonem non habebo, qui rosæ olfactu animo linquebantur. Neque de illis loquar, qui cum non essent prius satis robusti, postea mutata corporis constitutione vires habuere, quibus tres, quatuorve homines viribus suis simul sumptis essent impares. Et Romanam non adducam fœminam, quæ admirandos docta erat ventre ciere motus, quibus medici nonnulli crediderunt monstruosum quidquam illam utero gestare. Verum enim vero non præteribo, quod sicuti mures moventur ab his, quæ fiunt in ruitura domo, quæ non raro sensus hominum communiter effugiunt, sed non effugiunt murium sensus domum propterea deserentium; ita dari possit in homine aliquo ea corporis constitutio, quæ ab his iisdem, atque similibus moveatur, & possit postea homo iste domus ruinam prævidere, aut quid aliud simile. Sicuti quædam animalia sensus habent, qui moventur ab iis, quæ in terræ visceribus, aut etiam, & in aere fiunt, dum terræmotus imminet, moventur ab iis, quæ in aere contingunt, quando pluviae parantur, quæ ut plurimum hominum sensus effugiunt, & eludunt; ita inquam in aliquo homine dari potest corporis constitutio sensum habens, qui ab his, similibusque moveatur, & possit hic homo terræmotus, & pluvias pronunciare, tempestatesque

tesque futuras. Homines reperti, qui multa videbant in tenebris, quæ aliis hominibus occulta prorsus erant: multa hi monere, multa recognoscere poterant, quæ ab aliis, qui nihil circumspiciebant in tenebris, prorsus ignorarentur. Canes, qui feras insectantur, insectantur & aves, sensus habent, qui moventur ab effluviis promanantibus à corpore, sive feræ, sive avis, quibus motus canis cognoscit, quo in cespite coturnix, quam non videt, lateat; cognoscit, quas vias teneat fera, quam oculis non conspiciat. Moven- tur canes ad domini, quem non vident, cujus vocem non audiunt, adven- tum. Corpora scilicet prodeunt ab hominum corporibus, quæ non movent ipsorummet hominum sensus; sed non latent canum sensus, qui ab illis ef- fluviis moti, de domini adventu monentur. Ea scilicet esse potest in homi- ne corporis constitutio, sive à nativitate, sive postmodum acquisita, quæ sen- sus habeat, qui moveantur ab iis, à quibus moventur canum sensus; & propterea multa tum cognoscere, tum verò prædicere, & pronunciare possit homo aliquis, quæ cæteris hominibus sint omnino abscondita: Et hæc fiunt non minus, ac magnete quidem non movetur aurum, movetur tamen fer- rum; ita è quibusdam effluviis movetur canum sensus, non autem hominis. Vel movetur unius, non movetur alterius hominis sensus. Intelligimus autem hæc omnia similia esse iis, quæ dici possunt de conjecturis peritorum sive nautarum, sive agricolarum, qui ex quibusdam naturalibus signis mul- ta rectè præcognoscunt.

An poterit homo aliquis non solum disponi per morbos, verum etiam cogi, tum ad mordendum, tum ad ejulandum, tum ad latrandum veluti canis, & ab iis, similibusque in quacunque corporis constitutione nunquam naturaliter moveri poterit, à quibus canum sensus moventur? An fortè si hominum memoria recolatur, exempla deficerent, quibus hæc probentur? Nicolaus, sive Colapiscis descendens ad maris profundum quædam observa- bat, quibus futuras tempestates prædicebat. Profecto sic se res habet, & hæc, quæ dicta sunt, rarò quidem observata in homine; sed cum aliquan- do fuerint observata, vulgus credidit cæterorum hominum, eos, qui ali- quid percipere, & aliquid prædicere potuerint, quod ipsi neque percipere, neque prædicere possent, oculos enim non habebant ad hæc, vel cum superis, vel cum cacodemone commercia habuisse. At prudentissimi viri benè norunt, quod vera dixerim; nam ex multis, quæ tanquam divinitus circumferuntur pauca nimis admittunt, quæ scilicet revera vires superent humanæ naturæ.

Constitutio autem corporis, cujus sensus moveatur ab iis, quæ non mo- vent cæterorum hominum sensus nunquam ex hoc ægritudo appellari de- bent; sensus enim in iis perficitur potius, quam lædatur, & ea cum sic sen- tiuntur, non sunt ad hominis deceptionem ordinata. Propter alias tamen rationes aliquando possunt hæc, simileve constitutiones rectè dici morbi: Si videlicet ex una parte potentior, ex alia vero impotentior hominem reddant ad aliquod opus, vel aliqua propter illas molesta nobis sensatio fiat.

At quædam sunt corporis constitutiones, in quibus multa sentiuntur, quæ ad hominis deceptionem sunt ordinata; atque idè ægritudines dici me- rentur. Excipiam nunc eos, qui quasi volentes decipiuntur ab his, quæ sentiunt, ut sunt, qui talia credunt esse in Iride, qualia vident oculis, & qui

qui aliquid dolori simile, quem sentiunt, reperiri affirmant in gladio, quo dolor excitatur in sensu. Hi quidem non pauci sunt, & decipiuntur, quia decipi volunt, nec facile animadvertuntur. Cumque quamplurimos socios habeant, qui similiter quasi volentes decipiantur, alter alterum non solum excusat, verum etiam acriter defendit, ridente interim Democrito, & eorum deceptiones illudente. Eos intelligo, qui nunquam deceptionum suarum merentur excusationem, & sensationes quasdam habent conspicuas, & vehementes, quibus facile prudentes etiam, & fortes viri decipiantur. Et ea, quæ sic sentiuntur, licet sensus, qui non judicat de rebus, nunquam decipiatur, ad deceptionem ordinata appellare placuit.

Alius visionibus ad deceptionem ordinatis inquit.

Teneo Novercam, sequere, da penas mihi.

Jugoque pressum libera turpi Jovem.

Sed ante matrem parvulum hoc monstrum auferam.

Dilectissimæ Uxoris hic clava perfregit ossa, pupillas oculorum suorum perdidit natos. Alius testâ, segetesque igne corrumpit. Alius etiam sibi ipsi mortem consciscit. Hi sic decipiuntur, ut impossibile, aut sanè difficillimum sit non decipi: & condonandæ propterea ipsis sunt deceptiones, etiam gravissimæ: & licet in alios, ac nonnunquam crudeles in semetipsos manus inferant, humaniter sunt habendi; nam in his moraliter non peccant, cum recto rationis usu careant.

Quis nomen unquam sceleris errori dedit?

Ac licet.

Sæpe error ingens sceleris obtineat locum.

Hi tamen sic errant, ut impossibile, aut saltem difficillimum sit eos non errare.

Non inquam totius oculi, sed humoris tantum crystallini mutetur constitutio, cujus figura non unica simpliciue terminetur superficie, sive spherica, sive elliptica, sive alia, qualis homini, esse consuevit; sed multiplex sit hæc crystallini humoris superficies, hoc est ex pluribus componatur superficiebus; jam homini, quod simplex est, videbitur multiplex. Si unus adsit armatus miles, non quidem unum videbit, videbit cohortem, videbit fortè benè instructum, & firmum exercitum?

Illi, cujus humor crystallinus unius oculi haud ritè respondeat alteri, etiam si utriusque figura non sit pluribus terminata superficiebus, quod unicum est, videbitur duplex. Eiusdem humoris figura mutetur in cylindrum; Homo homini videbitur chimera, & pro formosa furiarum averni aliquam videre poterit homo, tetram, horribilem, tremendam, & nulquam existentem furiam.

Ac nuper accepimus fœminam quandam lac puero præbentem, olim Epilepsia tentatam his diebus aliquid molestum sentire in crure, & femore sinistro, & aliquando aliquid percipere à ventriculo ascendens in caput; quod ubi sit labia ex sinistra parte involuntariè tremant, ac palpitant; postea speculum sibi videtur videre mulier hæc ante oculos, in quo semet ipsam, & alia multa variorum, & ipso afflictionis tempore mutabilium colorum, ac mirabiliter nutantia intuetur.

Vox hominis videri potest leonis rugitus, non minus ac pictura ex

uno loco spectata videri potest numinis effigies, ex alio vero cornuti, ut pingitur demonis imago videri potest.

Sic in omni genere, instrumentorum sensus mutata partium constitutione alia, atque alia sentiunt dissimilia iis, quæ à cæteris ex ejusdem objecti præsentia communiter sentiuntur: ut nonnunquam pro amico, & pro filio deceptus aliquis inimicum sibi necem, vel parantem, vel minitantem, & insidias molientem accipere possit; & è converso in inimicum accipiat animum, mentemque benignam; aut aliter infinitis planè modis decipiatur.

Enim verò supponendum est, omni, aut ferè omni animi affectione, omni, aut ferè omni perceptione, in quacunque sensatione corporeum aliquid in nobis moveri. Nam si nihil prorsus moveatur in corpore, ex corpore, sumus ut prius; & nulla fit rerum memoria, nulla fit perceptio, nulla fit sensatio. Quod si ejus, quod movetur mutata sit partium constitutio; non quidem ab eadem causa eodem modo movebitur, sed aliter, atque aliter: Unde alia, atque alia erit animi effectio, sive perceptio, atque sensatio. Hinc fit quod ea, quæ huic dissona sunt, alicui, vel ipsi eidem mutato tamen possint esse consona: non minus ac quod huic incommensurabile est, alteri potest esse, commensurabile. Etenim quodcunque ad aliquod possibile, quamcunque datam habet proportionem.

Et illud quoque in his verum est, ea, quæ moventur ab aliqua causa, quæ homini dicatur extrinseca, similiter moveri posse ab aliqua causa, quæ insit homini, & ipsi dicatur intrinseca: ut proinde necessum sit, similes omnino fieri animi affectiones, similesque sensationes: veluti manus, & digitorum inflexio similis profectò est, vel si quis alius manum, vel digitos mihi inflectat, vel ego met id præstem; & differunt quidem causæ, sed motus in his similis, est motui.

Igitur cum lætari, tum contristari possunt homines nulla ad id moti extrinseca causa: tum psallere, & immodico risu solvi possunt; tum fure, & præcipites se ab alto dejicere. Sed cum hi proprio nomine à plerisque melancholici, & atrabilarii nuncupentur non video cur illi proprio careant nomine, & non humore aliquo gaudifico laborare dicantur! Ea inquam, quæ moventur, cum justam habemus sive risus, sive gaudii causam; moveri etiam possunt sine ullâ extrinseca, & sine ulla justa causa; ut similiter, & rideant, & gaudeant homines: atque ex eo neque justî, neque injusti, neque modesti, neque immodesti dici debeant.

Diaphragmatis fibræ, ut etiam, & plerorumque aliorum magis, minusve convelli possunt ea ratione, qua convelluntur in risu tum arbitrio hominis, tum sine arbitrio; & utcunque sic convellantur risus conspicuus fit. Accidit autem similiter convelli has fibras in vulneribus diaphragmatis; & similiter, qui sic vulnerati sunt sine eorum arbitrio ridere observantur; qui sæpe, & rident, & dolent ab vulnere. Accidit propter alias causas musculos, & fibras musculorum, quæ convelluntur in risu, similiter moveri, & convelli, quod scæminis frequens nimis est; & similiter scæminæ istæ etiam nolentes rident.

Respirationis item, & motus cordis contractiones, lacrymarum expressio, contractis fibris glandularum, quæ circa oculos sunt, & quæcun-

que

que alia moventur, aut mutantur dum iustas causas habemus sive luctus, sive mœstitiæ; similiter contrahi, & exprimi, moveri, & mutari possunt ab aliis causis, quas quoniam arbitrium auferunt, nequaquam iustas appellamus: & similes erunt tum respirationis, tum motus cordis contractiones; similiter, & hi quoque lacrymas effundent, & lugebunt, & mœsti erunt.

Hæc tamen, etsi aliquando fiant sine ullo arbitrio, & invito prorsus homine, frequentius tamen contingit esse à quibusdam levioribus causis: quæ quidem non auferant arbitrium; sed facile illud determinant ad hæc, & facile eos homines moveant sive ad risum, sive ad luctum; quorum corporis constitutio sive ad risum, sive ad luctum apta nimis, & accommodata est: ut qui membra habent apta nimis ad aliquod opus, facile à quibuslibet levioribus causis ad illud idem perficiendum determinantur, & per quietem quoque illud potius, quam aliud somniant. Quod tum natura, tum arte, & industria non rarò consequuntur homines, qui arte quadam gaudere, & ridere, possunt lacrymari, & mœstos esse. Quod de Justiniano Imperatore retulit Procopius in arcana historia, non lætitia, vel dolore illi opus ad lacrymas arte jam paratas pro opportunitate, & occasione rei præsentis. Ac fertur esse fœminas apud gentes quasdam, quæ hac potissimum vivunt arte lugendi, flendi, & luctum, atque mœstitiæ exercendi: verum his quæstus iusta dici potest luctus, & quæstus causa.

Sed ea persequar, quæ magis ad rem faciunt nostram. Hominum aures extrinseco sæpè opus habent tintinnabulo, ut excitentur; quibusdam verò satis est tenuis fibrillæ circa aures vibratio, qua similiter sensus afficiatur, ac si tinnitu campanarum commoto circum aere percutiantur auditus organa. Aquarum fervores, ac ebullitiones manifestissimè exoriuntur intercluso tantum aere inter auditus instrumenta, & quodcunque aliud, quo inclusus aer compressus, & arteriarum motu leniter percussus excitat ferventium, & ebullientium aquarum minime existentium auditionem. Ex quo multæ deceptiones, creduntur enim esse quæ non sunt, & quædam ad vires referuntur supra naturam. Quæve de metallorum, & campanarum tinnimento, de aquarum fervoribus, deque aliis quam plurimis dici possent; similiter dicenda videntur de hominum, de fesarum vocibus, deque omni, quod ad auditum relationem habet. Quippè non existentium, & mortuorum etiam voces; ferarum ululatus, & dulces non existentium avicularum vocum modulationes exaudiri possunt: scilicet similes fiunt auditiones si auris ex quacunque causa, sive extrinseca, sive intrinseca similiter afficiatur, ac afficeretur si quidquam ex his præsens esset. Haud semper opus est igne, ut calor percipiatur: sed pleraque sunt tum extrinseca, tum intrinseca homini, quibus similis sensatio fiat. Præter vocem hominis ore emissam multa sunt tum extrinseca, tum intrinseca, quibus auditio fiat humanæ vocis. Nec Didoni furias concipienti Sichæo opus est, ut Sichæi vox exaudiat, ipsa secum habebat Dido:

Quo exaudiri voces, & verba vocantis:

Visa viri.

Visa viri: an hæc fortè videbatur tantum audire, sed non audiebat; & plerique, quos diximus, videntur sibi videre, sed non vident?

*O imaginativa, che ne rube,
Talvolta sì di fuor c'huom non s'accorge,
Perche d'intorno suonin mille tube.
Chi muove te se 'l senso non ti porge?*

An utrumque fieri posse existimem? An fortè verum sit, quod nonnulli inquiunt; mens audit, mens videt, mens loquitur? Hic certè non est aptus huic tantæ digressioni locus! Ac satis mihi nunc visum est superiùs innuisse ab iis, quæ moventur in cerebro non minus moveri, & affici posse extrema sensus organa; ac eadem moveri, & affici soleant ab extrinsecis causis, quibus postea cerebrum afficiatur: & sæpè esse hæc veluti potentias duas extremitatibus, aut baculi, aut funis applicatas, quarum si una moveatur per intermedium baculum afficitur altera in altero extremo, quod si ista moveatur, ad hujus motum per intermedium baculum, & altera quoque afficitur, similesque sæpius esse affectiones. Nec idè existimo decipi hominem, quia videt, aut audit, vel, quia videtur videre, vel videtur audire; verum, quia aliquid ex his, quæ sentiuntur, aut sentiri videntur, ipse decernit, aliquid inde deducit, quod veritati non sit consonum: ut si judicet, adesse ea omnia, quæ videt, aut audit, vel semper extrinsecus esse omnia, qualia videntur, vel qualia audiuntur, vel judicet visiones, & auditiones, & apparitiones quascunque ipsi fieri ex causis, quæ nullæ sint, & ab iis, quæ revera non adsint, putans esse, quæ non sint, vel etiam si adessent, neque tamen apparitionum illarum causæ essent: veris scilicet ignoratis causis.

Erat quidam, cui crus graviter læsum fuerat ab ictu, & dolorum propterea cruciabatur acerbitate; pharmacis sopito, & dormienti jam, Medici ut vitæ consulerent, ulceratum resecarunt crus; expectatus postea ægrotus de pedis maximè conquestus est dolore, & Medicos rogavit, ut extremè dolenti pedi, & pedis digitis succurrere dignarentur.

An hic Medicos, & adstantes ludificabatur, & cum revera non doleret, de dolore conquerebatur? Ridicula hæc sunt, dolebat enim, & maximè. Sed quæ fuit ipsius deceptio? Digitis, & pede, quæ non aderant, dolere existimabat. Multa inquam reverà sentiuntur, & is, qui sentit, non idè decipitur, quia sentit; verum, quia ineptè aliquid judicando concludit, aut deducit ab iis, quæ sentiuntur.

Non rarò autem facile corrigitur animus, & deceptiones, ac judicii errores tolluntur; si modus adsit, quo ad verum aliquod cognitum falsæ opinioniones referantur, & via non desit, qua res meliùs notentur. Ut hic idem, qui cum reliquum integrum crus tum manibus ipse suis tangere, tum oculis perspicere posset, ademptum verò, & resectum neque tangere, neque cerne-
re posset; majorem sibi fecit ex manibus, & ex oculis, quàm ex dolore fidem, & credidit hæc, quæ prius sibi dolere existimabat, nunquam in posterum dolitura: adempta enim, & sepulta erant. Et is, qui per morbos tempestates in Cælo audit, & deciduas pluvias, si nihil his simile aliis sensibus observet in dio, neque pileum, neque vestes, neque calceamenta sentiat sibi humescere aquis; jam corrigi, & tempestatis, & pluviae opinionem, quam habebat existimare posset fallam.

Is etiam, qui inter extrema contortorum digitorum globulum leniter affricans, duplices credit, se tangere globulos; corrigitur, vel restitutis digitis

digitis in naturalem situm, vel si sanis oculis observet unicum, non duplices se tangere globulos: sed si oculo etiam malè constituto id, quod simplex est, videatur duplum; neque ulla reliqua sit via, qua verum in his notari possit, obstinatè aliquando jurabit homo insipiens se duplicem tangere, se duplicem videre globulum; obtestabiturque superos, & hominum implorabit fidem, & insanus eos, qui secum non sentiunt existimabit, vel insanos, vel infideles.

At non semel expedit deceptiones deceptionibus auferre, & in catinum, in quem evomunt insani homines, callidè angues dejicere, ut illi currentur, qui angues credebant habere in ventre: operæ pretium fuit incendio parato rogare, ut urinarum flumine aliquo ignis extingueretur; qua deceptione curatus est is, qui telluris pietate motus urinas non emittebat, nè humorum diluvio tellus obrueretur. Si quis credit vitrea sibi esse membra, & immotus permanet, sibi que cavet nimium nè diffringatur, verberare decipiendus, & plectendus est item: nam videns postea nequaquam sibi fuisse dissiluisse membra, non existimabit ex vitro sibi esse compacta. Sed non est insanientium stultitia minor insania eorum, qui omnes, qui insaniunt loris malè habent, alii enim sunt vincendi, alii in flumen dejiciendi, alii musica, alii divitiis capiendi, alii aliter sunt habendi.

Et equidem sæpissime propter adstantium inscitiam, & imprudentiam, & non semel propter scelus, qui non insaniunt, aut vix insaniunt, quàm maximè insanire coguntur.

Non pauci tamen ingeniosi nimis sunt in suis deceptionibus: ut neque admonitionibus, neque aliis deceptionibus revocari patiantur, & vix una supersit illis salutis spes, constitutionis scilicet partium corporis mutatio: qua aliud, atque aliud sentiant diversum ab eo, quo insaniunt.

Quod si aliquando consequantur, certò certius sanabuntur. Mulier quædam sæpe valetudinaria, & hypochondriaca puerum peperit: postmodum credidit, alterum in utero puerum se gestare. Venter enimensus erat, & durus haud dissimiliter, ac cum revera utero plena fuerat, & quid rotundum, & durum figura infantis capiti simile, & multa alia percipiebat, quæ sibi de puero fidem facerent. Cum hac animi sui sententia vixit quatuordecim menses: tandem fato cessit. Dissecto cadavere repertum est hepar tumidum, atque durum usque ad sinistrum latus excrevisse. Lien erat etiam immanis magnitudinis ad ilium rotundus, & parte quadam hepatis lobo coalitus. His quidem decipiebatur mulier: Et hæc viscera restituenda fuerant; mutata enim in melius hepatis, & lienis constitutione; sublato tumore, & duritie viscerum, rectius de semetipsa existimasset, & à multis morbis vindicata fuisset.

Alius graphicè locum designabat in ventre, ubi viventem ranam se habere affirmabat, cujus vocem aliquando sentiret, quamve in aquis, si quas potasset latere, & alio debilitari, & conquiescere, & in vomendi conatu ad gulam ferè ascendere perciperet! Rationes addebat phyficas, quibus à medicis quoque fidem extorquebat. Aiebat enim id facilè sibi contingere potuisse potu aquarum, in quibus ranarum sperma fuerit permistum: & vomitu se aliquid spermati ranarum simillimum ejecisse dicebat. Post duos annos mortuo homine tabe confecto, pro rana repertus est scirrhus varicibus insignitus pyloro adnatus, quam regionem vivens ostendebat, cum de hospite rana

philosophabatur. Quæ pylori constitutio si natura, vel medica ope sublata fuisset, fortè non desisset homo credere se ranam habuisse, sed certo desisset in posterum affirmare, se ranam alere, nec fuisset tabe extinctus.

Sic alia, atque alia timent ægrotantes, & ob alias corporis constitutiones, eorum animus facile ex quacunque occasione sive vili, sive concepti objecti determinatur ad ea, quæ dicuntur præter rationem: Et nunc mœrent; nunc ad iram concitantur, nunc in desperationes conjiciuntur, nunc vanas foveant spes, nunc anxietates, & difficultates plerasque percipiunt; qui nisi aliquid supersit, quo de erroribus admoneantur non curantur, nisi mutata corporis, aut alicujus particulæ constitutione, propter quam illa, aut necessario, aut facile quidem, & ex levissima occasione fiunt.

Constitutiones autem corporis, & partium ejusdem considerandæ sunt, vel in fluidis substantiis, vel in solidioribus, & nonnunquam in his omnibus, sed potissimum in solidis, quæ si omnino integræ sint, haud quidem diu perdurabunt vitia fluidarum substantiarum. Fluidas substantias appello non modo sanguinem, bilem, lympham, cæterosque humores corporis, verum etiam eas, quæ sensus, & omnem humanorum oculorum aciem effugiunt. Pro quibus argumenta quidem non desunt, quod dentur, & quod tum solidis particulis, per quas fluunt, tum humoribus permixtæ reperiantur, sed quales sint mente tantum, & ad eorum, quæ sensibus subjiciuntur similitudinem, concipere possumus. Atque ideò licet, & ipsæ revera corpora sint, & omnes suscipere possint corporum affectiones, spiritus tamen, & spirituosæ substantiæ à plerisque dicuntur. Omne enim, quod sensus latet spiritus ipsis appellatur, sed his nominibus corpora intelligunt tenuia, & oculorum aciem effugientia, ut nos etiam intelligimus. Sunt tamen, qui spiritus quosdam admittunt omnino incorporeos non solum in sanguine, sed etiam in lapide, à quibus multa fiunt in corporibus, quos nunc non placet serio refellere, illorum tamen sententiam omnino improbamus.

Spirituum autem non minus, ac sanguinis, & aliorum corporum, non est semper uniusmodi natura, & propterea non sunt semper æque apti ad quodcunque naturæ opus, etsi nisi etiam peccent solidiora corpora non diu existimem, illos in vitio durare, fluunt enim. Aliquando particulas asperiores, aliquando læviores, & hujus, vel alterius figuræ magis, minusve accommodatæ ad functiones habent, nonnunquam concitatiorem motum habent, & multa movent sine hominis arbitrio; nonnunquam torpent, & ignavi sunt, & homo ad pleraque fit ineptus. Non rarò vias reperiunt magis patulas, quàm conveniat, vel eas sibi parant, vel ampliores reddunt, ut majori, cum impetu aliquo ferantur, & non raro vel deficient, vel permeare nequeunt pororum, & meatuum angustias, & alicubi ipsorum fit indigentia, atque defectus, & infinitis plane aliis modis ipsorum constitutio alterari, & mutari potest.

Spiritibus, filamenta, ex quibus constant nervi, & fibræ corporis sæpè contrahuntur, aut diversimode convelluntur, & aliud, atque aliud fit præter eorum consuetudinem, quæ in sanitate fieri solent: ut sunt difficultates in organis respirationis, cordis, aut alterius partis tremores, palpitationes, & motus extra morem, & deliquia, & inhibitiones excursus humorum per aliquam partem, in qua tumores aliquando apparent citò evanescentes, aut
color

color immutatur, ut cum rubore genæ per intervalla suffunduntur, & post breve tempus mortis pallore fœda videntur. His iisdem causis sæpe oculi distorquentur, aut caligant, aut objecta videntur circumagi. His aliquando colla tument usque ad miraculum, mox redeunt ad consuetam constitutionem. His membrum aliud stupet, aliud veluti formicarum moribus lacellitur, & infinita sane alia his fieri possunt, quibus haud mirum est, plerasque venas, aut præter rectam rationem, & sine hominis arbitrio in animo excitarî opiniones.

Item, mutata humorum constitutione, & partium solidarum, tum spiritus sæpe vitari possunt, tum vasa alicubi dilatari, & ampliari, ut in aneurismate tum dirumpi, tum obstrui, & excursus impediri, & alia infinita fieri possunt, quibus homo male habeat, & ad aliud, atque aliud opus sit impotens, vel poclivis, & molestiæ sentiantur, & vanæ nascantur plerarumque rerum perceptiones.

Et in his quidem omnibus, tum singulatim, tum varie permixtis, & combinatis causæ potissimum, quærendæ sunt, & sanitatis, & ægritudinum. Ac si quis noverit morbi alicujus causas, cognoscet, quid potissimum desiderare, ac nobis procurare debeamus, ut sanitatem consequamur. Et si quis eas cognoverit constitutiones corporis, aut partium ejus propter quas bene habemus, & integri sumus, facile cognoscet, ut his mutatis, in morbos incidamus. Extrinsecæ autem causæ, ut aer, cibus, & potus, & alia multa idè nocent, aut prosunt, quoniam hæc, quæ intrinseca nobis sunt, illis sæpe mutantur, aut alterantur.

Operæ pretium igitur fuerit perpetuò integra corpora morboſis comparare, & hæc illis, ut facilius, qua parte fuerit opus, ægroti restituantur.



Lectio habita à Doctore

LUCA ANTONIO PORTIO

Die 27. Octobris in Concursu ad Cathedram Primariam Medicinæ, quæ vacat per obitum Caroli Pignatari.

CUM primum animum ad id exoptandum appuli dignari vos audire me loquentem, licuti quæ maxima vestra humanitas est nunc dignamini, Illustriss., & Reverendiss. Præsul, hujus Gymnasii Moderator oculatissime, Senatores amplissimi, Judices æquissimi, vosque omnes Auditores ornatissimi: illud sum certo ratus nequaquam vos exposcere, vestras ex me nunc audire laudes, ad quas referendas sum plane impar: & ad illas pro dignitate exornandas fortè, vel quivis; etli magnus orator impar esset. Sed benignè confedentes, intentique ad audiendum, maximum hoc de me periculum, nunc facere vultis, quo dignoscatis; an juvenes, tyronesque clarè quidem, sed breviter atque honestè simul, & piè ipse valeam edocere? Quam ob rem servatis patriæ legibus publico edicto me, atque alios ex omni, & si remotissima regione huc advocastis; propositoque præmio illexistis: tantæ molis visum fuit, doctorem eligere, qui rite juventutem docere possit!

Patria quidem quantum in vobis est servantur jura; servantur leges, quas ego quoque, quantum à Deo summo Patre luminum hucusque mihi datum fuit, servavi, divinaque favente gratia, quæ vestrum etiam omnium interiorem tangat aurem, non egenus servabo in posterum. Non vobis externus ego, non alienus, sed in hoc ipso Regio Gymnasio olim educatus omnes audivi, qui in illis temporibus docebant. Neque illud vertendum in dedecus, quod paucorum haud leve decus est, alias vidisse urbes, aliorum cognovisse mores: nam fama pervenit ad vos, quod ubicunque fuerim, divino semper adjutus auxilio, nunquam inglorius Patriæ, verendus meis nunquam fuerim. Neque quicquam de me dixi; nisi quæ prostant. Et ut vos omnes optime nostis, & testes esse potestis veracissimi: illud etiam ego servavi in legibus, quod nullis sum usus astutiis, nullis calliditatibus, non adulationibus, non versutiis, non dolo ullo vestram tentavi perstringere mentem.

Hæc tamen magna de me esse debet apud vos commendatio, magnaque de me recordatio: vestraque fide, quam etiam edicto veluti professi estis, vestroque sub patrocinio, quod maxima cum vestra laude non ærulatoris pecuniæ avidi, sed humilis, & egeni concivis vestri suscepistis ab omni injuria existimo me esse tutum.

Quæve magna etiam esse debet de me apud vos commendatio, omiſſis multis, quæ de vobis, æquitate, & justitiâ vestra, & de me dicere possem,

nam

nam ego sum, qui quondam multa præstiti, & non pauca præstabo in posterum; sine mora protinus ad textum, qui mihi de more hesternæ die ex lib. exceptus de diff. febrium Galeni exponendus tyronibus, sub vestro tamen acri judicio, datus fuit. Quem verbis simplicioribus, nullo fuce, nullave dicendi ostentatione, Virginis æternæ sapientiæ Genitricis invocato Nominæ, dilucide explicabo: sermone, inquam, quo familiariter utor, dum peripateticorum more inambulans puerorum aliquem doceo. Ac confessionibus monitus nunquam satis laudati disertissimi Divi Augustini, qui inter cætera fatetur Deo, quod in juventute sua plus curaverit vitare barbarismum, quam vitia morum; ego sane multo graviorum pœnitens, plus nunc curabo vitare obscuritatem sermonis, quàm inelegantiam, minulque probandum auribus vestris dicendi ornatum.

Pro textu autem ex iis locis, quæ signata fuere, accepi hesternæ die, ut audivistis, titulum capitis decimi primi libri de differentiis febrium Galeni: qui titulus est *de dignoscenda hectica febre, cui putrida adjungatur*. Ac operæ pretium erit pro majori tyronum intelligentia principio totius capitis paraphrasim quamdam vobis offerre.

Capite octavo hujus libri primi de ortu febrium hecticarum differuerat Galenus. Et capite nono de indiciis egerat febrium hecticarum. Hoc verò decimo capite ægritudinem narrat cujusdam fœminæ, quæ non solum hectica, & hectica quidem tabida laborabat; sed insuper laborabat alia febre, quæ duas faciebat manifestas accessiones, unam in die ante noctem; alteram noctis tempore. Ac quidem hecticæ, & hecticæ, quæ etiam ad tabem pro-
 vecta est, associari potest alia quæpiam febris ex iis, quæ putridæ dicuntur à Galeno. Qui conqueritur nonnunquam latere Medicos. imperitos tamen: ut imperiti sunt, quos descripserat capite secundo hujus libri. Qui cum sciant neque principium, neque incrementum, neque consistentiam similem illi, quæ observari solet in accessionibus putridarum, in hectica reperiri, si quando hæc in ægritudinibus perspiciantur, tanquam si putrida non possit hectica conjungi, nullam habent de hectica suspicionem. Quod ipse observavit in jam dicta muliere, cujus curatio aliis Medicis demandata fuerat, quos latebat hectica, quoniam manifestas videbant putridæ dictæ febris accessiones. Id autem neque primis diebus latuit Galenum: quomodo autem latuisset virum tam eximium! Qui statim cognovit duas fieri illi mulieri ex putrida accessiones unam interdiu, alteram noctu. *Utraque autem annotatio, idest accessio, sunt verba Galeni, & quæ interdiu; & quæ nocte fiebat, partes quidem breves accessionis faciebat, & sæpius cum rore aliquo, aut perspiratione vaporosa, ita manifeste solvebatur, ut corpus in temperie positum tangentibus appareret.* Ac proinde accessiones istas binas ex putrida esse decrevit. Tempora istarum binarum accessionum erant brevia, & declinatio cum rore, aut vaporosa perspiratione terminabatur, *ut corpus in temperie positum tangentibus appareret.* Verum cum ipse exploratis arteriis signa accepisset, observavit id, quod in præcedenti capite nono, cujus titulus est *de indiciis febrium hecticarum*, dixerat: nimirum, quod arteriæ non quidem similiter, *ut cæteræ partes refrigerarentur, neque celeritatem, aut frequentiam motus amitterent.* Statuerat enim circa finem præcedentis capitis hecticarum febrium magnum indicium esse, si cum arteriarum pulsus explorantur super
 incum.

incumbentes arteriis partes calidiores videantur, quam reliquæ partes circumstantes. Quo percepto signo in fœmina prædicta, ut etiam percepto altero signo pulsus arteriarum remanere celeres, & frequentes, decernere potuit hæcticæ febris putridam etiam conjunctam esse. Postremo monet febres per proprias ideas, formasque cognoscendas, non minus, ac homines ex propria cognoscuntur figura. Quamobrem cum ipse febrium omnium formas, ideasque haberet perceptas, sæpe sæpius non expectata triduana, aut quartana, aut quotidiana reversione, prima die febris speciem cognovit.

Quo sic accepto statim è longinquo quædam visa sunt in declivi nimis, & lubrico situ posita, & non pauca quædam omnino in præcipiti esse. (a) Atque idè eundem S. Doctorem Augustinum in patronum, custodem, & rectorem assumere decrevi, a quo ubi esset opus consilium, auxiliumque caperem. Continuo postmodum mecum ipse excogitare cæpi, quæ potiora dicerem vobis, & an pro faciliori, & aperta magis textus expolitione, licitum fortassis quandoque esset mihi ad infima quæque descendere. Quod tandem licitum visum fuit, & si sciam plerosque vestrum, & vos maxime judices æquissimi, esse sapientissimos, quibus altiora quæque, & abstrusiora disciplinarum omnium magis conveniant. Sed non vos, qui alios docere potestis, docendi estis: judicium quidem vos acre ferre debetis, aptus nè ego, atque utilis sim tyronibus! quibus forte nonnunquam, quæ vobis, & mihi levia, & tenuia viderentur, videri possent gravia, & magna, quæve merito juniorum menti difficultatem haud levem parere possint. Ac profecto recte Galenus causas exquirens, propter quas non pauci, ut ipse ait, sive Philosophorum, sive Medicorum, quorum sæpe numero par ratio est, semper acriter altercentur, turpes semper moveant, foveantque rixas, nunquam amicè veritatis studio incumbant, & quæstio semper apud ipsos, remaneat quæstio, liberè, & candidè suo more inquit: id accidere, quoniam aliud alii pro alio accipiunt, & vox una apud istos aliud, atque aliud significet, quam apud illos: Ex quo tanquam in Babilonicæ turris extructione, quoniam veluti variis utuntur linguis, nonnisi confusiones, rixæ, & animorum tumultus nasci possunt. Omnia quidem contra morem eorum, qui paci simul, veritati, & benevolentiae student, & contra morem eorum, qui demonstrandi artes habent, *apud quos discere ab ipso statim initio licet* (sunt verba Galeni) *quid quoque nomine, quo usuri sunt significetur, quas præterea propositiones indemonstrabiles, quæ axiomata vocantur, in disceptationem sint sumpturi*: deinde ad rem, quam proposuerunt rite procedunt, & admirabilia sane inveniunt. Ego igitur, qui hæc, atque alia multa à Galeno rite accepta in dissertationem logicam transtuli meam, quæ Romæ edita est, non dicam, ut altercationum, vanarumque disceptationum radices evellantur, sed ut dubitandi, & hæsitandi, quantum fieri potest, occasiones præcidantur, nomina, sique sunt, verbaque exponam difficiliora textus mei: eaque tantum assumens, quæ ab omnibus admittuntur ad ulte-

(a) Quod semper suspicandum est, dum res aliqua per verbum minus clara exponitur: calor natus, calor insitus, calor secundum, calor præternaturalis.

ulteriora procedam, aureamque plane, & (a) inconcussam demonstrandi methodum nobis à Galeno in his libris indicatam, pro virili imitabor, & re ipsa opere, & exercitio, quantum potero, eandem illustrabo.

Ac quia omnia quaecunque dicta ab aliis, vel dicentur à me, vel post me dici poterunt, doctè, & ornatè relata sunt ad febres, & ad febres referri debent: quoniam de febribus agimus, quæ res in præcipiti ne dum in lubrico est, ego consilio, & exemplo S. Doctoris Augustini iis tantum rejectis, quorum falsitas me, proximumque meum possit offendere, conabor verba mea resonare id omne, quod veri quisque de his rebus capere potest. Et demonstrativæ Galeni methodi inhærens ex omnibus, quæ de febribus quomodolibet traduntur, unum tantum assumam, *febres cordis esse affectiones*. Enim verò ex omnibus, quæ de febribus quomodolibet dicuntur, unum tantum ritè admissum, & merito jure assumptum à Galeno, ab omnibus, & quibuscunque aliis, quos mihi cognoscere datum fuit, maxima cum sententiarum uniformitate, consensione, & concordia clarissime, & libenter admitti video: *febres cordis esse affectiones*. Quod mihi demonstrativa Galeni methodo instructo, atque munito pro primo, maximoque principio est: de quo non liceat dubitare, vel hæsitare; verum est, quoniam Galeni est, quoniam ab omnibus, etiam à desertoribus demonstrativæ Galeni methodi, plenissime, & omnibus calculis admittitur. Qui omnes quicquid universo corpori accidat, nunquam febrem adesse dicunt, nisi cum cor certo modo fuerit affectum; quod illud ipsum est, quod Galenus assumpsit, *febres cordis esse affectiones*: Quod nos semper tenaci memoria retinere debemus. Nam cæteræ partes omnes, idcirco febre laborare dicuntur, quoniam cum illis cor communicat, arteriæque à corde protenduntur, palpitantque partes ad palpitantis cordis, palpitantiumque arteriarum motum: necnon etiam quicquid movetur in partibus, motu cordis movetur, aut saltem promovetur. Quod si pars aliqua fuerit, qua cum cor non communicet, pessimum illud est, ut in gangræna consummata: expers quidem febris gangræna est, doloris etiam est expers: & si mali quidvis, caloris cujuscunque præter naturam, frigoris, putredinis, corruptionis, aut si quod est aliud malum, de ea dici possit. Sed consummata gangræna re vera pars non est: mortuum enim quid est. At febris cordis tantum, & earum partium affectio est, quibus cum cor communicat, & adhuc vivunt.

Cum autem omnia, quæ in capitis paraphrasi continentur simul expediri, & declarari minime possint, cumque explicaverim quid pro nomine febris pro nunc hic accipere valeamus, revertar ad alia nomina exponenda, quæ sunt reliqua in titulo textus mei. (b) Sunt autem duo: videndum igitur quid vox hætica, quid vox putrida, sive putredo significet.

Ad primum respondeo rectè à Galeno hæticas dici *ab habitu, vel quia*

(a) In dissertatione de difficultate medicinæ venetiis edita, satis cum Galeno docui, quibus constet disciplinis demonstrativa rationalis methodus.

(b) Titulus est de dignoscenda hætica febre, cui putrida conjungatur.

quia (a) quædam (non omnes , & in principio) veluti habitus difficulter tolluntur , vel quia habitum corporis comprehendunt . Utrunque verum est , etiam si vox habitus accipiatur , prout à Philosophis accipi solet : nam multi acquiruntur habitus in membris propter membrorum usum , & exercitium , ut muscoli , manus , pedes , aliaque membra fiunt aptiora exercitio . Sed nihil tam antiquius , nihil tam perpetuo factum est , & fieri debet in toto vitæ cursu , ac est vegetavisse membra omnia , & vegetare debere . Ac quidem vegetatio , nutritioque partium offenditur in hectica . (b) Multæ partes non suum exercebant munus in principio generationis . Hoc unum præstabant partes omnes , vegetabant : hoc maxime læditur in hectica vegetatio , nutritioque partium . Hecticae autem dicuntur habituales , quia universum corporis habitum comprehendunt : quicquid scilicet in corpore habetur , comprehendunt . An fortassis habituales dicuntur , quia proprium cujusque singularis partis munus offenditur ? Respondeo negative . Id offenditur , quod commune est partibus omnibus , id offenditur , in quo conveniunt partes omnes : vegetare , nutriri , ut æquum est . Id autem accidit triplici potissimum de causa , vel quia deest id , quo partes apte vegetare valeant , vel quia hoc ipsum , etiam si non desit , vitiosum est , vel demum vitio organorum partis cujusque , quibus pars qualibet vegetare potest . Raro accidit causas istas omnes simul concurrere in principio hecticae : frequentius vitio alimenti læditur vegetatio corporis habitus . Sed quæcunque in principio fuerit causa , progressu temporis semper organa vegetandi offenduntur magis : ut postmodum etiam si non deesset optimi alimenti copia , tamen recta vegetatio fieri nequiret : vitio scilicet organorum , quibus partes corporis habitus vegetant , nutriunturque . (c) Quercus male vegetet defectu humoris , si antequam corrumpantur organa vegetandi fiant pluviae , iterum bene vegetabit . (d) Si Quercui pro dulcibus aquis affundantur maris salis , male vegetabit , & progressu temporis corrumpentur etiam in ipsa vegetandi organa . (e) Et de Cælo tacta quercus male vegetat , corruptis cito in ipsa vegetandi organis . Omnia similiter fiunt homini . Sic in uno tantum quercus ramo aut læditur , aut perit vegetandi vis , & observamus in homine non semel in uno crure , vel in uno digito lædi , aut perire vegetandi vim , organorum illius partis vitio . Cæterum in universo corpore mala nutritio , sive mala vegetatio , quæ tandem desinit in exquisitum marasmodum , sive tabem , in quacunque ætate potest accidere sine febre : sic ulcus potest esse sine febre . Vel mala vegetatio potest ipsa ortum ducere à febre , sic febres non raro desinunt in tumores , & inde in ulcera . Vel tandem ipsa mala vegetatio per ea , quæ fluunt per habitum corporis , & feruntur ad cor potest cordis motum irritare , & perturbare : hoc est febrem facere , quæ

(a) Hac occasione multa dici possent de quibusdam motibus acceleratis , qui postea fiunt æquabiles , & necessitas mortis probari posset .

(b) Oculi non videbant in principio , pedes non ambulabant , respiratio non solvebatur , &c .

(c) Defectu alimenti . (d) Vitioso alimento .

(e) Vitiatis organis ab initio fieri potest hectica . Fin qui s'era detto , quando fecero tumulto di finto tremuoto .

quæ re vera hætica ab habitu, sive habitualis ab habitu corporis dici potest.

Prolîxius circa vocem *hætica* tituli, textus mei. (a) Circa vocem *Putrida*, sive potius de putredine brevius. Affert quidem Galenus in his libris definitionem Aristotelis circa putredinem. Sed in plerisque descivit ab Aristotele circa putredinem. Nam Galenus pro calore nativo, & pro temperamento absurda intellexit. (b) Quod nunquam fecit Aristoteles. Et, ut nunc quantum possum mitius loquar, pro calore extraneo, sive præter naturam in corde intellexit Galenus quicquid potest cordis motum irritare, & perturbare: hoc est febrem facere. Ac semper Galenus in febribus pulsus artiarum, hoc est, motum cordis accusat. Quod si febres fierent vitio bilis utriusque, aut pituitæ, eas febres in his libris putridas, sive à putredine appellavit. (c)

(d) Supponenda in his dicet aliquis, febris definitio fuerat, quam Galenus statim in principio horum librorum habet. Febris substantia in genere caloris, qui est præter naturam consistit, quamve in aliis voluminibus pluries confirmare conatus est.

Tyrones, & juniores honesta, & pia hæc accipite. Vosque Judices judicate an recte factum fuerit? Ex industria etenim definitione illa non sum usus. Nam *caloris* acceptio ne dum apud plerosque cujuscunque ævi tum antiquiorum, tum recentiorum multiplex etiam est apud ipsum Galenum, qui sæpe sæpius multa toto Cœlo differentia per vocem illam significavit, quorum quædam sunt in præcipiti, quædam sunt absurda adeò, ut facile, sed latenter per vocem illam *calor* deceptio aliqua, & error gravis in juniorum animos intrare possit. Quod satis ipsemet monet Galenus, qui in libris de simp. med. facul. lib. 2. c. 3. expresse de se professus est, non ea quærere in illis libris, & quæ calida essent in se, & ex propria cujusque natura, quod ipsi scitu difficillimum visum fuit, sed tantum, quæ calefacerent. Et expresse monuit, nè quis varia acceptione caloris decipiatur. De-
nuo ergo, inquit, *hallucinantur in homonymia haud distinctis nominum significatis, tanquam si quis de cane terrestri disserens, ad marinum se oratione transferat, existimans, ut animantis utriusque nomen, ita & naturam quoque ipsorum unam esse.*

Hoc monitum Galeni est. Exemplum de terrestri, marinoque cane est

Tom. I.

B b

Gale-

(a) De putridis fusius agit Galenus lib. secundo horum librorum.

(b) Neque pro calore innato, neque pro calore præter naturam intellexit Galenus quid simile ignis calori.

(c) Perche molte cose fin qui scritte brevemente furono a voce spiegate più diffusamente finì il tempo dell'ora, prima che di qualche siegue si fosse potuto dir altro; ma così come siegue fù all'ora, all'ora data la scrittura continuata, come si vede a Monsign. Illustriss.

(d) Non fuit necessarium hoc supponere: quoniam ex doctrina ejusdem scriptoris possumus de eadem re plures habere definitiones, quarum una sanior sit alia.

Galenus existimantis non minus differre naturam terrestris canis à marini canis natura, quàm calor à calore differat.

Atque equidem ea video nonnullos celebratos sane scriptores, ut fortuna in his quoque est, de calore etiam quodam cœlesti dicere, quem adstruunt, ut Galeni ego usus exemplo non dubitem ea, quæ de cœlesti calore metaphorice sumpto, ipsi dicunt, plus differre à terrestri nostro, & proximi Vesevi calore, quam Procyon cœleste sydus canis dictum in cœlo à tripicite, trifauce, triplici ore pestes omnes evomente cerbero differat.

Scio apud sacros etiam scriptores nonnunquam metaphorarum magnum esse usum, quoniam ea, de quibus agunt sæpissime humanis vocibus satis explicari nequeunt, sed cum de re agitur medica metaphoris utendum minime est, vel saltem qui metaphoris utuntur, aliquando libere Deo, & parvulis, qui Dei sunt, fateri debeat, se rem penitus ignorare, ne fortassis pueri metaphoris decipiantur, ut in nostro casu facile, & graviter decipi possent.

Ac quia trifaucis cerberi mentio incidit non idè, inquam, insultandum, & exprobandum plerisque antiquorum est, quod fidei destituti lumine, aliquando male lapsi fuerint, sed potius agenda Deo gratiæ sunt, quod immerito mihi plus fidei luminis, quam dederit Galeno naturalis scientiæ, quod omnes admittere debent; plus enim valet radius divinæ gratiæ, quam omnis humana scientia. Physica tamen ratio nequaquam levis adèd est, ut male sentientes ethnicos semper excusare debeamus.

Cujus quidem Galeni definitionem febris per *substantiam, calorem* ipsi dictam *præter naturam* si supposuisssem, omnino directè aliquid enorme, & grave fecissem contra ipsius Galeni demonstrativam methodum, quam in his libris, & in aliis voluminibus si non lucide (nam perierunt libri de demonstratione, quos scripsit Galenus) satis tamen explicavit, & veluti digito nobis omnibus indicavit.

Sub prætextu verbi defendendi in Galeno rectissima demonstrandi ejusdem methodus nobis indicata, non sic facile laceranda, non sic facile deferenda, & rejicienda est. Demonstrativam etenim Galeni methodum deferere nihil aliud est, quam omnem regulam, normamque omnem invenienda veritatis deferere! quod ipse Galenus in his libris ipsis de diff. febrium clare monuit. Neque satis Galenum cognoverunt, qui copiosum, & optimum triticum per demonstrativam Galeni methodum reperiendum, omitunt, & levissima quædam verba, veluti supervolitantes quasdam paleas, ubique reperibiles, exultantes colligunt, & inde Galenicos se prædicant! Nequaquam tam facile Galenicus quis dicendus est! neque Galenicus ille est, cui optime conveniunt, quæ adversus Thessalum à Galeno dicta sunt.

Cum artem Medicos docet Galenus, qua facilius veritatem inveniamus, & verum à falso distinguere valeamus, ea tantum supponenda in sermonibus, & assumenda præcipit, quæ evidentia sunt, quæve minime disceptantur. Atque ego Galenum imitatus illud unum admisi, illud unum ex iis omnibus, quæ de febribus traduntur, assumpsi, *febris cordis affectio est*. Superest autem videndum, quænam sit affectio ista cordis, quæ febris dicitur? Quod præstabo si tempus id dabit: nunc autem videamus, quæ meliora pro textus mei expositione dici potuissent, si definitionem illam supposuisssem.

Forte

Forte meliora dixissem si divisione partium corporis ab Hippocrate tradita (quam ego etiam admitto) postea sine ulla demonstratione, tantum ex Galeni autoritate dixissem febrium primarias differentias fieri ex materiae varietate, in qua calor præter naturam insidet: videlicet cum insidet spiritibus, sive aeræ substantiæ ephemeræ fieri febres, cum vero in humoribus accenditur, tunc febres fieri humorales, sive putridas appellatas, tertio demum cum calor præter naturam in ipsius cordis solidis partibus accenditur, tunc febres constare hæcticas, solutu difficiles ab habitu, & habituales à corporis habitu appellatas. Hinc pugnās describere potuissem, dicit aliquis inter *calorem nativum*, sive inter *nativam humiditatem* (hæc enim in idem incidunt,) & *calorem præter naturam*. Quibus sine laboriosa illa, & ad tædium usque repetita Galeni arte demonstrativa melius potuissem caput decimum lib. primi de differentiis febrium tum amplificare, tum illustrare.

At hoc non quidem docere, sed pueros fuisset decipere: qui blandis vocibus capti, facile propter illas voces potuissent credere se doctiores factos, cum re vera in nihilo doctiores fuissent: utinam non fierent imperitiores, & mente pravi. Nam vocis illius multiplicior sane est acceptio, quam sit canis acceptio: differuntque calores apud Galenum, & apud plerosque alios non minus, ac natura uniuscujusque rei singularis ab alterius rei singularis natura differat, & quidem naturam rei cuiusque singularis non pauci in aliquo calore ponunt, & absurdissima quandoque per vocem illam *calor* significantur, vel saltem, ut idem Galenus ait, homonymia auditores decipi possunt.

Iidemque pueri sic decepti vocibus illis, adultiores facti cum facile videre possint Medicos, & adstantes omnes circa ægrotum nunquam certos esse calidi ne, an frigidi pedes ægroto sint, nisi postquam propriis manibus pedes tetigerint, & palpaverint ægrotantis; quicquid tandem pro calore secundum naturam, & præter naturam accipiatur, dicere poterunt, ut quæso Magister ille noster affirmavit cor calidius esse in febribus: cum nullus mortalium sublati integumentis costarum cordi manus apponere potuerit, ut experiretur, sicuti in pedibus facimus, calidius ne, an frigidius sit cor! Motum quidem cordis, & arteriarum observantis manibus se manifestantem cognoscere possumus; calores autem, ut & frigora cordis, polypi, vermes, tubercula, adiposa substantia super excedens, aliaque similia, quæ cordi in vitæ cursu accidere possunt, ante mortem cognosci nequeunt. Excepto uno motu cordis de reliquis omnibus, quæ cordi accidere possunt, ante mortem levis tantum conjectura est: non minus, ac quicquid de calidis, aut frigidis pedibus dicatur, antequam res probetur manibus, tactuque levis tantum conjectura est.

Iidemque pueri cum cognoscere possint interdum ægrotantes alteram genarum habere calidam, frigida altera cum sit: & nasum aliquando parte dextera calidum esse, sinistra frigidum: idque manibus tantum facto periculo dignosci posse: facile dicere secum poterunt, de quo calore intellexit magister ille noster: cum cor dixerit calidius in febribus nullo rei periculo facto! Quod si non aliquid simile huic nostro calori, quem nos manibus percipimus intellexerit, semper illud metaphorice dictum, & cognitu dif-

facilius fuit, ac noster hic est terrestris calor, quem inanibus tantum, tactu-
que facto periculo dignoscimus.

Iidemque tyrones adultiores facti legentes apud Hippocratem ver-
ba illa *Curatio ostendit*: hoc est curatio ostendit hypothelis veritatem,
aut falsitatem, eventus rei ostendit hypothesis veritatem, aut falsita-
tem, quæ verba in his ipsis libris de differentiis febrium adducuntur lib.
primo, capite illo, in quo agit de febre pestilentiali, & legentes apud Ga-
lenum nequaquam febres semper iis, quæ refrigerant, sed frequentissime
iis potius, quæ calefaciunt curari, ut est absinthium apud Galenum: hyssop-
us, aqua mulsa, piperis tria genera, aqua cum pipere, theriaca, succus
cyrenaicus, ut legere est in libris Galeni ad Glauconem, centaurium mi-
nus apud eundem Galenum, (a) & nostris temporibus cortex peruvianus,
myrra, gentiana, & alia similia *Curatio ostendit* clamare poterunt, nos dece-
ptos fuisse à Magistro. Qui sub prætextu verbi defendendi in Galeno, quod
verbum in perniciem etiam erat ægrotantium, & animam etiam nostram
offendere poterat, demonstrativam Galeni auream methodum, & quæ ma-
gis vera, & quæ meliora, & quæ utiliora, & quæ tutiora in Galeno essent,
deseruit. Id non fuit Galenum fuisse imitatum! Id fuit veluti demortuas
circa pellem Elephantis muscas cum admiratione collegisse, Elephantem
ipsum turres, cohortesque, dorso vehentem, neque fuisse contemplatum,
neque fuisse admiratum. Ac fertur quidem Elephas panniculum carnosum
cuti habere subiectum, ut nos habemus in fronte, & vi musculosi pannicu-
li cutem corrugare, & muscas perdere. Demonstrativa autem Galeni me-
thodus est veluti turris inconcussa, quam, qui custodiunt, vinci, & expu-
gnari nequeunt, iique res vera Galenici dicendi sunt, qui turrim illam cu-
stodire norunt.

Iidemque pueri si fortè audivissent ex pulsu, motuque arteriarum di-
gnosci cor calore aliquo præter naturam laborare: dicere poterunt motum
cordis, & arteriarum omnium localem esse motum, ac nisi fortè pro calo-
re omne id intelligatur, quo aliquid moveri potest, quæ acceptio aliena est
à communi hominum sensu, ipsi dicere poterunt cor etiam corpus esse, &
corpus quidem unum ex iis, quæ in mundo sunt, ac proindè non minùs
cor, & arteriæ ejus sive velociùs, sive tardiùs, sive æqualiter, sive inæqua-
liter moveri poterunt independenter ab omni hoc nostro calore, quem ma-
nibus percipimus. Siquidem corpora omnia toto cœlo, terraque, marique
petita sive velocius, sive tardius, sive æqualiter, sive inæqualiter indepen-
denter ab omni eo, quod simile est huic nostro calori, moveri possint.
Cordis motus multiplici plane de causa, & ea ipsa pituita frigida, qua non-
nunquam in febribus, ut ait Galenus membra omnia concutiuntur, & tre-
munt, concuti, irritari, & perturbari potest.

Quod si cœlestem aliquem metaphoricè locutus adstruxissem calorem,
Vesevi, vel Phlegetontis calori oppositum; adultiores facti tyrones me,
vel mortuum cum Apostolo increpare possent: Apostolus enim raptus in
cœlum

(a) Nonnunquam calefacientia tum extrinsecus, tum intrinsecus ap-
plicata sanant plerasque febres ex Galeno, & experientia.

cœlum, satis clarè indicavit, non licere homini de iis loqui, quæ in cœlis sunt; & illa, quæ in cœlis sunt, humanis vocibus, quibus neque terrestria ritè, & clarè semper explicantur; explicari minimè posse, ac metaphora cum de rebus medicis, aut phycis agitur non est sine doli, aut inscitiae suspicione.

Quæ omnia, & alia multa ego dum textum exponerem, mente revolvens omisi definitionem illam *febris substantia in genere caloris, qui est præter naturam consistit*; quoniam definitio illa difficulter nimis in recto sensu sumi, & explicari potest; & quoniam illa eadem definitio facillimè in pessimum, & absurdissimum sensum trahi potest: ut à non nemine in pessimum, & absurdissimum sensum trahitur, explicatur, & recipitur. Atque ideò, ut mitiùs loquar, saltem tanquam aliquid in præcipiti positum, quod vel ægrotos, vel honestas, piasque aures offendere possit; omninò vitanda visa fuit.

Dixi autem re vera dari nonnunquam hecticam febrem ab habitu corporis: vitiatis scilicet organis, instrumentisque vegetandi: quoniam ea, quæ quandoque fluunt per organa vitiosa vegetandi, vitia concipiunt, & delata ad cor possunt ipsius motum irritare, & perturbare, quod idem est, ac febrem facere. Et quidem, ut monui semper Galenus, alique Scriptores febribus in omnibus pulsus arteriarum, & consequenter cordis motum accusant.

Quibus id quod ab omnibus admittitur de una, eademque re plures nos habere posse definitiones, satis admonui tyrones, cujus rei exempla non deficiunt apud Aristotelem, Divum Thomam, Euclidem, Platonem, Galenum, & apud plerisque alios variarum disciplinarum scriptores, apud quos non est difficile de una, eademque re plures reperire definitiones.

Definitio autem febris, quæ re ipsa ab omnibus admittitur, & non minus ab assertoribus, quàm à desertoribus demonstrativæ methodi Galeni, & ab ipso Galeno si non verbo, re, opere, & exercitio admissa est, huiusmodi est. *Febris cordis affectio est, in qua motus, quo sanguis in circulum propellitur, irritatur, & perturbatur*. Ex qua definitione, quæ opere, & exercitio admissa est ab omnibus, nullus error nasci potest, ut postea ostendam, nam priùs animus mihi est patefacere, sive expressè, & clarissimè, sive minus expressè, & minus clarè eandem definitionem opere, & exercitio admitti ab omnibus, etiam à Galeno. Ut proinde facile ego videri possim, nihil vobis attulisse, quod meum sit, sed quod ego humilis servus vester, qui nonnisi in humilitate, & infirmitate mea gloriari possim, ab aliis omnia acceperim, quæcunque dixerim, admiserim tantùm, quæ in ore omnium de febrium sonant natura: veritatem scilicet, quæ ut ait S. Doctor Augustinus, à quocunque dicatur, recipienda est. Ac demum veluti is videri possum, qui digitulum secat, ut manum, ut brachium, ut totum fervet hominem, verbum unum minimum, malorum tamen omnium origo, damnavi in Galeno, ut secundum regias constitutiones quicquid boni in Galeno est, ipsumque Galenum vobis, & mihi servarem.

Principio sine hæsitatione dicendum est similiter febrem definitam fuisse ab Erasistrato, quem refert Galenus. Qui multa quidem scripsit adversus Erasistratum, & multo plura adversus Erasistrateos, sed quicquid sit de Erastrato,

Etatoribus omnibus, quos planè spernit, & passim irridet, idem Galenus in multis, atque multis Erasistratum laudat, facitque illum auctorem legitimæ gymnasticæ, quæ pars est medicinæ non ignobilis: cujus nunc vix nomen superest apud Medicos. Demonstrativa etiam utentis methodo rationalis sectæ Erasistratum, Galenus, Hippocratem, & paucos alios facit auctores. Erasistrati autem doctrina ab Avi Aristotelis temporibus, usque ad tempora, & post tempora Galeni tota Europa, & Romæ, maximè floruit.

Similis fuit Chrysippi de febribus definitio, ac Clarissimus etiam Chrysippus fuit ex ejusdem Galeni relatu.

Hepiala, in qua ægrotantes uno, eodemque tempore calores, & rigores in universo corpore percipiunt, febris etiam vocanda est, ut ex Archigene, quem multi sequuntur, refert Galenus. Atticorum autem plerique eum etiam rigorem, qui febrem antecedit, sic videntur nominare, inquit Galenus, neque contemnendi fuerant Athenienses. Febres etiam complures apud plerasque gentes, quas ex parte refert Galenicus quidam, demonstrativæ tamen Galeni methodi desertor egregius à frigore dicuntur das Kalte dicunt febrem, hoc est frigus. Quorum omnium sententiæ quantum decet, admittuntur per illam definitionem, quæ per cordis motum irritatum, & perturbatum fit, & rectius, & facilius explicantur per illam definitionem, qua non prohibetur febre correptis nunc frigora, nunc calores esse molestos, nunc eisdem utrumque simul pati, nunc alterum ipsorum.

Omnes Medici Romani alique omnes communiter M. T. Ciceronis temporibus similiter sentiebant: ut res vulgaris esset, & admissa ab omnibus. Inquit enim M. T. *si cui venæ sic moventur, is habet febrem*: videlicet non aliud quidpiam requirebatur, ut pronunciaretur homo febre laborare; quàm hoc unum: *si venæ illi sic moverentur*. Pro venis autem, quæ moventur in animalibus more latinorum pulsantes arterias intelligit M. T. Et Ovidius de Medico febrem exploraturo canit.

Dumque suo tentat salientem pollice venam.

Videlicet satis est ad determinandum hominem febrile, si pulsantium arteriarum motus, qui à corde est, constanter irritatus, & perturbatus sit. Proximus rem eandem tetigit Virgilius, qui arteriam dixit *salientem sanguine venam*: & sanguis quidem à corde propulsus: ipsaque cordis perpetua agitatio motus arteriarum causa potissima est.

Hæc eadem definitio per irritatum, & perturbatum cordis motum Galeni est: sive, quod idem est, ex Galeni doctrina elicitur: & Galeni doctrinæ summopere consentanea est. Enim verò quicquid pluribus voluminibus de arteriarum motu scripsit Galenus, hoc est de pulsibus scripsit Galenus, in febrium gratiam potissimum scriptum est: videlicet motus arteriarum, qui à corde est: motus ipse cordis in febribus spectandus potissimum est: Et in his ipsis libris de differentiis febrium meminit quidem Galenus caloris præter naturam, sed multò pluribus, atque pluribus tum verbis, tum vicibus manifestò in omnibus febribus motus, & pulsus accusat arteriarum; qui certo certius à corde sunt; quæcunque verò de calore secundum, & præter naturam dicuntur, incerta omnia, ambigua, maximè suspecta, vel saltem in præcipiti sunt. Insuper omnia alia sudor, vomitus, dejectio, urinæ variæ, parciore, vel copiosiores, respirandi difficultas, dolor, obstructio, cutis

cutis densitas, vel lassitas, abscessus, aliaque similia ex Galeno nunc reperiuntur, nunc non reperiuntur in febribus. Motus tantum arteriarum, qui cordis motum sequuntur semper à Galeno accusantur in febribus. Febris igitur definitio, quæcunque tandem illa fuerit, motum cordis admittere debet, qui semper in febribus irritatus, & perturbatus est. Et è converso, sive convertendo, ut dicere solent illi, qui demonstrandi artes habent, nunquam à febre immunis dicitur homo (quicquid de aliis omnibus observetur, vel non observetur, dicatur, vel non dicatur) nisi postquam pulsus tales sint, quales esse debent in illo virium statu, in quo æger reperitur: hoc est nunquam homo sine febre dicendus est; nisi postquam certi fuerimus conquievissse cor ab omni irritatione, & perturbatione.

Definitio (a) igitur febris, quæ cordis motum admittit irritatum, & perturbatum, tum vera est, tum Galeni est, tum ab omnibus admittitur, tum nominibus omnibus tutior est.

Si quid demum juvit aliorum cognovissse mores, omnes quot quot ego novi, quicquid ab ægroto, & adstantibus dictum, vel non fuerit dictum, relatum, vel non fuerit relatum, nunquam quicquam de febre decernunt, quod adsit, vel non adsit, nisi postquam arteriarum motum exploraverint, & peritiores quidam Medici in morbis quibusdam malignis si pulsus majores sint, quàm pro virium imbecillitate, etiam si non sint majores iis, qui esse solent in statu naturali, tanquam excedentes in illo statu virium, pro indiciis habent irritati cordis, & jure merito hominẽ febre laborare pronunciant.

Nostra non sunt hæc, quæcunque diximus: neque quicquam est, in quo ego gloriari debeam; nisi in infirmitate mea, sunt vera, sunt Galeni methodo demonstrativæ consona, sunt communia omnibus; ac resonant quicquid veri ab aliis, quibuscunque dictum est. In his propterea mihi videor imitatus S. Doctorem Augustinum difficillima quædam in confessionibus explicantem, ad cujus exemplum ea tantum non probavi, quæ me, atque alios possent offendere: id omne retinui, quod retinendum fuerat, & demonstrativam Galeni methodum omninò servavi.

Intelligamus quæso, dicet aliquis, pro calore nativo cordis generalem, universalemque aliquam principem causam bonorum omnium, quæ à corde bene, ritèque constituto absolvuntur. Pro calore verò præter naturam illi oppositam, inimicamque quandam principem causam intelligamus, qua cordis motus irritetur, & perturbetur; & id omne procedat ab illa, quod noxii, pravique in febribus observatur. Quibus sic positis definitio febris per *calorem præter naturam* erit bona definitio.

Sed S. Doct. Augustinus locutus ad internam aurem, non esse permitte-
tendos principes istos calores, apertè monuit: quorum alter bonorum omnium, alter malorum, & pravorum omnium esset effector.

Tyrones petitio illa saltem junonium aliquid habet: victa enim, & superata Juno virtute, & patientia Æneæ, fertur tandem rogasse virum.

Neu Troas fieri jubeas; teucrosque vocari.

Retineamus voces illas *calor secundum naturam*, & *calor præter naturam*; monitione tamen, cautione, & protestatione adhibita illi perquam
simil-

(a) Ac quidem definitio mea detractis verbis, *calor præter naturam* congruit cum Avicennæ definitione; quam omnes à Galeno dicti admittunt.

simillima , quā uti debemus cum de canibus sermo est . Nam si sermo sit de cane terrestri , monere debemus terrestrem canem domino fidelem ; si sermo sit de marino cane , monere debemus ejus quidem carnes nullis diebus in toto anno vetitas , attamen non esse valde bonas . *Si sermo sit de Procyone in lumine illius syderis admirari , & contemplari debemus Summi Factoris Dei Omnipotentiam . Si sermo sit de trifuca cerbero , triplici crucis signo , in fronte , in ore , & in pectore munimur .*

Cor musculus est , ut docet Illustriss. & Reverendiss. Nicolaus Stenonis Episcopus S. R. E. Anatomicus peritissimus , & demonstrativæ Galeni methodi excultor eximius , quem ego cognovi Romæ , & ante ipsum cor musculum esse , docuit Hippocrates , qui valvulas etiam cognovit in orificiis vasorum cordis positas . Valvularum etiam memini scripsisse Galenum , sed profecto is Hippocrates , qui librum de corde conscripsit , cognovit etiam valvularum usum . Ac sicuti musculi cujusvis motus multiplici de causa perturbari , & irritari potest à calore , à frigore , ab acu , & ab omni eo , quod pungere , & lancinare aptum est , ab obstructionibus , & à solutionibus continuitatum , & ab aliis plerisque , ita etiam cordis motus multiplici de causa irritari , & perturbari potest , quod satis his verbis significatur , absque eo , quod nomen aliquod universale assumatur , & perfingatur , maximè si nomen illud absurdi aliquid significare possit , ut est calor præter naturam , quo nomine quis dicere potest , intelligere Galenum causas quascunque cor irritare , & perturbare valentes .

Febres sunt cordis affectiones , quarum intantum participant aliæ partes , in quantum cor communicat cum illis , verum hæc una est cordis affectio recte , vel non recte moveri cor , quo unico motu concussis arteriis , & sanguine per easdem arterias propulso , cor cum partibus omnibus communicare potest . Igitur in hac unica cordis affectione , qua motus , qua sanguis in circulum propellitur , irritatur , & perturbatur , febris consistet .

Quæcunque aliæ affectiones non sunt propriæ cordis , sed communes aliis partibus . Quod si quamcunque aliam cor patiatur affectionem , nunquam per illam communicabit cor cum aliis partibus , nisi forte cum ex quacunque alia affectione cordis , hæc alia nascatur , qua ejusdem motus irritetur , & perturbetur . Calores , & frigora nequaquam propriè ad cor ; spectant enim ad partes omnes corporis . Polypi , aliæque liquidarum substantiarum concretiones non sunt propriæ cordis affectiones , nam contingere possunt , ubicunque vasa sunt , coagulabile , & concrescibile aliquid continentia , & multò frequentius accidunt aliis partibus , in quibus propterea fiunt apostemata ; polypi autem minus conspicui sunt in aliis partibus , quoniam nullibi tam magna sunt vasa , ac propè cor . Vermes , tubercula , excrescentiæ , sive pinguedinis , sive aliarum substantiarum non sunt propriæ cordis affectiones , nam possunt contingere partibus omnibus universi corporis . Hoc unum proprium cordis munus est rectè moveri , sanguinemque propellere : hæc una cordis propria affectio est , minùs rectè moveri , & minùs rectè sanguinem in circulum propellere . In his igitur , quæ propriè cor spectant , febris consistet . Exemplaria dabo istorum , quæ hætenus dixi , & hæc , & alia multa vestro nutu evulgabuntur . Vos autem iudices æquissimi pro majori justitia , pietateque vestra erga Deum rem omnem decernite .

Secondo l'Originale dato all'ora à Monsig. Ill. Cappellano Maggiore.

QUID

QUID PUTREDO GALENO SIT :

SI omnia, quæ à Medicis tantum de putredine, vel etiam sparsim à solo Galeno scripta sunt, colligere, & examinare velim, neque facilem, neque brevem, neque utilem laborem assumerem. Satius visum est ex his solummodo, quæ in his libris de diff. febrium de putredine affirmantur, Galeni mentem veluti divinare: quod profectò satis quoque erit in re præfenti.

Capite nono secundi libri Aristoteli putredinem definienti adhærere videtur Galenus, qui postquam dixisset sanguinem aliquando putrescere: *Rectè, inquit, sentire videtur Aristoteles ab aliena caliditate oriri putredinem. Vocat autem alienam externam, non insitam, neque nativam, in quocunque genere rerum; nam hæc coquere apta est, externa autem corrumpere, quod est putrefacere.* At Aristoteles sine discrimine putredinem corruptionem appellavit, & pro nativa caliditate, quicquid dispositionum in materia esset pro re, naturaque rei conservanda intellexisse videtur. Galenus verò sæpenu-mero perfectas, absolutasque rerum plerarumque corruptiones, modò utiles essent hominì, neque corruptiones, neque putrefactiones dixit, & pro nativa, sive insita caliditate ipsam rei cujusque naturam, ipsam formam substantialem, & quod pessimum est, in homine ipsam animam intellexit hominis: ut alibi sine dissimulatione, sicuti æquum fuit, palam feci, & reprobavi.

Primum autem, quod à me nuper affirmatum fuit, evidenter patet ex his iisdem Galeni verbis supra allatis, quibus habet insitam, sive nativam caliditatem in unoquoque genere rerum non quidem corrumpere, hoc est putrefacere, sed tantum coquere aptam esse. Illud corrumpere, & putrefacere externæ tantum, præternaturalique caliditati à Galeno datum est: quippe sæpe sæpius, imo fere semper hæc omnia, atque alia similia ad hominem, & respectivè ad hominem consideravit: ut quæcunque contingerent in homine si proficua essent, secundum naturam, & à nativa caliditate fieri diceret; si damnosa essent, præter naturam appellaret: hoc est præter naturam hominis, & comparata ad hujus hominis naturam; non quidem ad totam naturam comparata, ut ipsemet dicere solitus est. Qui propterea in homine sano, & benè valente quascunque optimorum ciborum, potuumque in ore, ventriculo, & in intestinis transmutationes in humorem alendo corpori aptum, & in alvi superfluitates, quamvis malè olidas non quidem corruptiones, aut putrefactiones dixit, sed coctiones appellavit, quia scilicet ab homine sano sunt, naturæ conveniunt sani hominis, & sunt ad conservandum hominem. Verùm eadem istæ transmutationes ciborum in sani hominis ventriculo à quovis in Aristotelis doctrina mediocriter versato, rigorosè loquendo veræ corruptiones dicendæ sunt à caliditate ventriculi, quæ extranea est panis, aliisque cibis, quibus vescimur, qui quidem secundum Aristotelis doctrinam re vera corrumpuntur, & ex ipsorum corruptione humor alendo corpori aptus, & superfluitates alvi generantur.

Tantus autem in his, similibusque Galenus fuit, ut neque pus perfectum, *la marcia*, absolutumque, quod in tumoribus, & in ulceribus

ribus fit , putredinem re vera appellare dignatus fuerit . Is enim libro primo librorum de differ. febr. à quibus non discedo , Cap. 6. cum putredinis, sive in tumoribus, abscessibus, aliisque collectionibus genitæ, sive genitæ in vasis duo posuisset genera ; unum quod est superante natura , alterum , quod est eadem natura superata ; quod idem est , ac dicere secundum Galenum, calore nativo vincente calorem præter naturam , & calore nativo devicto , & superato à calore præter naturam , de putredine primi generis inquit : *At talis quidem putredo non simpliciter putredo existit , sed aliquid in se continet coctionis ; nam adhuc vi coquendi vasorum remanente , qui interim putrescit humor ad talem pervenit alterationem .* Quod idem est , ac dicere pus perfectum , absolutumque, quod fit vincente calore nativo simpliciter , & omnino putredo non est ; nam coctionis nonnihil in se continet . Secundi igitur generis putredo , quæ contingit omnino superata , & devicta natura simpliciter putredo appellanda est : quæ, nescio an, præterquam in consummata, absolutaque gangræna, vel in aliis malis gangrænæ similibus, unquam contingere possit . Quamobrem tertium ex duobus generibus composuit putredinis genus, in quo, quæ fierent ex parte essent superata, ex parte fierent superante natura.

De his autem , aliisque multis , quæ addi possent , unusquisque peritus facile videt infinitas esse posse quæstiones; ægrotis tamen minimè profuturas.

Cæterum tyronibus , & junioribus normam tradam ; qua non decipiantur in iudicio ferendo , & ægrotis quamplurimum prodesse valeant . Sed prius operæ pretium erit monuisse humores quoscunque in vasis , & extra vasa , in fluxu , motuque circulari ductos, vel alicubi consistentes ; item tumores quoscunque oculis , tactuque observabiles , vel in profundioribus locis latentes, vitia magna nonnunquam concipere posse ; item & partes quas-cunque solidas lethalia sæpe sæpius vitia concipere.

Norma autem est huiusmodi in febribus si symptomata , & accidentia sint gravia : ut virium dejectio , parvitas pulsuum cum irritatione eorundem , quæ non respondeat viribus ; inæqualitas magna in iisdem, vel etiam repetiti insoliti defectus ; lypothimia, vel etiam syncope ; motus convulsivi musculorum , inter quos iéticationes tendinum , oculorumque inversiones, aliique similes ; mentis alienatio , vel etiam stupiditas ; sensuum , sentientique virtutis magna deperditio , dissimilitudo magna, & gravis eorum, quæ observantur in ægroto , & eorum quæ observabantur tempore salutis ; audacter pronuntiandum vitium esse magnum : quod si cum Galeno loqui velint , audacter pronuncient putredinem , sive in tumoribus , sive in humoribus, qui vasis continentur , esse etiam magnam . Quæ omnia , atque alia similia prout mitiora erunt , & minus gravia ; prout minus dissimilia erunt iis , quæ observabantur tempore salutis , audacter cum Galeno , & cum Hippocrate pronuntiandum vitium , sive vitia , putredinemque esse minorem , sive minus malignam , sive etiam benigniorem . Atque hoc illud idem est , quod Hippocrates paucis verbis monebat . *An similia , an dissimilia , principio à maximis , à facillimis , à quibuscunque , & quomodo-cunque cognitis ; quæ & videre , & contingere , atque audire licet ; quæ item oculis , tactu , auribus , odoratu , gustatu , & mente sentiuntur ; quæ item omnibus , quibus cognoscimus, intelligi possunt.*

QUID PESTIS GALENO SIT.

NEque major, neque minor, quàm cum de putredine quærebarum, est difficultas in discernendo quid Galeno pestis fuerit. Is enim *lib.1. de diff. feb. cap.4.* quod inscribitur de pestilentis febris generatione, etiam ex remotissima Æthiopia Athenas usque putavit. *Putredinis fluere potuisse contagia iis, quorum corpora erant ad patiendum parata, febrium cause futura.* Et multis aliis in locis putredinem maximè accusat in pestilentibus febribus, quarum calor, inquit, (a) *ab aliis per putredinis excellentiam differt.* Omnia igitur, quæ secundum Galeni mentem de peste dici possunt, coincidunt cum iis, quæ ab eodem de putredine dicta sunt. Qui Pestem: *Epidemiam perniciosam* appellavit. Et alibi sic pronunciavit: (b) *Quicumque morbus uno in loco multos simul invaserit, vulgaris hic vocatur, sive Epidemus: Qui simul si hoc habeat, ut multos perimat, pestis fit.*

Ex quibus manifestum est nequaquam uni tantum morbo nomen hoc Pestis tribui à Galeno; sed quicumque morbus vulgaris, sive epidemus, & multos invadens in uno loco, qui simul multos perimat, pestis secundum Galenum dicendus est. Quamobrem multæ numerantur ab eodem pestis species, alia in qua hæticæ febres perniciosæ erant vulgares, alia in qua carbunculi, bubonesque erant frequentes, alia in qua alvi dejectionibus mortales è medio tollebantur, alia in qua aliud, atque aliud fiebat.

Quæ quidem omnia, & alia similia nunquam rectè explicari possunt per nomen illud *calor*: nisi fortè facillima additione dictionum, *præter naturam, pro calore præter naturam*, intelligatur quicquid mortiferi, & perniciosi mortalibus accidere potest, quod minimè probandum est.

Sunt autem aliæ voces, quibus sine scandali, offensionisque suspitione, multa eorum, quæ contingere solent in peste aliqua meliùs, & faciliùs explicentur, ut est exempli gratia verbum *coagulo, coagulare*, ut est nomen *coagulans, coagulativum*, & similia quibus aliquid significatur, quod cogendi, & coagulandi vim habeat unum, vel plura eorum, quæ in corporibus animalium fluida esse debent.

Nam his positis, detur aliquid, quod inspirato aere suscipiatur, vel cibis, aquis, aut aliis, quibus utimur permixtum sit, & sanguinis non nihil in arteriis, & venis coagulare valeat; jam facilè dignoscimus ut hoc nonnihil sanguinis coagulatum per glandulas meare nequiens bubones faciat, carbunculosque, faciat parotidas, faciat exenthemata, delirium, & delirio pejus mortem inducat.

Cumque ea, quæ per suos meatus in corporibus animalium fluere debent non sint uniusmodi, & non parum differant inter se, contingere potest ab una, eademque causa coagulari unum, aliud minimè, vel unum efficacius cogi, quàm aliud: ut tumores faciliùs, & frequentius in una constitutione pestilenti fiant in gutture, & circa guttur, quàm in inguine, vel

C c 2

in

(a) *In lib.3. Hipp. de morbis vulg. com.3. fol.140. l.G. fol.150. l.D.F.*(b) *Eod. loco. fol.142. l.B.*

in aliis locis; quoniam glandulae, aliaeque partes circa guttur, nequaquam prorsus similes sunt iis, quae in inguinibus, vel in aliis locis sunt; neque omnibus numeris similia sunt, quae separantur, & quae fiunt in gutture iis, quae separantur, vel fiunt aliis in locis. Qua ratione haud nimis difficulter explicatur, ut quandoque omnia, rectè quantum decet, fluant per vasa sanguifera, cum per ossa, ossiumque poros, per membranulas, ossium amicula, per ligamenta articulorum, perque alias similes partes, multa, præterquam fieri solitum est in statu sanitatis, non fluant, vel minus liberè fluant, & dolores aliasque molestias pariant, & prout hæc, atque alia similia graviora, vel leviora fuerint; ita cum majori, aut minori fiant vitæ discrimine.

In quorum quidem confirmationem non deficiunt exempla ab iis omnibus petita, quae extra corpus animalium, & in ipsis animalibus observari solent. Enim verò cum multa coagulo hædino coguntur; alia multa non solum non coagulantur, sed etiam solvuntur; item & aceto, quo insuper efficaciter solvitur ferrum, cum non pauca ferro teneriora eodem aceto minimè solvi valeant. Similia prorsus de succo limonum, deque aliis multis dicere possumus. Oleum autem facilè solvit picem, & pici similia, quae quidem vel omnino non solvuntur, vel minima tantum parte solvuntur in aquis. Sal verò quo utimur in cibis, & ea, quae huic sali similia sunt in aquis facillimè, & in magna quantitate, in oleo difficulter, & in minima quantitate liquefcunt. Cantharides etsi extrinsecus applicatae cutem potius, quàm cuticulam exedunt, & venenum habent, quod in urinarum viis potissimum manifestatur, quoniam iis potissimum permiscetur, quae in renibus separantur; alia sunt, quae semen, potius tangunt, ut sic dicam, quàm urinas, alia aliud. Ac de viperæ subflavo venenoso liquore compertum est, quod ore sumptum nihil nocet, vulneri autem viperæ dentibus majoribus inflicto in exigua quantitate inditum, vel robustissimum enecat bovem, sic alia multa sunt, quae uno modo applicata, neque profunt, neque obsunt, aliae modo enecant, alio fortassis modo profutura.

Demonstrativa autem rationalis methodus, ut Galenus docet, (a) admittit ea, quae sensibus, & experimento comperta sunt, & ex iis, quae utcunque comperta sunt aliud, atque aliud quærit, & investigat. Estque ejusdem methodi præceptum non ignobile ab omnibus, qui ea uti solent, admissum, ad similitudinem eorum quae sensibus manifestantur; multa explicare eorum, quae sensibus minimè percipiuntur, si quidem exempli gratia sphaerarum majorum, minorumve, ut & pyramidum, & conorum aliorumque corporum similium eadem, simileve sunt proprietates.

Sic aliis usi clavis verbis *solvo*, *solvere*, *solvens*, *solutivum*, ut cuique facile patet febres nonnullae pestilenciales melius intelligi, & exponi possunt, quam per verba scandalii, *calor præter naturam*. Quandoquidem in corporibus animalium liquidæ substantiæ, nequaquam sic omnes fluere debent, ut nihil in unaquaque die coagulari possit, nihil coaguletur, nihil apponatur solidioribus partibus. Nam multa quotidie è solidioribus partibus dissolvuntur, multaque quotidie decedunt, quod vel in ungue manifestum est, qui
non

(a) De diff. feb. lib. I. cap. 3.

non est nunc idem, ac fuerit ante menses aliquot, neque post paucos menses idem erit unguis, ac nunc est, semper aliquid promovetur in ungue, deceditque; ut nisi quotidie etiam aliquid apponatur, addaturque ungui, brevi lapsu temporis nullus esset unguis. Sic similiter de aliis partibus omnibus dicendum est. Ac ut de homine potissimum loquar, quæcunque corporea sunt in homine continuo in fluxu sunt, & reparatione indigent, quod nisi fieret, brevi periret homo. Corporea quæcunque, & qualitates quæcunque corporum continuo in fluxu sunt. Calor quicunque, utcunque acceptus, humiditas quæcunque, utcunque accepta continuo in fluxu est, ut stupiditas sit in homine jam adulto calidum quærere insitum, sive nativum, stupiditas sit humiditatem aliquam quærere nativam, sive radicalem, aut alio quocunque nomine condecoratam. Omnia fluunt in homine: unaque tantum anima est ab his omnibus maximè differens, intelligendi enim vi prædita cum sit, arbitrioque utatur, omnino incorporea sit oportet, quæ à principio creationis ejus semper eadem est, æternumque duratura. Ac meritò laudaverim Erasistratum, Praxagoram, Philotimum, Asclepiadem medicos clarissimos, qui calidum innatum, sive insitum negabant, caloremque quemcumque ascititium esse docebant. Meritò damnaverim Galenum, qui heu nimium his delectatus vocibus, intelligendi etiam vim calido suo tribuat innato!

Sed reversus ad pestem dico iis etiam quibus fluidæ magis, quam conveniat, fiunt quædam substantiæ in homine, iis, quibus quotidiana appositio, nutritioque partium solidarum ex causa majoris liquiditatis impeditur, iis, quibus efficacius, & nimio, quam æquum est solvuntur solidæ corporis partes, febres pestilenciales fieri posse. Et jam pestis meminit Galenus, (a) in qua hæctica febres erant frequentes, sed ego existimo quavis hæctica multo breviores febres pestilenciales fieri posse ex majori partium dissolutione, & ex eo, quod substantiæ pleræque fluidiores quam conveniat, & minus, quam conveniat, coagulabiles sint.

Operæ pretium autem erit hic demum breviter enarrare, quæ nos observaverimus in peste, & quis modus reliquus sit homini sibi cavere ab ea, quæ nos observavimus. Qua occasione medicos etiam docebo quid profuturum, vel potius non profuturum sit cadavera inspicere eorum, qui hac peste à nobis observata surripiuntur.

In peste autem, quam ego observavi, fuerunt quidem homines, qui cum versati familiariter essent cum iis, qui peste erant affecti, peste tamen non laboraverunt, verum hi perpauci sane, & perquam rari fuerunt: Neque quicquam notatum est, quo præservati à tam dira lue fuerint: estque hujus rei tam obscura ratio, ut obscura, & occulta ratio propter quam alium, & rosa paucis quibusdam pro veneno fuerint, & ut obscura ratio est propter quam, qui semel variolis prehensi fuerint, ut plurimum à variolis in posterum immunitatem habeant. Cujus quidem morbi, ut & pestis, & aliorum multorum non dubitaret Galenus causas appellare *calorem præter naturam*. Sed stultus omnino est, & in Galeni doctrina parum versatus, qui existimat credidisse Galenum id, quod calor præter naturam ab ipso vocatum

tum est aliquod esse perceptu , & explicatu facile , ac multo stultiores sunt , qui per verba illa *calor præter naturam* existimant se doctiores esse . Item eorum , qui peste laborarunt , perpauci rarique admodum servati sunt : neque quicquam notatum est , propter quod servati essent . Dira lues facillime communicabatur integris , cujuscunque sexus , cujuscunque ætatis , cujuscunque gradus . Satis erat leviter tetigisse morbo affectum , satis erat tetigisse lintea , tetigisse pannos , quorum ægroto usus fuerat , vel prope ægrotum fuerunt , vel in eodem cubili fuerant , ad contrahendum morbum satis fuit aerem hausisse , qui circa corpus peste affectum erat . Lintea , panniculi præsertim lanei , quorum usus , aliaque similia ægrotis peste laborantibus longissime translata ad alias urbes , vel pagos pestis semina secum transportabant , aliosque populos , aliasque quascunque gentes inficiebant .

In his autem similibusque statim medicus pietate , & prudentia , quæ ex usu esse potest , domesticos monere debet de rei periculo , de his similibusque monere debet magistratus , ut commercia prohibeantur , ac ipse vitandus , vitare debet alios . Neque enim , tentando arterias pesti occurritur . Alio prudenti sanoque consilio opus est , de qua re non pauca scripsi in *lib. de militis in castris sanitate tuenda* , & fortassis aliquando integrum de his dabo tractatum . Et ex iis tantum , quæ occasione pestis Cuperfanensis facta , vel dicta sunt librum integrum possem conficere .

Omittam stultorum , & ineptissimorum , quos ego novi in similibus casibus stultitias , & errores , ne quemquam videar , injuria me velle afficere .



ILLUSTRISS., ET REVERENDISS. DOMINO
D. DIDACO VINCENTIO
A V I D A N I A,

*Regii Gymnasii Neapolitani moderatori strenuo,
 & integerrimo.*

L. A. P. s. p. d.

Multa eorum, quæ tibi narro Illustriss., & Reverendiss. Domine, iis etiam dicta existimo, qui in Cathedra primaria concedenda vota, ut nuncupant, habent, & non arrosas fabas dare solent. Ac nunc, ut ea confirmentur, quæ vel ore tenus, vel etiam scripto dixi, primus tibi, aliisque evidenter ostendam sententiam de febribus, quam Galenus tradidit in libris de differentiis febrium à Christianis damnandam esse.

Enim verò Galenus (a) febrium differentias primarias sumendas esse ab earum substantia opinatur: inquit autem *febris substantia in genere caloris, qui est præter naturam consistit*. Qui quidem calor præter naturam dictus Galeno sæpe sæpius non naturalis, extraneus, acquisitus, ascititius, aliisque similibus epithetis ab eodem appellatur. Quamobrem ut ea intelligantur, quæ sibi velit Galenus per verba illa: *Febris substantia in genere caloris, qui est præter naturam consistit*, necessum est examinare, quid sit Galeno calor secundum naturam, quid sit calor naturalis, vel intraneus, calor non acquisitus, ingenitus, primitivus, primigenitus, nativus, & non posteriorem animalis generatione: his enim similibusque nominibus calorem naturalem, sive nativum insignire solet Galenus. Qui etiam frequenter in suis operibus substantiæ, quam nuncupat *calorem nativum* inimicam, (b) contrariam, adversantemque facit substantiam, quam calorem præter naturalem, & extraneum appellat.

At Galenus pro calore naturali, sive nativo Naturam intelligit hominis: Animam intelligit hominis, ut videre est in libro de tremore, convulsione, & rigore. Sententia igitur, quam de febribus Galenus tradidit in libris de differentiis febrium à Christianis damnanda est.

Non autem corpuscula (sunt ejus verba) (c), & meatus statuemus corporis nostri elementa, neque calorem motus, aut attritus, aut alterius cujusdam causæ sobolem pronunciamus. Sed corpus quidem totum conspirabile, & confluxile censemus: calorem autem non acquisitum, neque animalis generatione posteriorem; verum ipsum primum, primogenitum, & insitum. Ac natura sanè, & anima nihil aliud, quam hic existit. Quare si substantiam
 per

(a) Lib. 1. de differ. feb. cap. 1.

(b) De diff. feb. lib. 1. cap. 6. & lib. 2. cap. 9.

(c) De trem. palp. convuls. & rigore cap. 6.

per se mobilem, & semper mobilem ipsum intelligas, haud errabis.

Cui quidem calori nativo (animæ scilicet secundum ejus sententiam) hostem facit, & inimicum calorem præter naturam, sive extraneum. Ac si quando calorem nativum superari inquit, vincique in pugna cum calore externo, animam intelligit superari, vincique. Si quando, inquit, calorem nativum languescere propter robustiorem in pugna calorem externum, animam intelligit languescere. Si quando, inquit, omnino vincente calore externo nativum calorem extingui, & mori, animam intelligit extingui, & mori.

Sententia igitur, quam de febribus Galenus retulit in libris de differentiis febrium à Christianis damnanda est.

Neque pro substantia, quam calorem nativum nuncupat intelligit Galenus animam aliquam inferiorem humana, siquidem facit calorem nativum intelligentem, majorique sapientia, & providentia præditum, quam cujusvis hominis adulti anima sit: inquit enim pluribus in locis calorem nativum gubernare, & regere materiam, & quæcunque sunt in homine, dicit calorem nativum sibi corpus sapienter effingere, multaue melius machinari ut corpus tueatur, quam quivis unquam architectus, aut sapiens artifex opus suum machinetur, & moliatur, sunt autem ejus verba: (a) *animalia verò non sic innatum ab eo, qui ea effinxit sortita esse calorem, sed ut ab illo augenda, & gubernanda. Nec ullum dari tempus, quo innatus noster calor per universam materiam ipsam non sit extensus, non eas solum facultates, quibus fingit obtinens, sed, & plerasque etiam alias; nam & nutrimentum ad se ipsum trahit, materiamque gubernat, apponit, agglutinat, assimilât, & ut semel dicam omnia secus, ac flamma, innatam sibi materiam efficit. Nam quæ unquam materiam, cui indita est, auget? quæ materiæ potius alimentum assimilât, quam sibi ipsi materiam? quæ denique tot machinationes, ut materiam tueatur invenit? nonnullas quidem partes circumvestiens, & claudens, ut nihil ipsis extrinsecus adhæreât, nonnullas vero perforans, dilatansque, canales præterea inserens, hos quidem, ut per ipsos nutrimentum attrahatur, illos verò ad refrigerium, & respirationem, simulque excrementa per alios quidem, crassa, per alios verò tenuia excernens! Omnem huc imprudens de particularum usu tractationem transferam, si singula naturæ opera enarrare voluero, quamvis hujus opinionis principes idem esse calorem innatum, & naturam dicant. Haud igitur eum recte igni assimilant, comparantque, ac corpora ab ipso corrumpi putant.*

Atque ex his iterum licet concludere sententiam de febribus à Galeno traditam in libris de differentiis febrium à Christianis damnandam esse.

Quibus addere possumus servata vocum *Calor*, & *Calidum* usitata significatione nulla arte ad rectum sensum doctrinam Galeni trahi posse. Quod forte, & ipse vidit Galenus, qui proinde aliud pro calore, & calido intellexit, quam vulgò vocibus illis significetur. In sermonibus autem quibuscunque ad humana, & terrena negotia spectantibus, usitatas nominum, & verborum significationes non servare ridiculum est: quod etiam non vacat suspicionem doli, aut inscitiae.

Qui

QUI PRINCIPES, QUI MINORES.
CALORES GALENO SINT.

Dllo Principes Galeno calores sunt in universa Medicina, Calor Nativus, & Extraneus, inimici inter se, bellaque gerentes. Reliqui autem minores calores motus, aut attritus, ignis, piperis, cinnamomi, aut rerum aliarum *soboles* sunt veluti Nervii, Ambanique, sunt veluti Sueffiones, aut Bellovaci, qui nunc erant ex partibus Cæsaris, Romanique exercitus, nunc deficiebant à Cæsare, pugnabantque adversus Romanum Imperium. Sic calor ignis nunc est pro partibus substantiæ, quam calorem nativum appellat Galenus, nunc pro partibus est caloris præter naturam, sive extranei. Sic calor piperis *soboles* nunc est pro partibus caloris nativi, pugnatque adversus præter naturalem calorem quartanæ febris, aliarumque non paucarum, nunc rebellans est pro substantia caloris extranei, pugnatque adversus calorem nativum, favetque febribus.

ARISTOTELEM IN GRAVIORIBUS, ET SOLIDIORIBUS
DESERVIT GALENUS, QUI LEVIORA DAM-
NANS, EPICURI PESSIMA OMNIUM
ADMISIT.

Non minùs ac intelligi, & explicari nequit, quid non sint tenebræ; nisi simul intelligatur, & explicetur, quid sit lux; ità profectò intelligi, & explicari nequit, quid sit, vel non sit Galeno calor præter naturam, sive extraneus, aut alienus, nisi quid eidem Galeno calor sit secundum naturam, sive intraneus, aut proprius simul intelligatur, & explicetur. Quæ consideratione omiſsa, Galeni de febribus doctrina intelligi nequit; siquidem per calorem præter naturam febrem, sive, ut ipsemet ait, febris substantiam definivit.

Videri autem Galenus voluit imitatus Aristotelis placita; (a) quibus habet; *putrefactionem esse proprii, naturalisque caloris in unoquoque humido existentis ab extranea caliditate corruptionem*. Sed postea in eo, quod maxime intererat non servavit Aristotelis sententiam. Quandoquidem nusquam, & nunquam id docuit Aristoteles, quod Galenus pluribus in locis malè asserit hominis calorem naturalem consilio, prudentia, & providentia præditum animam, naturamque esse hominis! Quin potius Aristoteles in libris de Anima pluribus clarè docuit hominis animam esse separabilem, & immortalem, quam dixit habere proprium, possibilemque voluit resurrectionem hominis. Aristoteles quicquid corporeum esset in homine, organum physicum, instrumentum physicum animæ appellavit. Ut proinde certò crediderim, non ab Aristotele, cujus videri voluit discipulus, sed ab Epicureo magistro accepisse Galenum ea, quæ mutatis vocibus de calido secundum naturam tradidit. Ac quidem, ut ipsemet refert, magistrum quandam habuit Epicureum; paternamque usque ad sydera tollit diligentiam,

Tom. I.

D d

ut

(a) *Meteorolog. lib. 4. cap. 2.*

ut rectè ab Epicureo magistro (a) ipse filius institueretur. Malè sanus, qui non cognoverit absolutè corporibus, quibuscunque, utcunque dispositis, & constructis quæcunque fiunt necessariò fieri. Cumque vel ipso naturæ lumine manifestum sit multa fieri in homine liberè, & summo arbitratu; apertè deducitur aliquod aliud incorporeum principium esse in homine, animam nempe, à quo ea dependent, quæ liberè fiunt: ut ego fusiùs tum aliis plerisque, tum iis Theologis, & Philosophis, qui hìc Neapoli in Seminario Archiepiscopatus me quondam audiverunt, Physicis tantùm rationibus publicè demonstravi. Ac profectò iis, qui in demonstrandi methodis sunt versati, ut versatos in iisdem debere esse Medicos Galenus jubet, ea, quæ breviter adduxi, demonstrationis Geometricæ vim habere facilè videbuntur.

Sed quoniam jam satis indicavi, ut Aristotelis in his sententiam non servaverit Galenus, non abs re fuerit aliquanto clariùs ostendere, ut in his, quæ de caloribus præter naturam, & secundum naturam tradidit, Aristotelem se fuisse imitatum videri voluerit. Verba ejus sunt: *rectè sentire videtur Aristoteles ab aliena (b) caliditate oriri putredinem. Vocat autem alienam externam non insitam, neque nativam in quocunque genere rerum: nam hæc coquere apta est, externa autem corrumpere, quod est putrefacere.* At quoniam Aristoteles non semel asseruit generationem unius alterius esse corruptionem, & è converso unius corruptionem esse alterius generationem, liquidò deducitur calorem (quidcunque id fuerit) uni substantiæ non naturalem alteri substantiæ naturalem esse, quippe principium corruptionis unius (hoc est calor præter naturam, quo aliquid corrumpitur) generationis alterius principium est, & è converso calor huic substantiæ naturalis alteri non naturalis est, siquidem non quicquam sine alterius corruptione constitit, aut constare potest. Quæ omnia non sunt aliena à Galeni documentis, quibus sæpe docuit, & præcipuè in libris de arte medicinali hæc omnia, & alia similia ad aliquid esse; hoc est respectivè, & secundum habitudinem quandam esse considerata, ut quicquid de salubribus, insalubribus, & de neutris dixerit ad aliquid esse, & pro varia habitudine, variaque ratione unum, idemque salubre, insalubre, aut neutrum dici posse non semel asseruerit.

Atque his omnibus facilè cum Aristotele convenire videri potest. Cæterum ubi calidum innatum, sive calorem naturalem, essentiam, naturam, animamque facit hominis, omninò ab Aristotele descivit. Aristotelem in gravioribus, & quæ magis vera essent, deseruit Galenus, qui leviora damnans Epicuri, mutatis nominibus mutuatus ab eodem omnium pessima est: ut quæcunque illius deteriora, & magis pestifera essent imprudenter admiserit. Sic iis accidit, qui in magno rerum discrimine nequaquam omnia circumspiciunt, neque satis omnia vident, & semper curtæ, deficientique in multis, humanæ fidunt sapientiæ. Qui sæpe cupientes evitare Caribdim, non tantùm in Scyllam, sed in vortices incidunt aquarum, & procellarum; quibus quælibet magna navis in profundum abissi trahi possit. Nonnullos autem Galeni sectatores eorum, quæ per voces istas, *calor naturalis*, &
non

(a) Lib. de dignoscendis, curandisque animi morbis cap. 8.

(b) De differ. feb. lib. 2. cap. 9.

non naturalis, à Galeno significarentur, hætenus excusavit ignorantia, & incuria indagandi quid calor sive naturalis, sive non naturalis Galeno esset. Nam rerum difficultas meliora, & saniora de febribus quærendi, & inveniendi non potest quenquam excusare, & quamvis febrium natura inventu, & explicatu difficilis sit, accusandus tamen in his, & dammandus sine dissimulatione ab omnibus Galenus est.

QUID SIT FEBRIS.

IN rerum omnium sedula inquisitione de hominum placitis, ea potissimum vera esse existimavi, in quibus cuncti convenirent. De febribus autem video omnes una mente, & uno ore credere, atque fateri eas cordis esse affectiones. Quo circa rectè mihi videor hoc ipsum assumere, in quo omnes conveniunt, febres cordis esse affectiones. In corde autem præcipuè considerandus motus est, quo quædam manifestò in circulum aguntur, quædam etsi non agantur in circulum, attamen moventur, & promoventur, nec non eodem motu cuncta palpitant. Ac profectò eas partes palpitare, quæ majoribus arteriis ad cordis motum motis proximæ adjacent, omnino manifestum est, & vel oculis etiam patet: alias verò partes minoribus, & obscurioribus arteriis contiguas similiter, sed obscurius palpitare necessum est.

Neque quicquam sanè effatu dignum vivente animali, & pectore non perfollo de corde, & affectionibus cordis Medici, aut Philosophi quicunque dicere norunt; nisi per ea, & secundum ea, & propter ea, quæ in motu ejusdem percipiuntur, cujus motus cessatio mors est, vel saltem lypothymia, aut syncope est, malum morti proximum. Ac si quid aliud excepto motu de corde dicunt, illud totum fictum est, & ut plurimum omnino fabulosum. Nam nullis indiciis vivente adhuc homine, & pectore non perfollo de corde quicquam certò affirmare possumus; nisi quod moveatur, rectè, vel malè moveatur. Neque quod cesset (ut per breve tempus accidere potest) certò dicere possumus: nam dari possunt, & quandoque sunt cordis quidam motus, qui non communicantur ad partes exteriores.

Multa quidem in animalium corde, & circa cor reperta fuisse retulit Galenus, & in simiæ pericardio tumor ab eo est observatus humorem in se continens qualem pustulæ (Græci hydatidas vocant) emittere solent, & in gallo vidit eandem cordis tunicam scirrhuso tumore affectam. Sunt qui adiposam substantiam intra cordis ventriculum, & adipis majorem, minoremve quantitatem circa cor repererint, carunculas præter solitum, polypos, pituitolasque concretiones, carnes glandulosas, vermes, calculos sunt, qui repererint. Verùm hæc omnia dissectis corporibus post hominis mortem observata fuere. Ac priusquam claustra pectoris aperirentur, licèt multis malis, afflicti ægrotantes in laboriosa vita fuerint, de his, similibusque, quæ cordi accidunt, Physici, atque Medici quacunque industria, & diligentia usi certi nihil, exploratique nihil pronunciare potuerunt. Illud unum superest: rectè, vel non rectè moveri cor! Ex quo, ut multa præteream, quæ magis, minusve rectè conjectant homines, illud profectò minùs rectè, & minùs certè deducitur calidius, vel frigidius cor esse. Enim verò cum quicquid est Cælo, Terraque, Marique celerius, vel tardius, & æqua-

liter, vel inæqualiter moveri possit independenter ab eo, quo aliquid calidum, vel frigidum dicitur, vel, si aliter placeat dicere, independenter ab eo, quod calor, vel frigus vocatur; Nulla prorsus ratio est, propter quam cor similiter velocius vel tardius, & æqualiter, vel inæqualiter independenter ab eo, quo aliquid calidum, vel frigidum appellatur, moveri non possit.

Conceptus motus separabilis omnino est ab omni conceptu ejus, quod calor, vel frigus nuncupatur, & separabilis omnino est ab omni conceptu ejus, quo aliquid calidum, vel frigidum appellatur. Ac proinde corpus quodlibet sive velocius, sive tardius, & æqualiter, vel inæqualiter independenter ab eo, quod calor, vel frigus dicitur, & independenter ab eo, quo quicquam calidum, vel frigidum nuncupatur moveri poterit. Quamobrem etiam cor sive velocius, sive tardius, & æqualiter, vel inæqualiter moveri poterit independenter à calore, vel frigore, & independenter ab omni eo, quo aliquid calidum, vel frigidum vocatur.

Quod si Deus Omnipotens nobis propitius auferat è medio id, quod calor, vel frigus dicitur, & auferat è medio id, propter quod corpus (quodcunque illud sit) calidum, vel frigidum appellatur, nulla omnino ratio est propter quam his etiam sublati corpus quodlibet, & consequenter Cor rectè, vel non rectè, velocius, vel tardius, æqualiter, vel inæqualiter moveri non possit.

Ac quidem etiam in extrinsecis viventium corporum partibus Medici, adstantes, aliique omnes nisi re manibus probata, & explorata omnino ignorant calidi ne, an frigidi pedes, vel manus ægroto sint. Qui quandoque facto manu periculo, genarum alteram frigidam esse dignoscunt, alteram calidam, & altera parte nasum calidum esse, altera frigidum; ac nonnunquam neque ægroto, neque adstantibus omnibus hæ partes similiter videntur. Quomodo quæso de corde unquam ullis indiciis dicere potuere, vel poterunt, quod calidius, frigidiusve sit!

Scio nonnullos cum Galeno (a) dicere posse hæc, atque similia quæ dicuntur de calore, & de frigore, aut de calefacientibus, & de refrigerantibus non esse intelligenda secundum sensum, neque secundum imaginationem, sed secundum potentiam, ac scio ea, quæ dixerit expositorum aliquis in istorum excusationem de iis, quæ per accidens, vel per se calida, vel frigida dicuntur. Sed hæc atque similia omnia sunt atramentum effundere, ut melius latitent sepiæ. Atque sublato sensu, & imaginatione, & sublati iis, quæ sub sensum, & imaginationem cadere possunt, omnis è medio tollitur calor, omnis è medio tollitur frigus, vel saltem omnis istorum è medio tollitur scientia. Nec non his iisdem quoniam non sunt secundum sensum, & secundum imaginationem, confirmatur nihil omnino certi, exploratique de cordis, aut calore, aut frigore ante obitum, & non perfosso pectore homines posse pronunciare! Vel dicendum est complures cum Galeno omnino aliud his, similibusque vocibus intelligere, ac communi, & idcirco rectiori virorum, fœminarumque, & Christianorum omnium usu intelligatur.

Cum

(a) De arte Medicinali lib. 3.

Cum igitur tam Physici, quàm Medici, & ægroto peritiores adstare consueti nedum alii levioribus titulis appellati certò, & manifestò sæpe sæpiùs pronuncient hominem febre laborare, & hominem habere febrem frequentissimè certò cognoscant, & unanimi sapientum omnium consensu omnes affirmant febres cordis esse affectiones, omnino dicendum est febres in eo consistere, quod homini datum est de corde cognoscere, nimirum in cordis motu vitioso consistere febrès. Quoniam ex omnibus, quæ vivente animali, & non perfoſſo pectore cordi accidere possunt; Medicis, hominibusque omnibus cognoscere tantum datur, quod rectè, vel non rectè moveatur Cor.

Quæ eo faciliùs admittenda, quo plerique acerrimè inter se pugnantes, singuli in propria sententia defendenda ferventes animo, neque pauca quidem verba de febrium natura dicere queunt, absque eo, quod aliquem motum vitiosum in febribus accusent. Ac omnes cum febres quærunt, sint ne, an non sint? semper perturbati, & irritati aliquid sit ne, an non sit? in arteriarum, & in cordis motu inquirunt.

Confirmantur etiam, quod ex his, quæ dicta sunt, nullus ante diem ad orcum dimitti potest. Cum contra audientes homines in calore febres omnes consistere præter naturam, facilè decepti vocibus refrigerium quærentes in febribus omnibus, maximè in gravioribus se se poterunt enecare.

CORDIS MOTUS QUANDOQUE VIDERI POTEST RECTUS, CUM RECTUS NON SIT.

ID assumens, quod omnes fatentur febres cordis esse affectiones, cum ostenderim febres in vitioso, & irritato cordis motu consistere, de hoc eodem cordis motu animadvertendum est, quod aliquando videatur rectus, & ut sanis esse solet, cum rectus non sit. Quod instrumentis motuum omnibus accidit, quæ aliquando videntur rectè moveri, cum minùs rectè moveantur. Fit autem id irritatione, irritationique similibus motibus, quod exemplis illustrabitur.

Sunt qui podagra impediuntur, qui imminente periculò ambulant: Sunt, qui ægotantem manum languidè moveant: Sed acu puncti celeritate, qua solent sani, manum retrahant, amoveantque ab acu. Sunt æqui laxi ab itinere, qui calcaribus stimulati currant. Lucertulæ cauda abscissa movetur longiusculo tempore, postea quiescit: Sed si pungantur, iterum volvitur, & revolvitur. Viperæ etiam decorticatæ natant in frigida; irritatur enim aliquid adhuc latens in musculis. Ità inquam, accidere potest, ut irritatione ejus, quo cor movetur, cor quod languidè moveretur, assurgens aliquantulum validiùs moveatur, faciatque speciem ejus motus, qui solet esse sanis.

Prudens autem hæc dico, quoniam scio quandoque Medicos (rarò tamen) febrem dicere adesse, eamque malignam; cum pulsus, motusque arteriarum, & consequenter cordis rectè videantur procedere, & tactus etiam non sit malus. Verùm alii secuti fortè Cornelium Celsum possunt negare tunc febrem adesse, etsi homo brevi postmodum moriatur, vel quia homo sine febre perire potest, vel quia aliis morbis paulò ante mortem potest febris

bris supervenire. At ego admissis febribus rarioribus, in quibus cor rectè moveri videatur, dico quod re vera in illis cor haud rectè moveatur. Enim verò interrogo in his vires languidæ ne, an validæ sunt, & an tam validæ sunt, ac sanis esse solent? Si cor rectè moveri videatur, & vires corporis tam validæ sint, ut sanis esse solent; quantum spectat ad cor, & ad ea, quibus cor movetur, animal sanum est. Si cor ita moveatur, ut sanis moveri solet; verùm vires corporis languidæ sint, tunc credendum est irritatione aliqua cor moveri similiter, ac sanis moveri solet, & proinde febrem adesse. Et Medici in his similibusque dicunt pulsum esse mendacem, esse fallacem: quod hoc ipsum est, quod dixi pulsum non esse rectum, & hominem habere febrem: nam qui mendax, & fallax est, rectus non sit oportet.

Sunt seniores, quibus motus cordis, & pulsus intermittat, deficiatque vibratione aliqua, & in cæteris se habeant, ut reliqui homines, quos non semel vidi malè se habuisse, cum nulla in pulsibus esset intermissio, irritatione scilicet aliqua cordis, & arteriarum motus non intermittebat. Nobilem novi Neapoli degentem, & Romæ puerum, quibus ex ortu pulsus intermittit, cum in omnibus benè se habeant. His accidere potest in febribus, ut pulsus non intermittat. Avulsam vidimus, dissectumque cor irritatione aliqua iterùm palpitasse: quod quantum nunc memini Galenus etiam observavit. Ac proinde credendum est, multò facilius accidere posse viventi cordi, quod præ virium languore languidè, & minùs rectè moveretur; nisi irritatione aliqua, vel alicujus causæ effectu, quem irritationem appello, validiùs moveatur; ut rectè moveri videatur, faciatque speciem pulsus sanorum.

REVERA, NEQUE DE ALLIO, EXEMPLI GRATIA, AUSUS
EST GALENUS, DICERE, QVOD CALIDUM IN SE
IPSO, AUT FRIGIDUM IN SE IPSO SIT.

Is, qui in Galeni libris aliquo modo versati sunt, cum frequenter legant hoc, vel illud calidum, vel frigidum esse, facile videbitur falsa propositio nostra. At in scriptoribus non debemus ea semper attendere, quæ scribuntur, cum de re quapiam non agunt ex professo. Ac si mille in locis cum de re aliqua non agunt ex professo, verba usurpent, quæ sensum quendam faciant; sed uno tantùm in loco, in quo de re illa ex professo agunt, explicent verba in alio sensu, existimo plus valere locum unum ad indicandam Scriptoris mentem, quàm mille valeant sententiunculæ ex aliis locis excerptæ, & simul contextæ.

Visus autem mihi est Galenus in libris potiùs de simplicium medicamentorum facultatibus de calido, & de frigido ex professo pertrastasse. (a) In quibus cæterum, inquit, *logicas methodos ignorantes opinor, Medici primum in hoc maxime peccant, quod propriis finibus excedant: nimirum cum sufficiens sit experientia, junctis saltem paucis quibusdam epilogismis, medicaminum vires exquirere, deinde tam fædè in rationibus hallucinantur, quam*
pueri

(a) De simpl. medicament. facult. lib. 2. cap. 3.

pueri modo speculationem logicam ingressi. Eisdem erroribus tenentur, qui ex odoribus medicaminum facultates conjiciunt. Nec enim quicquid bene redollet calidum est (quod quidam dictitant, haud intelligentes, quo pacto inaudire oporteat, quæ ab Aristotele, & Theophrasto super hac re sunt prodita, ea, quæ nos in quarto harum commentationum definiemus) neque quicquid calidum est bene olet. Quin etiam neque si quid grave olens est (allium nempe) calidum etiam fuerit: neque si calidum, etiam grave olens. Sic nec si quis quicquid graviter oleat, frigidum dicat, nec si quicquid frigidum sit, graviter olere verum dixerit. Siquidem calidorum innumera sunt partim bene olentia, partim graviter olentia, partim neutra: Similiter quoque frigidorum. Quanquam quid calida dico, aut frigida? cum debeam dicere calefacientia nos, ac refrigerantia, quæ utique etiam exquirimus. Nec enim quod absolute calidum est, aut quod ad hoc expenditur, nunc considerare propositum est, sed quod corpus humanum excalefaciat, nec sane etiam, quod absolute frigidum, sed quod hominem refrigeret. Denuò ergo hic hallucinantur in homonymia haud distinctis nominum significatis, tanquam si quis de cane terrestri differens, ad marinum se oratione transferat, existimans, ut animantis utriusque nomen, ita & naturam quoque ipsorum unam esse.

Similiaque his dixerat (a) libro primo cap. ult., ne dum frigida, & calida, sed ficca, & humida etiam comprehendens, ubi voluit ficcatoria potius, quam sicca dicenda esse ea, quæ hominem ficcant, & calefactoria potius, quam calida ea, quæ calefaciunt. Quippe non quale ex se sit, sunt ejus verba, & ad totam naturam consideramus; nam hoc pacto neque acetum, neque marinam aquam nos exiccare posse, aut sicca esse facultate dici manifestum est, siquidem utrumque illorum actu est humidum. Verum si nos exiccare appareant sicca dicentur, ad nos videlicet, & nostram naturam, quod perinde est, atque ficcatoria esse. Quin etiam & calida, & frigida, & humida eodem dicentur modo, ubi nos scilicet calefaciant, refrigerent, atque humectent: eaque ad nos non ad nostram substantiam, nec ex se. Quæ autem calefactoria sint, quæ refrigeratoria sola experientia constare inquit: (b) quam, qui relinquunt, & aliunde ratiocinantur, non solum falsa pro veris dicunt, sed etiam traditionis utilitatem subvertunt.

Cæterum cum totius naturæ, temperamentum, calidique innati meminit, & cum alias similes voces usurpat, quas sæpe confundit, & unum, idemque pro illis intelligit, sæpe disjungit, & aliud, atque aliud pro iisdem intelligere videtur Galenus, caute legendus idem est, & semper in magna esse debemus suspitione, ne aliud indicet, quam mens humana, vel capere possit, vel Christianorum pietas admittere debeat. Et satis ille ipse nos monuit, dum ejus meminit, (c) qui de cane terrestri differens, ad marinum se oratione transferat.

(a) De simplic. med. facult. lib. 1. cap. 38.

(b) De simpl. medic. facult. lib. 1. cap. 36.

(c) De simpl. medic. facult. lib. 1. cap. 3.

RE VERA NULLUS UNQUAM HOMINUM MOTUM EXCLU-
SIT A FEBRIUM ESSENTIA, AC VELUTI NA-
TURÆ LUMINE NOTUM EST, FE-
BRES IN VITIOSO CORDIS MO-
TU CONSISTERE.

Antiquorum sententia fuit febres omnes in vitioso cordis motu consister-
re, quam antiquiores Romani ab Erasistrato fortè acceptam tenebant,
& tuebantur, eratque communis inter Romanos Medicos Marci Tullii Cice-
ronis temporibus, qui libro de fato inquit: *Si cui venæ sic moventur, is ha-
bet febrem*, videlicet in tali, atque tali febres consistunt venarum motu,
nam *si cui venæ sic moventur is habet febrem*. Pro iis autem, quæ moven-
tur venis latinorum omnium, & Cornelii Celsi Medici clarissimi, & diser-
tissimi more arterias intelligit, at arteriæ omnes in motibus cordis sequun-
tur motum. Arterias salientes venas appellavit Ovidius, *Dumque suo ten-
tat salientem pollice venam*: Et credibile est, quod tunc temporis Medici
pollice tantum tangebant salientes venas, pulsantes scilicet arterias, ut febres
explorarent. Ac Virgilius magis accedens ad veritatem. *Salientem sangui-
ne venam*, dixit, arteriam scilicet sanguine salientem. Medici, alique
omnes, ut res vulgaris esset, ex percepta tantum in salientibus venis mo-
tus variatione, & perturbatione, alterati motus cordis indicium, hominem
febrem habere pronuntiabant.

Hujus sententiæ (a) fuit Erasistratus Hippocrate non inferior, Aristo-
telis ex filia nepos, primum ex Galeno, secundum ex Plinio habemus. Ac
Erasistrati Romæ pluribus seculis secta viguit, ut etiam à Galeno accepimus.
Quibus verisimile nimis fit ab Erasistrato accepisse Romanos Medicos in
motu arteriarum febrium essentiam contineri, quod idem est, ac dicere in
vitioso cordis motu (irritato scilicet) febris consistere: nam à corde potis-
simum moventur arteriæ.

Chrysippus etiam magni nominis Medicus eandem habuit de febribus
sententiam, ut habemus ex eodem Galeno.

At Erasistratum, & Chrysippum, etsi clarissimos viros, hac de re hallu-
cinatos appellat Galenus. Videamus igitur, an vi quadam veritatis, quæ
sæpe nolentibus, natura ipsa docente, manifestatur hominibus, hoc ipsum
admittat, quod negat Galenus. Hic unum, aut aliud, vel plura, aut pau-
ciora concedens, aut negans febribus particularibus, constanter tamen omni-
bus, nulla prorsus excepta, pulsuum concedit variationem, & alterationem,
perturbationemque à statu naturali, omnibus scilicet motus cordis variatio-
nem, alterationem, perturbationemque à statu naturali concedit. Febrium
igitur omnium essentia in eo consistet, in quo febres omnes secundum Gale-
num conveniunt, in motu scilicet cordis vitioso, sive alterato, sive pertur-
bato. Quod illud ipsum est concedere, quod negabat Galenus.

Non in omnibus febribus urinæ coctæ, aut non coctæ sunt Galeno.

Non

(a) Galenus in 6. Hipp. librum de morbis vulgar. comm. primo tex. 29.
lib. med. sive introductio cap. 13.]

Non in omnibus febribus calor suavis, vel insuavis est Galeno. Suntque febres in quibus frigus potius, quam calor molestus sit, quod etiam Hippocrates cognovit, & Germanis febris quædam das Kalte, frigus nempe nominatur. Suntque complures, eaque graviores quæ calefacientibus potius, quam refrigerantibus sanentur, quarum non pauca Galeno innotuere. (a) Qui affectum in quo calorem, & frigus simul sentiunt ægrotantes, febrem cum Archigene appellavit, refertque Atticos omnes, qui etiam rigorem, febres plerasque antecedere solitum, hepialam febrem dicebant,

Non febribus omnibus inflammatio, aut tumor alius, aut ulcus, aut alvi profluvium, lienteria, aut dysenteria, aut vomitus associatur secundum Galenum. Non omnibus marcor adest corporis, sive marasmus secundum Galenum. Non omnibus, qui febrem patiuntur, oculi concavi sunt, foveisque reconditi, non omnibus (hæc omnia secundum Galenum) ossa prominent orbitarum oculorum, non omnibus squalor, non omnibus somnus immodicus, aut vigilia, non omnibus in febribus carnes contabuerunt, non omnibus præcordia contracta. Non eos solum apprehendunt febres, qui licciores, aut eos solum, qui humidiores sunt. Non omnibus summa cutis, aut linguae superficies densa, vel adstricta, vel aspera, vel mollis, vel dura, vel arida, livida, flava, aut alia præter solitum est. Non in omnibus aliqua peculiaris visceris obstructio adest. Non in omnibus oculi rubicundi, aut pallidi, aut alii, aut sordes in ipsis siccae, aut humidæ sunt. Non in omnibus adest plenitudo, aut quam dicunt cacochymiam, vel gravedines, aut destillationes adsunt, aut amplissima significationis catharrus adest. Unus motus cordis pulsusque arteriarum diversimode aut variatus, aut alteratus, aut perturbatus, aut aliquo modo vitiosus, sive in principio fuerint febres, sive in ascensu, sive in statu, sive in declinatione, febribus in omnibus non contradicente Galeno reperitur. In hoc uno igitur motu cordis aut variato, aut perturbato, aut alterato, sive (& fortè melius uno verbo rem significantes) irritato, ut dignoscitur ex motu arteriarum, febres omnes secundum Galenum consistunt: etsi Erasistratum, & Chrysippum Medicos etiam secundum Galenum clarissimos in his hallucinatos idem Galenus dixerit.

Nostratibus, atque alienigenis licet capite, vel renibus, vel pedibus homo doleat, vel pus per nares, aures, oculos, os, aut inferne excernatur, licet plus, minusve impuritatum urinis, aut alvo, vel etiam aliena, & insolita ejiciantur, licet spiritus facile, aut difficulter ducatur; nunquam febris est, nunquam hominem febris molestare dicitur; nisi cum cor dignoscunt, explorato motu arteriarum, aliter moveri, ac cum sanus homo est, moveri solet.

Tedet me jam rei Medicæ Scriptores omnes huc adducere, & eorum sententias de febrium natura examinare. De omnibus autem contraria sententibus libere ausim pronunciare, quod etsi alias, atque alias tradant febrium definitiones, doctrina tamen ipsorum melius considerata, facile deprehenditur, eos non excludere motum à febrium essentia: natura videlicet multa docet homines, qui non rarè id ipsum opere, & exercitio concedunt, quod studio vincendi, & ambitione in disputationibus negant.

HECTICÆ FEBRIS

I D E A.

FEBRIS est species quædam, quæ hectica, sive habitualis ab omnibus appellatur. (a) Cujus nominis duplicem rationem reddit Galenus, vel quoniam firma, ac solutu difficilis est, quemadmodum habitus, vel quoniam ipsum corporis habitum comprehendit. At fortè, ut ex iis colligere datur, quæ retulit Galenus, Erasistratus, & Chrysippus dicerent febrem hecticam, sive habitualement dici, vel quia in ea, si non est ablatum, saltem est imminutus, & læsus antiquior semper vegetantis corporis habitus, qui est vegetandi, vel quoniam per ea suscitatur in corde, quæ malæ fiunt in vegetantis corporis habitu. Quæ binæ ex utraque parte rationes, fortassis in unam ex utraque parte coincidunt: utramque tamen exponemus, veluti diversæ essent, ac postmodum facile cognoscemus, si quid ipsæ habeant, in quo convenient: atque item facile dignoscetur, quid Galeni, & Erasistrati, sive Chrysippi sententiæ differant.

Cum autem vox habitus multipliciter accipiatur, consulto omittens multa, quæ dici possent minus spectantia ad rem præsentem, ea considerabo, quæ magis, è re medica sunt. Ac quidem ex iis, quæ communiter admittuntur, retineo habitus ex frequenti ejusdem, similisve actus repetitione acquiri. Ut si quis rudis, & imperitus digitis fatigare cymbala, qui tam ineptas manus habeat, ut dum unam chordam movere velit, moveat pulsetque aliam, vel plures, aut pauciores, quam conveniat eodem tempore agitet: hinc paulatim, atque paulatim sese corrigendo, manusque exercendo, frequentioribus actibus fit minus, atque minus rudis. (b) Cui tandem solvuntur manus, solvunturque digiti, ut vel nutui motu obediant celeri, & postmodum non minus in manuum, digitorumque motu harmonia quædam observetur, ac agitatae cymbali cordæ dulcem reddant melodiam. Exercendo manus impedimenta auferuntur ab organis manuum, musculi, tendinesque fiunt homini facilius, celeriusque mobiles, ligamenta musculorum facilius cedunt motibus, dactili, capitulaque ossium circa aliorum ossium foveas fiunt magis volubiles, omnia, non minus ac ferrum, exercitio fiunt minus rudia, magis obsequentia, & apta ad opus: ut nonnunquam his quibus habitus acquisitus est, etiam si nihil ipsi cogitent de cymbalis, manus digitique harmonice moveantur, veluti si cymbala, aut citharas tangerent. Qui quidem habitus, similesque semel acquisiti difficulter longa inertia, longave desuetudine deperduntur: possunt tamen vel vulnere, exempli gratia, manibus inflicto, vel nodosa chiragra momento temporis extinguere. Non pauci alii sunt habitus in hominis corpore considerandi,

(a) De diff. feb. lib. 1. cap. 7.

(b) Ferreis etiam instrumentis artificum accidit, exercitio fieri magis apta.

di, qui sæpè adveniunt absque eo, quod mortalium ullus de illorum acquisitione quicquam cogitet. Inde fit puellulos, neque manibus, neque pedibus, neque oculis, neque auribus, aliisque instrumentis corporum recte uti, qui ineuntibus annis paulatim, atque paulatim habitum acquirunt, quo iisdem organis rectius postea, & facilius utantur, impedimenta quoque etiam, & imperfectiones, quæ prius erant in membris auferantur.

Sed, quod magis spectat ad hæticas, hoc est habituales febres, illud consideratione dignum est, nullum opus, nullum actum, nullamve actionem omnium, non inquam tantum frequentius, verum constanter adeò, & perpetuo toto vitæ decursu exerceri in homine, ac partium nutritio. Uno excepto indeficienti motu cordis, reliqui actus, sive actiones omnes, reliquæ operationes, quæcumque illæ fuerint, vel noctu, vel diu ex pluribus causis intermittunt: ut verum omnino sit dicere, hominem in vitæ decursu neque semper ambulare, neque semper speculari, neque semper videre, neque semper audire, neque ex aliis omnibus quicquam esse, quod perpetuo, & sine intermissione fiat. Verum supposito cordis motu, sine quo animal mortuum est, una nutritio, aut aliquid eorum, quæ ad nutritionem, & vegetationem pertinent, constanter, perpetuo, & sine intermissione magis, minusve peraguntur. Atque hæc huiusmodi sunt, ut ab ipso primo conceptionis momento, si nihil morbi accedat, quo illa turbentur, nutriatur ad certum tempus, & augmenti terminum, & augeat corpus hominis, quo tempore præterito usque ad extremum senium nutriatur quidem homo, sed minus, atque minus, & tabidus, ut Galenus ait, sine morbo fiat, ac tandem marcore confectus naturaliter, & sine morbo estinguatur. Verum & virilem ætatem agentibus, & juvenibus, & pueris etiam marcor, sive tabida senectus ex ægritudine fieri potest, quod docuit Philippus antiquus plane Medicus, (a) confirmatumque à Galeno est, qui Philippon refert. Videlicet multa accidere possunt in vitæ decursu, quibus ratio, nutritionisque modus pueris etiam perturbetur, & plus quotidie decedat partium corporis, ac dietim addatur, & proindè marcore demum sive virilis ætatis homo, sive juvenis, aut puer conficiatur, properetque his senectus, ut Philippo, & Galeno placuit. Quod malum grave sit oportet, & solutu difficile, An quoniam id turbat, atque impedit, quod ab ipso conceptionis exordio institutum maximè fuit, quodve sine ulla intermissione toto vitæ tempore peragitur? Sed præter eundem non est paucis diebus contra antiquum novum induci habitum, quo fiat nutritio difficilior. Sic assueti pleniori cibo, quem rite concoquant, si minus, atque minus assumant, paucis diebus semper magis, atque magis inepti fiunt ad pleniorum cibum ritè concoquendum. In quibus non tam eorum, quæ fluunt motus, quàm in minorum partium minoribus organis mala structura, & mala conformatio, pororum, aut rerum aliarum figura mala, magnitudo mala, numerus malus, aliaque, quæ ad structuram, conformationemque pertinent, mala considerata sunt. Quæ omnia difficulter restituntur, maximè si plures, & plures partes, aut etiam totum corporis habitum occupaverint.

Virilis autem ætatis hominibus, junioribus, atque pueris marcor ra-

E e 2

rius

(a) Gal. de diff. feb. lib. 1. cap. 8.

rius fit sine motus cordis alteratione , perturbatione, five irritatione: hoc est sine febre . Quæ marasmodies proinde dicitur , atque hæctica : videlicet habitualis , quoniam secundum Galenum veluti habitus difficulter solvitur . Et re vera secundum Erasistratum , atque Chrysippum cum jungatur eo , quod contra habitum est ; five ex eo pendeat , quod contra eam consuetudinem partium est sese bene, recteque nutriendi , non leve malum sit oportet . Febris autem nequaquam semper marcori conjuncta est : nam id , quo marcor , & mala partium nutritio fit , non semper hujusmodi est , ut cordis motum alterare, perturbare, five irritare valeat . Sic neque semper ab apostemate, five ulcere , aut vulnere fit febris , neque cruditas , neque iëteritia , quod notavit Galenus , neque catharrus, neque ira, neque tristitia , neque ebrieta-tes, neque alia hujusmodi semper febrem faciunt .

Altera ratio , quam affert Galenus, quare febres quædam hæcticæ , five habituales nuncupentur , est quia ipsum corporis habitum comprehendunt: hoc est universum corpus , & partes potissimum solidas, quæ habitus corporis nomine veniunt . Cum autem universus corporis habitus varias habeat partes in plerisque sane nimium , atque nimium differentes : aliquid reperire necessum est , in quo omnes conveniant , similesque quodammodo sint, quod in febre, quæ hæctica , hoc est habitualis dicitur , maximè lædatur . Id autem est nutritionis opus . Multa quidem fiunt visus organis, quæ non fiunt organis auditus , multa fiunt pedibus , quæ non fiunt manibus, si cujuscumque partis aliquod est peculiare munus , verum omnes conveniunt in eo, quod omnes perpetuo vegetent , & continuo nutriantur , vel aliquid præstent ad nutritionem coordinatum . Nutritionis igitur opus secundum Galenum in febre habituali læditur . Quod ipsa constat experientia , & in hujus rei confirmationem satis esset ante oculos ponere hæctica febre laborantem hominem , & non quidem in principio cum res minus sensibilis est , & propterea difficulter cognoscitur, sed cum malum altius increvit . Qualem descripsit idem Galenus , qui confirmatam , provectamque hæcticam tabidam etiam appellavit , & disertissime hæcticum tabidum posuit ante oculos . (a) Cui oculi concavi, foveisque reconditi , prominentiaque ossa orbitarum, quibus palpebræ annectuntur , sordes circa oculos sicæ , squalor in tota facie , qui cum non dormiat , vigilare nequeat . Cui carnes contabuere , tempora concava , & collapsa sunt, qui nihil aliud est , quàm ossa , & cutis . Quæ omnia , atque alia similia nihil aliud significant , quàm præter pulsum, motusque cordis mutationem , alterationemque, five potius irritationem , hoc sibi proprium febrem hæcticam , five habitualement vindicare corporis habitum emungi , emaciari , ac tandem marcore confici . Ac quidem in febre hæctica corporis habitus læditur : nam propterea dicitur hæctica . At oculi ex corporis habitu sunt : igitur oculi læduntur in febre hæctica . An quia non vident , aut male vident oculi , aut quia calidiores , aut frigidiores sunt , læsi dicuntur in febre hæctica ? Nequaquam , vident siquidem , neque nimis calidi ; aut frigidi sunt , calidioresque sæpe sunt iis , qui ophthalmia laborant , ac si in hoc malum consisteret secundum Hippocratem facile levarentur agroti ! Sed concavi apparent , foveisque reconditi , extenuantur
sci-

(a) Gal. de differ. feb. lib. 1. cap. 9.

scilicet, & diminute sive multo minus, quàm conveniat, nutriuntur. Aures ex corporis habitu sunt: igitur aures læduntur iis, quos habitualis febris habet. An non audiunt aures, vel calidiores, aut frigidiores sunt? Nequaquam: siquidem audiunt, neque calidiores. aut frigidiores sunt, quàm in aliquo abscessu ex: gr: , qui in auribus consistat! Verum emaciantur, & contabescunt partes omnes, quæ aurium constituunt organa: hoc est nutritio, & restauratio partium utriusque auris potissimum læditur in febre hectica. Sic inquam de musculis omnibus, de visceribus, de manibus, aliisque partibus, quæ ex habitu sunt corporis, non deperit proprius, cujusque usus, quo distinguuntur invicem, sed nutritio paulatim, atque paulatim deperit omnibus, nutritio deperit, quæ communis est omnibus. Quid aliud sunt hectica febre prehensi, inquit Galenus, cum ultra manifestum jam omnibus malum provectum est, quàm ossa, & cutis! Videlicet id ex Galeno sibi vindicat hectica febris, quod in ea universi corporis habitus continuo quidem, ut fieri solet, & fortè largius, quam fieri soleat, dissipetur, & dissolvatur, verùm nutritio, repositio, sive restauratio ejusdem habitus per nutritionem aut non fiat, aut diminute nimis fiat, ut properante per ægritudinem senio, ut Philippus à Galeno relatus agebat, pereundum, fatisque ante diem cedendum sit.

Pulsus autem inquit Galenus iis, qui febre hectica, & maximè tabida laborant, esse tenues, duros, debiles, & frequentes. Quod si hujusmodi non sint, modo continuo febriles sint, & ex eo tales sint, quo habitus corporis extenuatur, & contabescit; hectica, ut patet ex ipso nomine, sive habitualis febris dicenda est.

Placeat autem nonnulla his addere ad naturalis marasmi majorem intelligentiam: ac multa quidem ex universa corporum natura, neque iis exceptis, quæ non vegetant, adduci possunt exempla; quibus explicetur augmentum usque ad certum terminum fieri in plerisque, quæ demùm necessario pereunt. Hujusmodi est exemplum non vegetantis campanæ, quæ vi pueri justis temporum intervallis funem trahentis moveatur. Hæc primum lento, languidove movetur motu, postea validiori, atque validiori, ut postmodum malleo etiam validè pulsetur. Hæc eadem campana primis, secundis, tertiis manus pueri funi applicatæ motibus habitum, vel quasi habitum acquirit ad faciliorem motum. Sed perseverante puero repetitis vicibus funem manubrio campanæ illigatum trahere, motus in campana tandem redditur æquabilis ferè, & uniformis; neque crescit in infinitum. Nam motu illo gravitatis centrum campanæ attollitur, exercetque majus, atque majus virium momentum; cui vis motus à puero impressi non sit æquivalens. At quoniam campana, & ea omnia, quæ ad ipsam pertinent æs, ferramenta, ligna, funis, manubrium dissolubilia sunt; primum hæc omnia, aut aliqua ex his ineptiora fient ad motum; demùm cessabit motus ille, etiam si ipse non deficiat puer. Simile exemplum est non vegetantis navis, quæ remis impellitur. Primo impulsu remorum lento motu, & vix movetur navis: postea repetitis per justa temporum intervalla remorum impulsibus velocius, & velocius movebitur, quæ proindè aliquo modo dici potest acquireret quendam habitum ad faciliorem motum. Sed non crescet motus ille in navi usque in infinitum; nam dum æqualibus tempo-

ribus

ribus majus itineris spatium trajicitur, major etiam vis resistentium aquarum superanda est, qua nunquam crescens, aut decrescens determinata remigii vis fit tandem inferior: motus igitur velocitas in navi non crescet in infinitum, sed necessario reddetur æquabilis, & uniformis, nisi quod singulis impulsibus remorum aliquid additur motus; cum tantundem inter unum, aliumque impulsus ejusdem amittatur. Verum quia quæcunque in navi sunt, dissolubilia sunt, ineptior primum ad motum fiet; postea, & ipsa peribit navis, etsi fortè in illa non primò cesset remigium, quod postea etiam cessabit; nam mortua navi nullum esse potest remigium. His inquam, similibusque aliquo modo explicari potest ratio, qua animalium corpora crescant; postea consistant, demum decrescant, & estinguantur.

At ab ipso Galeno exemplum eruere possumus malæ constructionis, & malæ conformationis partium in hectica febre, & res facile applicari potest ad naturalis marasmi intelligentiam. Hecticas febres posuit ille alias, quæ post nonnullos morbos, alias quæ statim ab initio invadunt: & vel propter aliquem animi affectum, iram, tristitiamve, aut alium, vel propter lassitudinem nimiam, aut solis fervorem, aut etiam, sicuti sum expertus, cum quis in frigida tempestate diutiùs, & pluribus vicibus inclementiori cælo est usus, vel ob alias similes causas fieri consuevere. Has dicit non esse nimis curatu difficiles, si statim occurratur; neque permittatur eas transire ad marasum, idest tabem. Nam istæ in quibus marasmus adest, difficile nimis curantur, vel etiam sunt curatu impossibiles. (a) Earum siquidem, sunt ejus verba, *natura calida est, & sicca, cum tale aliquid cor patiatur, quale lucernæ fomes cum fuit plurimum exustus*. Nam qui ita torrefactus est, frangitur, atque dissolvitur, atque ex ariditate continuitatem amittit: adeò ut neque si magnam olei copiam superinfundas flamma abundantior possit accendi, semper enim parva, & debilis in ipso palpitat flamma, ac continuò fit minor, donec extinguatur. Talis quidem est febris, quæ omninò marasmodes, idest tabida existit. Quæ non est idem morbus, ac passio, quæ marasmus, idest tabes appellatur, nam, & hæc absque febre in decrepita ætate solet accidere extincto nativo calore, quod nihil aliud existit, quàm mors, quæ sine sensu doloris, ac secundum naturam ex siccitate contingit. Sicuti iis, qui præternaturam tabescunt, altera advenit species, quæ à Philippo ex ægritudine senectus vocatur, in quam multos non solum senes, sed etiam pueros vidimus incidisse. Omitto ponderare singula verba Galeni, sed illud, quod addit hecticarum siccam etiam naturam esse, manifestò declarat, Galenum saltem ex parte posuisse istarum febrium essentiam in eo, quod siccantur, extenuantur, sive emaciantur, & marcescunt corporis partes. Ac verba illa, *fomes torrefactus frangitur, atque dissolvitur, atque ex ariditate continuitatem amittit*: manifestò malam structuram, malamque partium indicant conformationem. Non tamen penitus acquiesco in his, quæ dicit frangi, dissolvique, continuitatemque amittere fomitem; nam alia vitia structuræ minorum organorum existimo considerata esse in parti-

(a) De differ. febr. lib. i. cap. 8.

partibus, quæ malè nutriuntur, sive malè vegetant.

Cæterum illud quærendum est in febre hectica, an ipsa febris primarius sit affectus? Magna parte Medici dicunt alias febres esse symptomáticas, alias verò primarias, sive essentielles, ut appellant. Erasistrato, atque Chrysippo, iisque, (a) qui ab his dicti sunt febres omnes consecutarii, sive consequentes affectus erant. Ac quidem si in corde semper omnia sint, ut prius in salutis statu erant; nunquam cordis motus, aut alterabitur, aut perturbabitur, aut variabit. In ægitudinibus autem omnibus causæ, ut plurimum evacuandæ, expugnandæ, aut corrigendæ sunt, symptomata tamen nonnunquam sibi trahunt curationem, & sæpe numero omissa causa sibi exposcunt medicinam, sive delinimentum.

Demum ad maiorem prædictorum confirmationem breviter indicabo, quid Medici celebriores potissimum studeant consequi in febris hecticæ curatione, qui non rarò etiam nolentes ex iis, quæ omnes natura docente satis norunt, normas accipiunt, ut quid potius faciendum, vel non faciendum sit, determinent. (b) *Nimirum*, inquit, *quicquid humidi, & solidarum partium absumptum, & exiccatum est id, quantum fieri potest humectantibus restituere oportet*: videlicet omni majori studio habitus corporis nutritio recta promovenda, & adjuvanda est. Alii aliis verbis, sed omnes idem concludunt, neque sunt nimis solliciti de cordis refrigeratione; (c) quam facile consequi possent, ut Hippocrates ait.

NON OMNIA OBSERVAVIT GALENUS. QVI IN LIBRIS DE
DIFFERENTIIS FEBRIUM SI MULTA NON FINXIT,
SALTEM OCCASIONEM FACULTATEM.
QVE DEDIT ALIIS MULTA RI-
TE CONFINGENDI.

AB omni prorsus vacat injuria asserere Galenum non omnia observasse, quæ in re medica, vel etiam in aliis disciplinis observari possunt: id enim de omnibus hominibus, quibus semper aliquid deest, dici potest. Ac ipsemet Galenus cum dicit se non vidisse febrium circuitum, (d) *qui ultra quatrduanum protenderetur*, non negat quintanum, vel sextanum, vel alium magis minusve his longiorem; neque negat quotidiano magis, minusve breviores, vel medios inter jam notos circuitus dari posse: prout dantur, & illorum non pauci meminerunt. Præstitit id, quod potuit vir planè disertissimus, qui tamen quantum constat ex libris de differentiis febrium, non observavit excrementa jumentorum, aliorumque animalium in stabulo, & in umbra sine ullo Solis aspectu sæpe sæpiùs incallescere; nam tantùm refert se vidisse *excrementa jumentorum simul, & columbarum quadam ex parte à Sole adeò vehementer calefacta*, ut instar fumi multam in
subli-

(a) Galenus, qui non semel eosdem refert.

(b) Sennertus.

(c) In lib. de Veteri Medicina.

(d) De differ. febr. lib. 1. cap. 5.

sublime, mordacemque, ferientemque nares, & oculos evaporationem emitterent. Visumque ipsi est huiusmodi excrementa sic à Sole calefacta quotidianæ febris continuæ, id est amphimerinæ, exemplum exhibuisse: quoniam *quicquid superiori die ad summum fervoris pervenerat, refrigerabatur*: (a) *quod autem huic continuum erat, dum prima pars, quæ calorem conceperat, in summo esset fervore, ipsum interim paulatim succensum, mox priori se fervore remittente, iterum incallescere, atque effervescebat*: Hic autem circuitus in unius ferè diei, ac noctis spatio peragebatur: Quod si duobus diebus, ac noctibus idem circuitus factus fuisset, tunc febris tertianæ eo modo fuisset exemplum, & si tribus quartanæ, & quatuor quintanæ, si tamen, & quintana febris existat. Quibus etiam manifestum sit Galenum absque ulla pituitæ, bilis flavæ, aut atræ mentione in unico jumentorum excremento, Solis radiis, ut ipse credidit calefacto, quotidianæ, tertianæ, quartanæ, quintanæque febris reperisse exemplum: videlicet sæpenumero febres istæ non nisi temporis tantummodo inter circuitus intervallo differunt, & sæpenumero uno remedio ex chinachina, sive ex centauro, sive ex gentiana, aut pipere sanantur.

Sic vidit ille non difflata in corporibus, & extra corpus animalium quædam putrescere: (b) sed non vidit quædam alia, & ea ipsa, quorum meminit, fructus, semina, vestes non difflata melius conservari. Credo, quod ejus tempore non erat consuetudo, quæ nunc est, oleum addendi amphoris, ut minùs difflatum melius conservaretur vinum. Credo, quod non erat consuetudo castaneas, aliosque fructus terra ferè arida sepeliendi, & poma cera oblinire, & circumdare, ad hoc ut minùs difflata diutiùs conserventur. Sic pariter ex aliis multis, quæ passim occurrunt in Galeno dicere possumus ipsum non vidisse, neque observasse omnia: quod de quocunque mortalium sine injuria dici potest.

Quod demum in his iisdem libris Galenus occasionem, facultatemque dederit aliis multa confingendi, manifestum est ex iis, quæ habet *lib.2. de differ. febr. cap.8.* postquam de hemitritæo differuisset: *nam per hæc, inquit, quæ de biliosa, & pituitosa febre conscripsimus, licet ad melancholicam febrem transferendo ejus cum utraque illarum complexionem, ac confusionem pariter conjectari. Voco autem complexionem, quando horis differentibus invaserunt, confusionem verò, quando eodem tempore incæperint. Sic, & tres simul febres complecti per se quispiam, & confundere poterit ex iis, quæ nuper diximus motus. Quod tamen absurdum non est: imo ea, quæ possibilia sunt, etsi nunquam acciderint, cogitatione licet effingere, & contemplari; modò inutiles quasdam, nulliusque pretii computationes evitemus.*

Ridiculus etiam in eo videri potest Galenus, (c) quod pestis, quæ Athenienses afflixit, causas scrutatus: *Fortè, inquit, ab Æthiopia mali fluxere contagia.* At nos scimus per tot terras, totque maria pestis semina nunquam delata fuisse, &c.

Rectè

(a) De differ. febr. lib.1. cap.5.

(b) De differ. febr. lib.2. cap.9.

(c) De differ. febr. lib.1. cap.4.

RECTE MONUIT GALENUS FEBRES², QUÆ CIRCUITUS¹
HABENT, EX VITIO DEPENDERE ALICUJUS
PARTIS SOLIDÆ.

Julre quidem mihi videor sub Galeni nomine in Erasistrato scripsisse eorum potissimum, qui soliti sunt jurare in verba magistri, culpa, & crimine factum esse, quod alii aliis addicti, vel proprio fidentes ingenio, nomini, famæque nonnunquam detrahant principium, qui disciplinas utcunque tradiderunt. Nam dum illi, ut plurimum mercaturæ gratia, omnia cognovisse, & nihil errasse eum, quem ipsi sequuntur, ostendere nituntur; hi contra in plerisque eundem manifesto fuisse deceptum, & multa ignorasse indicare conantur. Quod ex utraque parte inique factum censeo, sed magis meo judicio illi peccant, qui mortalem hominem omnia cognovisse, vel credunt, vel alios debere credere volunt. Qui libros legit primum id debet animo determinato credere, quicquid tandem ab aliis scriptum fuerit, ea vera sine dubitatione esse, quæ à sacris docentur scripturis, & quæ mater tenet Ecclesia, & falsa esse existimare debet ea omnia, quæ à quocunque contra hæc scripta fuerint. Secundum de aliis, quæ quomodolibet leguntur, videbit an consona iis sint, quæ in libro naturæ Dei manu scripto notata fuere, nam si his, quæ notata sunt in libro naturæ, consona non sint, quæ in libris hominum manu scriptis leguntur, falsa hæc sint oportet, vel saltem eadem erroris, & fallaciæ aliquid continere, credendum est. Ego, quantum mihi hucusque à Deo datum fuit, hanc normam tenui, quam etiam divina favente gratia in posterum tenebo.

Ac quidem cum mihi non levis occasio data sit legendi libros Galeni de differentiis febrium in fine secundi libri hæc lego verba: (a) *Quæcunque per circuitus aliquos ægritudinum accessiones fiunt, ex membrorum dispositionibus ortum habent*, quæ mihi paucis tantum exceptis verissima adeò videntur, ut ex his multo magis laudandus sit Galenus, quàm à quibusdam laudetur Fernelius, qui hoc ipsum, sed restrictius dixit.

Ponamus enim cunctas partes solidas hominis integras esse, nihil vitii habere, & nihil interim in ipsis mutari: ponamus & eundem hominem febre laborare. Liquidarum, inquam, substantiarum vitio constabit hæc febris, & continens erit. Nam præter hæc duo genera partium solidarum, & liquidarum, nihil aliud habet corpus hominis, ut si solidæ integræ, & sanæ sint, & nihil in ipsis mutetur, ut supponimus, & febris adsit, liquidæ tantum supersint partes, quarum vitio motus cordis irritari, & perturbari possit, in quo febris consistit. Quæ continens erit, & quæcunque mutationes in ipsa accident, sive in melius, sive in pejus, ex mutationibus dependebunt, quæ liquidis substantiis accidere possunt: nam partes solidæ omnes integræ supponuntur, & posuimus nihil in ipsis mutari. Mutationes autem, quæ liquidis substantiis independenter ab omni vitio solidarum accidere possunt, nisi in paucis tantum casibus, quos postea dicam, non sic remittunt, desinuntque,

Tom. I.

F f

ut

(a) De differ. feb. lib. 2. cap. ult. circa finem.

ut iterum postea fiant, & iterum crescant. Atque idem, nisi aliquid aliunde fiat; febris ex his non potest esse periodica, quæ scilicet novus accessus, & novos insultus habeat. Secretiones, confusionesque liquidarum substantiarum in integritate solidarum naturæ sunt certæ, ordine certo, & certa mensura fiunt. Nam cum in circulum perpetuo agantur, & per certos canales non alteratos, ut supponimus, & nihil vitii habentes transcoluntur, aliæque iterum per certos canales iis addantur, è quibus secretæ fuerant, ut lymphæ, quæ secernitur è sanguine, & sanguini iterum additur, aliæ secedant & extra corpus pellantur, ut urinæ, & ea, quæ per habitum corporis protruduntur, aut aliter emittuntur, & hæc fiant perpetuo paulatim, atque paulatim, & certo ordine, si quid mali præstant in liquidis huiusmodi secretiones, permixtionemque, perpetuo præstabunt, si in melius vergant hoc ipsum perpetuo fiet usque ad morbi finem. Neque ulla ratio excogitari potest propter quam in data hypothese (nisi aliquid aliunde fiet) quicquid est siue boni, siue mali consideratione dignum nunc fiat, nunc non fiat; nam nunc, prius, & postea quæ secernunt, & quæ confunduntur, haud multo dissimiliter siue secernuntur, siue confunduntur, & mutationes in his, & per hæc fiunt paulatim, atque paulatim, prout guttatim, atque guttatim, ut sic dicam, siue secretiones, siue confusiones fiunt liquidarum substantiarum, ut proinde continens vitio tantum liquidarum substantiarum febris sit oportet: hoc est sine novo accessu, sine novo insultu. Cujus rei alias rationes affert Galenus explicans, ut vitio peculiaris membri periodicæ fiant febres, quas rationes nunc non tangam.

Difficile autem admodum, & fere impossibile est longiusculo tempore vitium in liquidis substantiis consistere, & vitii interim solidas partes nihil contrahere.

Sed nos magna ex parte in hypothese permanentes videamus, an cum aliquid aliunde fiat, in aliquo casu aliter accidere possit. Ac primum omitto ea, quæ de novo extrinsecus advenientia cibo, potuque liquidis substantiis, quæ in corpore animalis reperiuntur, accidere possunt, quibus novus insultus, vel veluti novus insultus fieri possit. Omitto ut divisa in plures, atque plures partes iuxta singulis diebus cibi, potusque quantitate, non affatim, sed paulatim, atque paulatim, & pluribus, atque pluribus vicibus illa assumi possit, ut nulla detur novo accessui sensibilis occasio. Omitto item mutationes, quæ accidere possunt ex somno, & vigilia, & ex vehementioribus animi affectibus, qui non fiunt sine mutatione in partibus solidis, ut manifestum in verecundia est, in qua mutatione aliqua in fibris, tunicisque vasorum, & orificiis eorundem, retardato per quasdam venas sanguine, genæ rubescunt, & ingenuo sanguinis tinguntur colore. Illud referam, quod est inevitabile, semper reperiri animal aliqua circumfusus substantia, quæ saltem per eas mutationes, quæ vigintiquatuor horarum tempore in Cœlo fiunt, haud leviter variat, & variare potest. Ac huiusmodi ambientis substantiæ alteratio in aliqua, aut noctis, aut diei hora mutationem aliquam facere potest in liquidis animalium partibus antecedenter ad id dispositis, ex qua novus insultus, siue novus accessus febris fiat. Communiter omnes agnoscunt ex horarum diei tantum mutatione in catharris, fluxionibusque, ut dicunt, à capite, aliisque partibus sensibiles fieri mutationes, quibus
melius

melius, vel pejus animantes se habeant. Ac regularis Gallorum certis nocturnis horis cantus ex mutationibus dependet, quæ lapsu horarum ambienti substantiæ accidunt, & jam dispositis ad eas percipiendas gallis communicantur. Flores ad diurnam lampadem sese convertentes, & noctu fibras, florumque folia contrahentes mutationem aliquam certis horis fieri ostendunt in ambienti substantia. Ut omnino verum sit similibus planè mutationibus, quæ necessario accidunt ambienti substantiæ, liquidas animalium partes certis horis alterari, & mutari posse, ut præviis dispositionibus in ipsis, quas vitia etiam appellare possumus, novi accessus, novique febrilis insultus, causa habeatur.

Libet autem hic loci addere exemplum aliquod à Galeno mutuatum, ex quo pateat, ut vitio alicujus partis solidæ periodica febris fieri possit. *Ita sane inquit, in mulieribus quoque accidit: nam & in his donec æquales, (a) ac similes monstruorum causæ fuerint, idem quoque eorum servatur circuitus.* Quæ differendi ratio sapientum omnium recte sentientium digna videtur, ac quantum memini Plato, Aristoteles, Hippocrates, alique in hanc, aut similem formam non semel locuti sunt, neque quicquam contra dici posse apparet. Necessitas enim semper inest corporibus omnibus, ut in iisdem, aut omnino similibus, & ex iisdem, aut omnino similibus, eisdem, aut omnino similes effectus tum sperare, tum promittere debeamus. Non abs re autem fuerit observationes quasdam narrando rem illustrare, quam Galenus docuit.

Sunt Mulieres, quibus exactè singulis triginta diebus fluit uterus. Sunt quibus celerius id fiat, & singulis 28. aut 25. aut 20. vel etiam breviori circuitu fluat. Sunt item quibus tardius id fiat, & singulis 35. aut 40. aut 50., aut 60. aut etiam longioribus circuitibus fluat uterus. Nec non sunt foeminae non unius speciei tantum animalium, quibus semel bis, aut ter, aut quater tantum singulis annis movetur uterus.

Item sunt mulieres, quibus vehemens dolor fit, cum fluit, aut jam jam fluxurus est uterus.

Item sunt mulieres, quibus febres fiunt, cum fluit, vel jam jam fluxurus est uterus, idque aliis celerius, aliis tardius ut dictum est.

Quamobrem illo uno exemplo Galeni fluentis uteri mulieribus manifesto constat, per ea tantum, quæ moventur in uteris febres nonnunquam dari vigesimanas, menstruas, quadragesimanas, annuas, & alias, atque alias sub variis celerioribus, aut tardioribus circuitibus redeunt.

Ratio autem, qua foeminis fluat uterus alibi tradita est.

Sed illud etiam his addendum à solo utero fieri nonnunquam febres continentes, quæ pluribus, paucioribusve diebus durent, & restitutis integre, vel cum morte foeminarum finiantur. Ac nulla quidem ratione Galenum censeo, addidisse verba illa: *(b) Sed quæ circuitum non habent in his nulla est corporis pars, quæ præcipuè sit offensa, sed qui in venis, & arteriis omnibus continentur humores, atque hi præsertim, qui in maximis, atque plurimo calore abundantibus sunt, aut ob aliam quamvis causam*

F f 2

quemad-

(a) De diff. febr. lib. 3. cap. 1. prope finem.

(b) De differ. feb. lib. 2. cap. 11. in calce.

quemadmodum in ephemeris, aut ob putrefactionem ferventes, febrem unam accendunt synocham appellatam, quæ à principio usque ad finem nullam habet intermissionem, ac tandiu perseverat, hominemque deurit, donec qui, ei causam afferunt humores, aut ex toto absumantur, aut concoquantur, aut utrumque patiantur. Ac nescio cur Galenus ad Praxagoram voluerit accedere, cujus sententiam his verbis refert: (a) reliquum est id februm genus, quæ synochæ vocantur, quarum universum tempus una accessio est, quæ vel semper in eodem vigore persistit, vel minuitur, vel augetur, donec judicetur. Hæ verò ex tali causa ortum habent, qualem omnium februm Praxagoras supposuit, humorum videlicet in vena cava putrefactionem. At non adhuc Galeni temporibus sanguinis innotuerat motus, quo tam Praxagoras, quam Galenus, alique multa melius potuissent explicare. Ac quidem tum ex ipso Galeno, tum ab aliis, tum ab iis, quæ observantur, facile multa exempla synocharum habere possumus, in quibus pars aliqua determinata est præcipuè offensa. Hujusmodi enim aliquid ex determinata corporis particula (ut ex digito, quem abscessus occupat, vel dens viperæ pupugerit) sanguini addi potest, quod continentem, hoc est Synocham faciat febrem. Et ex bubone tam ephemeram, quam periodicas, quam continentes nonnunquam fieri febres, tum passim observatur, tum ab Hippocrate, & à Galeno non semel notatum est: Et quæ ex bubonibus febres oriuntur, omnes sunt malæ exceptis ephemeris, est Hippocratis aphorismus, quem refert Galenus lib. 1. de differ. febr. cap. 5.



(a) Eodem loco.

DATA FEBRIS PERIODICA

FREQUENTER BREVIORI, VEL LONGIORI
TEMPORE RECURRIT.

Non quicquam magni iis omnibus fortè dicere videbor, qui sæpe numero unam, vel aliam datam febrem facile mutare periodos observaverunt. Sed fortè non minimi aliquid dicere videbor iis, qui causas sanè longè diffimiles quærunt, ut febres explicent sub brevioribus, vel longioribus periodis recurrentes: qui Galenum adducere possunt dicentem quotidianam à pituita putrescente, tertianam à bile flava putrescente, quartanam verò ab atra bile similiter putrescente excitari.

At ego admittens vidisse Galenum quotidianam aliquam, tertianam aliquam, quartanam aliquam, à causis fieri, quæ sic rectè potuerint nominari, ut Galenus illas nominat; ac iterum sine injuria repetens non omnia observasse Galenum, qui, quoniam neque quintanam, neque sextanam vidit, tres tantum diebus integris numeratas intermittantium posuit differentias; attamen cum Galeno demonstrabo datam quamcunque febrem periodicam mutatione circumstantiarum breviori, vel longiori tempore recurrere posse. Verum primo referam, quid periodica, quid intermittens, quid continua periodica febris sit Galeno, qui pluribus in locis periodicas febres dicit eas; (a) *In quibus per circuitus fiunt, accessiones*. Intermittens verò dicitur, quando *prioris accessionis tempus adeò breve fuerit (b), ut antequam secunda superveniat, iam prima quieverit, & omne id temporis spatium, quod secundæ principium, & primæ finem interiacet, sine febre est*. Si verò secunda accessio invadat, priusquam præcedens fuerit soluta, quoniam nullum vacuum intervenit, & sine febre tempus medium, periodica quidem febris dicetur, sed continua.

Neque, ut illud ostendam, prolixiori sermone rationes adducam à priori, ut dicunt; quas plurimas possem adducere tota fermè corporea clamante natura, id quod dato tempore fit, non mutata rei substantia, mutatis tantum quibusdam circumstantiis breviori, vel longiori tempore fieri posse, ut si dicamus dari fontem, qui dato tempore siccetur, & spatio certi temporis siccus maneat, quo tempore absoluto iterum recurret, sine dubio concludere liceat, igitur dari potest fons, qui non mutatis aquis alio dato quocunque tempore bis, vel pluries siccus observetur, siccusque maneat certi temporis spatio, quo absoluto iterum recurrat. Sed ego per ea tantum, quæ a Galeno in lib. de differentiis febrium tradita sunt, ejus, quod posui veritatem demonstrabo. Galeno autem difficilior visum est explicare quibusdam

(a) *De different. feb. lib. 2. cap. II.*(b) *Eodem lib. eodemque capite.*

dam in febribus per circuitus fieri accessiones, quàm febres esse, quæ unico tantùm accessu ad plures dies extendantur. Neque excrementorum jumentum à Sole calefactorum exemplum, quod ipse retulit, satis eidem visum est ad explicandas periodicas febres, quoniam in animalibus *ex omnibus ad omnia conspiratio, & confluxio existit*. Licet autem circa hæc eadem multa à nobis in præcedentibus dicta fuerint, placet tamen hic exempla alia examinare, quæ ipse Galenus affert, quibus tum ea confirmabuntur, quæ huc usque dicta sunt, tum manifestum erit, nos minimè in omnibus à Galeno esse alienos.

(a) *Sunt lippitudines*, inquit, *quædam, quarum nonnullæ quotidie; nonnullæ verò tertio quoque die magis infestant*. Ac nos in memoriam revocare possumus esse lippitudines, quæ mane, & vespere, & quæ ante prandium, & ante cænam, & quæ post certum temporis lapsum à prandio, vel à cæna, & quæ post lætionem, post motum, post animi affectum vehementiorem magis, vel minus infestant, non minus ac aliis lippientibus vino pejus fit, aliis melius, quod Galenus, & Hippocrates observaverunt. Rectè igitur Galenus ad lippitudinis similitudinem typos, & exacerbationes habentis, in febribus per circuitus fieri posse exacerbationes, novosque accessus ait. Ac quidem aliquando lippitudo cum febre est, quæ ad ipsius lippitudinis exacerbationes brevioribus, aut longioribus temporibus comprehensas exacerbatur.

Similiter, & aurium dolores (b), & capitis sive totius, sive medietatis, quem græci hemicraniam appellant, quibusdam verò, & pedum, & articulorum dolores per circuitus exacerbari conspiciuntur. Quod igitur in hisce omnibus inspicere licet, venas quidem in his partibus, quæ exacerbantur in tumorem attolli, atque inflammationem augeri, ac dolores intendi, ac materia inutilis affluxum ad extrinseca fieri: ita & in interioribus, quæcumque non videntur, servare eandem proportionis similitudinem concipiendum est: adeo ut in laterum, & pulmonis inflammationibus, in accessionum quidem principiis tumores increcant, in declinationibus autem evaporent, ac submittantur.

Modestissimus Pater Daniel Bartolus Societatis Jesu cum non placeret liber, noluissem, dicebat, librum scripsisse: at ego quia maximè placent, quæ hoc loco scripsit Galenus, voluissem, inquam, ego illa scripsisse. Attamen cum non scripserim hæc, saltem paucis eadem illustrabo, quod neque faciam prorsus meo Marte, ut dicitur, sed ex eodem Galeno afferam etiam exemplum ejus, *cui extremam partem digiti acus pupugerit, (c) statim indoluit, postea verò inflammatur, atque in magnum tumorem pars omnis circumstans attollitur*.

Acu videlicet quædam fit in digito continuarum partium solutio, qua statim indoluit homo. Ac eadem partium solutione viæ quædam etsi exiles disruptæ, & vitiosæ factæ sunt: ut ea quæ sive per nervulorum, tendinum arteriolarum, aut venularum, aliorumque minimorum ad glandulas propriè spectantium, cutemque contextentium vasorum cavitatem, vel per fibrillas muscutorum, aut ossium poros, aut per ligamenta, vel alias quascunque partes, quæ in digito sunt libere, & facile fluebant, & refluebant, aut admittebantur, vel extra pellebantur, fluere, & refluxere, admitti, aut expelli nequeant, vel minus libere, & minus facile fluant, refluantque ad-

mittan-

mittantur, aut expellantur. Motu quoque cordis semper urgente, & cuncta perpetuò promovente ex iis, quæ libere fluxissent, aut refluxissent, & hac, illac libere admissa, vel dimissa fuissent, nonnihil manere necessum est in partibus circa punctum locum positis.

Hinc tumor, & inflammatio. Hinc difficultates ad sanguinis trajectionem in venas ex proximis arteriis. Hinc molestæ pullantium arteriarum perceptiones. Hinc in aliis quibuscunque sive fibris, sive nervis, sive vasis, sive partibus aliis, quocunque peculiari nomine appellatis, per quorum porositates, aut inanitates aliquid meare, promoverique solitum erat, difficultates ad motum. Hinc ineptitudines fiunt ne dum digiti, sed quandoque totius manus, vel etiam totius brachii. Hinc multa, quæ prius non abundabant, per unicam acus puncturam minus rectè, ac prius fluentia abundare videntur. Quibus omnibus quoniam totum corpus confluxile, & conspicabile est, ut Galenus ait, facilè febres fieri possunt: cordis videlicet ex his motus facilè turbari, & irritari potest, ut sæpe numero turbatur, & irritatur.

At ea, quæ propter acus puncturam, ut jam dictum est, in digito consistunt, diversimodè putrescere apta sunt, & motu sanguinis, aliarumque substantiarum per vias quascunque variis nominibus nuncupandas, additioneque, aut detractioe aliqua sive sensibili, sive insensibili, vel etiam permutatione in pus sæpe sæpius, vel in substantiam puri similem mutantur. Quibus in conclusio factis febris tum faciliùs fit, tum major esse solet, quàm si in patenti ulcere fierent.

Ipsa autem febre non sine magno rerum utilium dispendio multa multis modis eorum, quæ molesta erant, dissipantur. Vel etiam adaperto foramine (quod spontè, vel arte fit) manifesto hæc eadem, quæ molesta erant, evacuantur, & omnia conquiescunt, cessatque in corde irritatio, & consequenter motus perturbatio, ut homo videatur febre immunis.

Verùm vel quia iterum foramen occluditur, ut frequenter fieri observamus in partibus visui subjectis, vel quia organa remanent adhuc vitiosa in digito, similibus modis celerius, aut tardius, similia, ac prius facta sunt, fiunt in digito, similiter cordis motus irritatur, & febris fit, & similiter, ac prius omnia redeunt accidentia. Enim verò ut in exemplo menstruorum in foeminis dixit Galenus, donec æquales, ac similes causæ fuerint, idem quoque eventum servatur circuitus. Qui rerum, & eventuum circuitus toties erit, quoties eadem, aut similes recurrent causæ.

Ità, & in interioribus (a), quacunque non videntur, servare eandem proportionis similitudinem concipiendum est: adeò ut in laterum, & pulmonis inflammationibus, in accessionum quidem principiis tumores increscant, in declinationibus autem evaporent, ac submittantur. Ac quidem quacunque fiunt digito, vel utero, vel aliis partibus omnibus sive in conspectum cadentibus, sive in occultis, & profundioribus corporis universi sedem habentibus similiter accidere possunt. Atque ideò non minus ac ex lippis oculis, ex inflammato digito, vel ex alia quacunque particula oculis subjecta, ex glandulis quibuscunque, ubicunque positis, ex carnibus aliis quibuscunque, ex membranis, ossibus, particulis cunctis in internis, & peni-

tiori-

(a) Gal. eod. lib. & eod. cap. 11.

tioribus locis collocatis febris, eaque gravior, aut levior, continens, aut periodica, & quæ tardioribus, aut celerioribus redeat circuitibus, fieri poterit.

Quædam possunt permutari, aut aliter commisceri, aut in aliquo dissimilia esse: ut proinde ordo, ratioque circuituum permutetur, & in uno vel alio, sive in paucioribus, aut pluribus febris febris ex digito, & accessio accessioni dissimilis sit (a). Has febres ordine carere inquit Galenus.

Quid autem est illud, quod ordine caret in universa corporea natura, in qua quæcunque fiunt necessariò fiunt? Magnus ordo sit oportet in iis, quæ necessariò fiunt, & magnus ordo sit oportet in iis, quæ necessariò agunt, ex quibus nonnisi certa, & necessaria procedunt! At homini videntur quædam sine ordine procedere, & sine ordine fieri ob causarum necessariò agentium ignorantiam. Quod ex ipsis, quæ ex Galeno deinceps trademus melius explicabitur, ille enim hæc habet: (b) *Earum autem quæ ordine carent, nonnullæ ex transmutatione humoris ad talem dispositionem deveniunt, videlicet tum unum, tum plura ex iis, quæ influunt in digitum, aliam: atque aliam in digito suscipere possunt transmutationem, & mutatis osculis, aut cavitatibus vasorum, sive contractis, aut laxatis fibris, sive ob aliam quamcunque causam, unum alio parcius, aut copiosius esse potest. Nonnullæ ob victus errorem ad talem dispositionem deveniunt.* Victus autem ratio, ut etiam ambiens universum corpus, & sigillatim circumfusa digito exempli gratia substantia, ut unusquisque scit, infinitas suscipere potest mutationes: quibus laxentur, aperiantur, aut obstruantur pori, qui sunt in partibus digiti, aut alia fiat in iisdem mutatio. (c) *Maximè igitur transmutatur, atque in alteram naturam transit sanguis, cum putrescit: nam ut etiam antea exposuimus, pars una sanguinis fit flava bilis, alia nigra.* Nihil autem obest si hæc nomina retineamus flava, atraque bilis: modo rectè aliquid illis significemus. At rei cuiusque natura, ne dum sanguinis, non duas tantum, sed infinitas suscipere potest mutationes, quæ vocibus illis nequaquam aptè explicentur: ut si sanguis simpliciter ex fluido fiat non fluidus in digito, in neutram dicetur bilem conversus, cum tamen multarum ægritudinum causa esse possit.

Quantum verò in ægotantium corporibus humores mutantur (d), & pro ut variæ sunt in digito mutationes, tantum etiam accessionum circuitus, atque rationes mutantur. Quare nihil etiam mirandum est, si huiusmodi mutationibus ordo accessionum evariet. Illa quoque non parum est varietatis causa, quod qui putrescere incipit humor in aliquo membro alter existit; alter verò ex aliis defluit partibus. Sic, & quæcunque circa victus rationem errata ab ægotantibus fiunt, nihilominus hæc circuituum ordinem everunt. Quemadmodum enim ipsis quoque sanis victus depravatus ægotandi affert occasionem, eodem, ut arbitror modo, vel etiam magis in laborantibus ex erroribus admissis fiunt accessiones. Non solum igitur cum jam ægotant;
sed

sed eo etiam tempore, quo ex morbo referuntur, quacunque ex causa promptissime offenduntur. Quodcunque igitur offensionis genus effatu dignum interverit, vel circuitus anticipare, vel alios diversae naturae à prioribus oriri est necessarium, à quibus accessionum ordo pervertitur, & tantum possunt anticipare, ut ex tertiana fiat quotidiana. vel alia tertiano circuitu brevior in accessu, & tantum possunt participare, ut ex quotidiana, vel alia celeriori in accessu fiat tertiana, vel alia circuitum habens tardiolem. Quae omnia mihi satis clara videntur, ut majori non indigeant explicatione. Sed placet alia exempla à Galeno proposita percurrere.

De inflammationum generatione meminit, & rheumaticas accusat dispositiones, & multa habet de potentiis partium viventis corporis naturalibus: quas nobis reliquit aliquo modo explicandas; nam ipse satis dilucide pluribus in locis docuit, potentias, facultatesque dici rerum ignoratas agentium causarum substantias. (a) Nihil igitur mirum, inquit, vel cerebrum (b), vel universum aliquando caput, acervatam in se superfluitatem ad partes imbecilliores expellere, veluti aures, oculos, tempora, labia, vel dentes, vel malas, vel palatum, vel gingivas, ad gargareona, & paristhmia, aut ad eos, qui sunt in hujusmodi partibus adenas, & cum nihil in istis imbecille constiterit ad thoracem, pulmonem, fauces, stomachum, ventriculum fluxionem transmittit. Videlicet viae sunt à capite ad praedictas omnes partes, & ad alias multas, nam si non sint viae, & donec non sint viae, nulla unquam à parte ad partem possibilis est transmissio. Determinatur autem malum à capite ad oculos potius, quam ad aures, vel à capite ad ventriculum potius, quam ad fauces propter causas non multò dissimiles iis, propter quas in fluminum decursu determinantur aquae sive turbidae, sive sinceræ ad influendum in hunc potius hortum, quam in alium. Atque sic, talique ratione, copia, vel inopia influere possunt aquae, ut pereat, vel non pereat hortus, fecundior, vel infecundior sit. Causae hujusmodi non multò dissimiles iis sunt, propter quas determinantur aquae in montibus, ex: gr., ad faciendum fontem, ex hac potius parte, quam ex alia, & ad faciendum fontem circuitus, & accessus, recessusque habentem, vel non habentem. Atque hujusmodi, similive ratione explicandae potentiae sunt partium corporis viventis, quas Galenus attractricem, expultricem, retentricem, & alteratricem appellat. Quod si quis est, cui nostra non placeat expositio, vel aliam afferat, vel donec meliora innotuerint, retineat verba illa, quibus potentias partium naturalis corporis nominavit Galenus.

Qui subdit: (a) neque mirandum est similem eisdem contingere affectum, qualis in excretionibus excrementorum ventris conspicitur. Sicuti igitur quisque quantum quaque die excernitur intuens, si causam excretionis ignoret, ordinem miraretur, sic quemcunque latet superfluitatum in capite generationis, atque excretionis causa, & qua ratione nonnullae quidem ex ipsis ad exteriora, nonnullae verò ad aliquem alium confluant locum, haeret, atque miratur hanc confluxus proportionem. Sic, & quicumque non novit, neque quae partes materiam inutilem ad hepar transmittant, neque causam propter

Tom. I.

G g

quam

(a) Lib. de naturalibus facultatibus. (b) De differ. febr. lib. 2. cap. II. circa princip. (c) Eodem lib. eodemque capite.

quam transmittant, intelligit, miratur in febribus, quæ ex hepate accenduntur ordinis proportionem. Sed & alia consideranda sunt quæ in ipso hepate, ex: gr.: fiunt: pro ut alibi monet Galenus. Cujus nos recte usi exemplo addere possumus, non minus ac mutatione tantum, parvarum circumstantiarum aliis tardius, aliis celerius exonerandi alvum, aut vesicam fit necessitas, in febribus parvarum circumstantiarum mutatione novi accessus necessitas fieri potest, atque ea sub alio, & alio circuitu non mutata rei substantia, mutatis tantum quibusdam circumstantiis pluries, atque pluries redire potest.

Thapsia, aliaque thapsiæ similia corrumpunt partem, cui applicantur, & multa vitia parti, iisque, quæ per partem fluere solent thapsia, aliisque thapsiæ similibus inducuntur, ex quibus tumores in parte, aliaque mala, ut non quicquam pro explicando exemplo thapsiæ à Galeno adductæ, his, quæ jam dicta sunt, addere debeamus.

Quod si nullam imbecillitatem pars inflammata contraxerit: (a) hoc est, si nihil vitii in parte sit reliquum, neque iterum superfluitates immittantur: hoc est, & omnia, quæ in partem utcumque perveniunt, sint bonæ notæ, ægritudo finitur, neque deinceps, aut sequenti, aut tertia, aut quarta die homo febricitabit. *Quod si denuò eandem ob causam ob quam primæ etiam missæ sunt aliæ immittantur superfluitates, aut si nec hæ quidem mittantur, sola autem remaneat petentiæ imbecillitas:* hoc est si ea, quæ perveniunt in partem, qualiacumque fuerint ipsius vitio partis corrumpantur, hominem secundo febricitare est necessarium. Sic pluribus, atque pluribus vicibus idem homo febre tentari poterit. Quibus illud idem concludere licet; Ephemera, quotidiana, tertiana, quartana, aliæque febres brevioribus, aut longioribus circuitibus molestæ ex una, eademque similive causa repetente pluribus vicibus, vel non repetente, ut in ephemera, vel in synocha fit, ortum habere possunt.

Ac cum æquum non sit universos hinc Galeni libellos exarare, sententias tantum quasdam ab eodem excerptas in horum confirmationem adducam. (b) Sicuti igitur in oculis, inquit, & auribus, & pedibus, multisque aliis huiusmodi partibus, quemadmodum ostensum est, per circuitum fieri exacerbatio manifestò deprehenditur; quid mirum est in laterum, pulmonis, & cerebri inflammationibus, atque aliis omnibus, quæ oculis inspicere nequeunt, eodem modo superfluitates defluere, eodemque etiam febrem accendere! Similiter dicendum est de febribus, quæ propter ea, quæ in parte jam prius ægro tante corrumpuntur, excitari possunt.

(c) Neque etiam illud mirandum, quod non iisdem statutis temporibus omnes superfluitates aggregentur, ut neque quod non iisdem statutis temporibus ea corrumpantur, quæ in partem utcumque pervenerit. Aliud alii sufficit tempus. Sed neque quod non æqua sit accessionum longitudo, oportet admirari: nam si non eadem neque species, neque multitudo superfluitatum, neque etiam omnibus æqualiter accendi, aut dissolvi convenit. Pro ut cum neque species, neque multitudo excrementorum alvi, aut urinarum, neque omnibus ventriculus, & intestina, aut vesica similiter sint affecta, neque etiam

etiam omnibus similiter fiet excrementorum alvi, aut urinæ ejiciendi necessitas. Quæ nonnunquam ex iis tantum fit, quæ in vesicæ solidis partibus consistunt, ex quibus cum omne corpus *confluxile, & conspirabile sit* febres, & convulsiones etiam fieri possunt. (a) *Nihil igitur mirum si absque eo, quod alterum alteri mittat, quemadmodum oculis caput, ex iis, quæ in ipso membro remanserunt, ad eandem pervenit, ad quam id, quod recipit materiam, extraneam dispositionem:* hoc est nil mirum si integris reliquis partibus vesicæ tantum, ex: gr: , vitio, ea, quæ utcunque sunt, vel utcunque perveniunt in vesicam similiter molesta sint, & similiter corrumpantur, & extraneam acquirant dispositionem, videlicet sano statui inimicam, ac omnino corrumpuntur, & omnino extraneam, sanoque statui inimicam acquirunt dispositionem, ea, quæ aliunde, & ex aliis causis mala in vesicam transmittuntur.

Sic multis concurrentibus, vel non concurrentibus, vel aliis concurrentibus, aliis minimè, accessio longissima, vel brevissima, vel media fiet. Illa autem sunt rerum frigiditas, tenacitas, & crassities, vel earundem caliditas, subtilitas, & promptitudo ad motus, & resolutiones: *totius corporis fabrica*, quæ multipliciter variare potest, potentiarum robur, raritas, aut densitas partium, meatuum major, minorque angustia, vel etiam obstructio, vel excedens ampliatio, materiæ inutilis, vel etiam noxiæ major, minorve quantitas, aliaque hujusmodi. (b) *Eadem ratione neque cur nonnullæ quidem accessiones in febricitatione terminentur, aliqua verò non, est difficile inventum.*

Quibus quidem omnibus aperte mihi videor, etiam cum Galeno demonstrasse febrem periodicam datæ notæ, non mutata rerum substantia, mutatis tantum quibusdam circumstantiis alias, atque alias periodos habere posse.

Ad hujus (c) verò rei demonstrationem coacti sumus etiam curationis meminisse, non aliter affecti, quàm Hippocrates, qui quodam in loco per similem modum vulgatissimum illud dictum conscripsit, ostendit autem curatio. Si quidem nostris temporibus, vel lippis, & tonsoribus manifestum est multas, atque multas esse febres sub variis typis, atque periodis invadentes, ut sunt quotidianæ diætæ, tertianæ, quartanæque cum horroripilatione incipientes, quæ sumptis iisdem, vel planè similibus medicamentis, ut plurimum cessare solent, ut plurimum inquam; nam sunt quædam, quæ aliquid aliud adjunctum habent, quo non leve negotium faceffant medico, vel etiam non sine vitæ magno periculo sint.

(a) *Idem Gal. eodem lib. eodemque cap.* (b) *Eodem libro eodemque capite.* (c) *Gal. de differ. febr. lib. I. cap. 4. prope finem.*

LABOR IMMODICUS POTEST FACERE FEBRES , EXERCITIORUM ITEM OMISSIO.

E Videntes, & communes febrium causas enarrans Galenus primo loco ponit labores. Qui item *illud quoque*, inquit, *longa experientia compertum*, (a) *quod qui consueta exercitia omiserint, & aliis morborum generibus, & febribus maxime coripiuntur*. Utrumque verum est, nec non potest etiam labor, potest laboris, sive consueti exercitii omissio multas sedare febres, & omnino è medio tollere, quod natura non raro docet, experientia testatur, & Hippocrates, Celsus, Galenus, alique hoc idem monuere. Operæ pretium autem erit horum omnium rationes tradere.

Videndo etiam, & audiendo, aut aliter longiori tempore, quam conveniat, sentiendo, ne dum ambulando, & manibus, pedibusque, aliave parte corporis se exercendo homo laborare dici potest. Verùm in his, quæ nunc perquirimus, evidentiores tantum labores corporis animus est examinare, qui manus, pedesque, aliasque partes instrumentis motus manifestioribus, quæ muscoli appellantur, exercendo perficiuntur.

Ac primò supponimus in quocunque motu ex his vi structuræ, proprietatibusque ejusdem aliquid dissipari, & aliquid succedere debere his, quæ dissipantur. An quia post magnos tantum labores manifestò sudore perfundimur, & evidenter cognoscimus non exigua nos refectiōe indigere, in levioribus laboribus, dicemus nihil dissolvi, nihil dissipari, substantiæque nihil nos amittere, & in hujus locum nil succedere, aut succedere debere? mihi non videtur sic affirmandum. Quin etiam cum post plures, atque plures lapidis jactus ex: gr:, vel post longam ambulationem brachium, crura, pedesque languescere videam, in unoquoque etiam lapidis jactu, & in unoquoque brevi passu aliquid solvi, sive dissolvi existimo. Ac credo his, quæ dissipantur in motibus moderatis aliquid succedere, quod non sit inferioris notæ, sed in motibus immoderatis, ut plurimum id, quod iis succedit, quæ dissolvuntur, vitiosum est, & minus utile partibus.

Quæ non sunt sic intelligenda, quod quicquid in moto musculo solvitur, statim in auras abeat, & extra pellatur, nam in plerisque motibus musculorum non sic fit, & pleraque non omnino decedunt è corpore, nisi post alias, atque alias mutationes, aliosque usus, de qua re nonnihil tetigi in Erasistrato.

Quæ neque de sanguine tantum, sanguinisque partibus sunt intelligenda. Ac manifestò quidem ea membra, quæ plus moventur, majora sunt (ut dextra manus sinistra, ut plurimum major est) & vasa habent sanguifera dum moventur tumidiora, & magis conspicua, ut omnino credendum sit sanguinem, tunc temporis per hæc vasa tum majori copia, tum velocius trajici. Verùm etiam tum in fibris nerveis, aut tendineis, tum in membranis, quibus quique musculus involvitur, tum in aliis partibus multa aliter moveri, aut promoveri aliter rarefieri, aliter solvi, & attenuari dicendum est, ac fiat in quiete earundem partium ab omni alio motu, excepto irrequieto cordis: quo cun-

Etæ

(a) De diff. febr. lib. 1. cap. 2.

Etæ semper palpitant. Quin in ossibus, in articulis, connexionibusque aliis ossium ne dum multa liquari, & attenuari concipiendum est, sed capita ossium, cartilagines, ligamenta, tunicas, fibrillas partium earum, quæ maximè, & immoderatus moventur aliqua ratione atteri credendum etiam est. Ferrum ferro proximum, fila ænea, sive etiam chalybea, quæ se se tangant, non nè si moveantur, invicem conteruntur, & attenuantur? Quo pacto igitur fieri potest, ut ossa, cartilagines ligamenta, nervuli, membranulæ, fibrillæque ære, & chalybe teneriores, & molliores in immoderatis longiorique tempore perdurantibus motibus non offendantur invicem, & non invicem conterantur! Sed in attritis æneis, vel etiam chalybeis filis, quoniam æs, & ferrum nutriri nequeunt, non restituuntur partes deperditæ. In animalium verò corporum mediocribus motibus deperditæ partes recta nutritione restituuntur. Sed in motibus immoderatis haud quidem tam promptè, tamque facile recta restitutio illa fit, ac talis esse potest immoderatus alicujus partis motus, ut corrumpatur organizatio illius, & non postea unquam quoquo pacto restitui possint de perditæ partes. Præterquam, quod non raro aliud dissipatur, aliud elicitur, admittitur, aut derivatur, quo organa vitiosa fiant, & omnis postea universi corporis turbetur œconomia.

Quibus omnibus ex immodicis, improboque labore passio quædam fit illi similis, quam in contusionibus accidere dignoscimus, percipiuntque demum immodicè laborantes non minus membra veluti contusa, ac cum aliis causis exteriores partes re vera contusæ sunt. Ac sicuti in contusionibus conspiciamus aliquid illapsum detineri in membris, quæ etiam livida non raro propterea observantur; sic in membris immodice exercitis aliquid postea illapsum, vel quia id minus aptum est, vel quia motu attritis partibus vitiosi sunt ductus, vel ob aliam similem causam minùs aptè satisfacere necessitatibus; minùs aptè moveri, aut promoveri posse, vel etiam quandoque omnino quiescere, & obstructions facere concipiendum est. Quo illud fit, quod frequenter observatur iis, qui immodice se se exercuerunt nequaquam convenire omnimodam membrorum quietem, sed juvet partes immodicè exercitas fovere, tepida lavare, perungere, perfricare, aut aliter leniter movere, ad hoc ut his, similibusque auxiliis nihil, vel pauciora consistant in membro exercito, multa promoveantur, multa facilius restituantur in pristinum statum, & morbis plerisque, ac febribus præripiatur occasio. Enim verò in his, similibusque facile postea accidit minùs liberè motis iis, quæ illabuntur in partes attritas, plerunque in immodicis laboribus, ut dictum est, mala multa communicari nervis, & nonnihil afferri, aut vitii aliquid communicari cordi, organisque, quæ in corde sunt, quo hujus motus iritetur, & perturbetur, & febris proinde fiat.

Sed si quis est, cui hæc nostra utcunque gratiosè oblata non placeat sententia, non illi succensebimus, si in Galeni conquiescet verbis: febris inquit, (a) *Quæ lassitudines sequitur, principium quidem, & ipsa habet multam musculorum, nervorum, copularum, & articularum motionem, quæ sanè, & prima calefiunt: hinc verò continuatim calor ascendit ad cor; atque inde homo febricitat.* Quisquis tamen est, cui hæc placeant Galeni, calorem exponens

(a) De diff. febr. lib. 1. cap. 2.

ponens febris præter naturam ea dampnare debet, quæ de calore secundum naturam Galenus retulit.

Illud quoque longa experientia compertum est, (a) inquit Galenus, quod qui consuetæ exercitiis omiserint, & aliis morborum generibus, & febribus maxime corripuntur. Etenim in laboribus moderatis, congruisque, & exigentiæ proportionatis multa cum eliquentur, solvantur, attenuentur, rarefiant, resolvantur, vel utcunque alio verbo res melius exprimi possit, moveantur, promoveanturque in corpore animalium; sitque his, qui consuetudinem habent, labor quicunque mediocris, moderatus, & conservator sanitatis, non immodicus, & morbos afferens: omisso consueto exercitio, siue motu illa eadem non eliquata, non soluta, non rarefacta, non resoluta, non mota, vel non promota (non enim me pudet multis uti verbis fortè superfluis, modò res ipsa melius significetur) impedimento erunt aliis partibus, quæ propterea haud rectè poterunt functiones perficere, vel irritari etiam, & ad motus incongruos concitari poterunt: ac illa eadem non mota, ut dictum est, multa vitia concipere poterunt, corrumpi poterunt, & ex uno aliud, atque aliud mali nasci poterit, quibus multi morbi, febresque variæ ortum ducere poterunt.

At quoniam laboris omissio potest facere febres, poterit quandoque labor febrium causas ne dum avertere, aut dissipare, verum etiam quandoque multarum febrium remedium esse. Ex quibus ratio patet eorum, quæ experientia edocti Hippocrates, Galenus, alique monent in plerisque febribus exercitiis, exercitioque similibus, & æquipollentibus incumbendum. Celsus in quartana sic scribit: *Deinde post febrem oportebit ungi, & vehementer perfricari, cibum, & validum, & fortiter assumere, vino uti quantum libebit, postero die cum satis quieverit ambulare, exerceri, ungi, perfricari fortiter, cibum accipere sine vino. Tertio die abstinere. Quo die verò febrem expectabit ante surgere, & exerceri: dareque operam non oportet, ut in ipsam exercitationem tempus febris incurrat. Sic enim sæpe illa discutitur. . . si imbecillitas occupavit, pro exercitatione gestatio est. Si ne hanc quidem sustinet, adhibenda tamen frictio est: labor scilicet, & nonnulla labori æquivalentia prodesse consuevere in hac febre.*

Item cum labor immodicus possit facere febres, omissus, vel prætermisus, vel remissus, vel intermissus per aliquod tempus labor, non minùs ac a malis eduliis, & quandoque ab omni cibo, omnique potu abstinentia, prodesse poterit in morbis plerisque, gravioribus ne dum in febribus. Ex quibus ratio patet eorum, quæ experientia edocti Hippocrates, Celsus, Galenus alique monent in febribus plerisque quiescendum esse ab omni opere.

ANIMI AFFECTIONES CORDIS MOTUM POTENTER, ET VELOCITER ALTERANT.

DUobus generibus pathemata, quæ latinis animi affectiones dicuntur, comprehendi possunt voluptate, & dolore, & ab omnibus, quos sciam, his

(a) *De differ. febr. lib. 1. cap. 2.*

his corpora turbari, & diversimodè moveri conceditur. At causarum, quæ cordis motum alterare valent, animi affectiones sunt omnium potentissimæ, quæ quovis veneno efficacius quandoque hominem enecant: cumque aliæ causæ tempore indigeant sanè notabili, affectiones animi velocius, quàm oculus nescit, cordis motum perturbare possunt.

In omnibus autem animi affectionibus corporea quædam organa moveri vel ex hoc ipso, quod cordis motum alterent, & hominem tum vindicare à morbis, tum infirmare, & enecare valeant, manifestum esse potest. Sed præterea ex pedum ex: gr: , vel impotentia, vel velocitate, vel inconstantia in gressu, ex suspiriis, oscitationibusque, ex risu, ex vocis alteratione, & læsione, aliis propter varias animi affectiones vociferantibus potius, quàm clamantibus, aliis neque clamitare, neque loqui, neque literulas proferre valentibus, ex mutatione caloris remanentibus etiam nonnunquam diutissimè maculis, ut remanet etiam longissimo tempore ex animi affectu, qui timor dicitur, oris distorsio, qui colores frequentissime, & momento temporis mutantur in genis, quæ aliis pallent, aliis rubent, aliis lividæ etiam apparent, pro ut varii sunt affectus, ex iis, quæ observantur in oculis, ut plurimum nimis argutis, & loquacibus in significandis animi affectionibus, ex doloribus, & præcipue, & frequentissime capitis, & ex aliis innumeris fatis clare apparet pleraque organa corporis diversimode moveri in animi affectionibus. Ac eorum, quæ homini accidunt, quædam corporis tantum sunt, quædam ex parte corporis, ex parte sunt animæ, & hæc propter animæ præstantiam pathemata, sive animi affectiones appellantur, quædam omnino animæ sunt: ut ex: gr: velle, & nolle. Quod multi antiquorum, & recentiorum affirmant, & in libris de anima Aristoteles etiam hoc ipsum docuit.

IRA, ET TRISTITIA SUNT NONNUNQVAM CAUSÆ FEBRIS.

CUm pluries pluribus in voluminibus meminerit Galenus animi pathematum; in libris de differentiis febrium iræ potissimum, & tristitiæ meminit, utraque in genere doloris, sive displicentiæ, quas voluit esse nonnunquam febrium causas. Ego primum de Ira, postmodum de tristitia aliquid dicam.

Ira ultionis desiderium adjunctum habet. Galenus inquit desiderium hoc non constituere essentiam iræ, sed esse illi quid accessorium, (a) *Iratiss, & perturbatis*, sunt ejus verba, & *pudore affectis naturalis etiam calor augetur, quanquam ira haud quaquam auctus*; sed veluti fervor est caloris in corde. Itaque etiam essentiam ejus, vel probatissimi philosophorum talenz esse affirmant: quippe accessorium iræ est, non ejus essentia ultionis appetentia, & in lib. de diff. febrium. Ira autem, inquit, est veluti fervor quidam, (b) *ac vehemens motus potentiæ irascibilis in ipso cordis corpore sita, simul autem cum hoc fervore calefit aliquando quidem spiritus substantia, aliquando vero sanguis*

(a) De sanit. tuenda lib. 2. cap. 9. (b) De diff. feb. lib. 1. cap. 3.

sanguinis . Quod si ita contigerit , ut ea corpora . quæ in se caliditatem admi-
serunt , longo eam tempore retinere natura apta sint , licet motus cordis sede-
tur , in hisce tamen remanet calor præter naturam , atque inde hominem fe-
bricitare est necessarium . Hujusmodi ergo febris habet horiginem à motu , atque
fervore nativæ caliditatis . Sed semper ac caloris nativi , sive insiti , & na-
tivæ caliditatis mentio fit apud Galenum , semper maximè suspecta esse de-
bet ejusdem doctrina .

Utcunque autem iræ adjunctum sit ultionis desiderium , ex ultione
semper sperat homo oblectamentum , & levamen ejus displicentiæ , in qua
ira saltem ex parte consistit . Ac proinde in ira mens omnia agitat , in quibus
ultio sequatur , & omnia in corpore ea ratione commoventur , & agitantur
sanguis , alique liquores , pedes , brachia , facies , oculique in facie , qui tu-
midiores , & rubicundiores apparent , dentes , quibus , infrendent irati , par-
tesquæ aliæ , qua promptiora sint , & aptiora ad vindictam , sive ultionem
capeffendam . Quæ facilius , & gravius iis accidunt , qui ratione , & pru-
dentia minus pollent , quive superbi sunt , & malas habent consuetudines .
Ulysses , Polydamas , & Nestor consilio , & sapientia maximè præditi , ut ex
Homero refert Galenus , iracundiæ dominabantur . Hector , & Achilles
iracundiæ succumbebant . Pueri , qui ratione minus pollent facillime ira-
scuntur . Ac noster Poeta Neapolitanus describens fœminam iratam , inquit :

Mostrando ben quanto à furor raccolto ,

Sparsa il crin , bieca gli occhi , accesa il volto .

Et paulò post :

—— : ahì seguirò pur l'empio ;

Ne l'Inferno per lui riposta parte ;

Ne 'l Cielo fia per lui sicuro tempio :

Già il giungo , e 'l prendo , e 'l cor gli svello , e sparte

Le membra appendo a' i dispietati esempio .

Et apud Virgilium : Sic irata fœmina loquitur :

—— Proh iuppiter ibit

Hic , ait , & nostris illuserit advena regnis !

Non arma expedient ? totaque ex urbe sequentur ?

Diripientque rates alii navalibus ? ite

Ferte citi flammæ , data vela , impellite remos .

In ira multa maximopere rarefiunt , ut apparet ex toto corpore ali-
quantulum tumidiore , oculis maximè , facieque , & ut ex eo conjicitur , quod
ira percitis facile venæ in aliqua parte corporis , & manifestò nonnunquam
in narium summitate , vel in pectore disrumpantur . Quod si nullus sanguis
extra prodeat , non proinde dicendum est nullam venam , sive sanguiferam ,
sive aliam , nullam particulam intus in abditis sive cerebri , sive pulmonum ,
sive jecoris , aut alterius visceris nonnunquam disrumpi , vel leviori , aut
graviori vitio corrumpi iis , qui graviter irascuntur . Forte vehementiori
in ira , quædam , quæ simul mixta quoniam nimis rarefiunt , ebulliunt , &
fervent efficacius , & copiosius commilcentur , ut omnium maxima , & re-
pentina sequatur rarefactio : ex qua vel venarum , aliarumque partium disru-
ptio , vel in corporis habitu magnum aliquod fiat vitium , quo aliquando
nutritio etiam lædatur , & irritato per ea , quæ consequuntur corde , ea febris

fiat

fiat ab initio (hoc est in corpore, quod nulli prius manifesti vexarunt morbi) quam Hæticam ab initio appellavit Galenus. (a) Qui tamen, & recte quidem, præcedentem corporis dispositionem requirit ad hanc hæticam febrem faciendam. Nam ira, ut etiam quævis alia causa, non eadem in quocunque corpore producit mala; sed aliis alia: pro ut non est eadem corporum omnium dispositio.

Cum igitur præter alia vitia, etiam continuarum partium solutiones iratis fieri possint; nil mirum esse debet si omnes febrium species, & phthises, aliique morbi eodem animi affectu quandoque fiant.

Hæc autem intelligenda sunt, cum nulli alteri affectui ira commixta est, nam si tristitiæ, & metui exempli gratia jungatur, multò diversæ fiunt in corpore mutationes, & pallidi, & frigidi, & tremantes possunt esse sic affecti, qui aliis, atque aliis morbis in graviore affectu ægrotabunt.

Galenus in ira pulsus ait esse (b) *altos, magnos, vehementes, celeres, crebros*. Verum magnitudo pulsus non est tantum ex ira, sed si ex ira fiat (c) *prudentem non latet si oculos respiciat, universumque vultum*: modo non sit ira alteri affectui conjuncta, quo tum pulsus, tum adspæctus alius sit. (d) *Quod si quis reprimere iram, & tegere velit, propter aliquem alium adjunctum animi affectum, pulsus sit inæqualis: magisque inæqualis his est, qui anguntur, & verentur*.

Ira ex animi affectibus *excrementa, quæ prius quieverant, calefaciendo, attenuando, ac in spiritum vertendo excitat*, (e) ait Galenus, atque ideò tum obesse, tum prodesse potest. (f) *Irascantur interdum illi, qui sibi ipsis præcavere volunt à renum affectibus*, inquit idem Galenus, qui his etiam, *desidiæ esse in primis noxiæ* ait. Ego iram nunquam laudaverim; licet sciam nonnunquam ad victoriam iracundia trahi hominem, ac cum vi magna quadam animi præclara aggredimur non sine nostræ vitæ discrimine facinora: tunc fortitudinem potius illam, quàm iracundiam appellari velim.

Tristitia verò sæpenumero adjunctam habet remedii, levaminisque desperationem. Iique, qui sic affecti sunt appellari etiam consuevere melancholici, & hypochondriaci, cujus tamen nominis fuit antiquitus, atque etiam est hoc nostro seculo varia acceptio. Hi sunt frequenter absque ulla recta causa meticulosi, mærentes, omnia desperantes, solent esse tardi, pigri, frigidi, omnia inique peragentes, frequenter ad extremas vi ægritudinis animi trahuntur desperationes.

Quæ autem febris, inquit Galenus, (g) *ex tristitia fit ex solo motu, non autem ex fervore generatur*, quasi fervor non motus etiam ipse sit! Sed sine dubio ejusdem rei hic motus aperit, cum alius claudat, hic dilatat orificia, cum alius eorundem vasorum orificia constringat, faciatque angustiora, vel etiam claudat. Sic ejusdem cataractæ motu vario, fluunt, quæ fluere cessaverant; parcius, vel copiosius fluunt, vel etiam cessant fluere, quæ prius fluebant aquæ. Atque ideo cum in iracundia, tristitia, aliisque ani-

Tom.1.

H h

mi

(a) De differ. febr. lib.1. cap.9. (b) De causis puls. lib.4. cap. 2.
 (c) De præsagi. ex pulsu lib.1. cap.1. (d) Gal. eodem lib.1. de præsag. ex puls. eodemque capite. (e) Gal. de symp. causis lib.2. cap.5. (f) De renum affectus dignotione, & med. cap.5. (g) De differ. febr. lib.1. cap.3.

mi affectibus motus plerique in corpore fiant; præter alias differentias nonnulli motus hujusmodi esse possunt, quales superius ruditer descripsimus in ira, dicentes multa sæpenumero rarefieri, vel alii erunt, ut condensationes, constipationes, aliique contrarii sequantur effectus.

Sunt quibus frequenter sic placeant dolosæ locutiones; ut eos semper damnent, quorum sermonibus imaginabile aliquid significatur. Hi si motus, canales, cataraetas, aliasque similes voces legent, quoniam vident nos non posse res ipsas ante oculos ponere, iniqua mente omnia interpretabuntur, & saltem pessimè nos ubique traduentes contra omnem pietatem, quam affectant, sibi ipsis nomen, famamque aucupabuntur. Sed valeant ipsi quantum volunt, sinant tamen nos veritati magis adhærere, & de iis, quæ imaginabilia fecit Deus imaginabile saltem aliquid referre. Non quod ignorem multa aliter, ac ego concipiam, quandoque fieri posse; sed quia cum sæpissime minuta nimis sint instrumenta, quibus res peragitur, viarum omnium hæc una superest homini ad similitudinem visibilium, & sub sensus cadentium ea concipere in corporibus, quæ propter exiguitatem, tenuitatemque instrumentorum perspicere nequeunt.

Pulsus in tristitia, inquit Galenus (a) *parvus, languidus, tardus, & rarus est*. Quibus tarditas in operibus, metus, & frigidi sensus fit. His constipationes, constrictiones, condensationes, angustięque viarum, & præcipue vasorum cordis denotantur. Sanguis propter hæc, aliique liquores, & postmodum ea, quæ cibo, & potu sumuntur, minus quam convenit, attenuantur, & multipliciter imperfecta sunt. Obstructiones ab his iisdem fiunt, & sexcenta plane, quæ ab obstructionibus ortum ducunt. Quo facile rectum sensum accipere possunt verba Galeni dicentis (b) *tristitia humores intro ferri, non quod re vera intrò ferantur, sed quod haud recte transmittantur, distribuanturque, & haud recte attenuentur, ut exinde alicubi consistant, & intrò abundare videantur*. Ac quidem in tristibus, melancholicis, hypochondriacis malas ciborum præparationes, & obstructions potissimum audio medicos omnes accusare solitos. Quibus omnibus non est nimis difficile concipere, ut febres fiant. Animadvertendum tamen est tristitiam aliis etiam plerisque affectibus animi conjunctam esse posse, & alia aliis ex ea accidere posse.

VIGILIE IMMODICÆ POSSUNT FACERE FEBRES.

Vigilantes si non plura, saltem pauciora ex iis organis exercent, quorum in vigilia esse potest usus. Vigilantes necessario dicendi sunt in exercitio esse, atque in labore. Vigilantibus immodice non minus ac immodice laborantibus morbi, & febres fieri consuevere, (c) quod recte etiam notatum à Galeno est. Quæ mihi adeo omnino vera videntur, ut existinem me jure merito posse huc transferre ea omnia, quæ de immodice laborantibus dicta sunt, & quæ ibi brevitati consulentes omissa sunt, non dubitem hic loci addi posse.

Vigi-

(a) *De causis puls. lib. 4. cap. 4.* (b) *De sanit. tuend. lib. 4. cap. 6.*

(c) *Gal. de differ. feb. lib. 1. cap. 2.*

Vigilantes vident, ex: gr:, at oculi, & alia interiora visionis instrumenta videndo exercentur, & defatigantur: ac addere possumus partim ab externo lumine, partim per ea, quæ intus in visione homini fiunt exerceri, & defatigari oculos. Non negamus tamen per ea tantum, quæ intus moventur nonnunquam inanes quasdam visiones fieri, ut sunt rerum non existentium visiones: his enim, quibus hæ fiunt ab intrinseco instrumenta visionis, sine ullo externo lumine ea ratione moventur, ac moverentur si lumine prædita objecta extra oculos posita essent. Quamobrem cum oculi corpora sint, musculos habeant, proprios humores, aliosque, membranulas, & nervos habeant insignes; ad similitudinem eorum, quæ dicta sunt cum de laboribus evidentioribus, in visionibus quoque quibuscunque (nam non fiunt sine motu) necessum est multa dissipari, multa moveri, promoverique, motusque communicari ad profundiora principia nervorum, ne dum usque ad thalamos opticorum. Ac videndo in longioribus vigiliis fibrillas, membranasque, aliasque partes non minus atteri, & attenuari, longiorique usu aliud illabi, aliud evacuari, aliud derivari, quam conveniat credendum est. Quin etiam in canalibus, aliisque partibus multa diversimode vitari, aut corrumpi affirmandum est, ut communicato demum vitio aliis nervis, iisque omnibus, quæ ad cor utcumque pertinent, & ad cor utcumque feruntur; hujus etiam motus irritetur, & febris fiat.

Quod si in immodicis vigiliis non quidem oculi immodice videant, sed aures, ex: gr:, immodice audiendo exerceantur, similia prorsus dicenda erunt.

His similia dicenda erunt in longioribus, & immodicis speculationibus contemplationibusque, quæ vigilantibus contingere solent, in quibus multa organa necessario immodice exercebuntur, & multa continget dissipari, aliis minus congruis, & minus aptis succedentibus.

Neque eos morabor, qui in cogitationibus animales esse spiritus substantias, quæ dissipantur, affirmant; nam spiritus dicti medicis corpora etiam sunt, quibus in majori, atque majori copia dissipatis minus apta, & minus congrua succedere debent. Et tenuissimæ solidæ fibrillæ, aliæque partes in cerebro corpora sunt, quibus simile quid in immodicis laboribus accidere debet, ac musculis sive manus, sive pedibus accidit, dum nimis exercentur. Quin multò gravius homini profecto est instrumenta tenuissima in cerebro posita nimis exercere, quam grave, sanitatique incommodum sit magnis manibus, magnisque pedibus nimis laborare. Atque ideo multo facilius speculationibus, cogitationibusque immodicis caput dolere, cor irritari, febres fieri, totaque universi corporis œconomia turbari potest.

Quod si vigilando linguam, aliæque organa, quibus loquimur, immodice homo exerceat, res, de qua agimus, erit magis manifesta. Enim verò primum nonnulla, quæ forte per noctis quietem conquieverant in lingua, & vasa, porosque, cavitatesque fibrillarum repleverant, & fortassis linguæ, vasisque, fibrillisque ejusdem erant superflua, moventur, evacuantur, & in os, faucesque erumpunt. Quo si motus in mediocritatis terminis consisteret, multa melius essent homini, nam in his terminis nonnihil uberius descendit in ventriculum, qui validior proinde fit ad novi cibi elaborationem, & alia non pauca beneficia ex moderato illo linguæ motu sequuntur.

Sed postmodum in hujuscemodi exercitii longiori duratione alia solvuntur, evacuantur, & exprimuntur, aut aliter moventur, quæ utiliter non fuissent sic mota. Necnon longiori organorum, quibus loquimur, exercitio multæ partes invicem conteruntur, quæ utiliter non fuissent attritæ: mutaturque earundem constitutio, quæ utiliter non fuisset mutata. Atque his quidem facillimum quoque est ea omnia contingere, quæ in immodicis quibuscunque laboribus accidere posse diximus. His insuper, qui immodice loquuntur multa moventur, volvuntur, & revolvuntur in cerebri organis, dum ea, quærunt de quibus sunt locuturi, & frequenter gravis aliquis affectus animi sermonibus ipsorum conjunctus est, ex quibus omne mali genus fieri potest. Quamobrem recte quidem neque M. Tullio Ciceroni, neque aliis mirum fuit L. Crasso Oratori egregio extremo scenicorum ludorum die dum acrius, magnaue cum animi concitatione inveheretur in Philippum, novissimam diem approperasse: *nam tum latus ei dicenti condoluisse, sudoremque multum consecutum esse audiebamus*, inquit Cicero, *ex quo cum cohorruisset, cum febris domum rediit, dieque septimo est lateris dolore consumptus*.

At si neque immodice loquantur, qui immodice vigilant, impossibile tamen erit eosdem non aliqua eorum facere, propter quæ vigilare dicimur, utcunque inquam immodice vigilent, immodice laborare dicendi sunt, ut propterea omnino constet immodicis vigiliis hominem febre posse corripiri.

Consuetudo tamen in his non minus ac in pedum motibus multum valet, & sæpe non minus ac videmus quosdam immodice ambulantes nihil pati, nihil etiam patiuntur nonnulli, qui immodice vigilandi consuetudinem habent. Verum, ut rectius loquar, assuetis plerique motus non sunt immodici, & respective hæc omnia, ac secundum habitudinem quandam accipi debent.

In accessionum initiis (a) *vigilias agrotis præcipimus* inquit Galenus, *illam, quæ à vigiliis fit spiritus, sanguinis, & caloris, qui in eis est, ad exteriora lationem opposcentes, tanquam maximum auxilium adversus illam, quæ fit in accessionum principiis, sanguinis, spiritus, & caloris naturalis ad interiora lationem*. Sed si pro calore recte id intelligatur, quod omnes vulgo intelligunt, neque in cujusvis febris accessionum initiis extrema frigida observantur, quo caloris ad interiora lationis conjectura fieri queat, neque quibusvis, utcunque vigilantibus exteriora calida observantur, quo caloris ad exteriora lationis conjectura fieri queat, quinimo vigilantibus ex eo, quia literarum studiis, & speculationibus sunt graviter occupati pedes, manusque frigidiores potius, quam calidiores sunt. Verum aliud vigilandi genus in accessionum initiis commendare Galenus existimandus est: artus contendere, aut aliter leniter movere, perfricari, perungi apte, confortans aliquid olfacere, vel aliquid aliud his simile facere. Ac idem Galenus Hippocratem explicans, qui vigiliam appellavit edacem, *vigilia* inquit *digerit, dissolvit, dissipat*, quibus verbis multa eorum confirmantur, quæ superius dicta sunt.

SOLIS

(a) In 2. lib. Aphorism. Hipp. aph. 1.

SOLIS ARDOR, ET FRIGORA FEBRES POSSUNT FACERE.

Puriores inter febrium causas enumerat Galenus solis ardorem, maxime sub canem, & ante canem, quo tempore difficiles esse purgationes docuit Hippocrates, qui per verba illa tempora significavit, in quibus dies esse solent magis fervidi, Julii scilicet, & Augusti mensibus saltem maxima ex parte.

Sole autem, quo localiter movetur terræ circumfusus aer, non moveri corpora animalium ridiculum est. At dixerit aliquis planta non quidem localiter solis, vel frigoris vi, sed aliis movetur motibus, qui dicuntur alterationis, atque sic etiam dicendum est de corporibus animalium! An rami, frondes, flores, fructus neque borea localiter moventur, quoniam hebetes oculi nullam in trunco vident partium localem mutationem? Sed etiam in trunco lapsu temporis multa apte apparent localiter mota, ut in ramis quoque, frondibus, floribus, fructibus, aliisque plantæ partibus! Quid dicemus? motus istos locales non fieri pedetentim, & momentis singulis non dignosci, quoniam momentis singulis re vera nihil localiter moveatur, sed lapsu temporis dignosci, quoniam re vera tunc fiant, cum eorum mortalium, qui melius vident, cæcis oculis res manifesta est! Ridicula plane, & hæc quoque! In libro qui dicitur: *Saggi di Naturali sperienze fatte nell' Accademia del Cimento*, est titulus hujusmodi *Esperienze intorno a d'un' effetto del caldo, e del freddo nuovamente osservato circa il variare l'interna capacità de' vasi di metallo, e di vetro*, multa leguntur, quæ faciant ad rem præsentem, probentque iis, quæ ex Galeno ad nos tantummodo calida, vel frigida dicuntur, quoniam calefaciunt, vel refrigerant nos, loco moveri partes corporum, & mutare sedem adeo, ut inter plerasque distantiarum mutatio clare observari queat, ac scio ea, quæ ibi referuntur esse vera. Quod si quis velit calores, frigoraque alios habere motus, alterationis dictos, quibus jungatur quidem semper motus localis, sed non esse eos unum, idemque cum motu locali. Hanc dabo illi facultatem utendi vocibus, hac tamen conditione, ut ille det nobis, licet um saltem esse contemplari nos, & examinare ea, quæ motu locali corporum, & partium eorundem fieri, & observari possunt.

Puillus noster ignis in terra nunquam is est, qui non multis passibus remotum ab ipso aerem non habeat conservandæ sanitati aptum. At solis vi nonnunquam aer ad multa quidem, atque multa passuum milliaria homini, aliisque animantibus noxius est, aeremque hujusmodi audiivi homines dicere solitos suffocatum, non quia suffocatus is sit, sicuti neque ridet prata, quæ ridere dicuntur, neque in se calida sunt Galeno, quæ calefaciunt nos; sed quia veluti suffocet animalia, & respirantibus minus aptus sit, ac meminisse me legisse à Galeno ejusmodi aerem suffocatum dictum fuisse.

Multiplex sine dubio est nobis aeris usus, qui satis explicari nequit verbis his *calefacere nos, & refrigerare nos*, ut neque panis usus his iisdem vocibus satis explicari potest. Ac quidem multa habemus ab aere, & magna parte aere nutrimur, qui summe necessarius est ad omnes vitæ natorum functiones. Neque quicumque æque satisfacit. Neque idem est recte, vel per reflexum illustratus radiis solis, quod saltem ex parte manifestum est, vel plan-

plantas observantibus, quæ ramos extendunt ad plagam solis radiis illustratam. Magna sit oportet aeris ab aere differentia, quoniam multa fiunt in uno aere, quæ non fiunt in alio, vel non sic in uno, ut in alio fiunt aere. Quod etiam in vini maturatione, & perpurgatione observavit Galenus, qui tamen forte ignoravit longa navigatione vinum sæpe numero perfici, nam meliores pro exponendo eventu invenisset rationes. Neque res adeo facilis est, ut per brevissima verba calefacere, & refrigerare satis explicari possit, nam quæcumque sunt corpora infinitis modis moveri possunt independenter ab hoc, quod calefacere, & refrigerare dicitur. Sed plerique sunt, quos metaphorice dicam usurpare has voces, & per ipsas intelligere vim rerum omnium universam. Verum hoc non est rerum corporearum omnium naturam explicare, quæ nunquam recte explicatur, nisi cum ad mechanicas, quibus res fiunt rite, & recte, perventum fuit. Quibus paucissimis verbis motus etiam inclusus est, nam sine motu machina quævis veluti mortua omnino nihil præstat.

Causas sane febrium (a) scripserat Erasistratus primum, atque etiam nunc sciscitari solent, & ab ipsis ægrotis audire volunt, an is morbus ex frigore, vel labore, vel plenitudine, vel alia simili causa originem habuerit, qui nec vere, neque ut convenit causas morborum inquirunt. Etenim si frigus febris causa esset, qui magis refrigerantur, magis febre tenerentur. Sed hoc non ita est, multi siquidem, qui ad extremum usque periculum præ gelu devenerunt, mox ab eo servati absque ulla febre permanserunt. Non secus etiam in labore, & plenitudine fieri videmus, in fortioribus enim quidam laboribus versati, majorique repletionem graves, nunquam febrem passi sunt.

At in contemptum Erasistrati, vel cachinnos etiam movere, & extorquere ab iis, qui legunt, conatur Galenus, ex quo animi gratia, & ut dicendi vis hominis manifesta sit, afferam verba, (b) quæ sunt in lib. de causis procatarcis cap. tertio. Unde accersamus Oratorem aliquem Erasistratium, qui velit percussorem ab homicidii crimine eripere, & hoc modo dicat, utamur vero definitis nominibus, ut res clarior fiat. Non est Orestes causa mortis Clytemnestræ, movit enim ille manus quidem, nam id nos fatemur, quod manu sua ille hoc fecit, manus vero Orestis, non ipse Orestes enses moverunt: unde jam ex hoc Orestem insontem esse ostendimus, sed ex hoc etiam magis, nam ab ense præterea incisæ sunt venæ in collo, non ab Orestis manibus. Fuit postea in causa effusionis multi sanguinis sectio venarum non Orestes. Quod vero mors Clytemnestræ à venarum sectione, & sanguine multo effuso prodierit, neque ab iis, qui accusant, negari arbitror. Quare non est putandus Orestes fuisse causa mortis Clytemnestræ, cum nequeant accusatores nostri monstrare, quod idem sit Orestes, & multi sanguinis effusio. Ac multa alia quidem perquam ornate ad istorum similitudinem, & ludibrium Erasistrati Galenus habet aliis in locis tum notato superius capite.

Sed jam unusquisque videt, quam facile ipsi eloquentissimo Galeno fuerit Erasistratum, vel defendere, vel excusare. Neque ego alium velim Erasistrato Patronum, quam ipsum Galenum, qui sæpe sæpius hæc
ipsa

(a). Relatus à Gal. lib. de c. procatar. cap. 2. (b) Gal. de c. procatar. cap. 3.

ipsa probat, ostenditque, quæ in Erasistrato improbat, deridetque, ut videre est in lib. 1. de diff. febr. cap. 2. ubi postquam æstus, & frigora, labores, & plenitudines, aliaque multa dixerit esse febrium causas præincipientes, hæc statim subdit, *qui vero ab eisdem causis nostris corporibus adveniat affectus ex quo febricitamus, hoc sane multos latet, & a plerisque etiam, qui se medicos profitentur ignoratur.* At dixerat febrem in genere caloris, qui est præter naturam consistere hoc est affectus, ex quo febricitamus formaliter in genere caloris, qui est præter naturam constitit. Calor igitur hic præter naturam latet multos, & ignoratur etiam à plerisque, qui se medicos profitentur. Latet semper inquam Lazarum Riverium, Sennertum; Fernesium, Mercatum, Capi vaccium, Massarium, aliosque hujus farinae, latebit homines, qui nunquam examinaverunt, quid pro calore præter naturam intelligendum sit. Atque ineptissime crediderunt calorem præter naturam esse quid perceptu facile. Qui perceptu difficillimus visus est Galeno, cujus sententia verbis tamen, & verbositate, qua eadem traditur, differt ab Erasistrati Clarissimi etiam viri sententia: dicebat enim Erasistratus difficile esse id cognoscere, quo proxime, & immediate in febrem incidimus, quod ipsum est, quod pluribus in locis Galenus asseruit, de qua re aliquanto fusius peculiari numero ex sequentibus.

SUMMA CAPITIS VI.

C U J U S T I T U L V S

DE FEBRE HEPIALA, AC DE PITUITÆ GENERIBUS.

Superiori capite, in quo de quartana egerat, ex rerum observatarum historia retulerat, contra antiquorum sententiam, rigorem non semel fuisse observatum sine febre, videlicet, ut ipse dicere videtur, cum humor adhuc non esset putridus. *Sed quando hujusmodi in tempore humor putruerit, non modo rigent, sed etiam febricitant,* sunt ejus verba, quibus addit hujusmodi febres esse diuturnas, & sub quotidianæ specie progredientes. At præsentis capite ex hoc igitur genere, inquit, est & febris ea, quæ proprie vocatur hepiala, in qua ægrotantes eodem tempore utrumque sentiunt affectum.

Inde refert Archigenem existimantem nomen *Hepiala*, febri tantum convenire in qua ægrotantes eodem tempore in toto corpore utrumque sentiunt affectum rigoris scilicet, & caloris.

De Atticis autem refert, eum etiam rigorem, qui præcedere solet nonnullas febres, hepialam appellare consuevisse.

Post hæc supponens, quod innuerat, hujusmodi febrem sub quotidianæ figura progredi, & proinde à pituita ortum ducere, de Praxagora refert, quod vitreum humorem accusare solitus esset, de Philippo ait, quod crudeum humorem accusare consuevisset, laudatque breviter tum Praxagoram, tum Philippum, quod nullum epithetum adicientes melius distinguerent.

Prodicum autem increpat, quod in expositione nominis peccaverit: prodi-

Prodici tamen, quisnam fuerit error, non explicat: Sed aliquanto magis aperte, quam prius fecisset. *Quicumque inquit humor natura frigidus, atque humidus fuerit, hunc nos pituitam appellamus, tu verò si libeat scindapson nomines, adeò est mihi parva nominum cura.*

Dehinc pituitæ, sive ut ipse ait, scindapson varias enarrat species, quarum una vitri liquefacti similitudinem gerit, & frigida adeò est ut cum in loco calido obstruitur dolores maximos excitet, qui in intestino laxiori non semel excitari vi acrioris clysteris évacuata hac vitrea pituita statim sedati sunt. Est alia pituitæ species sapore dulcis, scretu évacuari solita, quæ adeò frigida non est. Est & tertia species expuentibus acida, quæ frigiditate inter vitream, & dulcem est. Quarta species falsa est, aut propter putredinem, aut propter salsæ serosæ humiditatis mistionem, ex qua si quos febricitare continget superveniente accessione non rigent, sed tantummodo horrent. Verum acida, & vitrea pituita ex ipsius sententia in sentientes corporis partes delatæ, rigores sine febre faciunt, quod si earundem aliqua sit putrefactio hepiala febris fit. Quod si vehementius putrescant, rigor quidem antecedit, febris verò sequitur superata frigiditate à multitudine caliditatis, adeò ut dum febris invalescit, atque consistit, minime sentiatur.

Inde dubitans vitream pituitam esse acidæ qualitatis participem, dicit tres esse tantum ejus species, acida, dulcis, & falsa. *Minime vero dulci pituita putrescente febrem rigor antecedit.*

Demum quæstionem proponit, qua quæri potest an pituitæ pars quædam putrescens faciat febrem, pars alia non putrescens faciat rigorem, sintque hæc à duplici causa, ab eo scilicet, quod putrescit, & ab eo, quod non putrescit. Sed dulci fastu asserens hæc esse logica potius quam medica *per febrem inquit tertianam flava bilis rigorem efficit, ac febrem*, quasi, nisi mea fallit sententia, dicat, potest una, eademque secundum easdem partes putrescens pituita rigorem facere, & febrem, sicuti eadem bilis in tertiana rigorem, & febrem facit.



ILLUSTRISS., ET REVERENDISS. DOMINO
D. DIDACO VINCENTIO

A' V I D A N I A,

*Neapoli Regiorum Studiorum Modera-
tori Oculatissimo.*

L. A. P. s. p. dicit.

MEmini me quondam scripsisse, existimare me ea omnia, quæ tibi narro, aut scribo Illustrissime, & Reverendissime Domine iis etiam omnibus narrata, & scripta esse, qui in Cathedra primaria, quæ vacat per obitum Caroli Pignatari, concedenda habent vota, & non arrolas fabas dare solent. At nolim nunc ea, quæ dicam, mihi obesse potius, quàm prodesse, & iis omnino prodesse, qui sine bonarum, malarumque rerum discrimine totum Galenum laudant, quem neque in reâis defendere sciunt, vel totum Galenum damnat, quem neque in reâis admittunt.

Scripta autem hæc sunt occasione, qua à multis frèquenter audivimus negatum ex una parte fuisse, dari posse Hepialam febrem, in qua ægrotantes (a) *Simul febricitent, & rigeant, atque eodem tempore in toto corpore utrumque sentiant affectum*, ex altera autem parte haud ullum unquam validum, propriumque ex frequentibus multis audivimus argumentum, quo Galeni stare sententia. Quamobrem ego animi gratia hanc mihi proposui quæstionem. Utrum dari possit febris, in qua eodem tempore, & ex eadem causa frigus, & calor per sentiantur ab ægroto?

Respondeo affirmativè, ac insuper assero febres hujusmodi non semel datas fuisse, & non raro dari. Cujus rei exemplum aliquod nobis exhibere possunt febres illæ, quæ cum horrore, vel cum rigore incipiunt. Enim vero nequaquam sic incipiunt cum rigore, ut statim, momentoque temporis omnino desinente rigore, calor incipiat molestus esse, verum pernotabile sanè tempus, & quandoque etiam per longum tempus ægrotantes utrumque patiantur affectum rigoris, & molesti caloris. Et Franciscus Sylvius de le Boe neotericus non ignobilis, febres dari inquit, in quibus (b) *Tum frigus, tum calor per intervalla recurrunt*, ut revera dantur. Possunt autem intervalla temporum esse adèd brevia, ut non inepte toto suæ durationis tempore tum frigore, tum calore febres hujusmodi dicerentur ægroto molestæ, quæ

Tom. I.

I i

proin-

(a) Gal. de diff. febr. lib. 2. cap. 6. (b) Qui tamen nihil præstantius fecit, nisi quod novavit, & mutavit præjudicia.

proinde Hepiale secundum Galenum dici merentur . Merito autem jure mihi videor in quaestione addidisse verbum *ab ægroto* : nam quicquid sentiant Medicus , & adstantes in ægroti hominis corpore , ipse potest in semetipso ægrotus manum ex: gr: percipere calidam , quæ frigida observetur ab adstantibus , potest de doloris conqueri perceptione in digito manus , quam Chirurgus jam resecaverit , & sepulta jam sit , & potest clangores referre se audire buccinarum , aut campanarum , quæ nullæ sint , sonum ,

Generaliter autem de frigoris , caloris perceptionibus dico , quod uno , eodemque tempore ab uno , eodemque homine , cujus corpus non est veluti punctum unum , haberi possint . Sed prius paucae quædam observationes recensendæ sunt , quibus manifestum fit , esse quædam , quæ vario modo applicata , tum calorem , tum frigus parere possint . Hujusmodi est nitrum , hujusmodi est vini spiritus , qui , ut facile quivis experiri potest , affusus manui , præcipue si moveatur manus , facit frigidi sensum , & sumptus ore facit sensum calidi . Hujusmodi est acetum , quod diversimode applicatum , diversos , & planè contrarios parit effectus . Inde est , quod Galenus apertissime pronunciaverit acetum neutrum esse , quoniam quandoque ab effectu calidissimum , quandoque ab effectu frigidissimum videri possit . Quod quidem pronunciatum verum est , modo ea ponamus neutra dicenda esse , quæ ratione aliqua usurpata , calidi , certa verò ratione alia usurpata , frigidi sensum facere possint : Galeni tamen hoc loco rationes omittæ , contentus pronunc , quod dicat pleraque esse , quæ tum calidi , tum frigidi sensum facere possint . Sed alias adnectam observationes , quibus pateat diversas , & planè oppositas sensationes ab una , eademque re , & uno , eodemque tempore haberi posse , & veluti contrarios effectus ab una , eademque re nonnunquam produci . Sic eadem titillatio plerumque tum delectabilis , tum molesta , si ve dolorifica est . Et in re venerea non pauci tum dolerem , tum oblectamentum eodem tempore percipiunt . Quæ quidem multiplici ratione exponi possunt , sed referam saltem unam , quæ quantum memini , iis , quæ Plato docuit , consentanea est . Unum , idemque , diverso tamen modo applicatum varios debet producere effectus , quoniam diverso modo applicatur . Sic in machinis eadem motus vi quædam in circulum , quædam per ellipsem , quædam per alias curvas feruntur , quædam ad dexteram , quædam ad sinistram , quædam recta moventur , & quædam casura non cadunt , sed suspensa manent , & saltem ex quadam distantia quiescere videntur , ut globus in fontibus perpendiculariter ad horizontem , aquas versus Cælum effundentibus suspensus apparet , & veluti quiescere videtur . Verum unum , idemque variis partibus animalium applicatum , & variis liquoribus dum per vasa , perque glandulas varias fluit permixtum diverso , varioque modo applicari dicendum est . Atque idèò varios , diversosque producere debet effectus . Sic memoratus spiritus vini applicatus manui facit frigus , sumptus ore facit calorem . Et acetum , de quo locutus fusè Galenus est , applicatum ferro secundum Galenum dici posset habere calorem corruptivum ferri , & præter naturam ferro , & calor quidem aliquis nascitur ex illa ferri solutione , & corruptione . Idemque acetum applicatum auro vim nullam ostendit , nullumque calorem præ se fert auri corruptivum . Idemque acetum applicatum frustibus quibusdam , maxime immaturis præservat illos à certa quadam corruptione .

ruptionis specie, dicique posset calorem habere familiarem, amicumque nativo calori illorum fructuum. Idemque spiritus vini alicubi applicatus sedare potest dolores, cum alibi, ut ejusdem guttula apertis infusa oculis, dolores excitet, eosque non leves. Calci autem vivæ affusum oleum nulla facit incendia, quæ, ut Galenus (a) etiam cognovisse videtur facile fiunt affusis aquis. Hæc autem omnia illud confirmant, quod à Galeno pluribus in locis dictum est, omnia, aut fere omnia in medicina consideranda esse ad aliquid, sive respectivo, ut revera ad aliquid, & respectivo considerari debent. Et illud confirmant, quod à Galeno pluribus in locis dictum est, difficillimum plane esse recte decernere ex sui essentia, sive natura, & in se calidum ne aliquid, an frigidum in se sit? Ac proprio quodam capite in animadversionibus meis ostendi, neque de alio ausum fuisse Galenum affirmare, quod calidum, vel frigidum in se esset.

Sed his ommissis, quæ ad Galenum, & ad Galeni doctrinam spectant, in febribus inquam etiam accidere potest una, eademque causa, quoniam partes corporum animalium variæ, & variæ sunt, uno, eodemque tempore tum calorem, tum frigus excitari posse. Ac profecto accidere potest partes varias esse proximas, vel non nimis invicem remotas, ut propterea in uno, eodemque membro, in quo plures variæque partes sint, & uno, eodemque tempore tum frigus, tum calor percipiuntur. Neque discedens à vini spiritu, dico: accidere posse eo affuso tum intrà, tum extrà, & circa oculum uno, eodemque tempore varias, oppositasque haberi sensationes doloris, oblectamenti, frigoris, & calidi, non minus, ac in horologiis, & machinis ex: gratia, quæ moventur uno pondere, vel uno fluxu aquarum varii, oppositique tum nasci, tum percipi possunt effectus.

Ex his autem, similibusque facile quivis dignoscere potest quot, & quanti ex non distinctis nominum significatis, ut Galenus agebat, & ex dividendi, componendique, & ex historiæ naturalis ignoratione nascentur deceptiones. Demum in his etiam omnibus mihi videor, quæ rectiora, & utiliora in Galeno sunt me fuisse secutum. Vale.

MEDICIS PHILOSOPHIS

VERITATI POTIUS, QUAM LUCRO INHIAANTIBUS.

*Id, quod calor præter naturam appellatum à Galeno est,
non est calor illi similis, quem sensu percipimus,
& quid rectius de eo dici possit.*

DE calore quidem *secundum naturam*, quem etiam *calidum innatum*, & *insitum* vocare solet Galenus, dubium non est eundem Galenum intelligere aliquid maximè differens à calore quem sensu percipimus; nam de calido innato non semel loquutus substantiam, & substantiam quidem non ignobilem intellexit, & non semel expresse declaravit se non intelligere aliquid simile calori, qui ignis dicitur, vel attritus, aut alterius rei similis *soboles*. Nos autem nullum sensu percipimus calorem, nisi similem illi, qui ab igne, attritu, aut alia re simili fiat. Ac licet eadem dici possint *de calore præter naturam* ex Galeni sententia, qui semper consideravit *calorem præter naturam calori secundum naturam* inimicum, & adversantem, & qui huic præter naturam dicitur calor, alteri secundum naturam est; attamen aliquanto melius, & accuratius quærendum est, an similiter pro calore præter naturam substantiam intellexerit, & aliquid intellexerit dissimile calori, quem sensu percipimus.

Ac primo considerandum est ea, quæ dicit *de calore præter naturam* corrumpente naturam hominis, & nonnunquam spiritus occupante, aut prehendente, non verò partes solidas, aut humores, & nonnunquam insidente humoribus, non verò partibus solidis, aut spiritibus, & nonnunquam residente in partibus solidis, non verò in spiritibus, aut in humoribus de calore ignis, vel ignis simili intelligi, & explicari minime possunt. Nam partes solidæ, spiritus, & humores nè dum in corde, sed in universo corpore animalium minutissime sese contingunt, & confunduntur, ut sic dicam, ut non possit quidpiam ex his calore simili ignis calori incalescere absque eo quod reliqua incalescant. Sic aerea substantia, calidior si fuerit in corde, necessario servata quadam proportionem eodem tempore solidæ, & humorales cordis substantiæ, sive per nervos delatæ, sive per coronaria vasa permeantes, sive ventriculos alluentes calidiores, & fervidiores esse debebunt. Nam sunt solidæ humoribus, & aereis substantiis semper proximæ, & minutim per cordis substantiam sparsa sunt vasa, & nervi repunt, ut omnia minutim confusa sint, & unum non possit sine alio alterari.

Sed si prò *calore præter naturam* aliud, atque aliud calori ignis dissimile intelligatur, res facile explicabitur. Siquidem potest primo corrumpi os, absque eo, quod corrumpatur musculus, & potest corrumpi musculus, absque eo, quod corrumpatur os, & potest corrumpi sanguis, aut alius humor, absque eo, quod musculus, aut alia pars solida corrumpatur, quod de spiri-

spiritibus etiam dicendum est. Licet tamen concedere progressu temporis ex ossis ex: gr: , aut humoris corruptione omnia post modum corrumpi posse in animalibus , quoniam machina corporis ex omnibus illis constat, & sic concinnò facta est , ut unum si patiatur omnia postea compati necessum sit. Sed illud incallescere unum prius , quam aliud est impossibile. Res exemplo illustranda est.

Corona mihi detur, non solum ex auro , & argento constans ; sed etiam in quam æs, & ferrum, dum conficeretur, fuerint admissa , ac sic metalla hæc omnia sint minutim permixta, ut oculus non amplius discernere, aut distinguere valeat purum aurum ab argento, ære, & ferro; neque argentum ab auro, ære, & ferro distinguere valeat , neque æs , neque ferrum ab aliis distingui possint. Quin arte omninò Archimedeæ opus sit ad decernendum quantum auri , argenti, æris , & ferri singulatim fuerit admixtum. Quæ ars forte dari potest , si certa ratio rarefactionum , & condensationum constet , quæ considerari potest in singulis metallorum , dum permiscebantur. Ego autem non prohibebo quemquam dicere unum aurum calidum humidum , argentum frigidum humidum ; Æs calidum siccum , & ferrum frigidum siccum , ut neque prohibeo quemquam dicere ex his plus salis , mercurii , vel sulphuris habere , vel plus acidi , aut alchali habere , hæc enim nihil me tangunt , ut neque me nunc tangerent quæcunque à plerisque de salibus , sulphuribus, aut mercuriis , de acidis , & alchalicis , aut de aliis similibus dicta sunt. Si calidum quid sit simile nostro igni , ipsius caloris proportionem quidem aliqua communicari poterit coronæ , & elementis omnibus, ex quibus corona constat. Sed nunquam accidet sic communicari auro, ut non etiam eodem tempore simul communicetur argento , aliisque elementis coronæ. Nam aurum, argentum , ferrum , & æs sunt ex hypothesi minutim commixta , ut ignis vis applicata uni particulæ auri , proximis argenti , ferri , ærisque minutim commixtis applicetur particulis.

Ita, inquam, similiter si de igne, vel re aliqua igni simili intelligantur, quæ de calido faciente febrem , vel *de calido innato* oppugnato à calore *præter naturam* faciente febres dicuntur, explicari non poterunt ea , quæ de tribus generibus febrium narrantur ephemerarum , hecticarum , & humoralium. Nam solidæ , aeræ , & humorales substantiæ sunt plane , minutim commixtæ , ut non possit ignis , aut aliud calefaciens sic alterare digitum, ut non etiam humores , aeræque substantias in digito , etiam intra unguis crassitiem existentes non simul servata proportionem alteret.

Verum si illis simul in coronæ fabrica commixtis affundatur succus limonis corrumperetur quidem ferrum , & etiam æs , non autem æqualiter , sed non corrumperetur aurum , vel argentum purum , dicique potest succus limonis aliquid habere , quo corrumperetur ferrum, non autem aurum, sive argentum corrumperetur. Ac proinde retentis verbis Galeni dici potest succus limonis calorem tribuere *præter naturam* ferro; nequaquam tribuere calorem *præter naturam* auro, vel argento, hoc est corruptivum ferri, non verò auri, vel argenti corruptivum.

Secundò si de calore ignis calori simile, aut attritus *sobole* , de frigore, quod sensu percipimus , simili res intelligenda esset, facile ne dum medicus, sed ægrotus , adstantes , & rudis ancillula quævis posset intelligere, si ve Solis,

lis, tempore æstivo, vel boreæ flatu, aut nivis contrectatione, sive motu immodico, aut exercitiorum intermissione, sive animi affectu, sive præsentia ignis, sive vini, vel frigida potu largiori totum corpus, aut partem ejusdem, aut etiam cor ipsum calidus, aut frigidius aliquando esse.

Nam quævis stupida ancillula pluribus vicibus in anno, vel etiam in die percepit in corpore suo, aut in parte corporis sui majorem, aut minorem calorem, & pluribus, atque pluribus vicibus conquesta est, quod magis, vel minus, quam opus esset, calefieret, vel frigida facta fuerit ab illis causis. Sed Galenus apertè inquit, captu, & intellectu difficile minis esse, quo nam *affectu* nos febricitemus: hoc est, difficile nimis esse id intelligere, quod *calor* ab eodem vocatum est *præter naturam*. Ac licet enumeraverit febrium causas evidentes, & manifestas, quibus totum corpus, & cor incallescere calore simili ignis calori possint, attamen postmodum hæc habet: (a) *Qui verò ab eisdem causis nostris corporibus adveniat affectus, ex quo febricitamus, hoc sanè multos latet, & à plerisque etiam, qui se medicos profitentur, ignorantur: hoc est affectus, quo febricitamus, sive id, quod calor præter naturam vocatum est, non est quidpiam calori ignis simile, non est quidpiam calori, quem tactu percipimus simile; Nam hic calor facile sub conceptum cadit, cujusvis, vel stolidæ ancillulae, quæ cum frequenter altera manuum experta sit, alteram manuum, vel genarum calidiorum, vel frigidiorum esse, quam conveniat (calore inquam simile calori ignis) etiam si ipsa non possit apponere manum cordi, facile intelligit cor quoque nunc calidus, nunc frigidius esse posse, quam conveniat, colore inquam, & frigore ignis calori, vel nivis frigori simile. Ac si hypothesis fiat de hujusmodi calore, vel frigore, & si de veritate hujus rei certum periculum apponendo manum facere nequeat; attamen rem istam non esse impossibilem, facile intelligit. Sed secundum Galeni sententiam id, quod calor vocatum est præter naturam affectus, scilicet, quo febricitamus (si de febribus loquamur) difficulter intelligitur, vel etiam omninò non intelligitur à Medicis, licet clari nominis, qui sapientiæ famam sibi sunt aucupati.*

Tertiò Galenus *lib. 1. de diff. febrium cap. 3.* febrem posuit esse intemperaturam unam: At idem Galenus quando de temperaturis, intemperaturisque loquitur substantias intelligit. Ac etiam si multa colligere valeamus in Galeno, ex quibus dubitare possumus prò *calido* intelligere calorem similem calori, quem percipimus, & pro frigido intelligere frigus simile frigidum, quod percipimus flante borea, & pro humido intelligere humiditatem similem humiditati aquæ, & pro sicco intelligere siccitatem similem illi, quam habent ea, quæ humida non sunt, sunt tamen loca expressa, ex quibus manifestum est ipsum intelligere substantias, ex quarum commixtione aliæ, atque aliæ fiant substantiæ, tum nobiliores, tum ignobiliores. Qui insuper eodem *cap. 3. lib. 1.* experimento, & rationali methodo *affectum* perquirens, quo ex Sole, aut igne febricitamus, hoc est perquirens id, quod *calorem præter naturam* appellaverat hæc habet, *veluti statim exustio, sive ipsa Solis operatio talem sortiatur appellationem, sive qui ab eodem fit in corpo-*

(a) *lib. 1. de differ. febr. cap. 2,*

corpore affectus, sive ille qui iam affectus est: est quidem sane; & hoc ipsum calor præter naturam, nondum tamen febris, nisi cor una calefiat. Non uni fedit rei, non uni fedit verbo, ut calorem explicet præter naturam.

Et ad quid quæso ars demonstrandi, & distinguendi veras à falsis propositionibus, quæ ars disciplinas omnes difficiliores complectitur, & secundum Galeni mentem necessaria est, ut ratione inveniamus, & cognoscamus affectum, quo febricitemus? calorem scilicet præternaturam intelligamus! Enim verò hæc addit verba. (a) Duplex autem hoc ignorantium medicorum genus: alterum eorum, qui soli experientiæ nituntur, ajuntque nullius rei naturam posse à ratione inveniri, alterum est genus hominum, qui sibi nomen sapientiæ vindicarunt, & licet parem habeant cum prioribus ignorantiam, opinionem tamen scientiæ sunt aucupati. Sed eorum inscitia inde habet initium, quod in rationalibus methodis nequaquam sunt exercitati, quæ nos distinguere, ac discernere docent eas propositiones, quæ demonstrandi vim habent, ab iis, quæ probabilitatem quidem continent, nihil tamen veri possunt aut invenire, aut demonstrare. Cum verò ad hanc ignorantiam accesserit arrogantia, ex ipsis quidem nonnulli ad tantam insaniam, ac temeritatem pervenerunt, ut neque ea, quæ omnes homines experientia magistra, febriū causas esse didicerunt, velint ipsi concedere. Quam sententiam pluribus in aliis locis confirmaverat.

Quibus verbis clare patet id, quod calor appellatum est præter naturam, non esse quid perceptu, & explicatu facile.

Quartò Galenus pestem etiam existimavit consistere in aliquo, quod calor præter naturam ab eodem appellatum est; (b) dixitque febris pestilentialis calorem differre à calore aliarum febrium per putredinis excellentiam, putredo autem substantia est. Ac quæso quis audebit dicere frigidam tactu gangrænam in calore consistere, qui similis sit calori ignis! At in gangræna etiam cum illa frigida tactu percipitur calor præter naturam, vel maximus est: videlicet id quod calor præter naturam appellatum est, non est quid simile ignis calori.

Pus insuper perfectum in ulceribus non est simpliciter putredo: (c) Quoniam coctionis particeps est: fovemusque sæpè partem affectam calore simili ignis calori, nè gangræna fiat: hoc est sæpè lepius calor similis calori ignis, nedum similis non est affectui, qui calor præter naturam dicitur in ulcere, vel in gangræna, sed quandoque proficius est homini ulcere laboranti; prohibet, arcetque gangrænam. Quæ tactu frigida potius, quam calida frequentissime observatur; licet id, quod calor præter naturam appellatum est, in maximo, vel maximo proximo gradu sit: hoc scilicet illud est, quod dicebamus calorem præter naturam differre nimis à calore ignis. (d) Et ut Galeni similitudine utar, ea, quæ calores à Galeno appellata sunt, non minus differunt, ac terrestris canis natura à marini canis natura differat, quam obrem æquum non est sapientissimos Galenicos nonnullos homonymia decipi, quos ipsemet monuit Galenus nè homonymia deciperentur.

Si ea tantum, quæ de puris speciebus variis in his libris (e) de differentiis

(a) Galen. de diff. febr. lib. 1. cap. 2. (b) In lib. epidem.

(c) De differ. feb. lib. 1. cap. 6. (d) De simpl. medicam. facult.

(e) lib. 1. de differ. febr. cap. 6.

rentiis febrium afferit Galenus, considerentur, nisi me mea fallit sententia, manifestum fit tum pro *calore secundum naturam*, tum pro *calore præter naturam* illum aliud, atque aliud intelligere consuevisse, quam nos communiter pro calore, quem sensu percipimus intelligere soleamus; nam in uno, simplicique ulcere; in quo pus bonum conficiatur, tum naturam, quod verbum idem significat, ac *calor innatus*, sive *secundum naturam*, tum *calorem præter naturam*, tanquam in uno campo dimicantes considerat Galenus. Enim verò, quia pus perfectum est, viget adhuc quantum saluta continuitas patitur, nativus calor, cujus est concoquere, estque pus perfectum concoctionis particeps, & fit natura superante in pugna, quæ fit inter ea, quæ secundum naturam sunt, & ea, quæ sunt præter naturam. Sic in collectionibus omnibus, tumoribus, aliisque morbis, in quibus pus fit album, crassum, sibi simile, lene, minime foetidum, quod superante natura fit. hoc est superante *calore nativo*, qui interpretatur *natura*, & in pugna vincit, superatque *calorem extraneum*, qui dicitur *præter naturam*. In quo casu natura, hoc est *calor nativus* consistet in eo, quod adhuc in partibus circa ulcus vitiosum, & corruptum non est. Consistit in vasis, fibrillis, nervis, membranis, aliisque partibus, quæ adhuc saltem ex parte proprium obeunt munus. Consistet in eo, quod adhuc est bonæ constitutionis, quocunque nomine dicendæ.

Calor verò *præter naturam* consistet in eo, quod discissum, apertum, corrugatum, aut aliter mutatum est. Consistet in eo, quod non fluit, ut fluere deberet, vel non fluit, qua fluere deberet. Consistit in eo, quo pars quandoque tumidior fit, in eo, quod non mutatur, licuti mutari deberet, in eo, quo malus sensus fit, in eo, quo nervi vellicantur, in eo, quod vitiosum, & functiones lædens dici potest. Consistit in eo, quod quocunque titulo malæ constitutionis appellari potest. Quorum omnium est *corrumpere*, quod idem est, ac *putrefacere*. At si in ulcere, & partibus circa ulcus majus vitium sit natura (hoc est *calor nativus*) erit languidior, & consequenter major erit *calor præter naturam* ad similitudinem eorum, quæ supra dicta sunt. Et ea, quæ fient vincente, & superante *calore extraneo*, sive *præter naturam*, minus, vel nihil habebunt coctionis, & *simpliciter putredo* erunt. Sunt autem puris species quædam, quæ mediæ sunt, & partim fiunt superante natura, partim superata natura, & propterea eo minus, vel plus vitii habent, quo plus, vel minus accedunt ad alterum extremorum prædictorum.

Quibus quidem sic ad mentem Galeni, & per ea potissimum, quæ idem Galenus *de differentiis febrium lib. i. cap. 6.* habet, expositis stultus sit oportet, qui hæc, aut similia intelligi velit per calorem similem ignis calori, Solis, attritus, laboris, vigiliarum, aut rerum similium *sobolem*. Hæc quidem, quæ dicuntur de utroque calore sive *secundum*, sive *præter naturam* non possunt intelligi, nisi de re tota, de tumore ipso, de collectione ipsa, de ulcere ipso, de arteriis, de venis, de vasis aliis, de nervis, de membranis, aliisque spectantibus ad tumores, sive collectiones, sive ulcera.

Ac licet calor, sive Solis, sive ignis causa quandoque sit, ut id fiat, quod *calor* sive *secundum naturam*, sive *præter naturam* appellatum est, hæc tamen non sunt similia calori ignis, solis. Sic eadem solis vi germinant arbores, sed calor nativus arboris flores, seminaque, quæ producuntur, substantiæ

stantiæ sunt, etsi aliis, atque aliis concurrentibus à solis calore dependeat, & à solis calore facta sint. Sic eadem solis vi pereunt arbores, sed *calor præter naturam*, aliaque, quæ contingunt arbori, floribus, fructibusque pereuntibus, non sunt calori Solis similia, quin *calor præter naturam* potest esse in arboribus boreæ sevientis effectus, non minus, ac in animalibus *calor præter naturam*, live *affectus*, quo febricitamus boreæ effectus esse potest.

Quæ sunt etiam manifesta ex eo, quod si quempiam interrogemus, quando calor ignis major est, dum digitus uritur, an cum combustus est, & remotus etiam ab igne? Unusquisque respondebit calorem ignis tunc majorem esse, cum ignis proximus est, & cum digitus comburitur. Sed si interrogemus id, quod *calor præter naturam* appellatum est, an majus sit combusto jam, & remoto ab igne, an cum comburitur digitus, & ignis præsens est? Respondebit Galenus id, quod *calor præter naturam* appellatum est, majus esse combusto digito, etiam si ignis jam remotus sit. Necnon etiam si frigora, horrores, & rigores sentiantur, ut accidere solet; attamen *calor præter naturam* dictus est major in combusto digito. Quin etiam juvat quidem removisse digitum ab igne, at ne crescat *calor præter naturam* juvat quoque non habere digitum longissime remotum ab igne, & ab iis, quæ mediocriter calefaciunt, sicuti mediocriter facit ignis cum longissime remotus non est, & quod pessime fieri posset in hoc casu, esset digitum statuere in loco nimis frigido.

Non negaverim tamen ex magnis voluminibus Galeni non pauca facile nos colligere posse, quæ videantur contradicere his, quæ superius exposita sunt, verum si velimus ad magis rectum sensum ea leniter trahere, quæ de his, aliisque similibus à Galeno referuntur, ea ratio, atque via ineunda est, quam nos supra exposuimus; Nam quæcunque alia dicantur, semper majora absurda, pluresque contradictiones erunt in Galeni doctrina, cum è contra iis admissis, quæ supra fuere exposita, exceptis paucis, quæ contra fidem sunt, fere omnis Galeni doctrina, vel sana videri poterit, vel facile eandem excusare poterimus.

At majoris evidentiae gratia, & prò confirmatione prædictorum, consideremus amabo calorem ignis *sobolem* admoventi ulceri pus optimum generanti, qui si desit, vel etiam frigus boreæ *soboles* applicetur ulceri, crescat *calor præter naturam* partis, & pus sequenti die erit inferioris notæ. Si calor ignis *soboles* sit mediocris, minor erit *calor præter naturam*, & pus erit melioris notæ, si calor ignis *soboles* sit vehementior crescat calor præter naturam suntque hæc manifesta, ut manifestum est ex ira, labore, aliisque causis evidentibus appellatis, quandoque fieri febrem. Estque obscurus, & explicatu difficilis affectus, qui per calorem ignis *sobolem*, vel per frigus boreæ *sobolem* fit in ulcere, & in partibus circa ulcus, (a) sicuti difficile est tum cognoscere, tum exponere affectum illum ex causis evidentibus genitum in corde nostro, quo quidem affectu febricitamus. Ac per hæc quidem non lusisse operam videri potest Galenus, cum dixit hæc minime omnium intelligi posse ab iis, qui demonstrandi artes non habent. Nam cum hæc ad structuram præcipue pertineant, ad ordinem, numerum, figuram, magnitudinem, continuitatem

(a) Galen. de differ. feb. lib. I. cap. 2.

solutionem, & ad alia his similia pertineant, nonnisi mechanice intelligi, & explicari possunt, quod illi facere nequeunt, qui demonstrandi artes non habent, & difficulter quidem fit ab iis, qui artes habent demonstrandi.

Item majoris evidentiae gratia consideremus calorem ignis *sobolem*, vel frigus boreæ *sobolem* in parte, quam gangrænam præhendat; per calorem languidulum ignis *sobolem*, non crescet *calor præter naturam*, hoc est is affectus, qui calor præter naturam vocatur in ulcere non crescet. Si calor ignis *soboles* sit validior, minor erit *calor præter naturam* in gangræna. Si calor ignis *soboles* sit vehementissimus, & exurens, fieri poterit, ut extinguatur *calor præter naturam* gangrænae, vel partes aliæ circumpositæ præserventur à *calore præter naturam* gangrænae.

At si frigus boreæ *soboles* communicetur parti affectæ, crescet *calor præter naturam*, videlicet hic *calor præter naturam* toto Cælo, totaque natura differt à calore ignis *sobole*, quo tamen nunc melius, nunc pejus homini est, tum in prædictis, tum in aliis plerisque calibus, ut merito calor ignis *soboles*, nunc pugnare dici possit pro calore nativo, nunc rebellare, & esse pro partibus caloris extranei dici potest. Item & frigus boreæ *soboles*, nunc pro calore nativo, nunc pro calore extraneo pugnare dici potest, non minus, ac calor idem solis *soboles* fruticum, arborumque neque folia, neque flores, neque semina est, sed nunc est pro his iisdem, nunc est contra naturam, sive contra *calorem nativum* istorum eorundem.

Et uterque calor sive nativus, in animalibus, fruticibus, arboribus, rebusque aliis, sive extraneus in his iisdem non nisi ab iis, qui demonstrandi artes habent, intelligi potest, non nisi inquam ab iis, & cum difficultate quidem explicari potest, qui demonstrandi arte pollent.

Caloris verò, qui ignis *soboles* est, item, & frigoris, quod boreæ *soboles* est scientia, quam nos habemus per sensum nullo modo satis esse potest ad explicanda ea, quæ mente potius, quam sensu dignoscuntur. Ac proinde cum de rigore loqueretur, quem dixit *caloris nativi* affectum (a) Galenus desideravit lectorem habere, qui vi mentis maxime polleret, quippe ea, quæ ipse dicebat per sensum percipi, & dignosci minime possunt.

Quæ consentiunt cum iis, quæ Galenus docuit *lib. i. methodi cap. i.* Medicinam non esse disciplinam, quæ sex mensibus, ut petulanter Thessalus promittebat, tradi possit.

Quæ consentiunt iis, quæ vetustior docuit Hippocrates in *lib. de veteri, sive potius vetustissima Medicina*, qui textu primo hypotheses omnes damnavit, quæ in Medicina per ea fiunt, quæ ad sensum necessario referuntur, & nisi relata ad sensum intelligi nequeunt, ut est calor, & frigus, acceptis verbis in significatione communiori, & ut à doctis, & indoctis etiam ancillis accipi solent. Nam in alio sensu accepta difficili, & longo indigent sermone, ut id explicetur, quod pro libitu hominum abutentium significant. Et in sensu quidem, quo communiter accipi solent, accepta fuere ab Hippocrate cum dixit: (b) *Quicumque de Medicina dicere, aut scribere aggressi, dicendi scopum sibi ipsis, ac fundamentum supposuerunt calidum, aut frigidum, aut humidum, aut siccum, aut aliud quodcumque voluerint, rem in compendium contra-*

(a) *Lib. de rigore.*(b) *De veteri Medicina tex. 1.*

contrahentes, principium causæ tum morborum, tum mortis hominibus idem unum, aut duo proponentes hi in multis quidem, quæ dicunt errasse deprehenduntur. Qui eodem libro, textu vigesimo septimo in communiori significatione accepit verba cum dixit: *Frigiditatem autem, & caliditatem ego omnium facultatum minime potentes esse in corpore existinzo*: Prout minimi semper hæc existimavit in toto libro prædicto: Verum alius Hippocrates in libro de natura humana, ut etiam nonnunquam Galenus in sensu metaphorico, & remotissimo à communiori significatione acceperunt verba illa, calidum, frigidum, humidum, & siccum, ut quoque caliditatem, & frigiditatem. Cæterum modo id explicetur, quod per verba significetur, licet aliquando abusus quidam sit vocum, attamen fieri potest, ut non ineptus, neque absurdus omnino sermo sit, non minus ac, ut Galeni utar verbo, & similitudine, excepta ex libris *de differentiis februm*, fieri potest, ut quis scindapson dicat quicquid ipse velit scindapson dicere, & non inepte sentiat de iis, quæ scindapson vocata sunt.

UT GALENI DE CALORE NATIVO SENTENTIA FACILE
CORRIGI, ET AD RECTUM SENSUM DEDUCI
QUEAT.

Postquam prædicta omnia scripsissem, in locum incidi Galeni, qui est *lib.2.ad Glauconem cap.2.* ubi multa habet de *calore nativo*, & de *calore præter naturam*, quibus ea omnia confirmantur, quæ superius à me relata, & disputata sunt. *Nocet autem*, sunt Galeni verba, *sæpius passionis curatio membri patientis virtuti*. Laxare manifesto refertur ad organicum aliquid. *Quæ enim immoderate laxant, solvunt robur, quare, & membri virtutem, quæ autem supra modum refrigerant, nativum calorem extinguunt*. Qui fortassis, ut nonnulli arbitrantur Philosophi, ac Medici summi, *substantia virtutum existit*. Atque hujus sententiæ fuit ipse Galenus, qui cum de homine fere semper loquatur animam hominis in calore nativo constituit hominis, videlicet substantiam virtutum hominis, animam nempe hominis, claris vocibus nihil aliud esse pronunciavit, quam *nativum calorem* hominis. In quo maximè deceptus est. Eodem loco pergit Galenus referre alteram fuisse apud alios Philosophos, & Medicos sententiam de *calore nativo*, quem nequaquam dicebant *virtutum substantiam* existere, sed *virtutum primum, & maximè necessarium instrumentum calorem nativum* appellabant, quæ videtur fuisse Aristotelis sententia. Qui quicquid organi, quicquid constructionis, & dispositionis in corpore esset ad conservandam formam, calorem dixit *nativum*, fecitque *calorem nativum* primum, & maximè necessarium instrumentum formæ viventium corporum. Sed nunquam formam dixit consistere in *calore nativo*, quæ secunda sententia tuta est, & à Christianis defendi potest. Atque ad hujus sententiæ de calore nativo normam correctæ Galeni sententia admitti potest.

Quod si quis nolit sic corrigendam esse Galeni sententiam, & pro calore tum nativo, tum præter naturam contendere velit intelligendum esse aliquid calori, quem ab igne, vel à sole percipimus omnino simile, & nihil organici habens, is nominibus omnibus absurdissimam facit universam de febribus, deque aliis multis Galeni sententiam.

CONFECTIONIS CIBORUM IN VENTRICULO SPECIMEN.

Hominis Corpus, ut etiam aliarum animantium continuo veluti in fluxu est, & decedentibus semper multis particulis, si nullæ novæ accedant, brevi quidem tempore pondere saltem manifestò observatur diminutum. Quod si longiori tempore nulla fiat novæ substantiæ accessio, ac interim mortuus non sit homo emaciatus, moles etiam Corporis ejus perspicuè videbitur minor. Cumque illud ex multis, atque dissimilibus partibus componatur, quarum aliæ tenuiores, & magis spirituose, aliæ fluidæ quidem, sed non adedò tenues sint, aliæ solidæ, & magis, minusvè, sive molles, sive duræ, sive raræ, sive densæ, aut aliæ sint, necessariò aliæ citiùs, aliæ tardiùs, & omnium tardissimè ossa fluent, quæ certo certius tempore non sunt eadem, quæ priùs erant.

Sic capilli prolixiores fiunt protrusis partibus, quæ priùs prodierant ab iis, quæ novissimè radicibus eorundem apponuntur. Sic ungues promoveantur nova ad radices facta partium appositione. Sic etiam dentes veluti fluunt.

A N N O T A T I O N E S.

Incredibile, ac prorsùs inverisimile videtur, quod nonnulli inquirunt, partes quasdam spermaticas appellatas à primo conceptionis momento ad mortem usque perdurare in homine!

Quo quæso partes istæ clypeo tam longo vitæ tempore defenduntur?

Præterea corpus hominis primo conceptionis tempore, aut non exæquat, aut vix exæquat fabæ magnitudinem, & fortè majus non est pisi semine. Ponamus corpus hoc pusillum totum esse spermaticum quanta quæso postmodum sit partium ipsius, si ad mortem usque permanent, distractio? Quid est quod tam raram, tamve distractam substantiam diutissime servet etiam in febribus? Quid quo proximæ partes nutritionibus appositæ pluries, atque pluries renoventur in vitæ cursu, illæ sint inalterabiles, ac omnibus resistent motibus, quibus tam longo tempore neque duriora metalla resisterent? Et profectò lenissimo contactu ferreis, & æneis imaginibus aliquid aufertur, quod primum inconspicuum est, tempore autem manifestum fit manus, atque ora aliquid detraxisse æneis imaginibus, quas pluries, atque pluries tetigere.

Est qui dicat, (a) quamvis per centum annos ossa in lebetes coquas, non propterea solventur. Ego neque hoc crediderim, neque partes corporis calore dissipari existimo. Quin etiam puto diutiùs servari posse ossa mortua, quàm viventia sine restauratione ejus, quod quotidie deperditur, quoniam in viventibus maximus fit partium effluxus, secus in mortuis. Ac scio sanguinem, qui in viventibus brevi absumitur, in vase vitreo optimè clauso longissimo tempore servari posse. Viventium ossium, & sanguinis in
ani-

(a) H. F. lib. I. de bon. propof. 20. quæst. 8.

animali maximus est usus, in quo semper aliquid deperditur, & proinde mirum non est si dum partes sunt animalis maxima partium restauratione indigeant, ut conserventur.

Caries ne dicam aliud in dente animalis viventis mihi videtur demonstrare dentes nutriri, & fluere.

Capilli, & ungues sæpè observati sunt crevisse in cadaveribus mortuorum, & longiores fuisse factos non secus, ac accidit in vivis corporibus.

Archigenes fabis ore detritis salivæque permixtis ad sugellata utebatur, ut refert *Galenus de comp. Medic. secundum locos lib. 4. cap. 1.* (a) Illud autem, quod cecinit Nicander Poeta hominis salivam bestias occidere omnes, quæ ipsum hominem interficere valerent, nunquam satis constitit, ut neque illud, quod ait Galenus hominis salivam tota substantia scorpionibus adversari, & difficile sanè explicatu est, quid sit hoc tota substantia adversari. Non inficiabor tamen salivam, ut plerisque remedium est, ita fieri posse, ut aliis sit venenum. Et quidem nonnullarum animantium, & non rarò ipsius hominis peculiariter tamen affecti saliva quibusdam aliis animantibus, aliis hominibus veneno est, quod de rabidorum tum canum, tum luporum, tum hominum saliva negari non debet.

Verum enim verò non est omnium partium, & omnium membrorum similis fluxus. Partes enim quædam sic fluunt, ut ejus, quod abscedit, nihil omninò in corpore remaneat; quædam verò sic fluunt, ut id, quod decedit ab his partibus aliis addatur corporis partibus, & hæc sub varia, & sub varia specie sive halituum, sive sudoris, sive furfuris, sive alterius rei, & frequenter sub lymphæ specie, aut salivæ, aut bilis, aut alterius rei, quorum omnium, vel quædam extra corpus pellantur, vel quædam retineantur adhuc, & intra corpus in aliam substantiam transmutentur, cujus aliquis sit adhuc in vitæ functionibus usus, donec hoc ultimum sub aliqua specie similiter extra corpus expellatur.

Vita igitur hominis longæva esse nequit, nisi id quod quotidie ex corpore fluit, quotidie reponatur. Atque ideo substantiæ nobis quærendæ sunt, quibus hæc restauratio fiat.

Illæ autem potissimum sunt aer, & cibus, & potus.

Aere siquidem magna ex parte vivimus, & nutrimur. Cumque reperi-
ta fuerint corpora, quæ sine omni cibo, potuve diu vixerint, & omnes vitæ functiones obierint, in quibus semper aliquid dissipatur, necessum est affirmare hæc iis tantum substantiis, quæ ab aere acceperunt, fuisse restaurata, & enutrita.

Prætereà vidimus aliquandò corpora, quæ cum non decreverent, singulis tamen diebus urinis plus redderent, quàm cibo, potuve sumpsissent, circumfuso scilicet aeri non parum debebant acceptum. Sed de aere fusiùs cum de hominis respiratione agemus.

Cibus verò primum ore comminuitur, quod idem est ac aliquantulum attenuari. Ea, quæ comminuta, sive attenuata sunt, per angustius spatium transire possunt, & filum, quod dicitur filo tenuius, angustius foramen pervadere

(a) *Gal. de simpl. Med. facult. lib. 10.*

vadere potest, ac corpora omnia attenuari, & in tenuissimum pulverem redigi dicuntur, cum fuerint optimè in minores, atque minores partes comminuta.

Sed cum os saliva continuò perfundatur; dum cibus ore conteritur, & hac illac motu linguæ provolvitur necessariò salivæ permiscetur. Quæ quidem tunc temporis majori copia in os influit: etenim contractis, distensisque vicissim musculis, quorum motu masticatio absolvitur, vel sugimus, vel deglutimus aliquid; glandulæ salivam secernentes, ut & vasa eandem eruētantia comprimuntur, atque idèd saliva copiosior elicitur. Quod lege quadam fit, & necessitate mechanica; hoc est ipsius natura rei, ipsa namque partium structura talis est, ut dum alteræ vicissim contenduntur, & distenduntur; proximæ præmantur, & id, quod ipsis continetur, saliva nempe in nostro casu facillimè exprimatur.

Quamobrem helluones, & gulones, qui frustatim cibos devorant, dupliciter peccant, primum cibos satis, & quantum ore fieri potest, non dispetunt. Secundum non solum sufficienti salivæ quantitati cibos non permiscunt; verum etiam cum ad profundiores malè contriti cibi particulas saliva permeare non possit, illæ non mutantur, ut æquum est.

Ex his autem ciborum confectio, & elaboratio, sive coctio, ut quidam inquirunt, non rarò frustrari solet. Nam cibus attritus, & comminutus salivæque permixtus aliud quiddam est, quàm si neque in minores partes fuisset divisus, neque salivam accepisset! aliud efficere, atque aliam profectò potest cibus sic paratus suscipere mutationem.

Sic panis coctus, cui aqua superinfunditur, jam aliud quiddam factus est, & alios gignit effectus.

Is, cui aqua non injicitur, nullam accipit brevi tempore magnam mutationem. Hic cui aqua superinjecta est sua spontè fermentatur, & post breves horas magis, atque magis attenuatur, & vinositatem quandam concipit: ut possimus à pane sic in aquis fermentato spiritus elicere iis similibus, qui à vino distillantur.

Hac etiam panis aqua perfusi fermentatione tractu temporis acetum habere possumus.

At saliva non est aquis segnior, & ignavior, simplicior certè aqua est; atque majorem habet saliva partium compositionem. Et Galeni etiam temporibus noverant nutrices puerorum lichenas saliva sanare, noverant rustici furunculis, nonnullisque aliis morbis masticato pane, hoc est salivæ permixto, vel tritico, si corpus ægrotans durius esset, ore contrito, hoc est salivæ permixto, opem afferre. Quivis etiam experiri potuit panem salivæ, & roremarino permixtum non sine operæ pretio de recenti contusis partibus imponi.

Falsum autem est, à saliva, quæ hæc præstet, cibum, cui ipsa saliva confunditur, nihil alterari, nihil immutari! Salivæ inquam vi fermentari atque mutari in ore incipit cibus.

In omni autem fermentatione motus quidam adest, quo aliis subactis, aliis dissolutis, aliis extrinsecus accedentibus aliqua profectò sit novæ substantiæ conceptio, quæ non est una omnibus. Enim verò multiplices sunt rerum fermentationes in quibus aliud, atque aliud, & unum vel plura diversa

versa conspiciuntur: scilicet spiritus, sales, olea, metalla, vel aliud quodcunque nunc simplex, nunc aliis immixtum substantiis. Et hæc quoque omnia multarum sunt specierum, & aliqua quandoque fit in cibis spiritus, aut salis conceptio, quæ utilis fit ad conservandam vitam, quandoque verò alia fit, quæ perniciem afferat.

Videlicet differt spiritus à spiritu, & sal à sale, & fortè neque à vinis variarum uvarum dici potest similes prorsus spiritus elici; neque spiritus isti omninò aderant in vinis. Igitur plerumque haud satis est dixisse hoc vel illud à spiritu fit, vel à sale, nam hæc sunt nomina genera quædam rerum significantia, in quibus reperire licet res, quæ contrarios producant effectus.

Hinc fit, ut nobis sæpè numero aptæ desint voces, quibus particularem aliquam fermentationem rectè valeamus denotare, & non rarò opus sit illa veluti digito ostendere, sicuti facimus cum plures homines in plerisque similes, & in plerisque dissimiles eodem nomine dicuntur, si voces non suppetant, quibus aliqua inter unum, & alterum dissimilitudo significetur, digito ostendimus, quem ostendere volumus.

Quod autem aliqua nova substantia in iis, quæ fermentantur concipiatur, manifestum fit in succis de recenti ab uva expressis, ex quibus ante eorundem fermentationem nullos habebis arduos spiritus. Fermentatione igitur aliquid concipitur in succis illis, ex quo postea distillatione spiritus habere possis.

Sic neque oleum ab amygdalis recentibus exprimitur, oportetque amygdalas ab arbore collectas tempore fermentari. Quod multò celerius fit detrahitis corticibus, ac cum aer immediatè amygdalas tangit. Et tunc quidem haud dixerim, oleum factum fuisse separabile ab aliis partibus; sed potius multis edoctus experimentis fermentatione fuisse genitum, sive conceptum in amygdalis, quæ diutius fermentatæ multum quidem præbent olei, sed rancidum.

Terræ quoque, ex quibus semel, atque iterum vulgare nitrum extractum fuit, ulteriori multorum mensium fermentatione in loco, quo pluviae non decidant, novum nitrum concipiunt. Et vitriolum ad rubedinem calcinatum fermentatione apta multa accipit ab aere, quibus pondere crescit, & novum vitriolum concipit, sic aliis fermentationibus aliud, atque aliud gignitur.

Multa equidem, quorum cognitio utilis est, tum diu, tum magis, minusve dilucidè explicari possunt de rerum fermentatione; sed peculiarem illa requirunt tractationem, & pro nunc satis alios monuisse videbor, si dixerò, ciborum in ventriculo fermentationem, panis fermentationi in plerisque esse similem.

Panis autem fieri potest ex farina multorum seminum, adjectis aquis hujus, vel alterius generis, & fermento aliquo (non enim unum tantum ad hoc sufficere potest); eritque varius, prout varia sunt hæc, ex quibus ille fieri potest, & prout varius est quoque illius fiendi modus. Sed de eo pane nunc nos pauca addemus, qui fit ex farina triticea cribrata, aquisque communibus calidis, in quibus aliquid fermenti vulgaris fuerit dissolutum, permista, & in massam redacta, quæ subacta prius optimè, & justo tempore

pore in loco apto detenta postea clibano inditur, & coquitur.

Massa hæc in loco apto constituta incipit rarefieri, & in molem crescere. At omnis rarefactio fit admissis particulis alicujus novæ substantiæ inter particulas corporis rarefacti. Quod non fit sine motu. Massæ videlicet hujus particulæ diltrahi, & longiori spatio una ab altera removeri debet, ad hoc, ut spatia quædam inter ipsas relinquantur, quæ admissis aliis corporibus repleantur, & sic massa turgeat, crescatque in molem, & rarefiat.

Cæterum motus hic videtur esse ab æthere, substantia nempe, quæ pervadat, quo aer, & aqua permeare nequeunt, cujus multum reperitur in aere minimè rigido, massæ panis circumfuso, & à fermenti particulis, quibus massa perspersa fuerat. Siquidem si alterutrum ex his desit, fermentum scilicet non sit permistum massæ, desit circumambiens substantia æthere abundans, aut aer circumfusus nimis rigidus sit, rarefactio non sequitur. Quod si illa sequatur, cum profundiores etiam massæ partes, ad quas aer permeare nequit rarefiant, æthereum profecto, & aeris purior pars erit id, quod eo pervadit libere, ad quem locum aer ipse permeare nequit.

Concursu igitur, atque lucta æthereæ substantiæ, & particularum fermenti lenis agitatio, & intestina minutissimarum partium effervescentia, quæ sensu quoque dignosci potest, excitatur in massa, quæ propterea attenuatur, ut cremorem facilius ab illa habere possit, nec non etiam rarefit.

Præterea hæc eadem massa dum sic fuerit satis fermentata, calidior videtur; nam cum his motibus jam alia facta sit, alio sane modo, ac prius, sensum afficiat necessum est.

Ac si tunc temporis massa in sat ignito clibano coquatur, rarefcit magis, atque abit in panem, in quo cellulae innumerabiles manifesto observantur, quæ aere repletæ sunt; nam ex æthere, cui aliquid tenue ab aquis, & farina acceptum permisceatur, confit aer.

Verum si illa non coquatur, posteaquam attenuata, & rarefacta fuerit, quantum illis causis fieri potuit, paulatim etiam mole decrescit (nam pondere ab ipso primo fermentationis exordio mihi videtur diminui), & tandem, quod reliquum est abit in fermentum simile prorsus vulgari fermento, quod illi inditum fuerat. Quo si quis pro fermento non utatur, demum lapsu temporis ipsa estinguitur in eo fermenti vis, & id, quod remanet, inutile est ad novam panis confectionem, similisque massæ fermentationem.

Sic igne, & aliquo, quod accipitur ab aere, ignis concipitur in ligno, qui priusquam fuerit omnino estinctus aptus est ad novam alterius ignis conceptionem, sive in alio ligno, sive in alia apta materia. Et rationes habeo plurimas, propter quas hanc non dicam novam ignis congregationem, sed potius novam ignis conceptionem.

Rationes item habeo plurimas, quibus hæc, ut & ciborum in ventriculo confectionem affirmare nolim fieri à calido, vel ab acido, vel ab alio quocumque, quod ad sensum aliquem necessario sit referendum, licet sciam ea, quæ fermentantur, vel calida, vel acida, ut dicitur, vel alia percipi posse; nec non etiam ea, quæ talia dicuntur percipi, fermentationes quamplurimas promovere posse.

Sed ad ea revertar, quæ prius innui, alimentorum confectionem in ventriculo, in plerisque similem esse panis fermentationi; estque saliva fer-

menti

menti loco. Cunque pars illa quædam fuerit humorum, qui jam apti erant functionibus corporis animantis, cibum ita fermentat, ac mutat, ut possit is postea facilius naturam induere similem humoribus, ex quibus saliva secreta fuerat.

Nec ætherea hic deest substantia, quæ, etsi multiplicis generis sit, & non minus, ac reliqua corpora, mutationes, & alterationes multas, quibus ad aliud, atque aliud magis, minusve aptus sit, subire possit; in corporibus tamen densioribus poros invenit, quibus ad profundiores quoque eorundem partes admittatur. Præterea respirationibus aeris non exigua æthereæ substantiæ quantitas liquoribus universi corporis permiscetur, cujus semper aliquid tum salivæ, tum aliis liquoribus in ventriculum confluentibus permixtum, ciborum confectionem adjuvat.

Enim verò cibus salivæ primum permiscetur, ut dictum est, postmodum nonnihil accipit à tonsillis, & à capite, & ab ipsis oculis, estque hoc ejus generis, cujus aliquid non rarè per nares expurgatur. Et ab auribus quoque aliquid descendit in os. Sunt etiam glandulæ pleræque æsophago adjacentes, aliquid tunc præcipuè eructantes, cum cibus in ventriculum protruditur, & illæ comprimuntur.

Lingua etiam rara mihi, & spongiosa videtur, porosa quoque videtur æsophagi, & ventriculi substantia, cujus interior tunica, quæ manifesto in nonnullis animalibus villosa est, & in elegantes areolas distributa, ut possit per exiguos meatus aliquid in os, vel in æsophagi, vel ventriculi cavitatem diduci in liquoris, aut saltem halitus forma, quo ciborum concoctio adjuvetur. Siquidem nihil est in universa natura prorsus otiosum, & iners, ac si quid adest, vel juvat, vel nocet iis, quæ fiunt, ubi adest: adeò, ut ea tantum neutra dici possint, quæ haud notabiliter, aut juvant, aut nocent.

Ipsa etiam ventriculi constructio cibos perficit. Etenim distensus à cibus ventriculus, dum fibris ad modum retis sese decussantibus constringitur, illos semper undique arcte amplectitur, atque fovet. Et interior ventriculi tunica manifesto in ove villosa est, in homine verò minus manifesto.

Quod etiam ex parte fit à visceribus, & intestinis ventriculo proximis, quæ non solum ventriculum comprimunt, verum etiam foveant, ea maxime ratione, quia vasa habent multiplicia, in quibus motus semper aliquis fit, ac si apposita extrinsecus manu super ventriculum, concoctio ciborum sæpe numero citius, meliusque peragitur, multo verisimilius est hoc idem fieri ab hepate, liene cæterisque visceribus, & partibus, quibus ventriculus vicinus est.

Neque in hoc opere omittendum est diaphragma, hoc enim viscus alternis suis motibus stomachum, & totam inferiorem regionem perpetuo exagitat, quo cuncta, quæ fiunt in ventriculo, & in inferiori regione ex hoc diaphragmatis motu ex parte dependent.

Quibus omnibus comminuitur, subigitur, attenuatur, solvitur, rarefcit, ac ferè in pulvem convertitur cibus, ac substantias concipit functionibus vitæ utiles, & ex his, ut etiam motu cordis, & substantiarum, per vasa excurrentium, aliisque fermentationibus, quæ in corpore fiunt, lenis quædam nascitur in sensu caloris perceptio.

Ex his cognoscere licet, quantus sit partium omnium consensus in homine, quanta sit harmonia, quæ eorum, quæ fiunt necessitas, ut aliquibus positum non possint non fieri.

Quæ de liene dicta sunt ab antiquioribus, quod humoris melancholici ab hepate per ductum splenicum advehi sit receptaculum, & quod huius humoris nonnihil per vas breve venosum in ventriculum feratur, omittenda hic potius visa sunt, quàm refellenda; nam res ex opposito prorsus se habet, videlicet à ventriculo per vas breve in ductum splenicum, & à liene per eundem ductum refluus sanguis ad jecur defertur.

Et licet verisimile sit, aliquid in liene etiam separari, quod ad alimentorum confectionem non parum conducatur, quid tamen hoc sit, & quo feratur huc usque incognitum anatomicis est.

DE ULTERIORI CIBORUM IN INTESTINIS ELABORATIONE.

Sunt qui ventriculum, & vasa humorifera, quæ in illo reperiuntur, nihil omnino putent accipere ab iis, quæ in ejusdem cavitate continentur, quæcumque illa sint sive cibus, sive potus, sive hæc confecta jam, & concocta sint, sive non.

Sunt etiam, qui ante perfectam alimentorum elaborationem nihil elaborari affirmant à ventriculo ad intestina, & hoc tempore pylorum, sive janitorem exacte clausum esse, atque adaperiri putent postea quam satis confecta fuerint alimenta, quæ demum ad intestina, in quibus nulla alia fiat in cibis alteratio, sed utilis tantum substantiæ ab inutili separatio, protrudantur. Sed cogitationes istæ minimè consentiunt iis, quæ observantur, & longissime remotæ sunt ab ipsa rei veritate.

Multa enim, licet extrinsecus applicata, cutem penetrare possunt, sanguinique, & aliis humoribus permisceri, & universum corpus magis, minusve perturbare.

Olfaetu susceptis halitibus, ut etiam iis, quæ ore tantum detinentur, melius, vel pejus nobis esse potest, & corpus his, quæ sic admittuntur, aliquando nutrimentum aliquod suscipit; & spiritus reficiuntur, & manifesto alterantur.

Præterea assumptis brevi hora cibus, potibusque turget ventriculus, qui non unico momento detumescit, sed per gradus spatio multarum horarum. Et dissectis animantibus post duas, tresve, aut quatuor horas à pastu alimentorum aliquid reperitur in ventriculis, aliquid in intestinis, & mesenterii venæ novo chylo tumentes observantur. Suntque, qui continuè ventri indulgendo plus, cibi una die accipiant, quàm ventriculus capere possit, in quibus necessum est affirmare, quod aliquid interim ex his, quæ prius sumpta fuerant, è ventriculo elaboratur.

Ingenii igitur potius stupiditate, quàm solertia nonnulli inquirunt, ventriculum, qui non minus, quam cutis, & olfactus organa, non minus, quàm os, & palatus poros, & vasa habet, non minus, quam lignum, & mortuum corium, quæ aquas admittunt in poros suos, nihil suscipere ab iis, quæ in ipsomet ventriculo continentur! Neque profectò magis vera sunt, quæ
de

de pyloro, sive de tam accurato janitore affirmantur.

Alimentum autem, quod dum ventriculus constringitur, paulatim, atque paulatim ad intestina propellitur, vix dilapsus est pyloro in primum intestinum bile, & succo pancreatico perfunditur, Habent succi isti ductus proprios, qui, ut plerumque in unum coeunt ad intestina patulum. Verum aliquando alter cum altero non communicat, & uterque proprio ore, ad duodenum patulo liquores, quos advehunt, deponunt. Omitto autem ea, quæ rarius observantur in animantibus, quæ vim sermonis mei non minuunt.

Qui quidem liquores sunt ex genere eorum, qui facile tum inter sese, tum præterlabenti per intestina alimento permisceri possint, non inquam sunt, ut mercurius, & aqua, quæ analogiam non habent, qua confundi simul, & permisceri possint.

Cumque sint diversæ naturæ, agitatio quædam fit, dum confunduntur, & lenis partium eorundem effervescencia, qua impossibile prorsus est, alimentum non alterari, non confici, & ulterius perfici.

Etenim hoc opus fit continuè ab ipso vitæ principio ad mortem usque, ut proinde non in perniciem, sed in animantis utilitatem cedere censendum sit.

Ponamus bene comatum hominem minimè lædi à coma, statim ausim affirmare, quod juvetur. Coma autem multitudo est capillorum. Capillus igitur si non nocet, prodest. Quod satis norunt illi, qui ex sola comæ nulum detrimentum afferentis recisione, in morbos non leves inciderunt.

Is inquam, qui ad mensem, vel ad annum, ut non dicam ad centum annos, cum continua interim facta fuerit bilis, & succi pancreatici in alimentum ipsius perfusio, provectus est, non solum minimè læsus ab illa, sed etiam juvatus est, & à multis morbis est liberatus, quos fuisset passus, si bilis, vel succus pancreaticus, vel uterque liquor defecissent, non minus, ac ægrotat ablata coma is, cui coma non nocebat.

Præterea omnes, quos sciam, cognoverunt, bilem esse magnarum virium, & igni illam assimilarunt non pauci scriptores. Quam rectè nunc non quæro, sed ultro concedendum puto, magnam esse bilioli liquoris efficaciam. Quibus addam libenter, bilem non quidem liberè, non arbitrato alicujus intelligentiæ, sed naturæ necessitate semper, & ubique id omne efficere, quod potest efficere.

Id velim explicent, qui contrarium sentiunt, ut cibus, qui vix elapsus est ventriculo tam efficaci liquore perspergitur, non alteretur, non immutetur, ac si multum alteratur, & quàm maximè mutatur, & hæc alteratio, & immutatio non noceat, ut bilis vile tantum sit excrementum, & non potius utilis liquor, & ad vitam necessarius.

Liquor autem pancreaticus sæpe ferè limpidus est, & quibusdam palatum, & nares acriter percellit, aliis videtur salivofus, aliis subacidus, & austerus, aliis insipidus, aut saltem nulla aciditate donatus. Qui omnes fortè vera dicunt, vel quia idem liquor non est in omnibus animantibus ejusdem naturæ, & alius est in cane, alius in bove, alius in homine, vel quia non est omnino similis in eodem animante, diversis tamen temporibus, vel in pluribus aut canibus, aut bobus, aut hominibus, ut mirum non sit, si diversimodè sensus afficiat, & ab hoc animali collectus videatur subacidus, ab

alio vero animali videatur salivofus, vel alius. Vel demum hoc idem contingit, quia hominibus organa sensus non sunt similia, & una, eademque res aliis sensum excitat aciditatis, aliis verò alium sensum producit.

Sed utcumque res ista se habeat, & etiam si succus pancreaticus pura esset aqua similis illi, qua utimur in potibus, ex concursu tamen ejus, & bilis in alimentum, quod per duodenum fertur, existimo alimentum alterari, & immutari, utiliter quidem, si hæc fuerint secundum hominis naturam, sin minus, morbos fieri.

Elapsus scilicet è ventriculo cibus in duodeno, non solum bile, & succo pancreatico diluitur, & liquidior fit; verum etiam, modo hæc nullo vitio laborent, leni eorundem effervescentia attenuatur, & utilior ejus pars fit magis separabilis ab inutili. Nec non novi aliquid ab his concipitur.

Sed illud quæri potest, an alii quoque liquores, per alios canales diducti in cavitationem intestinorum instillantur?

Mihi sanè verisimile videtur, ab aliis glandulis mesenterii, & ventris inferioris alios ductus ad intestina derivari, liquorem aliquem in eorum cavitationem eructantes. Et mucositas illa qua intrinsecus intestina levia sunt, & lubrica, non quidem videtur descendere è ventriculo, & intestinorum tunicis adherere, sed potius videtur ab ipsa intestinorum substantia per poros, & meatus hucusque incognitos eructari, & internam superficiem intestinorum oblinire.

Præterea qui alvum habent adstrictam, quam supposito solvunt, experiuntur humiditatem, sive mavis dicere mucositatem ab ultimo intestino exprimi, & multum verisimile videtur, à superioribus intestinis motu proprio eorundem, & motu septi transversi per poros minimè notos aliquid simile exprimi in eorundem cavitationem; cumque cutis vapores, & sudores etiam sæpè fundat copiosissimè, non video, cur ab intestinis, & vapores, & quid sudori simile in eorundem cavitationem non possit instillari.

Ac facilè mihi persuadeo, passim, & per intervalla è vasis maximè iis, quæ propria sunt glandularum in os, in fauces, in œsophagum, & stomachum, in ventriculum, & in intestina, & quidem passim per totam eorum longitudinem aliquid influere, & è converso esse vasa, esse porulos, & meatus in membranis, reliquisque partibus tum oris, tum œsophagi, tum ventriculi, tum intestinorum, quibus ex iis, quæ ore assumuntur, & paulatim per tam longam viam descendunt ad rectum, aliquid, quod magis usui esse possit admittatur, & in circulum cum aliis humoribus corporis feratur, & magis, ac magis perficiatur. Reliquum verò ex his, quod usui esse non potuit, tandem ab extremo intestino foras extruditur.

Et in his rerum quædam circulatio adesse videtur eorum, quæ è vasis in cavitates prædictas defluunt; & eorum, quæ ab iis, quæ in cavitatibus his continentur, in vasa admittuntur.

Hæc autem, quæ à ventriculo, & intestinis auferuntur, majori copia esse debent, quàm ea sint, quæ advehuntur. Et res simili modo procedit, ac in puero adhuc non excluso, qui plus suscipit à placenta, & à membranis matris utero adherentibus, quàm sit id, quod per arterias umbilicales in placentam advehitur: aliàs neque crescere, neque nutriri posset puer.

Cæterum cum argumentis concludatur membranas omnes poros habere,

re, quibus aliquid in vasa corporis admittatur; in intestinis hoc ipsum oculis probari potest. Non quia intestina, & mesenterium, è quo illa pendent, innumerabilem habeant sanguiferarum venarum numerum, quas chylum deferre ad hepar crediderunt prisca; recentiores verò ostenderunt, easdem sanguinem referre per arterias ad mesenterium, & intestina delatum: verum quia innumerabiles ferè à mesenterio ad intestina maximè tenuia, venæ lacteæ protenduntur, quæ candicante liquore turgidæ reperiuntur in cane exempli gratia post tres, quatuorve horas à largiori pastu dissecta: Et aliundè lacteum succum istum habere nequiverunt, quàm ab intestinis. Quin imò dissecta jejuna animante absconduntur oculis venæ istæ lacteæ, & visum effugiunt: deficiente scilicet in ipsis candida substantia, qua turgent, & visui manifestæ fiunt. Ac licèt semper habeant limpidum quemdam liquorem, quem suscipiunt à vasis lymphaticis, hic tamen, & in minori copia est, & eo non satis turgent hæc vasa, nec non etiam lymphæ minus conspicua est, quàm lacteus chylus.

Nolim autem ex his, quæ de vasis lacteis, sive chyliferis comperta sunt, aliquem sibi persuasum habere, sanguiferas venas mesenterii, & intestinorum nihil prorsus arripere, nihil prorsus admittere ex his, quæ per intestina labuntur, id enim est omninò inverisimile. Ac alios invisibiles poros esse nedum in intestinis, sed in membranis omnibus, quibus aliquid admitti possit, mihi facilè, ut supra monui, probatum est ex mortuo animalis corio, cui utcumque aquam aspergas, illam imbibit, illa turgidior, & gravior est, quod ab Hippocrate etiam notatum fuit.

DE CAUSIS, QUIBUS CIBUS, ET POTUS MALE CONFICIUNTUR.

Cum optima ciborum confectio ex iis fiat, quæ superius memorata sunt, continget, eandem frustrari his iisdem mutatis, aut deficientibus, aut exuberantibus, quo vel continget omninò non mutari cibos, & potus, quod rariùs accidit, & tunc crediderim animal penè mortuum, vel lentè, & tardè nimis in alimentum aptum converti, vel mutari quidem, & alterari breviori, vel longiori tempore, sed in substantiam, alendo, & restaurando corpori ineptam, aut minus aptam, quæve molestias, & impotentias faciat.

Sic margaritæ, quæ solvuntur à nonnullis liquoribus, ab aquis ex. gr. puris minimè solvuntur. Ac dicimus, aquas ignavas esse, & inertes ad huiusmodi opus; quoniam aquarum particulæ, licet motum quemdam habeant intestinum, ut quilibet alius liquor; attamen propter incongruentiam figurarum margaritas penetrare, & vincula, quibus margaritarum partes nectuntur, solvere minimè possunt.

Item ex concursu aquarum simplicium in margaritas, & ex substantiis æthereis, quæ in aere reperiuntur ob eandem incongruentiam figurarum nulla excitatur ebullitio, & effervescentia, qua margaritæ comminui possint: secùs, si in aceti spiritum margaritæ injiciantur, vel si in aquas hordeum, vel frumentum, vel gummi arabicum, vel sal, aut aliquod aliud ex his conjiciantur; tunc enim tum ebullitio, & effervescentia, tum
fer.

fermentatio sæpe excitabitur ex his tribus, aqua nempe, frumento, & particulis, quæ ab aere habentur, vel spiritu aceti, margaritis, & iisdem particulis ab aere acceptis fervor excitabitur in margaritarum solutione. Neque ipsa profectò lima chalybea apta est omne corpus rodere, sed aliud quidem ab alio in pulverem comminuitur.

Hæc eadem, quæ margaritas solvunt, & ea, quibus panis fermentatur, aut cibus conficitur, aliquandò minùs sunt efficacia, quàm opus sit, atque idèd fit quidem solutio, aut panis, & ciborum fermentatio, sed lentè nimis, & interim fieri potest, ut hæc corrumpantur, vel crudiores succi in venas admittantur, qui postea morbos progignunt.

Atque, ut omne, quod fit, veluti domus, aut arbor, multiplex, & infinitis modis varium esse potest, & idcirco ad aliud, atque aliud magis, aut minùs aptum: ità ea, quæ in ventriculo reperiuntur, sive liquores sint in ipsum è vasis, & poris confluentes, sive extrinsecùs admissa, ut cibus, & potus infinitas suscipere possunt mutationes ad vitæ functiones magis, aut minùs idoneas, & nonnunquam ad conservandam, & ad reparandam vitam omninò ineptas.

Quæ utcumque fiant, necessum est, ut aliquid adsit, ex quo fieri possint. Nam si nihil prorsùs sit in ventriculo, ex eo, quod non est, nihil prorsùs fiet, & homo peribit. Ea verò, quæ utcumque in ventriculo constituuntur, tum quantitate, tum qualitate peccare possunt. Neque omnia æquali facilitate in utile alimentum convertuntur, aut in substantiam abeunt noxiam, & quædam sunt, quæ alicui homini sint tamquam venena, aliis non item, & alia, quæ licet venena non sint, multis tamen hominibus sæpe sæpiùs noceant, ut cibus non masticatus, aquæ palustres, fungi nonnulli, non inquam pessimi, sed ex media natura, anguillæ, & mugil in lacubus altus, & quibusdam potiùs, quàm aliis temporibus. Sanguis taurinus de recenti eductus, & bibitus, & alia multa, ex quibus homo, aut perit, aut malè nutritur, aut in morbos incidit, etiam si priùs liquores necessarij ad ciborum utilem transmutationem sine culpa fuerint.

Sed nihilo minùs hæc contingere possunt absque errore tum in quantitate, tum in qualitate ciborum; verùm aeris vitio, quod multiplex sanè, atque multiplex esse potest, vel salivæ sive defectu, sive superabundantia, sive alio vitio, quod multiplex esse potest, peccantis, ut etiam defectu, & vitio bilis, & aliorum liquorum ad hoc opus concurrentium, vel diaphragmatis, & cordis motu alteratis, & ab animi affectibus, ut ab ira, mæstitia, aliisque similibus, quibus ea mutantur, & non solum in quantitate, sed multiplicibus planè modis variant, quæ necessaria sunt ad optimam cibi, tum confectionem, & elaborationem, tum distributionem, & in aliti substantiam transmutationem.

Cæterum cum aliæ ex his causis extrinsecæ dici possint, aliæ intrinsecæ, de his præcipuè agemus in sequentibus, quæ non ab extrinsecis causis, ut est aer, aut ab aliquo errore, & vitio in his, quæ assumuntur, fiunt, sed à causis dependent intrinsecis.

Sed præmissò titulo, ut causæ hujusmodi cognoscantur, ut distinguantur, non omitemus exponere, quæ consequantur abstinentiam ab omni cibo, & potu, & quæ immodicam repletionem consequantur, & ut ebriis,

& iis, qui malis fungis, anguillis, mugilibusque lacus vescuntur, & iis, qui sanguine potati sunt taurino opem afferre valeamus. Et erunt hæc polita veluti exempla, quibus alii quoque juvari possint.

DE COGNOSCENDIS, ET DISTINGUENDIS CAUSIS, QUIBUS CIBORUM CONFECTIO FRUSTRATUR.

CAusæ, ex quibus aliquid fit, recto usu Logicæ minimè contentiosæ distinguuntur, & cognoscuntur. Logicam hanc tradidi brevissime in dissertatione quadam, & consistit in scientia, qua cum nascimur primarum notionum, sive communitatum, ut appellat *Galenus lib. i. meth. Med.* sive dignitatum, ut inquit Aristoteles in *Metaphisicis*, & in recto mentis usu, ea dijudicando, & deducendo tum ex dignitatibus, tum ex iis, quæ quoque modo sentiuntur, quæ necessariò consequantur.

Hanc eandem Logicam paucissimis verbis expressit Hippocrates proæmio *libri de officina Medici*: Primo, aut similia, aut dissimilia, principio à maximis, à facillimis, à quibuscunque, quomodocunque cognitis. Secundò, quæ & videre, contingere, atque audire licet. Tertio, quæ item oculis, tactu, auribus, odoratu, gustatu, mente sentiuntur. Quarto, quæ item omnibus, quibus cognoscimus intelligi possunt. Quibus verbis jure merito Galeno visus est Hippocrates totius medicinæ institutionem tradidisse.

Eorum autem, quæ sentiuntur, aliud genus comprehendit ea, quæ ab ipsomet ægrotante tum sanitatis tempore, tum dum male habet, & ægrotat, aliud, quod ea comprehendit, quæ ab adstantibus, & à Medico in hoc præcipuè homine, quem præ manibus habet, observentur, & sentiuntur, & quæ ad hunc pertinent hominem non modo morbi tempore; verum etiam dum sanus esset, & integer viveret, comparando enim altera alteris, faciliùs de morbi natura, & de remedio, ac curandi ratione dijudicatur. Et hæc quidem in alias, atque alias subdividuntur species.

Ac licet multo, ut plurimum ratiocinio opus sit ad dijudicandum de rerum natura ex iis, quæ sentiuntur; attamen si ab uno, eodemque non mutato aliter afficiatur sensus noster, certi ex eo sumus de aliqua mutatione in organis sensus; at si nihil in organis mutatum sit, & aliter afficiamur ab aliquo, certi sumus de aliqua mutatione in sensibili objecto, à quo aliter movemur: ut si quis nullam expertus in organis suis mutationem à vino, quo dulce sentiebat, sentiat amarum, vel acidum, vel aliud; certò certius affirmare poterit, vinum esse mutatum, & non esse ampliùs ad eos omnes usus, ad quos priùs quam mutaretur, aptum erat, & aliquid ab eo fieri, quod priùs fieri non poterat. Et impossibile est aliquid mutatum jam esse, ut aliud videatur, & aliter sensum afficiat, & prorsus omnes alias vires non mutatas servare, quas priùs habebat. Id enim, quod sensus movet, alia multa efficere potest, ac si ad unum ex his facta mutatione, magis, aut minùs potens sit, ad reliqua omnia nequaquam easdem, ac priùs vires habebit: ut solis lumen movet oculos, & manus hominis; movet plantas, & aquas, & multa alia; quod si languidiùs moveat oculos ob interpositas nubes, alio etiam modo movebit tum manus, tum plantas, tum alia quæcunque.

Ex iis autem, quæ de vino diximus, facile infertur oportere reperire modum, quo vinum restituatur ad priorem statum, si ab illo in omnibus similes velimus effectus, vel si modus, aut ratio, qua id fiat, non constet, facile deducitur oportere hoc vinum, quod malam suscepit mutationem abjicere, & novum quærere.

Si quis igitur malè concoquat, & alium percipiat in ore ex saliva saporem, puta acidum, salsum, vel amarum, aut copiosior, aut parcius, aut liquidior, aut crassior, aut spumosa nimis, aut alia sibi videatur saliva; indicio hæc esse possunt ex salivæ mutatione, quam restituere, & corrigere oporteat, malam sibi fieri ciborum confectionem, vel hanc ipsam ab illa eadem esse causa, qua saliva mutata est.

Item si aliæ fuerint, ac in integro statu sensationes, & apparentiæ quæcunque, ut exempli gratia eorum, quæ excernuntur, ex his quidnam mutatum sit, ex quo aliud, aut aliud fiat, investigare poterimus.

At si novi nihil in his observetur, verum post certas horas ab assumpto cibo, vel potu ventriculum quis experiatur solito turgidiorem, spiritus habeat difficultatem, vel aliqua alia molestia afficiatur, quam prius minimè patiebatur, conicere poterit aliquid sibi fieri à cibo, potuvè, vel quia hæc haud ritè mutantur, vel quia tumor, vulcus, aut impedimentum aliquod adsit in ventriculo, vel circa ventriculum, quo etiam si cibus rectè conficiatur, diverso tamen modo sensum affici necessum sit, & molestum aliquid percipiatur.

Sic alia multa observari possunt, quibus aliud, atque aliud dignoscere, & aliud ab alio distinguere valeamus.

Verum ne quis facile ab his decipiatur, nequaquam ex unica tantum observatione conicere debet quid nam sit illud, quo lædimur, aut quid facto potissimum opus sit, sed ex multis: imò ex omnibus, quæ visu, gustatu, auditu, naribus, & ut nihil omittam, quæ tactu sentiuntur, & mente cognoscuntur, ut inquit Hippocrates. Nam sæpe ex unica, eademque causa effectus nascuntur æquivoci in significatione, & facile is, qui non considerat omnia, in deceptiones, & in errores trahitur. Ut ex vermibus sive in ventriculo, sive in intestinis, sive in hepate, vel in alia parte aliquid fieri potest, quo nihil minus significetur, quàm vermes.

Aliquando tamen neque hoc ipsum satis est, omnia notasse, & observasse, quæ ab homine notari, & observari possunt. Multa enim sunt magnarum virium, quæ non movent sensus hominis, nisi post jam factum malum, & multa sunt, quæ sine ulla præeunte notabili molestia remedium afferunt dolorum omnium; mortem scilicet. Et profectò nullo sanè indicio præcognoscere possumus, an liquor aliquis vires easdem habeat, quas habet viperæ venenum. Nullo indicio, nulla ratione præcognoscere possumus, an ferrum aliquod magnetis vires habeat, & aliud ferrum ad se alligere possit, nisi periculo facto de hoc ipso magnetico ferri effectu. Quin etiam frequentissimè, cum non lateant effectus, causa latet, & modus, atque ratio, qua illi fiunt, sunt in obscuris: ut manifestum est in his etiam, quæ in ferro, magnetis vi imbuto observantur; cum rationum vix hypothesei aliqua tentare possimus divinationem.

Atque id quidem in medicina sæpissimè contingere animadversum fuit
ab

ab omnibus antiquissimis, & clarissimis Viris, qui illam tractarunt. *Dioscles*, ut refert *Galenus*, (a) hæc scripta reliquit: qui omnia sapore eodem, odore, calore, aut alio id genus prædita vires easdem obtinere existimant; haud rectè opinantur: nam multa ostendere quis possit dissimilia fieri ab his, etiam si, quod ad prædicta attinet, inter se conveniant, &c. Et idem *Galenus* lib.2. de sim. med. f. cap.3. disertissimis verbis docet: quod neque à colore, neque ab odore, neque à consistencia, neque congelatione, neque à durtie, neque à levitate, neque à frigiditate, neque à caliditate, aliisque similibus de medicinarum facultate ratiocinari oporteat.

Porro tum *Galenus*, tum *Hippocrates*, alique doctissimi Viri pluries, atque pluries monuerunt, quod à juvantibus, & nocentibus conjecturam nos facere debeamus de morbi natura, aut saltem de remedio, quo opus sit; videlicet antequàm periculum fiat, & antequàm aliquid nocuerit, sive opem attulerit frequenter nimis nulla via præcognoscere possumus, utile ne illud sit, an noxium. Non enim percipere possumus omnia, quæ insunt rebus, neque habemus instrumenta apta ad cognoscendum omnes similitudines, omnesque dissimilitudines, quas habent res. Quod semper meminisse oportet.

DE IIS, QUÆ CONSEQUUNTUR CIBI, ET POTUS ABSTINENTIAM.

ADversus omnes impetus morborum duo sunt remedia certissima, inquit Author libri de Dynamidiis Galeno ascripti; primum est, ut decimo quoque die à cibo, & potu abstineas; deindè postero die laveris, ciboque firmo utaris, si sic feceris, oportet, ut nihil vitii omninò accidat; perpetuaque sanitate utaris. Altera res salubris est potus, qui valetudinem confirmat. Sed non describit, qui sit hic potus salubris, facilè tamen multa pro eo excogitari possunt.

At libro de locis affec. 5. cap.6. Grammaticum legimus, qui quoties nimis vehementer doceret, aut cogitaret, aut inediam sustineret, aut irasceretur, comitiali morbo corripiebatur. Qui iussus optimam concoctionem accuratè procurare, ac tertia, vel quarta hora panem sumere ex se si non sitiret; si verò siti cruciaretur, ex vino diluto, & quidem albo, atque modicè adstringente, meliùs se habuit.

Siquidem ea, quibus cibus, & potus elaborantur in ventriculo, & in intestinis, & in aliis partibus perficiuntur, in abstinencia primum fiunt acriora, & efficaciora nimis, aliis citiùs, aliis tardiùs. Quod nonnunquam aliquibus prodest, aliis non item, quibus ab illis iisdem, vel ventriculus, vel stomachus tentatur, vel alio pacto corpus turbatur, undè vomitus, aut dolor, aut lypothymia, aut epilepsia, aut aliquid aliud sit.

Fames quoque, ut plurimum, & sitis tunc temporis molesta esse consueverunt, quæ cum cibo, & potu cessare possint, cessant tamen etiam ex sese, & naturæ spontè, sive necessitate mavis dicere, in longiori abstinencia,

non minus, ac omnes aliæ molestæ sensationes, quas meminerim, ubi diutius, atque diutius, & non interruptæ perduraverint, ex rerum naturæ necessitate desinunt, sensus enim organum fit impotens ab affectione perenni, & non interrupta.

Cessat quidem fames, & cessat sitis in diuturniori à cibo, & potu abstinencia, sed non item cessant alia mala, quin potius fiunt majora, & graviora, & aliis fortè desinentibus, alia, atque alia nascuntur, & tandem mors advenit.

Vulgus autem, quod credit rem omnem Medicam hoc unico comprehendendi præcepto; *contraria contrariis curari*, modum non adhibens rebus in omnibus sapissimè decipitur. Nam licet morbi plerique fiant à jejunio, & quo quis longiori tempore sese abstinerit tum à cibo, tum à potu, eo pejus, & gravius se habeat; sive quo diutius jejunarit, eo majori in vitæ discrimine reperiatur, ex his tamen non sequitur, quod eo largius, & copiosius tum bibere, tum comedere, & brevi tempore multa, ac multa ingerere debeat.

Nec sanè post perpetuam multorum dierum non interruptam vigiliam probarim somnum non interruptum multorum dierum, nec post maximam corporis refrigerationem ex nive repentinam mediocrem calefactionem probaverim. Probaverim primùm minimam, postmodum paulò valentiorē, & mediocrem, demum quantum opus.

Enim verò etsi non rarò multarum horarum jejunium nimis conferat, & facilius, atque melius ex eo cibi concoquantur, & apponantur, longior tamen abstinencia obest, & quo quis plus jejunaverit, eo difficilius postea concoquit, & minus rectè in ventriculo, & in intestinis, & in aliis partibus quid quid assumitur, perficitur, & impotentiores sumus ad omnes alias nutritionis, & vegetationis functiones. Vasorum latera concidunt; poruli occultantur, & partes longiori tempore feriatae ab opere ad illud idem sunt postea ineptæ, & ignavæ.

Pleraque autem ex his simili planè modò contingunt, ac in vulgari fermento panis, quod diutius sine usu asservatum, & custoditum, impotens postea est ad panem perficiendum, & deperit in eo fermenti vis. Fermenta namque omnia tempus, & ætates habent; generantur enim, & concipiuntur, crescunt, & summas acquirunt vires, demum, & ipsa quoque senectutem experiuntur, & pereunt.

Illi igitur, qui sic laborant, paulatim reficiendi sunt, ac primum per brevium horarum intervalla, postea longioribus; visu, & potione tenuiori, mox pleniori, uti debent, ac paulatim aliquid addendum est, donec perveniatur ad justam ciborum quantitatem, quæ sano corpori conveniat. Interim corpus extrinsecus fovendum balneo, quod suscipiat, & lenissima frictione partes ad consueta munia sunt excitandæ. Iis, quæ grata sunt, nares fovendæ, & os vino optimo abluendum, etsi videbitur, clyster ex oleo, lacte, & vino, aut jusculo injiciendus. Lacte autem rectè adhibito serè omnibus, quibus opus, satisfacere poterimus.

DE HIS, QUÆ CONSEQUUNTUR IMMODICAM EX CIBO,
ET POTU REPLETIONEM.

Cibo, potuve distento nimis ventriculo magna fit liquidarum substantiarum è tunicis ejusdem expressio, & novus aliarum accessus compressis lateribus vasorum, & eorundem cavitate angustiore reddita propter tensionem, aut omninò impeditur, aut difficilior est. Ex hac enim tunicarum ventriculi distentione nimia dolores in eo, & protrusiones fiunt viscerum circumexistentium; quorum functiones turbantur, & alterantur; maximè verò alteratur diaphragmatis, & pulmonum motus.

Et ab his alia, atque alia nascuntur incommoda, ac nisi aliquid auferatur à ventriculo quavis via, ut si descendat, citò descendat per intestina, aut vomitu rejiciatur, rumpantur necessum est voraces, & bibones, cibus enim, & potus mora in ventriculo rarefiunt, & ampliorem locum expolcunt.

His autem, quæ haud promptè rejiciuntur, vasa replentur crudioribus succis; nam excedens quantitas assumptorum minùs rectè perfici, & elaborari potest.

Mirum igitur non est, si plerique ex his veluti obrupti copia ciborum, & potionum, aut suffocentur, aut apoplexia, aut syncope, aliove brevi morbo extinguantur: quidam mente moveantur, & multa videant, & sentiant, quæ dicuntur præter rationem, & ad multa sint impotentes, & aliis aliud fiat, prout varia est tum copia, tum qualitas eorum, quæ sumuntur, & prout varia est corporis consuetudo, vel varia est quavis de causa constitutio.

His evacuatione opus est, quæ aliquandò neque vomitu, neque per sedem facilis est; accidit enim ventriculo id, quod vesicæ, quæ ab urinarum copia nimis distenta, sæpè neque perstringi ex sese, neque ejus sphincter aperiri potest. Sed si vel vomitus, vel dejectio, vel alia etiam minus congrua evacuatio succedat, ut urinarum, aut sudoris profusio, & nullum vitium interim contraxerint corporis partes, quod permaneat in eorundem constitutione, citò liberatur.

Idcirco tentandæ sunt hujusmodi evacuationes: vomitus nempè vel digitis ipsius ægrotantis, vel penna, vel alio simili fauces, & æsophagum irritando, & stimulando, & eodem tempore manibus comprimendo ventriculum, ac si videbitur suppositis simile quid faciendum est ad extremum intestinorum, vel clyster injiciendus est, quo alvus, quantum commodè fieri potest, exoneretur.

Sed si tantus non sit excessus, ut evacuationes sæpè profint; frequenter tamen non sunt necessariae, & quandoque satis est primum conquiescere, & postea leni gradu; de hinc iterum conquiescere, & postea citatiori gradu exerceri, ac per intervalla aliquid accipere, quo faciliùs assumpta solvantur. His, quibus os est amarulentum, succus mali citri, aut similis usui esse potest. His, qui acorem sentiunt, aqua cinnamomi in parva quantitate, sed pluries exhibita; plerisque aliquid ex his commixtis convenit. Quibus mero factus acor est, aqua superbibita prodesse potest. Germanis autem, quibus mos est integras dies potando, & comedendo consumere, ne à cra-

pula lædantur, usui est vini spiritus, quod felici experimento sæpè comprobatum est. Sunt, & alia, quæ prodesse possint, ut cremor tartari in jusculo, & tartarus vitriolatus, & medicamentum ex Ære paratum, sed de his commodiori loco.

Verùm non præteream ea, quæ præter vomitum in ebrietate opem afferunt; & ea, quæ maximè conveniunt iis, qui fungis, & anguilla, & mugile lacus, vel paludis, similibusque pasti salutis detrimentum acceperunt: neque eos, qui sanguine tauri recenter educto potati sunt, sine auxilio relinquam.

QUÆ CONVENIANT EBRIIS.

EBrios observare licet toto corpore titubantes in incessu, & vanissima tum videntes, tum balbutiendo loquentes. Qui si jaceant in gravi ebrietate, supini jacent, & hiant ore stertunt. Cumque ebrietas fieri possit, tum vino, tum cerevisia, tum lactis potu, tum tabaci fumo, tum fragariæ fructu, & sylvestribus sorbis, aliisque similibus, aliis hominibus facillimè, aliis minùs facilè contingit, ac si Galeno credimus, ex unico vini præparati scypho quis ebrius fieri potest. Qui etiam inquit ebrietatem non sentire eum, qui ovis pulmonem jejunos ederit, quantumvis copiosè bibat: neque ebrietate tentari eum, qui rutæ folia, aut acorum, aut thebaicam palmulam, aut amaras amygdalas ederit. Eos autem, qui ex vino ebrii facti sunt, adjuvat vomitus, & post vomitum brassicæ, aut baccarum myrti, aut mali punici succus, & absinthium, & crocus, & ruta etiam cum aceto testiculis admota.

QUÆ CONVENIANT IIS, QUI MALIS FUNGIS, VEL PINGUI COENOSA ANGUILLA, AUT MUGILE E LACUBUS, SIMILIBUSQUE PASTI SUNT.

Vomitum etiam, & nonnunquam dejectio adjuvat eos, qui ex fungorum malorum, vel anguillæ, similiumque comestione ægrotant. Ac si citò subveniatur pipere, allio, origano, lixivio, similibusque facilè restituntur, & integri fiunt; hæc namque experientia docuit pluries alexipharmaca esse, vires obtundentia variorum fungorum, qui venenati dicuntur, suntque variæ eorumdem species, & sunt quippè quamplurimi innoxii, qui pluries comesti nihil mali attulisse compertum est, neque stomacho obnoxii fuere; fungi namque illi, qui ut plurimum quamplurimis nocumento fuere, liquores digestivos infringunt, & venas replent succis crudis ad motum circularem ineptis: unde anxietates, & suffocationes ex fungis, frigidi sodes, & interdum lypothimiæ contingunt, ob idque meritò venenati vulgò appellantur.

QUÆ CONVENIANT IIS, QUI SANGUINE TAURI RECENTER EDUCTO POTATI SUNT.

Multa sunt, quæ cum liquida sumantur, in ventriculo coagulantur, ut lac, maximè si coagulum immistum habeat, & antequam coagulatum fuerit, bibatur, quod etiam aliquandò ipso in ventriculo reperit, quo coagulari possit. Item sanguis tauri fibrosus nimis de recenti eductus è venis, & adhuc liquidus exhibitus, qui in unam massam coactus in ventriculo

culo veneni vires æmulatur : pylorum obstruit , & priusquam dissolvatur corrumpitur , & enecat .

His , qui hæc , aut similia sumpserunt priusquam cogantur , conveniunt vomitus , mel , saccharum , & alia , quæ lacti , vel sanguini , similibusque immista , non sinunt ea arctè cogi ; sed postquam coagulata fuerint , & frustra vomitus fuerit tentatus , conveniunt coagula animalium , quæ lac liquidum coagulant , & coagulatum solvunt , ficus immaturi ex vino , vel aceto ; laserpitium commendassent antiquiores , sed ad nos non advehitur ; semen brassicæ , lixivium ex . gr. figuli in exigua quantitate , & aliis dilutum ; est autem ex vini fœce , sal tartari volatilis , & alia . Cavendum ne quis post lac , sive sanguinem taurinum sal commune sumat . Lac , & sanguis tauri cochleatim , atque cochleatim si sumantur , sæpè non nocent , quoniam in minora frusta coguntur .

DE INTERNO ABSCESU.

Abscessus est partium corporis diductio propter interpositam aliquam inutilem substantiam , qua pars illa intumescit .

Id autem , quod intercedit , vel peculiari clauditur tunica , ut in atheromate , steatomate , meliceride , aliisque , vel non habet folliculum , cystimque , capsulam videlicet , qua contineatur .

Utriusque generis in omni corporis regione frequentes nascuntur abscessus . Qui item differunt tum ratione partis , in qua fiunt , tum ratione substantiæ , ex qua fiunt , tum etiam magnitudine . Semper autem in quocunque abscessu mihi supponendum videtur aliquod in vasis , atque meatibus præcedens impedimentum , quod obstructio dici possit , aut à crassioribus humorum particulis , aut à contusione , aut ab alia causa , præterquam in iis , qui sunt potius veluti appendices quædam , & excrescentiæ , aut carneæ , aut osseæ , aut aliæ , quæ aliquando videntur fieri posse , absque obstructione , & intercedentes inter partes corporis illas diducere possunt .

Abscessuum autem omnium quidam sunt , qui nunquam ad maturationem , sive suppurationem deveniunt , quidam difficulter , alii celeres habent mutationes , & citò pus concipiunt .

Cumquæ alii interni , alii externi sint , non omnium eadem est habenda ratio , majus quidem imminet ab internis vitæ discrimen , ac cum illi , in quibus pus non gignitur , si extrinseci fuerint , sæpe vix aliud , quam deformitatem afferant , ubi fuerint interni , saltem compressione partium proximarum , aut mortem , aut aliquod non leve incommodum afferre possunt . Illi verò , qui ad maturationem deveniunt , nisi eum sortiantur locum , è quo facilis puri pateat aliquo modo exitus extrà corpus , quodvis ferè malorum , quibus homo subjicitur , gignere possunt .

De externis abscessibus , in quibus Chirurgia non tenuem opem afferre solet , multa scripta sunt diligenter , & accuratè à plerisque . De internis autem pauca dicta sunt , cum tamen tum numero plures , tum graviores sint interni externis , numero plures quidem fortè , quo major est soliditas corporis cute , & partibus cuti proximis , quæ alias profundiores abscondunt , graviores verò propter hoc ipsum , quod sunt interni .

Qui sunt cuti proximi , sæpe crudi rectè excinduntur , ut sunt abscessus

sus cystici, qui discissa cute, digitorum compressione extrahuntur, & resecto pedunculo auferuntur. Postea vulnus simplex si sanguinis profusio non sequatur, simpliciter habendum est, alias prius sanguis sistendus. Idem aliquando rectè comburuntur, quod si pus, aliudvè puri analogum in ipsis contineatur, novacula, aut lanceola sinu aperto illud expurgatur, & postmodum medicamenta injiciuntur, quibus si quid reliquum inutile est in parte affecta auferatur, vel pars ipsa consolidetur.

Hæc, atque alia similia, quæ administrari possunt in externis abscessibus, in internis, ut plurimum minime locum habent. Quin imò neque illud exoptandum in internis abscessibus, quod ad maturationem, sive ad suppurationem deveniat id, quod in ipsis inutile est: nam nisi illud etiam contingat expurgari, & extra corpus duci pus, majores sane, & graviores molestiæ excitabuntur. Nemo autem, nisi natura adjuvet, hoc promittere potest. Nisi inquam natura adjuvet, hoc est, nisi talis fuerit partium, in quibus abscessus factus est, constitutio, & dispositio, ut facile per foramen aliquod, ut per intestina, vesicam, os, nares, aures, oculos, aut alia via extra corpus ducatur id, quod corrumpitur.

Aliis igitur auxiliis, quam iis, quæ suppurationem movent, internis abscessibus occurrendum est. Ac primo extenuandum corpus est, nè cum vasa repleta fuerint, humoribus crescat malum. Et proxima si timeatur disruptio aliqua, illa quantum decet, prohibenda. Potissimum autem prohibetur largiori sanguinis missione. Si verò non est futura proxima aliqua disruptio, quod ex ratione doloris, & ex pulsu coniici potest, satius est diminutione cibi, potusque corpus extenuare, & leni pharmaco, ubi expedit, per intervalla corpus purgare, aut urinas, & sudores, aut salivationem movere.

Convenit ea exhibere, quæ incirculum aëta una cum humoribus appellentes ad partem affectam, solvunt id, quod inutiliter in ea coagulatum est, qualia sunt illa, quæ commendantur ad pleuræ abscessus, ut est papaver erraticum, dens apri, fimus equi, sanguis hirci, & alia multa.

Verum aliquando remanet infixæ parti, quæ morbi facit recidivam, & studere debemus, ut illa auferatur, quod non rarò fieri consuevit iis, quæ ex myrrha, aloë, atque croco parantur, & iis, quæ spirituosam naturam habent, similem illi, quam habet vini spiritus, & cum ipso vini spiritu multa utilia fiunt, ut extractiones ex sampso, roremarino, pulegio, salvia, aliisque. Quibus pluries per os assumptis sanguinis fit quædam partium constitutio, qua pars infirma adjuvetur. Progressu verò temporis nisi ager interim moriatur, ac cum abscessus ad suppurationem non devenit, assuescet natura morbo, & minus periculosus ille erit.

Aliquando conveniunt chalybeata, maximè cum vini spiritu parata. Verum enim verò ad solvendum internos abscessus magnum remedium cinnabaris, cujus multiplex usus esse consuevit. Et suffumigiis usurpata, plerumque salivationem promovet, aliquando urinas, aut sudores copiosos excitat, cum interim abscessus solvantur. Quamobrem neque antimonio, & aliis medicamentis, quæ vel ex ipsa cinnabari, vel ex aliis mercurialibus haberi possunt, fumus prædictus cedat.

Sunt autem in his omnibus consuetæ cautelæ adhibendæ.

DE MALA CIBORUM CONFECTIONE SALIVÆ, ET ALIORUM LIQUORUM IN VENTRICULUM, ET INTESTINA CONFLUENTIUM VITIO.

Quamplurimi licet fiant morbi vitio eorum, quæ extrinseca nobis sunt, & utcumque sumuntur, aut applicantur; attamen non est satis in his non errare, & satis non est nihil noxium ex iis, quæ extrinseca sunt, in nos irruere, ut bene, & integre vivamus: Siquidem multa fiunt intrinsecus, quibus graviter affici possumus.

Enim verò erumpens dens, & ulcus, & tumor aliquis exiguus in gingivis, aut in alia parte oris non solum dolore molesta sunt, sed nonnunquam copiosiores, & vitiosam salivam eliciunt, quæ aliquando ignava, & iners est ad corporis functiones, & non rarò spiritu etiam diversimodè affecto turget, qua cibus malè conficiatur, & alvus adstricta sit, aut dyarrhæa corpus solvatur, aut dolores suscitentur, aut aliquid aliud fiat nobis molestum.

Aliæ quoque sunt causæ, quibus similes concitationes in liquoribus ortum habeant, ut iracundia ex: gr: & aliæ, quibus effecti iidem sint, ut meditationes assiduæ, mœrores, ignavia, & pigrities voluntaria.

Præterea vasorum ampliaciones, & patentiora orificia, & alternata eorundem compressio tum arbitrio, tum sine hominis arbitrio in majori copia, & minus aptos liquores promunt.

At sæpe numero substantia abundat in vasis, quæ copiosam suppeditet materiam liquoribus in ventriculum confluentibus, qui vel copia tantum, vel etiam alio vitio ciborum confectionem turbent. Ac, ut videmus, ob Cœli inclementias nonnunquam copiosam mucositatem varii generis ad nares, & ad fauces delabi, sic non rarò tum ab his, tum ab aliis causis copiosi humores diversorum generum, vel è faucibus, vel ab œsophago, vel à ventriculi tunicis in ejusdem cavitatem delabuntur, qui vel nimia copia, vel etiam, aut lentore, aut acrimonia, & mordacitate, aut alia ratione malam faciunt in cibis fermentationem.

Sed è converso non rarò deficit saliva, aliussvè liquor in ventriculo, vel quia vasa glandularum sunt obstructa, & meatus sunt angustiores, vel quia ipsa saliva, aliussvè liquor crassior est, vel partium eorundem figura mutata est, & non congruit orificiis vasorum, vel ob aliam causam, propter quam libere permeare nequeant ad utiles usus, vel quia deficit in venis, & aliundè, ut per renes alvum, aut habitum corporis evacuatur substantia, quæ salivæ copiam subministrare posset. Quæ quidem impedimenta aliquando citò adveniunt, & citò tolluntur, aliquando non item accidit.

Notandum autem est, molestias quasdam, ut eas, quæ sitis nomine denotantur, non semper percipi in una eadem parte, sed vel in ore, vel in faucibus, vel in œsophago, vel in ipso ventriculo, vel in pluribus ex his nihil male habentibus reliquis, scilicet frequenter non omnia vasa sunt obstructa, sed hæc, vel illa tantum, & humores consuetos minimè fundunt, ex quo pars aliqua destituta perenni irroratione molestiam afferat.

Frequenter lingua siti torquetur, cum fauces, œsophagus, & ventriculus nihil notabile patiantur, frequenter contrarium accidit.

In quibus illud est animadvertendum, ut bene nobis sit, debere liquores convenienter fluere per canaliculos proprios, parum sanè juvantibus aliis irrorationibus. Quod manifestum est in lingua, quæ cum aret ex defectu intrinsecæ irrorationis, parum juvatur repetitis ablutionibus ex aqua, ac nisi vitium intrinsecum auferatur sæpius irrotata extrinsecus liquoribus citò arefcit iterum. Atque id similiter contingit omnibus partibus universi corporis, & percipue faucibus, œsophago, & ventriculo, in quibus molestæ sensationes, quæ sitis, aut famis nomine denotantur, plerumque non sedantur, quantum opus est potu, & cibo, aliisque, quæ ex iis, quæ nobis extrinseca sunt, sumuntur, oportetque intrinsecum auferre vitium, quo illæ fiunt.

His similia dicenda sunt de bile, de succo pancreatico, deque aliis liquoribus ad intestina concurrentibus, & è membranis, quibus constituuntur, in eorundem cavitatem influentibus; corpora namque hæc quoque sunt, & corporis cujuscumque eadem sunt affectiones, ac aliorum corporum, quæ similiter magis, & minus suscipere possunt, similiter alias qualitates amittere, alias acquirere possunt.

Consistunt autem qualitates in magnitudine, figura, motu, & habitudine sive respectu, quem habent corpora inter se, quibus mutatis aliud, atque aliud fit. Quibus quidem aspera dicuntur corpora, vel levia, dura, vel mollia, liquida, vel solida, fluida, vel non fluida, porosa, vel impervia, acuta, vel obtusa, aut aliter appellantur. Similiter secundum habitudinem, & respectum aliud corpus dicitur magnum, aliud parvum, aliud velox, aliud tardum, & respective ad sensum hujus animalis acida, dulcia, amara, salsa, graviter, aut suaviter olentia dicuntur, aliisque nominibus appellantur, prout varia est eorum magnitudo, figura, motus, & habitudo, sive respectus, ex quibus nascuntur qualitates, quas appellamus asperitatem, levitatem, duritiem, mollitiem, velocitatem, tarditatem, albedinem, nigredinem aciditatem, dulcedinem, salsedinem, atque alias infinitas, quot sunt variationes modorum, quot sunt habitudines, quot sunt effectus, adeò ut nomina sæpe sæpius deficient, quibus illæ appellentur.

Verum satis sit, hæc innuisse iis, qui in Democriti philosophia versati sunt, atque dicamus, quod à principio fuerat constitutum, cholidocos ductus easdem pati posse affectiones, quæ accidunt vasis salivalibus, aut pancreaticis, aut alterius particulæ, quibus facilius, vel difficilius liquores effundantur, vel omnino ipsorum motus, & excursus impediatur, aut pervertatur. Atque ipsa bilis, aut alius quivis liquor, sive pancreaticus, sive alius multas suscipere potest mutationes, quibus aut crassior, aut fluidior, aut mordacior, aut alia jure merito dici possit, & aliam suscipiat in intestinis cibis, & potus mutationem, quàm quæ naturæ conveniat.

Quæ, cum multipliciter, & infinitis modis variari possint, impossibile est species omnes recensere vitiatæ concoctionis, & elaborationis ciborum. Precipuas igitur, & frequentiores persequemur, in singulis notando, quæ maximè convenient, ut corpora restituantur, de reliquis verò ad istarum similitudinem dicendum, atque dijudicandum existimamus.

INDEX

TITULORUM.

D E Tumoribus præter naturam.	pag. 163
Ægri tudinum specimina quædam.	177
Lectio habita à Doctore Luca Antonio Portio in con- cursu ad Cathedram.	188
Quid putredo Galeno sit.	201
Quid pestis Galeno.	203
Epistola ad Illustriss. & Reverendiss. D. Didacum Vincentium à Vidania, &c.	207
Qui principes, qui minores calores Galeno sint.	209
Aristotelem in gravioribus, & solidioribus deseruit Galenus, &c. ibidem.	
Quid sit febris.	211
Cordis motus quandoque videri potest rectus, cum rectus non sit.	213
Re vera neque de alio ausus est Galenus pronunciare, quod cali- dum in se ipso sit, vel frigidum.	214
Re vera nullus unquam hominum motum exclusit à febrium es- sentia.	216
Hætica febris idea.	218
Non omnia observavit Galenus, qui in libris de diff. febr. si mul- ta non finxit, saltem occasionem dedit aliis multa ritè confin- gendi.	223
Rectè monuit Galenus febres, quæ circuitus habent, ex vitio de- pendere alicujus partis solidæ.	225
Data febris periodica frequenter breviori, vel longiori tempore recurrat.	229
Labor immodicus potest facere febres, exercitiorum item omis- sio.	236
Animi affectiones Cordis motum potenter, & velociter alte- rant.	238
Ira, & tristitia sunt nonnunquam causæ febris.	239

<i>Vigiliae immodicae possunt facere febres.</i>	242
<i>Solis ardor, & frigora febres possunt facere.</i>	245
<i>Summa capitis sexti, cujus titulus de febre Hepiala, ac de Pituita generibus.</i>	247
<i>Illustriss. & Reverendiss. Domino D. Didaco Vincentio à Vidania, &c. L.A.P. s.p.d.</i>	249
<i>Medicis, Philosophis veritati potius, quam lucro inbiantibus. Id, quod calor præter naturam appellatum à Galeno est, non est calor illi similis, quem sensu percipimus, & quid rectius de eo dici possit.</i>	252
<i>Ut Galeno de Calore nativo sententia facile corrigi, & ad rectum sensum deduci queat.</i>	259
<i>Confectionis ciborum in Ventriculo specimen.</i>	260
<i>Annotationes.</i>	ibid.
<i>De Ulteriori ciborum in intestinis elaboratione.</i>	266
<i>De causis, quibus cibus, & potus malè conficiuntur.</i>	269
<i>De cognoscendis, & distinguendis causis, quibus ciborum confectio frustratur.</i>	271
<i>De iis, quæ consequuntur cibi, & potus abstinentiam.</i>	273
<i>De iis, quæ consequuntur immodicam ex cibo, potuque repletionem.</i>	275
<i>Quæ convenient Ebriis.</i>	276
<i>Quæ convenient iis, qui malis fungis, vel pingui cœnosa anguilla, aut mugile è lacubus, similibusque pasti sunt.</i>	ibid.
<i>Quæ convenient iis, qui sanguine tauri recenter educto potati sunt.</i>	ibid.
<i>De interno abscessu.</i>	277
<i>De mala ciborum confectione salivæ, & aliorum liquorum in ventriculum, & intestina confluentium vitio.</i>	279

F I N I S.

INDEX

RERUM NOTABILIMUM.

A

Abscessus partium corporis diductio, est. pag. 277
Abscessuum differentia. ibid.
 Abscessus interni plures. ibid.
 Abscessibus extenuare corpus prodest. 288
 Abscessibus internis pleuritidis remedia profunt. ibid.
 Abscessibus conveniunt Chalybeata. ib.
 Abscessum solutionem adjuvant cinna-
 baris fumi. ibid.
 Abstinencia, quæ mala progignat. 273
 Abstinencia longiori cessat fames. ibid.
 Abstinencia longa, non requirit longam
 comestionem. 274
 Acini in Hepate. 170
 Acetum diversimodè applicatum di-
 versos parit effectus. 250
 Adstrictio dilatationis causa. 164
 Aegritudines ex mala corporis constitu-
 tione. 177
 Aeris usus multiplex. 246
 Aeris ab Aere magna differentia. ibid.
 Aere magna ex parte vivimus, & nu-
 trimur. 261
 Affectus, quo febricitamus ignoratur,
 secundum Galenum. 246
 Alimenti defectus, vel vitium facit He-
 ctica. 192
 Allium neque in se ipso calidum, neque
 frigidum est Galeno. 216
 Alimentorum in intestinis ulterior elab-
 oratio. 266
 Alimentum in duodeno bile, & succo
 pancreatico perfunditur. 267
 Alimentorum mala confectio à variis
 causis 270
 Ambustis igne aqua vitriolica. 176
 Amygdalæ recentes, nō dant oleum. 263
 Anatomicorum nodi. 173
 Animi affectione, perceptione, sive sen-
 satione, quavis corporeum aliquid in
 nobis movetur. 182
 Animæ existentia probatur. 210
 Animi affectiones cordis motum poten-
 ter, & velociter alterant. 208
 Antiquorum de morbis sententia. 164
 Antiquorum de Janitore sententia fal-
 sa. 266
 Apum morsui lac ficulneum. 176

Aristotelem in gravioribus diseruit Ga-
 lenus. 259
 Aristoteles, nunquam formam dixit
 consistere in calore nativo. 259
 Arteriarum magis, quàm venarum ar-
 tificiosa constructio. 166
 Arteriæ ad cordis motum pulsant. ibid.
 Arteriarum sanguis quandoque non
 differt à venarum sanguine. 166
 Arteriarum motus velocior, quàm cæ-
 terarum substantiarum. ibid.
 Arteriolæ motus quandoque torquet ho-
 minem. 178
 Arteriarum motus causa. 198
 Arteriarum motus accusandi sunt in
 febribus. 199
 Arteriæ omnes in motibus cordis se-
 quantur motum. 216
 Attici rigorem, qui præcedebat non
 nullas febres Hepialam appellabant.
 pag. 247
 Auditiones falsæ. 183
 Audiendo quoque defatigamur. 243
 Autores omnes cordis motum accusant
 in febribus. 197

B

Bilis, & succi pancreatici mixtio effe-
 vescentiam parit. 267
 Bilis est magnarum virium. ibid.
 Bilis alimentum alterat. ibidem
 Bilis, & succi pancreatici in alimen-
 tum vires. 268
 Bilis vitiatæ signa. 272

C

Calci affusum oleum nulla parit in-
 cendia, quæ sunt affusis aquis. 251
 Calidis curantur pleræque febres. 196
 Caloris perceptio haud semper ab ex-
 trinseco. 183
 Calor à calore differt, ac natura à na-
 tura secundum Galenum. 195
 Calor non consistit in velocitate, vel
 tarditate motus. 196. & 212
 Calor præter naturam Galeni suspectus
 christianis. 198
 Calores, & frigora non propriè spe-
 ciant

stant ad cor. 200
 Calor, & humiditas continuo in fluxu sunt. 205
 Calor natus Galeni est substantia. 207
 Calor natus hominis Galeno anima est hominis. ibidem
 Calori nativo hostem facit Galenus calor præter naturam. 208
 Calor natus secundum Galenum anima scilicet estinguitur à calore præter naturam! ibidem.
 Calorem nativum intelligentem, sapientiaque, & providentia præditum facit Galenus. 214
 Calores principes, & minores, qui sint Galeno. 209
 Calor præter naturam latet multos secundum Galenum. 247
 Calor præter naturam Galeni est substantia. 254
 Calor præter naturam non est quid calori ignis simile. 252
 Calor secundum, & præter naturam, in quo consistit. 256
 Campanæ non vegetantis exemplum. pag. 221
 Canes venatici. 180
 Canceri natura. 171
 Cibi delectatio quandoque famem præcedit. 173
 Ciborum in ventriculo fermentatio panis fermentationi similis est. 263
 Cibus, & potus, quibus causis male conficiantur. 269
 Ciborum mala confectio ex liquorum inertia. 270
 Ciborum varia mutatio. ibid.
 Ciborum haud recta mutatio multa parit incommoda. 272
 Circulatio quædam eorum, quæ à variis locis in intestinorum, & ventriculi cavitatem influunt. 268
 Coagulantur multa in ventriculo. 276
 Cogitationibus pejus homini, quàm ex aliis exercitiis. 243
 Confectionis ciborum in ventriculo specimen. 260
 Constitutiones corporis à conceptione vitæ decursu mutantur. 179
 Consuetudo quid. ibidem.
 Cordis affectionum vix tantum motus ante mortem cognoscitur. 195
 Cordis motus irritari potest à frigida pituita. 196
 Cor est musculus. 200
 Cor affici potest ab iis omnibus, quæ musculos afficere possunt. ibid.
 Cordis motus cessatio mors est. 211
 Cordis nonnulli motus non communicantur ad partes exteriores. ibid.
 Cor rectè, vel non rectè moveri tan-

tum certò cognoscitur. ibid.
 Cor velocius, vel tardius moveri potest independentè ab eo, quod calidum, vel frigidum dicatur. 212
 Cordis motus aliquis vitiosus febris est. 213
 Cordis motus quandoque videri potest rectus, cum rectus non sit. ibidem
 Cor irritatione moveri potest similiter, ac sanis moveri solet. 215
 Cor avulsum, dissectumque movetur. pag. 214
 Cordi præter motum, quæcumque accidunt, non nisi post mortem certò cognosci possunt. 211
 Coronæ ex variis metallis exemplum. pag. 261
 Corpus hominis continuo fluit. 260
 Corrumperè idem est putrefacere. 256

D

Debiles fieri possunt robusti. 179
 Deceptiones ex imaginibus. 181
 Deceptiones deceptionibus tollendæ. pag. 185
 Dentium eruptio morbus. 177
 Diaphragmate vulnerati involuntariè rident. 182
 Diaphragmatis motibus adjuvatur ciborum concoctio. 266
 Dignitatum scientia causæ rerum cognoscuntur. 271
 Dioclis sententia à Galeno relata. 273
 Dolere malum est, non dolere pejus quandoque est. 167
 Dolor. 175

E

Ebris prodest vomitus, & alia multa. 276
 Elephas dicitur cute muscas perdere. pag. 195
 Epicurum in nonnullis sectatus est Galenus. 209
 Erasistratus autor legitimæ gymnasticæ. 198
 Erasistratus nepos Aristotelis. ibidem
 Erasistrati doctrina usque dum floruerit. ibidem.
 Erasistratus autor demonstrativæ methodi. ibidem.
 Erasistratus Hippocrate non inferior. pag. 216
 Erasistrati secta pluribus seculis Romæ viguit. ibidem.
 Erysielatis natura. 176
 Erysielas nova machina. ibidem.
 Exercitiorum omisio facit febres. 236
 Fa-

F

- F** Ames. 175
 Fames non est appetitus. ibidem.
 Famis remedium cibus. ibidem.
 Fames, & sitis molesta in abstinencia. pag. 273
 Febres cordis sunt affectiones. 191
 Febris earum partium tantum est, quæ cum corde communicant. ibid.
 Febris ex mala vegetatione. 193
 Febris vera definitio. 197
 Febris das Kalte hoc est frigus nonnullis dicitur. 198
 Febris quævis definitio motum cordis admittere debet. 199
 Febris essentia. 200
 Febres pestilenciales à nimia solutione. 205
 Febris quid sit. 211
 Febris nequaquam semper marcori conjuncta est. 220
 Febres, quæ circuitus habent dependent ex vitio alicujus partis solidæ. pag. 224
 Febris eadem breviori, vel longiori tempore recurrere potest. 229
 Febre multa mutantur adsumuntur-quæ. 230
 Febres variarum periodorum, ut plurimum iidem curantur medicamentis. 236
 Febricitare boreæ effectus esse potest. pag. 257
 Fœminæ, quæ vana multa sibi videbatur videre, historia. 181
 Fœminæ viventes arte lugendi. 183
 Fœminæ, quæ falsò credebatur utero gerere, historia. 185
 Fœminæ iratæ descriptiones. 240
 Ferrum ferro proximum dum movetur continentur. 237
 Fermentatio semper novæ substantiæ conceptionem quandam habet. 262
 Fermenta omnia tempus, & ætates habent. 274
 Filum filo tenuius angustius foramen pervadere potest. 262
 Fluida sensus effugientia in animalibus. 186
 Fons non mutatis aquis varias periodos habere potest. 229
 Funambuli. 179
 Fungi humores reddunt ad circulandum ineptos. 276

G

- G** Alenus nunquam mechanicè docuit, ut tumores fluxionibus fiunt. 164
 Galeno hepar, pulmo, & stomachus nodi dicti sunt. 173
 Galenus gloriosus. 190
 Galenus pro calore nativo, & pro temperamento absurda intellexit. pag. 193, 201, 207
 Galeni de calore nativo sententia, ut facile ad rectum sensum deduci potest. 259
 Galeni de febribus definitio perpenditur. 193
 Galeni caloris acceptio multiplex. ibi.
 Galeni de demonstratione libri perierunt. 194
 Galenici, qui falsò sint. ibid.
 Galenus demonstrativæ methodi refert autores. 198
 Galenus neque pus putredinem appellavit. 201
 Galenus non omnia observavit. 223
 Galeni de circuitibus sententia exemplis illustratur. 227
 Galeni de circuitibus exempla perpenduntur, & dilucidantur. 229, usq; ad 235.
 Galeni de ira sententia. 239
 Ganglium. 273
 Gangræna consummata expers febris, & vitæ. 191
 Gangræna tactu frigida, habet suum calorem præter naturam dictum. 255
 Grammatici relati à Galeno historia. 273

H

- H** Abitus quid. 218
 Hæctica quid. 192
 Hæctica febris. 218
 Hæcticæ febres, quia habitum corporis comprehendunt. 220
 Hæctici tabidi descriptio. ibid.
 Hæctica partes tantum lædit quo ad nutritionem. ibid.
 Helluones, & gulones cur benè cibos non digerant. 262
 Hepatis tumores proprii. 168
 Hepiala. 198, & 247, & 249
 Homines multa præcognoscere possunt. 180
 Homini multa mutantur similiter ab extrinseca, ac ab intrinseca causa. 182
 Homines lætari, & contristari possunt ab intrinseca causa. ibidem.

Homo.

Homo, qui dolebat in jam abscisso pede. 184
 Homines in deceptionibus aliquando ingeniosi. 185
 Homini quis modus, ut sibi caveat à peste. 205
 Homo tabidus tandem sine morbo fit secundum Galenum. 219
 Homini quædam accidunt tantum ex corpore, quædam ex corpore, & anima, & quædam ex anima tantum. 239
 Hominis corpus primo conceptionis tempore majus non est pisi semine. pag. 260
 Hominis sensus aliquando non movetur à multis etsi magnarum virium, nisi post factum malum. 272
 Hydatidarum generatio. 168

I

Ignis non est igni omnino similis. 176
 Ignorantia depravatur Judicium. 184
 Intestina multos liquores recipiunt. 268
 Ira, & tristitia faciunt febres. 239
 Ira ultionis desiderium adjunctum habet. ibidem
 Ira multa maximopere rarefiunt. 240
 Ira percitis facile venæ disrumpuntur. ibidem.
 Ira quandoque nutritio læditur, & fit hæctica. ibid.
 Ira diversa in diversis corporibus parit. 241
 Iram reprimere pulsus facit inequales. pag. ibid.
 Irasci præcavet homines à renum affectibus inquit Galenus. ibid.

L

Laber immodicus facit febres. 236
 Labor quandoque convenit in febre. ibid.
 Lienis tumores proprii. 168
 Lima chalybea non est apta omne corpus rodere. 270
 Liquida difficulter in vitio durant absque solidorum vitio. 226
 Liquores varii variè corrumpuntur. 168
 Liquores in ventriculum, & intestina confluentes copia non rarò peccant. pag. 279
 Liqueorum, qui fluunt per vasa differentia fieri potest, ut unum coaguletur magis, quam aliud. 204

M

Machina quævis sine motu mortua est. 246

Manus dextra, ut plurimum sinistra major est. 236
 Marasmus esse potest sine febre. 192
 Margaritarum solutiones. 269
 Masticationis motu saliva copiosius elicitur. 262
 Mechanica explicatur corporearum rerum natura. 261
 Mesenterii venæ sanguiferæ aliquid arripiunt ab iis substantiis, quæ per intestina labuntur. 269
 Morbi quidam in conceptione. 177
 Morborum remedia certissima Galeno. 273
 Mors partis cessatio arteriarum illius. pag. 167
 Mors L. Crassi Oratoris. 244
 Motibus immoderatis contunduntur membra. 237
 Motum nullus exclusit à febrium essentia. 216
 Motu quantumvis levi semper aliquid dissipatur. 236
 Musculorum repentina mutatio unde. pag. 170
 Mustum recens nullos dat spiritus. 263
 Mutationes in circumambientibus substantiis possunt liquores in corpore alterare, & mutare. 226

N

Naturam creatam non multa superant. 180
 Natura multa docet homines. 217
 Navis non vegetantis exemplum. 221
 Nicolaus, sive Colapiscis. 180
 Nominum, & verborum significationes non servare ridiculum, dolosumque est. 209
 Nutritio partium perpetuo, & toto vitæ decursu exercetur in homine. 219
 Nutritio læditur in febre habituali. 220
 Nutritio non peculiaris usus partium læditur in hæctica. 221

O

Oculis etiam quandoque decipimur. pag. 185
 Ordo magnus sit oportet in iis, quæ necessario fiunt. 232
 Organa facile mutantur ex noxiis in proficua. 176
 Organa, quibus movemur atteruntur motibus. 236
 Osculationibus etiam aliquid aufertur æneis imaginibus. 260
 Ossa etiam aliquo modo fluunt in homine

mine. ibidem
Ossa mortua magis, quàm viva sine re-
stitutione durare possunt. ibid.
Otiosum, & iners nihil in universa na-
tura. 268

P

P Alpitatio partium omnium à cor-
de. 192. & 211
Pancreatis tumores proprii. 168
Pancreatis liquor. 267
Pancreatico liquore alteratur alimen-
tum. 268
Panis fermentatio. 264
Paraphrasis capitis decimi libri primi
de differ. febr. Galeni. 189
Partis cujuscunque aliquid peculiare
munus est. 220
Partes omnes in hoc tantum conve-
niunt, quod nutriantur, & vege-
tent. ibid.
Partium solidarum nutritio promoven-
da, & adjuvanda in hectica. 223
Periodicarum febrium curationes, &
exempla. 230
Perceptio omnium, quæ insunt rebus
difficilis. 273
Pestis quid sit Galeno. 203
Pestis, & putredo sunt unum idemque
Galeno. ibidem
Pestis multæ species. ibidem.
Pesti haud occurritur tentando arte-
rias. 206
Phosphorus non est omnino phosphoro
similis. 176
Pituitæ genera tria. 248
Pituita putrescens sicuti bilis rigorem,
& febrem facit. ibidem
Polypi, aliaque multa non proprie spe-
ctant ad cor. 200
Pueri, qui ratione minus pollent fa-
cillimè irascuntur. 240
Pulsus magni in aliquibus febribus ma-
lignis irritati cordis signum. 199
Pulsuum intermissio malum, sed qui-
busdam quandoque pulsus non inter-
mittere pejus. 214
Pulsus in hectica quales. 221
Puris tria genera Galeno. 202
Putredo quid. 193, & 201
Putredinem corruptionem appellavit
Aristoteles. ibidem

Q

Q Uæstiones nonnullorum semper
sunt quæstiones. 190

Quies non convenit iis, qui immodera-
tè se exercuerunt. 237

R

R Arefactio tumorum causa. 170
Repletio immodica turbat dia-
phragmatis, & pulmonum motus. 278
Repletione fit liquidarum substantia-
rum è tunicis ventriculi magna ex-
pressio. ibid.
Repletione nimia novus substantiarum
accessus ad ventriculum impeditur.
pag. ibid.
Repletione nimia multi graves morbi
sunt. ibid.
Repleti nimis quandoque difficulter
vomunt. ibid.
Repletis prodest aliquid per intervalla
accipere. ibid.
Rigor esse potest sine febre secundum
Galenum. 247
Risus voluntarius, & involuntarius ex
motibus diaphragmatis. 182

S

S Aliva efficacior aqua. 262
Saliva in ore incipit mutari ci-
bus. ibidem
Saliva non semel vitatur à causis in-
ternis, ut ab eruptione dentis, ab
ulcere, tumore, &c. 279
Sanguine tauri de recenter educto po-
tatis, quæ convenient. 276
Sanitatis recuperandæ modus haud latet
eos, qui causas morborum norunt.
pag. 187
Scindapson quid. 248
Semen magis differt à quocunque alio
liquore, ac bilis à sanguine. 170
Sensus non judicat de rebus. 181
Sensus organum fit impotens ab affe-
ctione perenni. 274
Sitis perceptio non semper ex eadem
parte. 279
Sole loco moventur animalium corpo-
ra. 245
Solis ardor facit febres. ibidem
Solida potissimum peccant in morbis.
pag. 186
Solutiones, & coagulationes ex eadem
re. 204
Somnambuli. 179
Specifica commendantur varia in tu-
moribus variis. 168
Spermatice partes à conceptione ad
mortem usque haud durant. 260
Spi-

Spiritus in animalibus corpora sunt. 186
 Spirituum natura non semper eadem.
 ibidem.
 Spiritibus fiunt contractiones nervo-
 rum, ex quibus variis morbi. 187
 Surdus omnino à nativitate, est etiam
 omnino mutus. 179
 Sylvius de le Roe admittit febres, in
 quibus tum calor, tum frigus per in-
 tervalla recurrunt. 1249

T

Terræ quædam tempore novum ni-
 trum concipiunt. 263
 Testibus avulsis multa mutatur. 169
 Testium tumores proprii. ibid.
 Tristitia adjunctam habet remedii le-
 vaminisque desperationem. 241
 Tristitia aliis conjungitur affectib. 242
 Tumorum quidam sunt naturales. 163
 Tumores ab omni eo quod corpus est
 fieri possunt. ibid.
 Tumorum quatuor primariæ species se-
 cundum Galenum. 165
 Tumorum variæ species. 169
 Tumores è nodo, qui proficiuntur.
 pag. 173 & 176
 Tumores cystici. 174
 Tumores variis, in quibus modo vario,
 & noxio ludit aer. ibid.

V

V egetavisse, & vegetare debere anti-
 quissimum viventibus. 192

Vegetatio læditur in hæctica. ibid.
 Vera ea sunt, in quo omnes conve-
 niunt. 211
 Ventriculus amplectitur cibos. 265
 Ventriculus aliquid accipit ab iis, quæ
 in ipso met continentur. 267
 Videndo etiam, audiendo, & sentiendo
 laborat homo. 236
 Viæ visû effugientes in corporibus. 163
 Vigilæ immodicæ faciunt febres. 242
 Vigilantes necessario exercentur. ibid.
 Vigilantibus febres similiter, ac labo-
 rantibus fiunt. ibid.
 Vigilantibus, ac speculantibus extrema
 frigescent. 244
 Vigiliam appellavit edacem Hippocra-
 tes. ibid.
 Vigilia multorum dierum non requirit
 somnum non interruptum multo-
 rum. 274
 Vini spiritus varie applicitus tum ca-
 lorem, tum friguseodem tempore
 parere potest. 250
 Viperæ venenum ore sumptum non
 nocet. 204
 Vitriolum ad rubedinem calcinatum
 tempore novum vitriolum conci-
 pit. 263
 Unguis in dies crescit, consumitur-
 que. 204
 Visionis duplicitas, vel multiplicitas
 unde. 181
 Visiones non fiunt sine motu. 243
 Visionibus defatigantur oculi. ibid.
 Ulcera varia varium generant pus. 163
 Ulcera veluti in ambustis in cancro
 pag. 172
 Ulcus esse potest sine febre. 193

F I N I S.

LUCAE ANTONII
PORTII
DISSERTATIONES
VARIÆ.

ИСТОРИЯ АЗИИ

И ТЛЮЧ

ДИССЕРТАЦИЯ

В. И. А. В.

291

LUCAE ANTONII PORTII

DISSERTATIONES VARIAE.


DISSERTATIO PRIMA

De Difficultate Medicinæ.

AD ILLUSTRISS. ET EXCELLENTISS.

D. HIERONYMUM ASCANIUM
JUSTINIANUM

Venetum Ordinis Senatorii.

1.  Ulmor increbuit, qui etiam ad aures meas pervenit, velle te iusta oratione demonstratum, atque explicatum *Medicinam practicam non satis aestimari*. Laudavi me hercule hominis ingenium, moresque, animumque tuis Majoribus dignum; qui ne fortè ab ea, quæ sanior est, vel paulum sententia deflectat tua, & ne, vel tantillum pecces in iis gerendis, quæ tibi mandavit Respublica, omne studium adhibeas, & diligentiam! Ac licèt sciam non defuisse tibi, neque deesse magnorum ingenia virorum, qui ornatè, disertè, & cumulatè potuerint, atque possint rem absolvere: mihi tamen nunc paritèr animus est (quod iis accidit, qui quoniam otio abuti nesciunt, quamcunque amplectuntur occasionem sese exercendi) in idem argumentum tenues contendere vires ingenii mei. Idem enim ferè est *Medicinæ difficultatem, ac Medicinam non satis aestimari* ostendisse. Ne tamen quæso credas, quicquam eorum, quæ ab aliis dicta jam sunt, me nunc velle, vel damnare, vel reprehendere, quin potius quid vis, aliud velim existimes; ac si hæc illis conferas, manifestò comperies mirificè confirmari ad invicem. Sed id mihi suscepi negotii, tum, quod dixi, ut haberem, quo me exercerem, tum ut tibi in his abundè, & cumulatius satisfiat, iis etiam cognitis, quæ fortassis ne avertarentur animi ab his studiis deterritis rei difficultate discipulis, ab aliis omissa sunt. Ego enim, qui nunc nemini serviam, vel vix mihi serviam, cuique nihil magnum est, quod sperem; vel si quid sperem, ingenuitate morum, & liberali potissimum animo, illud mihi fallacissimè sperandum ducam, non-

nulla honestè, atque modestè simul possum recensere, quæ ab aliis iustas ob causas honestè item, & meritò omittuntur. Atque ex eo dicendi genere, quo utar facili, simplici, sine ostentatione delectus verborum, sine omni fuco, aut turpis una, & dulcis assentationis suspicione clarissime conjicies, nolle me mentem tuam, aut aliorum perstringere; sed tantùm candidè, & sincerè, quod mei moris est, quæ omninò vera deprehenderim, velle nunc me tibi narrare. Nequè te ducam per ambages. Neque profectò longa utar circuitione!

2. Medicina, inquam (adde *practica* si vis) omnes alias facultates habet administras; vel dicam prolixius. Medica facultas, ut ritè vel doceatur, vel exerceatur bonarum artium, disciplinarum, & facultatum omnium auxilio indiget; vel adhuc prolixius, & clarius, & de Medico potius, quàm de Medicina loquar.

Medicus optimus eorum omnium scientiam, atque experientiam habere debet, quibus corpus hominis constat, quibus moveri, sive alterari, & utcunque idem corpus mutari potest; & eorum omnium quibus idem corpus à motibus quibuscunque potest conquiescere, & eorum omnium item scientiam habere debet, quibus hominis animus moveri, & in quasunque passionibus, sive affectionibus impelli potest, & eorum omnium, quibus idem animus conquiescere, vel revocari potest à quibuscunque passionibus, sive affectionibus. Nam tanta est inter animum, & corpus communio, ut alterius motus, passionibus, sive affectionibus quæcunque, quocumque nomine appellatæ alteri prodesse, vel obesse possint. Atque ideo sæpe opus est Medico ea novisse, quibus animus in spem, inque timores veluti trahitur; vel ad iram concitatur, vel ad clementiam, mansuetudinemque revocatur; aut aliter, atque aliter afficitur. Et his quidem, similibusque non solum fieri, atque curari possunt morbi; verùm etiam in his, similibusque non pauci morbi omninò consistunt.

Non reor, nunc opus esse ab Abecedariis libris, quod multi solent facere, exempla mutuari, quibus hæc confirmantur. Nam ad rectè de re quacunque dijudicandum sat esse solent indicia parva sagaci, atque hæc, quæ retuli clara aded sunt, ut ex se possint fidem facere, & sat, superque etiam videri possint tibi sagacissimo. Cumque vera dixerim, quod sum professus, parum interest ab Hermete nè, an Platone, vel Aristotele, ab Hippocrate, an à Galeno, vel Avicenna, Helmontio, aut Paracelso, aut ab alio quocunque hæc dicta prius acceperim.

Verum enim verò aliis quoque satisfaciendum est, qui fortassis hæc legent, quorum nonnulli aded stolidi sunt, ut non moveantur, nisi autoritate, & celebritate alicujus nominis, & in stupiditate confirmantur iniquorum calliditate, & malitia, quibus haud facile insipientibus datur proprios oculos adaperire, & cœlum absque interprete intueri. Non abs re igitur fuerit, si quæ breviter, ingenuè, candidè, & castè asserui (uti decet, & omninò fieri deberet, si rectius saperent homines cum Principes alloquuntur) clarissimorum virorum responsis, & auctoritate comprobem. Tandem verò brevibus rationibus eorum, quæ dixerim veritatem ostendam.

3. Claudius Galenus Pergamenus toto orbe terrarum jam satis sanè celebris inter innumeros fere, quos edidit, librum inscripsit *De cujusunque animi*

animi peccatorum notitia, atque medela, cujus solum titulo, si auctoritatis standum sit, multa probantur, & confirmantur eorum, quæ supra retuli. Is idem Galenus in hoc ipso libro *De cujuscunque animi peccatorum notitia, atque medela*, & pluries alibi cum multis solidè nimis, & clarissimè quidem, atque copiosissimè docuisset, & probasset *Medicum demonstrandi arte omninò debere esse instructum*; postea edocet, quibus disciplinis, & quibus facultatibus demonstrativa hæc ars haberi possit, *Hujusmodi methodus, inquit, in Geometria reperitur, Arithmetica, Supputatoria, Astronomia, & Architectonica. Nomine autem Architectonicae Horologiorum, Chlepsydrarum, Hydroscoptorum, & Machinamentorum omnium descriptiones amplector; inter quæ, & pneumatica (hoc est spirabilia, quæ vocantur) existunt. Quibus Galeni verbis nescio, an multæ sint disciplinæ, quæ non comprehendantur! Nedum machinas omnes, quas in confertissimo vestro armamentario vos Veneti habetis, complectitur; verum quascunque alias ab homine inventas, vel excogitatas, in scientia quarum maxima parte contineri affirmat demonstrativam artem Medico apprimè necessariam. Et prius eodem libro acriter reprehenderat eos, qui non solum in ostensoriis methodis minimè versati sunt, sed etiam aliarum disciplinarum, quæ Græci Mathemata nominant, sunt imperiti. Iis enim imbutus animus acuitur, ac delinatur, utpotè Geometria, Arithmetica, differendi ratione, Ædificatoria, & Astronomia.*

Hic idem Galenus libro *Si quis optimus Medicus est*, eundem esse Philosophum, non quidem pro Philosopho eum intelligit, qui garrere novit, & hircocervum defendere dari, vel minimè dari posse; sed eum qui naturæ opera (hoc est quæcumque sunt) admiratur, contemplatur, speculatur, & iis viis usus, quas nobis eadem natura dedit, cognoscere nititur. Quod præstitisse fertur Hippocrates, quem pro idea viri sapientissimi accipimus. Cujus quidem non pauci fronte chalybea imitatores se venditant, ut faciliùs ipsis detur bonos viros decipere; cum vix nomine, & ne nomine quidem illum imitentur. Ille enim, inquit Galenus, non minimum esse, quod in Medicinam Astronomia conferat, admonet, & Geometria (scilicet quæ Astronomiam præcedat necesse est). Medici verò, qui multi sunt ab harum utriusque studio usque eò ipsi abhorrent, ut alios etiam id conantes coarguant. Quæ verba satis bellè conveniunt his temporibus; iniquitate enim ignavissimorum plerorumque, quorum etiam non pauci fronte chalybea Galenici, Hippocratici, Aristotelici, vel ab aliquo alio magno nomine se dicunt, bonis artibus disciplinis, facultatibusque demonstrandi viam habentibus studuisse nocet! Illi autem, cum id omne vitio vertant, quod laudari debet, pii interim habentur! At Galenus in ipso primo limine Medicinæ, quam docendam suscepit, in ipso primo libro methodi medendi, in qua maximè gloriatur, in ipso primo capite, in prima pagina Thessalo cuidam maledicens, qui sex mensibus Romæ medicinam docturum profitebatur, *Si enim inquit, neque Geometriæ, neque Astronomiæ, neque Dialectices, neque Musices, nec ullius denique bonarum disciplinarum indigeant, qui Medici sunt futuri, quemadmodum Thessalus iste generosissimus promittebat, nec etiam longam experientiam, & operum artis usum desiderant, cui non promptum sit artem aggredi, ceù facile Medico futuro? Atque hinc adeò fit, ut nunc etiam sutores,*

& tin-

& tinctorum, & fabri tum materiarii, tum ferrarii proprio magisterio relicto in medicina artis opera insiliant: quin, & Rhopopolæ ipsi etiam de primo loco certant.

Hippocrates autem tum per ea, quorum jam diximus meminisse Galenum, tum per ea, quibus filium ad Geometriam excolendam hortatus est, & ad multum operæ impendendum iis disciplinis, quibus figurarum, & numerorum proprietates edocentur, hujusmodi etiam sententiæ fuisse dicendus est, qui his iisdem facultatibus, quas recensuimus, vitam existimavit fieri illustrem, animum autem peracutum, & ad rectum judicium de rebus omnibus ferendum magis idoneum. Pluribus item locis, vel libri de capitis vulneribus, vel libri de veteri medicina, de articulis, de corde, aliorumque multorum manifestò colligi potest eos, qui libros istos conscripsere mathematicarum disciplinarum fuisse peritos, quo quidem nomine *mathematicarum disciplinarum*, multò plura comprehendere mihi animus est, quàm quis putet.

An alios etiam adhibeam testes, tum Medicos, tum Philosophos clarissimos? An potius multos silentio præteribo, ne magis ignavorum, qui veluti Turcæ innumerabili multitudine, & crudelitate, non virtute, & fortitudine animi nobis nocent, invidiam, & iniquitatem mihi concitem? Quid si unum non præteream Platonem, qui ab ipso Academiæ liminari prophanos eos procul arcebat, qui Mathematicarum disciplinarum non fuissent instructi, quive sapientiam, quam nunc philosophiam dicimus, non equidem eorum unquam studium esse posse contendebat, qui mathematicarum disciplinarum essent ignari: quemadmodum talparum, & malarum avium nocturnarum, quæ in tenebris ambulant, vel volitant, illud esse nequit clarissimum, & lucidissimum solis jubar aspicere! Quamobrem, vel illud est, quod Galenus fuit suspicatus, nonnullos existimare, medicinam nullius bonarum artium opus habere, vel si eam hac una disciplina, quam Philosophiam appellamus, indigere concedant, Divo Platone, Hippocrate, & Galeno Judicibus reliquæ omnes disciplinæ, quæ Mathematicis comprehenduntur, & Philosopho sunt necessariae, illi, qui dignus Medicus est futurus, frequenter, atque frequenter erunt ex usu. Ac etsi possem innumeros adducere, & infinita planè ex illorum scriptis colligere, quibus doctos, & honestos viros hoc ipsum confirmasse, & hoc ipsum semper fuisse testatos demonstrarem; tamen cum sciam doctis, probisque, castarumque aurium hominibus satis, superque esse, quos adduxi, improbis autem nequicquam me laborare, ut satisfiat, & quod plures adducam, eò pervicaciores illos, & iniquiores effici, neque me, neque te in hoc amplius defatigabo.

4. Sed interrogabit aliquis ad quid per Pollucem Medico Geometria, ad quid Arithmetica, ad quid Astronomia, ad quid Architectonica, ad quid denique viles artes Mechanicæ?

Bona verba quæso? Verum malè hic habendus est, si à Galeni, Hippocratis, Aristotelis, Platonis, aut cujuscunque magni viri nomine appellari unquam is fuerit ausus, & sectæ celebritate si popello imposuit. Enim verò nos recepimus iis standum, quæ Hippocrates docuit, quæ Galenus pluribus sanè confirmavit, quæ Plato etiam asseruerat, quæ ab omnibus
clari

clarissimis Scriptoribus admittuntur ! Quæ puerilis sententiæ puerilis mutatio ista est

Nolo , volo , volo nolo rursùm , cedo , cape :

Quod dictum , indictum est , quod modò erat ratum , irritum est !

In scriptoribus , quod boni est damnas , vel approbando depravas , quod mali est probas , & laudas , vel corrigendo facis pejus , & quodque leve vitium tuo vitio fit gravius !

Sed aliquid dedam , atque inquam , quod tamen deceat (qui enim unà ignavi , atque superbi sunt , non docendi , sed coarguendi , & confundendi sunt) Medico necessarias esse illas omnes disciplinas , ut Hippocratem , Galenum , Aristotelem , Platonem , cæterosque scriptores majoris famæ intelligere queat ! Nam multis in locis erit veluti asinus ad lyram is , cujus animus illis facultatibus non est excultus ! Indicabo locum unum , vel alterum , ut hoc fiat manifestum , cum possim indicare sexcentos . Aristoteles libro primo Physicorum textu undecimo duas comparat circuli quadraturas æque falsas , alteram Antiphontis , quam dissolvere non est Geometrici , quoniam Antiphon non est usus ad illam Geometricis omninò principiis . Alteram cuidam Hippocrati tributam , quam dissolvere Geometrici est , inquit Aristoteles , quoniam ab Hippocrate Geometricè quidem prius inventa fuerat Lunulæ cujusdam sectionibus circularibus terminatæ perfectæ , & exactæ quadratura , ex qua postea æquali felicitate , & Geometrica item ratione speravit totius circuli quadraturam exhibere , in quo est deceptus . Hoc quidem loco , ut in aliis multis , non is potest Aristotelis mentem capere , qui Geometriæ elementorum est ignarus . Non is potest Galeni mentem capere methodi medendi libro 1. cap. 4. item , & aliis multis locis , qui elementorum Euclidis est nescius ! An ne hoc minimum est , necessarias esse medico bonas artes , ut autores legens , mentem eorum intelligat , qui de universa natura , vel de re medica dignum quicquam scripsere ?

5. Sed modestius , & liberalius verecundus aliquis illud idem interrogabit , quid Medico cum Geometria , quid cum Arithmetica , quid cum Musica , quid denique cum vilioribus mechanicis artibus ? Non enim , inquiet , contradicenti , vel cavillandi studio sic interrogo , nec quidem pernego eas disciplinas Medico esse necessarias , cum necessarias esse Galenus cum multis aliis protulerit , sed non video Adepol quid illæ in medicinæ studium conferre valeant . Ac etiam si loci non pauci tum in Philosophis clarioribus , tum in Medicis minimè intelligantur ab iis , qui Mathematicis disciplinis non sunt exculti , tamen si iidem loci prætereantur , non video cur minus bonus Medicus aliquis propterea futurus sit ?

Huic multo sanè mitius respondendum , quin etiam docendus idem , & commiserandus est . Miser quærit panem , & qui panem frangat , & vix raro invenit ! Cui quidem sic conabor satisfacere , ut vix dictione aliqua vel mutata , vel addita , vel detracta sermo iste noster omnibus sectis tum Philosophorum , tum Medicorum aptari possit . Non enim assumam , quod multi affirmant , adesse omnia in homine , & proindè meritò parvum Mundum appellari , ut de cunctis planè scire debeat is , qui conservare , vel sanare in se recipiat hominem , in quo sint omnia . Neque Homericum illud assumam Deos , Deasque omnes auream quamdam constituere catenam , hoc est

est scientias omnes, & virtutes simul connexas esse, ut una absque aliis esse nequeat. Sed rem demonstrabo directè, & sicuti logici dicere solent à priori, nihil affirmans, vel negans, quod ab omnibus non debeat item affirmari, vel negari. Ac etiamsi videri possim illi præcipuè me nunc respondere, qui animal credat ex materia constare, & ex forma substantiali, vel ex anima, & corpore (nihil enim intererit) attamen quicumque ea, quæ dixero diligentius fuerit rimatus, facile cognoscet dictione una, vel altera, aut addita, aut detracta sermonem meum cuicumque convenire hypothese, quod maximè perspicuum fiet si nonnullæ sectæ terminos quosdam obscuros explicaverint, quibus uti solent.

Conveniam autem, inquam, tecum in plerisque, non enim æquum est in omnibus, de quibus possim, me nunc tibi contradicere. Ac tecum una affirmabo *animam esse actum primum corporis physici organici potentia vitam habentis*. Sed adverte quæso unanimi omnium consensu, cum corpus hominis, vel equi omninò est bene constructum, cum nihil deest, nihil superest magnitudini, figuræ, numero partium, ordini, quo eædem sint collocatæ, & dispositæ, & cum motus omnes, tum totius, tum partium singularum etiam minimarum, sive solidarum, sive liquidarum sunt tales, quales esse debent, tunc animal vivit, vivit equus, & ad omnia bene se habet. Atque omnino miraculosum, & supra vires effect creatæ naturæ hujusmodi corpus sic instructum omnibus iis, quæ sunt ex parte sui ad vitam necessaria, non vivere, non spirare, non bene se habere ad omnia! Quin etiamsi in tali corpore nulla adesset anima, sive forma substantialis, statim illa, vel crearetur à Deo optimo maximo, vel educeretur, ut inquiunt, ab infinita, & inexplebili materiæ potentia. Et è converso etiam si forma aliqua substantialis utcunque (sive naturaliter dicas, sive divinitus) præsens sit in corpore, cui tamen præcipuum aliquid desit, vel supersit, ob quem defectum, vel excessum corpus non sit aptum organum illi formæ, hæc vicissim non erit illius actus, & corpus illud non vivet, vel cum vitium organi fuerit leve, vivet quidem, sed male vivet, & male se habebit ad pleraque. Et æque, ac in superiori casu esset supra vires naturæ creatæ corpus malè constructum vivere, vel cum vitium sit levius, vivere, & bene vivere, & ad omnia bene se habere!

Quamobrem bonus Medicus (qui id maximè studet, ut homo vivat, & ut benè vivat, vel saltem ut vivat tantum, si illud bene haberi nequit) omissis aliis omnibus, vel præ aliis omnibus maximè sollicitus esse debet de organis conservandis, ad quorum perfectionem etiam nolente fato omnia bona consequuntur; ad quorum vitium, sive vitia etiam nolente fato omnia mala consequuntur.

At organica animalium corporis moles, vel omninò nihil habet, quod in ea nos considerare valeamus præter aptam, decentemque magnitudinem, aptam figuram, aptum numerum, aptum ordinem, situmque, connexionem, communionemque partium, & aptos quosdam motus tum totius, tum partium singularum, etiam minimarum; vel etiam si aliquid aliud insit corpori organico, quod nos considerare valeamus, hæc tamen, quæ enumeravimus sunt præcipua, quæ corpus faciunt organicum, illudque reddunt conveniens instrumentum formæ substantialis, sive animæ.

Facul-

Facultates autem , quæ metiuntur magnitudines quasunque , quæque excessus , defectusque indicant alicujus magnitudinis respectivè ad quandam aliam ; facultates , quibus edocemur de figurarum quarumcumque natura , & proprietatibus ; facultates , quibus numerorum passionès explicantur ; facultates , quibus concinnus ordo , concinnus situs , & harmonica quædam rerum quarumcumque constructio declaratur ; facultates , quibus motus cujusunque leges traduntur ; facultates , bone Deus , quibus mens hominis aliquid determinare valeat de relationibus , quas habent ea ex his , quæ sunt ejusdem speciei ; facultates , quibus relationum , sive proportionalitatum proportionès cognosci possint , sunt Geometria , Arithmetica , Astronomia , Musica , Architectonica , quæ comprehendat Galeni more machinarum omnium descriptiones , & quæ has omnes complectitur bona philosophia .

Igitur optimus Medicus harum omnium disciplinarum , facultatumque auxilio indiget , & bonus Medicus esse nequit , qui his omnibus disciplinis facultatibusque instructus satis non est , quod ostendendum erat.

Et quidem adversus hæc nihil sanè satis constans adduci potest . Atque id continget illi , qui hæc fortè oppugnare conabitur , quod rabido canis cum porphyriten , durum profectò lapidem infrendens apprehendit , mordetque dentibus , qui suos ipse sibi potius conterit , proterit , perfrangitque dentes , quàm duro lapidi morsus vestigia , vel levitè imprimere valeat . Quinimo quantumvis ingenia contorqueantur , & conentur tenebras offundere , semper eorum , quæ dixerim veritas clarior fiet .

6. Cæterum etsi his videri possim liberaffe fidem , & satis ostendisse , quod initio fueram pollicitus disciplinas , & facultates omnes (nam omnes quidem in iis continentur , quas retuli) medico esse necessarias ; verùm ut facilius , atque melius huic veritati assuescat nonnullorum animus , qui cum lacte multa cum suxerint præjudicia , & oppressum jam semper habuerint animum opinionibus non modo vulgi , sed etiam hominum leviter eruditorum , postea veluti nauseabundi respuunt ea , quibus possent à præjudiciis vindicari , operæ pretium erit aliquantulum ad particulares quasdam disciplinas descendere , & ad eas præcipuè , quæ rudioribus videntur magis remotæ à medicinæ studio ; atque hac saltem ratione , quæ summatim dicta sunt uno , vel altero exemplo speciatim confirmare : initio factò à musica .

Musica , quæ plures sensus potest tangere , sed visu , & auditu præcipuè suscipitur , & visum , vel auditum maximè principidè movet , indè animum , in motibus quibusdam certas servantibus proportionès videtur consistere , & à natura ortum habuisse , quæ iisdem , aut planè similibus utitur motibus , in quibus eadem , aut planè similes servantur proportionès . Hinc est quod similitudine ista proportionum inter ea , quæ extrinsecus harmonice moveri solent , mirabiliter quædam novæ affectiones musica excitentur in animo , quiescentibus , sive cessantibus aliis . Ex his autem affectionibus , quæ musica excitatæ sunt in animo , membra corporis tum moveri , tum easdem etiam in motibus suis proportionès servare solent . Atque hoc præter alia multa , clarissimè docent tubæ bellicæ , quæ ne dum in hominibus , verum etiam in equis bellandi alacritatem , & in membris eorundem

militares quosdam suscitant impetus. Cumque apud omnes in confesso sit animi pathemata sapissimè tum facere, tum etiam posse sanare morbos ple-rosque, & ad Medicinam spectare studium eorum, quæ passionum animi vim, & naturam declarant, concedendum quoque erit musicam, quæ ut-cumque suscepta potenter animum movere apta est, & novas, quas volu-mus affectiones excitare, non minimum in medicinam conferre. Simile quid dicendum de somno, & vigilia, quæ item animi affectiones quædam sunt. Sæpè enim Musica dolores, vel alias molestas curas demulcet, conso-pitque, & nullam aliam insignem in animo introducit affectionem, ex quo fit somnus. Item aliis modulationibus sæpe musica tardum etiam, atque hebetem insigni aliqua cura afficit animum, & somnos arcet. Unde si som-ni, & vigiliæ consideratio spectat ad Medicum, musicæ quoque studium, saltem quatenus illa affectiones animi moderari potest, ad Medicum spe-ctabit. Idem dicendum de motibus aliis, quorum consideratio ex omnium confessione Medici est. Ac nullus eorum, qui crediderunt motuum doctri-nam Medico esse necessariam, tam malè sanus fuit, qui modos, sive motus excluderet rithmicos, sive harmonicos, hoc est musicos. Neque novum hoc adeò est, ut non Medici extiterint, qui sola musica morbos curaverint. Neque alienum esset è sacris paginis aliquid adducere in hujus rei confir-mationem, nisi brevitati studerem. Sed non omittam mulieres quasi à na-tura edoctas tum vocali, tum rithmici motus brachiorum, & cunæ, tum strepitus, alteriusve sonitus, musica morbos avertere, nec non etiam multas molestias sedare, dulcesque somnos ad cunas vocare solitas. Atque ego ne dum his, sed oculis, vultuique matris puero blandientis, & cum puero suo ludentis, & gestui ejusdem, quin ori, oculisque item pueri multum musi-cæ, multum harmoniæ inesse video! Suntque mater, & puer duo chori musicorum sibi mutuò respondentium. Et multum etiam musicæ inesse video oculis lascivientibus animalium præsentè objecto, quod ardeat, vel canis, vel equus, vel homo, & ad oculorum musicam mente concipio alte-rum chorum moveri in cerebro, cujus motibus concupiscentia nascatur, & inde tanquam chordas harmonicè contentas, sive temperatas principiò mo-veri cordis organa, quibus statim arteriarum chorus, & tremore quodam membra cuncta musices non ignara respondeant! Et quidem judicio eorum, qui plus aliis vident, horum omnium, similiumque peritia; atque intelli-gentia, & scientia eorum, quæ ex uno, vel pluribus motibus vicissim consequuntur in animante, & eorum, quæ propterea timenda magis, vel speranda sint, Medico per quam necessaria existimabitur.

Neque seria hæc ab iis, qui legunt, & fortè non intelligunt, sic accipi debebunt, tanquam metaphoricè essent dicta. Nam re, inquam, multum musicæ, & multum harmoniæ his omnibus, similibusque inest, & re ipsa hæc omnia easdem, aut omninò similes habent harmonicas proportionem, quibus utuntur illi, qui sinè controversia cogniti, & admissi musici appel-lantur. Quin ex his ille melior, & in musica facultate præstantior est, qui sive proprii pectoris voce, sive tibiis, vel testudine, sive pedum motu, aut aliis quibuscumque (nam omnibus harmonicæ proportionem exprimi pos-sunt) meliùs novit imitari, & eas assequi proportionem, quas natura homi-nes docuit in unoquoque animi affectu. Et quidem in quocumque animi affectu

affectu semper unum, vel plura moventur, servata certa quadam in motu proportioni. Et stultus omnino is Musicus est, qui ut risum moveat, & hilaritatem, lugentium imitetur modos, vel è contra. Atque is longè sapiens est, qui ut amorem, ex. gr., moveat, tripudia cordis, & lascivientium oculorum dulces gyros, & interruptas amantium voces, & oris oscitationes eorundem musicis suis numeris, modulationibusque imitari nititur, quod cum fuerit assequutus, tunc artis peritus dicendus est.

Nemo autem est, qui magis tum tenere, tum docere debeat in quocumque munere obeundo, qui sint motus corporis, & partium ejus, quasve servant proportionem motus isti in quacumque animi affectione, quam Medicus. Vel forte, ut is cognoscat qui peculiare morbi sequantur faciliùs quodcumque exercitium peculiare, quæve studiosus, quæve agitator equorum, quæve nauta, quæve lignarius, vel metallurgi facilius patiantur, vel ut iis uti sciat, quæ diximus, & quæ magis opportuna videbuntur in quavis occasione eligere valeat, sive ad iram compescendam, vel excitandam, timoresque vel propellendos, vel incutiendos, si fuerit opus.

Hæc autem, quæ à me hætenus de musicæ utilitate dicta sunt, minima certè pars sunt eorum, quæ ex hoc capite ad argumentum tuum, vel illustrandum, vel confirmandum dici possunt!

7. Cum autem nonnullorum corporum vibrationes, necnon etiam vocum harmonicarum reflexiones plæreque, atque refractiones, & sonorum cursus, atque recursus ad musicen spectare videri possint, luminis revocant hæc in memoriam vibrationes, & radiorum lucis tum reflexiones, tum refractiones, quorum scientia medico adeò necessaria est, ut ejusdem ignari de plerisque, & præsertim de visione, morbisque non paucis, quibus visus offenditur, veluti pueri de republica loquantur. Quæ enim debeat esse totius oculi, & partium ejus figura, qui ordo, atque situs, quæ distantia ad invicem, & præcipuè humoris chrySTALLINI à retina, & ut imagines, sive species omnium visibilium in oculi fundo depingantur, necessum est eum prænovisse, qui de morbis, qui in his accidunt, recte velit dijudicare. Possem hac occasione tum nostros, tum alienos nominare, sed etiam iis multa dimittam, qui patientia abutuntur mea. Tam pauci verò sunt, quos meritò debeam excipere, ut non malè dixerim ferè omnes tam stultè, & temerè simul de morbis oculorum fuisse loquutos, ut sæpenumero ob ignorantiam disciplinarum memoratarum iis, qui malè vident lautissimè remedia præscripserint, quibus occaecari potiùs possint, quam vitium corrigere, atque notavi hominem rerum medicarum scriptorem (ut mortalium opinio est) satis celebrem, qui dum causas exponit, quibus alius remota, alius proxima meliùs conspiciat, tantum aberrat à scopo, quantum qui dicat diem esse cum sol reperitur in cœli imo!

8. Astronomia autem, quæ inter cætera docet.

Errantem Lunam, solisque labores

Unde genus hominum, & pecudes; unde imber, & ignes

Arcturum, pluviasque hyadas, geminosque triones;

Quid tantum Oceano properent se tingere soles

Hyberni, vel quæ tardis mora noctibus obstet?

optimo medico futuro perquam nimium est necessaria. Nam variis Lunæ

phalibus, & varia ejusdem è terra distantia multa fiunt terra, marique, & vario Solis aspectu in toto telluris globo fiunt annuæ tempestates, quarum insignes sanè, & solennes sunt in corporibus animalium, & in plantis mutationes, quas prætereo enarrare. Ac nisi bonus Medicus, nauta, & villico, rusticove agricultore rudior, & imperitior esse velit, Astronomiam non contemnet. Illi enim orientia, & occidentia notant signa, & quæcumque in cœlo de novo, & in qua plaga appareant, & in quo signo Sol reperiatur, quantum crescant, vel decrescant umbræ in solstitiis, & ut singulis horis projiciantur, quæ oriantur, & quæ nunquam occidant sydera, observant, & contemplantur, & his instructi rectius suum adhibent in plerisque judicium. Quod etiam facere debet Medicus causas saltem dicturus eorum, quæ propter varium Solis aspectum in homine, & in brutis, & in plantis, inque rebus omnibus, quibus ipse medendo utitur, contingunt. Præterquamquod Medicus nisi fuerit Astronomiæ peritus, neque cubile eligere poterit in ampla domo ad conservandam, vel ad recuperandam salutem magis idoneum, ignorabit quâ, quantum lubeat, Solis radiorum admittere valeat, & qua aura vel borealis, vel orientalis (si orientalis ipsi videatur salubrior) perspiret, quam æger, vel ad salutem tutandam, vel ad morbum facilius profligandum frequentius excipiat.

9. Cumque magna sit inter Astronomiam, & Geographiam cognatio, iidem namque circuli opportunè cœlum, & terram dividunt, qui Astronomiæ, & Geographiæ sit ignarus, tum ea, quæ dicta sunt, tum quibus ventis regio maximè perflatur, è quibus regionibus iidem ducantur, & quæ loca pertranseant, & salubriores ne, an insalubriores fiant in transitu, quos montes plaga habeat, quemve positum montes, quos lacus, quos fontes, quibus aquis irrigetur, quibus æstus sive maris, sive ventorum infestetur, & alia multa simul ignoret, necessum est.

Et hæc item, quæ hætenus dixi, minima etiam pars sunt eorum, quæ Astronomia, & Geographia in exornando, & perficiendo optimo Medico conferunt. Neque illud prætereundum est, quod scientia motuum corporum cœlestium pluribus nominibus animum exacuat, & ad omnia faciat promptiorem.

10. Cæterum de mechanicis facultatibus, & de Architectura minimè dubitandum est Medico eas esse ne dum utiles, verum etiam necessarias. Cujus rei demonstratio continetur in eo, in quo jam cum omnibus convenimus optimum Medicum omninò debere cognitum habere corpus humanum. Non equidem corpus informe, quale per privationes chaos describitur, cujus nulla sit magnitudo, nulla figura, nullus partium numerus, nullus ordo, nullus motus; sed corpus organicum. Ac meo quidem judicio idem dixissemus, si fuisset dictum, Medicum debere cognoscere admirabilem corporis humani structuram, vel artificium, machinamentum, opus admirandum, divinum; vel debere cognoscere innumerabilium instrumentorum tum majorum, tum minorum mirificam struem, & architecturam captu difficillimam, stupendamque partium compagem, veluti mechanicè, & arte quadam contextarum, quæ superet, & comprehendat omnes artes ab homine excogitatas: propositiones namque istæ, aliæque similes, vel unum idemque, ac illa Medicum debere cognoscere organicum.

cum corpus hominis, vel sanè non multum diversa significant.

Is autem, qui mente non capit ignobiliora, & minùs artificiosa machinamenta, & qui non capit imperfectiores machinas, & organa minus composita rudi, & crassa manu ab hominibus compacta, quomodo poterit cognoscere, & intelligere architecturam organicæ humani corporis molis; in qua tum plura, tum nobiliora, & tenuiora continentur instrumenta; in qua etiam reperiuntur innumerabiles minores, atque minores machinæ, quibusvis celebrioribus, à quovis magis celebri architecto, vel alio quovis diligentissimo artifice confectis, perfectiores! Ego autem sicuti existimo difficillimum planè esse perfectè cognoscere organa omnia, sive instrumenta corporis animati, ità arbitror nullam omninò datam esse homini viam faciliorem ad cognoscendum suum domicilium ea, quæ nos ad mechanicas disciplinas, & ad architecturam manuducit.

Neque hucusque Anatomicis institutionibus, sive corporum animalium, sive plantarum, sive rerum quarumcunque quicquam præstitum est, nisi quod instrumenta quædam mechanicè veluti disposita, & partium corporis coordinationes, & organicæ dispositiones quædam cognitæ sunt. Neque quicquam omnes futuri Anatomici præstabunt, nisi forte quod, quæ partium coordinationes, & organicæ, sive mechanicæ dispositiones sunt nobis incognitæ, ostendent, & in paginis suis designatas exhibebunt: ac si rem absolvent, non erit profectò minimum. Atque equidem non leve argumentum hoc etiam est, quod quæcunque in animalibus, & in plantis, & rebus in aliis clarè comperta jam sunt, in muro, vel in tela, vel in pagina depingere valeamus: quod de iis tantùm licitum est, quæ corporea cum sint, non sunt chaos informe; sed partium habent discrimina quædam, & aliquam servant in partibus organizationem, sive architecturam. Contemplare quæso favos apum, videbis sit ne hoc plusquam satis manifestum! Contemplare folium, sive vitis, sive salviæ, sive cujuscunque alterius rei; vel saltem contemplare plumbum, quod dum liquidum fuisset, postea in aquas injectum est, observabis etiam ex illo casu nasci quandam non omninò absurdam partium architecturam! Videlicet sunt hæc adnexa, & corporibus omnibus connaturalia magnitudo, figura, & partium coordinatio quædam; ut semper aliquid organicum in ipsis conspici re liceat.

Cultri autem recto usu, sive analysi, sive Anatomicis administrationibus, quas communi omnium consensu dicimus Medico necessarias, primò, exempli gratia, in corporibus animalium membra, & viscera majora oculis perspicienda, exhibemus; sed statim nolentibus etiam nobis devenimus ad minutiora, & exiliora quædam instrumenta, quæ omnem effugiunt oculorum aciem. Et hoc quoque verum est difficillimum omnino esse partem aliquam corporis animalium tam diligenter nos dissecare, quin statim multa minutiora instrumenta dissecando corrumpamus; ut nullus adhuc extiterit hominum omnium, qui partes, ex quibus constat cutis animalium exactè, satis potuerit explicare, & delineare. Cum igitur difficillimum sit via analytica corpus hominis perfectè cognoscere; quod etiam via compositiva est difficillimum, æquum erit nos opem exposcere ex Mechanicis artibus, & ab architectura more Galeni amplissima significatione

accepta ; quibus facultatibus tum dividendo , tum componendo , & diversimode atque infinitis planè modis comparando , quæ extra corpus animalium organicè fiunt , cum iis , quæ in animante fieri observamus , non parum in structuræ organizatione partium corporis animati valeamus proficere . Et in hoc non parum nos adjuvabit crassities ipsa , & corporatura instrumentorum manu hominum elaboratorum ; quæ nostris sensibus , & imaginandi virtuti , qua pollemus , sunt magis accommodata ; quam tenuitas instrumentorum , quibus natura utitur . Neque quicquam tam vile est in artibus , & in iis , quæ arte constant ; neque aliquid tam magnificum , quod modis omnibus , quibus fieri potest comparatum , cum iis , quæ sunt in corporibus animalium , non possit multum concedere , ut hæc facilius , atque meliùs intelligantur .

Sed quid ego longiori sermone rem clarissimam obscuram facio ? Manus machinamentum est magnæ architecturæ ; digiti manus sunt machinæ , vola , dorsumque manus machina est ; ossa manus , quæ parte una excipiunt , parte altera excipiuntur ad invicem sunt machinæ ; ligamenta ossium sunt machinæ , fistulæ humoriferæ in manu sunt machinæ ; muscoli , quibus digiti , & tota manus movetur sunt machinæ ; fibræ carneæ musculorum sunt machinæ ; item aliæ fibræ , villique in musculis sunt machinæ ; chordæ musculorum , sive tendones sunt machinæ ; tota manus machina est ex pluribus compacta machinis ? Quamobrem qui architecturam , & machinamenta quæcunque , & mechanicas facultates contemnit , naturam contemnit ; & eorum omnium , quæ in corporibus animalium fiunt omnino est ignarus .

11. Neque profectò video , quid adversus hæc constanter dici possit !

Cætera , quæ possem dicere Medico esse necessaria tum patent , & admittuntur ab omnibus , & facilè ex his deduci possunt ; tum ab aliis plerisque fusè , atque doctè , & ornatè simul necessaria esse demonstrata sunt , ut omnino constet veritas eorum , quæ principio diximus .

12. Sed dicet aliquis repugnare factum ; multi enim fuerunt magni nominis Medici , qui absque tanto artium , & disciplinarum apparatu , quantum præcipit Galenus , medicinam cum gloria , & cum lucro fecerunt .

Crede mihi Domine , crede mihi , fuerint illi quidem magni nominis Medici , & medicinam cum gloria , & cum lucro fastitarint ; sed crede mihi , sic te , atque me Deus sospitet , ut nunc verum tibi dico : imposuerunt hominum generi ; imposuerunt quidem . Quod facillimè fieri potest , ubi illi , qui in res humanas imperium habent , easque moderantur , sint bonarum artium imperiti , & non valeant ex se eligere bonum , & reprobare malum .

Quem non nominem scriptorum ; nam scio quos possim nominare ? Excipe decem , quindecim , vel viginti ad summum , qui etiam si multa ignoraverint honorandi tamen semper , & venerandi sunt ; de reliquis accipe , quem velis , quem dicamus N. N. vel exempli gratia apertè nominemus Lazarum Riverium , quoniam de Italiæ nomine alicubi male meritus est ; ac quæramus quidnam causæ fuerit ob quam N. N. ignoraverit , non inquam epilepsiæ , aut morbi difficilioris naturam , atque causas , sed naturam simplicis scabiei ? Et scabiei quidem naturam ignoravit N. N. Post longam

longam inquisitionem non inveniemus causam, rationemque potiore ignorantia facultatum prænarratarum. Face quæso, artis periti emungant, exprimantque è libris N. N. quidquid poterunt doctrinarum; nunquam sanè, clarè, & dilucidè sapientibus responsis illis explicabunt, in quo consistat scabiei natura! Nevè dicant non fuisse priùs probè monitos, rem explicabo planiùs. Helmontius cum optimè se haberet, & nulla parte ægro-taret, contactu manus scabiosæ, scabiosus factus est. Utque demum his iisdem laborem, levemque parte, addam manum illam quaqueverfus examinatam diligenter neque calidam, neque frigidam, neque humidam, neque ficcam plus, minusque quàm deceret, fuisse visam. Nevè alterius sectæ Medici Helmontio fortassis in omnibus subscribenti dicant se non probè item principio fuisse monitos; addam manum illam cujus contactu Helmontius scabiosus factus est non fuisse acidam, vel salis plus, minusve esse soleant eorum manus, qui nulla scabie laborant: ac certissimo mihi constare alias manus sale conspersas, vel acido aceto perfusas; & ipsum sallem perfricatum, diuque contrectatum manibus, & ipsum acetum, vel limonis succum non facere scabiem; & nolim equidem in his verba mihi dari. Non me Hercule doctrinis illis omnibus, quas in amplo, sive amplis voluminibus digessit N. N. nodum explicabunt!

Vel ad similitudinem illius Vergilii

Dic quibus in terris inscripti nomina regum

Nascantur flores, & phyllida solus habeto.

quæramus: cur scabies nascatur præcipuè inter manuum digitos, in brachiis, inter crura; & non in mento, non in genis, non in fronte? Vel cur sola manuum inspectio sapissime sufficiat ad dijudicandum hominem esse scabiosum; non item menti, genarum, frontisque inspectio? Quænam hæc est mento, frontique à scabie immunitas? Nunquam, nunquam profectò terque, quaterque nunquam sapientia, quàm in codicibus digessit N. N. quocunque ejusdem affectu, vel fautores difficultates rei maximè obviæ poterunt extricare! Idque nulla alia potissimum ratione, nisi quia N. N. mathematicum, ut Galenus docuit, fuit omnino ignarus.

An quæramus de difficilioribus sententiam; de febris essentia, in qua tradenda cordis motus explicandus est, & sine illis iisdem disciplinis ne umbram quidem veri attingere poterunt? an etiam de aliis adhuc difficilioribus? Vel potius dimittamus multa plerisque nostrorum Italorum, & plerisque aliis exterorum, ne odio duci in quenquam videamur. Sed de compluribus, quæ maxima nostra æquitas erit, quo ad doctrinam dicamus, quod cum ipsi non deciperentur, deceperunt alios. Sed cum doctrinam defendendo, vel excuso mihi videor me mores eorundem magis, atque magis accusare: meliùs igitur, & humaniùs erit totam quæstionem istam omittere; nisi fortè ubi quis velit rem sibi meliùs explicatam; quod faciam sedulò ut licet; surdo aures adaperiantur tamen.

Sed iterum repugnare factum quis affirmabit; nam innumeri, opera istorum, qui tanto disciplinarum famulatu non fuere instructi dicuntur sanati?

12. Neque hoc inquam dijudicatu facilè est, cujus opera æger sanatus fuerit! Quid non etiam dicunt Cabalistici mirabilium suorum! quæsitæ esse eorum scientia, & inventa esse remedia hexametris, vel hexametro, &

pentametro notata ! Sed multi inquam , sanantur è morbis etiam gravioribus , ubi nulli sunt Medici . Ac etiam si libenter admittam , quod verissimum est , multos sanari opera Medicorum ; cum tamen multa semper fiant circa ægrotum , clysteres injiciantur , sanguis mittatur , purgantia , alterantia , & alia præscribantur , & exhibeantur ; & tum intus , tum extra multa applicentur ; cumque natura semper multæ fiant in corporibus mutationes , difficile postea illud est , à quonam istorum æger sanatus sit decernere . Si non hoc difficile videtur aliis quibusdam , qui per quam nimis frequenter triumphos canunt , & eos ostendunt qui naturæ robore adjuti non perierunt eorum opera ; quos etiam eadem opera , qua tantum non perierunt , resurrexisse dicunt , mihi tamen videtur , & saltem difficillimum visum est Galeno , qui hac ipsa de re eandem ac ego , protulit sententiam commentario in *lib. 1. Aphorif. Hippocr. Aphorif. 1.*

14. Sed etiam si plerunque æger sanetur opera alicujus hominis , sitque manifestum medicamentum , quod opem attulit , non idcirco statim hominem illum dixerim Medicum , & multò minus optimum Medicum . Sic anus illa apud Thomam Willis re sanè desperatissima juvenem sanavit fluxu sanguinis è naribus penè extinctum præsentibus cum aliis , tum ipsis Medicis pro testibus , & factum admirantibus . Cum jam medici nequicquam cuncta , quæ noverant tentassent , jussit anicula afferri ignitam ferream laminam ; quam supposuit deciduo è naribus sanguini . Fumus indè combusti sanguinis est elevatus : qui ore , naribusque susceptus extemplò largè fluentem cohibuit sanguinem . Quod semel atque iterum contigisse ego quoque sum expertus . An anicula optimus Medicus illa fuit ? neque ipsum dixerim optimum Medicum præstantissimum Virum Thomam Willis ! Et multò , atque multò sanè minùs optimum Medicum appellare dignabor , quem stolidissimi vulgi opinio fecit Medicum : etsi sciam vulgus fecisse multos , & non rarò facere Deos , ut mirum non sit , si quandoque sibi quoque faciat Medicos !

Neque profecto lignarium , qui quemvis angulum cum fuerit opus dividit in tres partes æquales (quod non perfecit Euclides) & aliquo instrumento suo multò facilius , ac citiùs quam Euclides , ad quodvis punctum plani cujusque perpendicularem erigit , geometram propterea dixerim , & Euclide doctiorem !

Optimus Medicus , quem dicimus scientia , & sapientia plenum , methodicum , rationalem , qui alios docere debeat , & valeat in hoc casu , præter ea , quæ novit anicula debuisset insuper scire , quantum ignita ferri lamina , & calidus combusti sanguinis fumus ore , naribusque acceptus constanti etiam , firmoque animo juveni repentini terroris incutiat ? Quid possit in hoc casu repentinus animi timor , terrorve ? Quid illud videri ægroto suffocari à calido fumo ? Quid hic idem calidus fumus perveniens ad locum affectum possit fibrillas membranularum illius loci contrahere , & orificium vasis , vel orificia vasorum , è quibus sanguis erumpit corrugare valeat , & fluxum sistere ? An alia contractio fibrarum alio modo facta , ut in quibusdam doloribus accidit , quiescentem etiam sanguinem valeat ad fluxum concitare ? Vel quid idem calidus fumus valeat sanguinis profluentis guttulas propè locum affectum citò cogere , & sic fluxum cohiberi ? Et vidi equidem

dem ego Romæ Sacerdotem quendam, quem analogia, & conjectura ego ductus hoc eodem remedio in magna sanguinis tussi, & sreatu rejectione uti volui, qui postquam conquievisset fluxus, parvos quosdam sanguinis grumos per intervalla temporis levi tussicula adjutus rejecit. Debebit etiam scire optimus medicus an in laminæ ferreæ defectu, æquè apta sit lamina ænea ignita, vel alia, vel igniti lateres, vel quid aliud; an peculiare quid stipticum constringens oscula vasorum, vel quid cogens sanguinem præstet ferrea lamina? An idem fortassis præstet aceti fumus? Et cum his ea, quæ de posca utili in sanguinis rejectione scripsit Galenus comparare debebit optimus medicus, & an fortè posca sanguinis guttæ aliquæ, vel lymphæ, aut alterius humoris cogantur, membranulæque contrahantur, orificiaque sic, an alia ratione occludantur? Item debèbit scire an melius sit in fluxus principio hoc remedio uti; an potius postquam multum sanguinis effluerit, & postquam vasa nimis detumuerunt, & homo languidus jam nimis, & viribus exinanitus est? Item quæ vivendi ratio, qui mores, quæ studia magis conveniant, ut pars affecta melius confirmetur, & non redeat amplius fluxus? Hæc omnia, & alia multa debèbit scire is, qui Optimus Medicus dicendus est: nam tum rectius isto remedio utetur; tum analogia, & conjectura ex his in aliis morbis alia, atque alia inveniet remedia. Et quidem omnium istorum scientia non quidem haberi potest, nisi præcedat scientia eorum, quæ diximus tum necessaria in plerisque esse, tum saltem semper Medici animum acuere. Ego autem existimo, quod neque dubitare de his, non modo quærere poterit is, qui non fuerit in illis disciplinis versatus: nam non nisi de magnitudinibus, de figuris, deque motibus dubitabit, & non nisi magnitudines, figuras, motus, & uno verbo organizationem quæret, intelliget, & explicabit, si illam fuerit affectus. Quod si alicui aliquid ex his sine illis disciplinis notum sit, rustico quodam modo, non quidem scientifice illud cognoscet, & proinde non poterit alios docere ea, quorum ipse scientiam non habet; neque uti poterit analogia inter hæc, & alia si fortè expediat, neque unum ex altero rectè deducet, quo utatur in aliis casibus.

Si non naturæ rerum indagatione, non acri judicio, & conjectura præstare debeat Medicus, nihil amplius erit, quo aniculæ idem sit præferendus, & jam optimos Medicos appellabimus servum quendam Eminentissimi, & Reverendissimi Cardinalis Ottoboni, & plerosque eorum, qui pietati serviunt, & generositati Illustriss. & Excellentissimi Principis Prudentissimi, & modestissimi D. Livii Odescalchi, in hospitio, quod Odescalcorum Romæ dicitur, & plerosque eorum, qui serviunt item Romæ in Nosocomio Sancti Jacobi Incurabilium: enim verò omnes isti suffimento massæ cujusdam multa habentis (quorum tamen præcipuum est Cinnabaris factitius, quod Cinabrium etiam dicitur) non paucos sanant miseros languentes, & eos maximè, qui morbis laborant a lue venerea ortum ducentibus! Et jam illud confirmabitur, quod multi minimè negant, omnes esse Medicos; nam omnes aliquid norunt, quod præscribant in quocumque morbo, sive aqua acetosa, aut citri, sive theriaca, sive orvietana antidotus, sive ruta, sive salvia, sive rosmarinus, sive juniperus, aut quid aliud, quod prodest, illud sit! Medicus optimus de iis omnibus debet dijudicare, quæ tum ab ipso, tum ab aliis

utcumque observata sunt in homine, & in aliis animantibus, & ex his conjecturam facere eorum, quæ adhuc observata non sunt, & eorumquæ fugiunt, obtutum oculorum, nec possunt observari, ut omnibus, ratione qua fieri potest, uti queat, cum occasio dabitur. At illud rectè dijudicare, & illud rectè conjecturas facere de iis, quæ adhuc observata non sunt, & illud ad istorum similitudinem conjicere de iis, quæ sensuum hebetem fugiunt aciem, non est nisi eorum, qui illas omnes facultates habent, quas Medico diximus, nedum utiles, sed necessarias.

Non graverer de cinabrii usu aliquanto lucidius differere, quod tibi fortassis, & quibusdam aliis non esset ingratum. Sed non est æquum te diutius à me in his detineri. Attamen dum ad finem propero, de cinabrii fumis monebo complures scripsisse; sed nonnulli multa inutilia admiscuerunt, & in plerisque multa desiderantur. In Italia pluribus in locis usurpantur: Romæ publicè duplici in loco; in altero pecunia Illustrissimi, & Excellentissimi D. Livii Odescalchi, in altero pecunia ipsius loci, Nosocomii nempe Sancti Jacobi incurabilium. Non est necessum fumos istos ore excipi; sed satis est si habitu corporis excipiantur: licet difficile sit non aliquid fumorum ore hauriri. Effectus quos præstant fumi isti sunt iidem, aut planè similes iis, quos præstant unctiões unguentorum, quæ præter alia mercurium accipiunt, quæ passim hinc Venetiis in usu sunt. Sed multò tutiora sunt suffimenta ista, & multò efficaciores, & feliciores effectus ab his, quam ab unctiõibus mercurialium observantur, & minus nocent corporibus, & non requirunt adeò robustas vires, ut consuetæ unctiões mercurii cum iis, quæ mercurio adduntur, & minori impensa ægroti curantur, minorique labore, ac minus periclitantur. Quam ob rem complures ornatissimi Viri re, & experientia edocti ommissis omnino ungentis illis salivationem promoventibus, solis fumis è cinnabari, cui pauca quædam adduntur, magno cum languentium emolumento utuntur.

Possem fusiùs rem exponere, & vietus rationem, omnem methodum, habendique modum tradere, sed facile videri possem præ me ferre eum esse, quem descripsi optimum Medicum. Neque sum, neque novi, qui sic dici mererentur, & forte ego sum in disciplinis omnium minimus. Id tamen firmiter assero, quò quisque magis recedit ab eo, quem veluti pennicillo delineavi, eò is minus bonus est, scilicet eò magis recedit ab optimo. Vel si sigillatim, quantum possim, omnia exponerem saltè viderer aliquam me propterea velle exigere gratiam! More eorum, qui etsi nihil recusent, quod bonum sit, nihil tamen exposcunt, regionem, urbem, nosocomia indicavi. Poterit Excellentia Tua concivibus tuis clarissimis Romæ degentibus mandare, ut de his exakte ad te scribant. Mone tamen sedulo, videant quæso, quos interrogent! Nam etsi multi sint Romæ, non omnes tamen vident Obeliscum Pamphilium montis in vertice, subjectosque Indum, Maurumque, binosque alios fluvios, & bibentem leonem, prosilientem equum, immanemque ponti belluam ingenti ore aquas resorbentem! Doctos, Honestos, Pios, & veritatis amatores interrogabunt! Ac pro notitia eorum, quæ de Cinabrii usu dixi, omnium optimus erit idem Humanissimus Princeps D. Livius Odescalcus. Qui quondam mihi dixit, meminì enim, aliquando his, qui fumis jam dictis usuri erant, multa priùs medicamenta præ-

præbebantur, sanguisque mittebatur, ut purgato prius, & secundum leges artis nonnullorum bene præparato corpore melius esset ægrotis. Sed oppositum contingebat; quippè sic præparata corpora pejus se habebant, quam illa, quæ non fuissent tam accurata medicorum diligentia præparata, quæ levioribus purgantibus prius adhibitis, & recta vietus, cæterorumque ratione, fumisque felicius curabantur. Quantum interest demonstrativam artem à Galeno indigitatam non habere, non adhibere eam in judicio ferendo de rerum natura!

15. His autem omnibus sat, nisi fallor, quod voluisti, demonstratum habes: *Medicinam practicam non satis æstimari*. Nam cum tam arduum, tam difficile, & tam Divinum quid sit Medicina; tamen cuicumque licitum est de eadem, de rebus medicis, & de medico dijudicare, & illi facilius admittuntur ad medicinæ exercitium, qui post memoriam nonnullarum formularum melius noverint potentum genio adulari! De quibus si non fueris dedignatus legere Galenum tum libro ad Posthumum, tum libro primo Methodi medendi cap. primo, multa habebis scitu planè digna, & quæ rectè argumento tuo possint accommodari; nam ego ne longior sim, abstineo nunc commentariolum, quod jam meditor in illa eadem verba conscribere, & referre: Dicam tamen aliquid breviter.

16. Dignitas rei alicujus, quæ difficultatem adjunctam habeat in paucis hominibus producit admirationem, & rei desiderium; indè studium, & diligentiam pro illa consequenda, & humilem, modestamque de semetipsis sententiam: atqui hi sunt illi, quibus ex meliori luto effinxit præcordia Titan. In aliis autem illa eadem in principio quidem facere solet admirationem, & sui desiderium, sed propter difficultatem nascitur desperatio rei assequendæ; indeque despectus ejusdem, quantumvis dignissimæ. Et nonnulli hominum tam pravæ naturæ sunt, qui deveniant ad despectum, odiumque bonorum, non præcedente admiratione, atque desiderio eorundem! assimilantur caco-dæmoni maledicenti bonis omnibus etiam summo. In aliis, qui longè plures, atque plurès sunt, eadem rei dignitas, cui difficultas adjungitur, facit temeritatem, & petulantiam, qui id maximè credant scire, habere, & possidere, quod maximè ignorant, quod minus habent, quod minus possident, quod nunquam habebunt, nunquam possidebunt: hoc

*Est genus hominum, qui esse primos se omnium rerum volunt
Nec sunt.*

17. Homo autem ut plurimum animal est superbissimum, ampullosum, ambitione turgidum, sapissimè Deitatem affectans. Indè fit, ut non rarò ferè quisque aliquid concupiscat, quod omninò impossibile, vel quasi sit impossibile; vel quod Summi Dei tantum sit: volare, exempli gratia, Regem esse cum non sit: exercitus scribere, delectumve habere; arcana cordis in aliis scrutari; puerili quadam Cabala secretiora naturæ revelare; futura præscire, aurum, argentumque ex plumbo conficere, in Dæmones imperium habere; verbo, vel cogitatione inimicos è medio tollere; urbes, insulasque in medio oceano fundare; bestiis omnibus nutu imperitare, & alia hujusmodi, in quibus tam validè mentem homo interdum figit, ut id esse credat, quod esse animo fingit: Et in tanta hominum multitudine vix paucos quosdam reperiemus, qui non in aliquo ex his sæpè peccent.

18. Hinc autem fit, ut plerique nunquam hæsitent, nunquam dubitent de rebus; sed neque hæsitare, neque dubitare sciant; nunquam cogitent, an ea, quæ effutiunt vera sint, an falsa; statim respondeant ad quæcunque quæsitæ etiam difficiliora; omnia temerè aggrediantur, de omnibus temerè loquantur; quippe credunt omnia scire, quin proprii intellectus mensura altissimi Dei potentiam metiantur. Quod belle succedit ubi complures ejusdem, aut similis farinae sunt homines, inter quos, qui petulantia, & temeritate cæteros vincit, pluris habetur. Ex quo hominum vitio illud quoque factum censeo, quod rarissimi profecto sint, qui non assentatoribus velint esse stipati.

19. Horum pars una sunt jam potentes; pars altera natura cupiunt fieri. Cumque utrique neque quod verum, neque quod bonum sit, videant, facile fit, ut qui minoris sunt, potentiorum omni studio effingantur in mores; & omne ab inferioribus sibi exposcant assentationis holocaustum; & vicissim inferiores sibi imperent, omnia potentioribus assentari; quibus arrident, & eorum ingenia admirantur, si quid dicunt illi, isti laudant, si negent, negant; rursus si negent, negant iterum. Quod multis sanè, & disertissimis expressit Galenus. Ex hac autem peste non solum Medicæ facultatis, sed omnis ferè vitæ, atque humanæ societatis pestes cunctæ, vitia, & corruptelæ dimanant.

20. Cæterum ex illis paucis, quos primò dixi, alii sunt, quorum industriæ aliqua accedit, vel domesticæ rei, vel alia bona fortuna; vel casualitate aliqua juvantur, & contenti vivunt. Alii vel longa patientia malorum, vel alia causa pervertuntur tandem, & sunt deceptores. Alii, qui paucissimi sunt, cum nunquam potuerint ingenuam exuere naturam, & crocodilos, canes, feles, vitulosque, etiam si aureos, venerari, variis tempestatibus acti, undisque jactati, semper conati morum ingenuitatem, atque candorem servare, tandem occumbunt. Inter quos connumerandus est Joannes Baptista Capuccius honestis, doctisque Viris sui temporis tum nostratibus, tum exteris satis superque notus, & ab omnibus maximo in honore habitus. Qui Crotone diem obiit. Quod in honorem cedat, gloriamque Crotoniatarum. Qui piissimum, & doctissimum hominem dignum quem Principes amarent, & cujus consilio in rebus gravioribus uterentur, si omnes qui dicuntur, Principes essent, tum cognoverunt, tum exceperunt, tum muneribus multis effecerunt, ut iis, qui in magnis degunt urbibus, moderatissimus Vir non posset invidere. Postremò tamen senectute, morbisque confectus, & veluti excruciatum rerum omnium curiositate, cui videbat haud promptè Crotone sibi posse satisfieri, & sæpe numero frustra per literas amicos rogare longè remotos, ut si quid novi prodiiisset, monerent, libros compararent, deferri curarent, quæ omnia non poterant citò fieri, ut ipse voluisset, aliquantulum illius loci videbatur pertæsus, ut pluribus mihi, aliisque significavit. Cujus præter multas literas ad amicos, & quod non pauci amicorum honorificè ejusdem meminisse voluerunt in scriptis suis, vix aliquid extat, quod sciam: ego tamen si quid ingenii viribus possum, conabor aliquando hominis amicissimi famam, nomenque diutissime manere; nevé hæc pereat de Crotoniatis memoria nostro seculo illos novum habuisse Pythagoram! Vale Senator Illustrissime, atque Excellentissime. Vale.

S U M M A R E R U M.

In hac prima dissertatione contentarum.

- 1 **O**ccasio scribendi.
- 2 **O** Medicinæ omnes alias facultates habet administras, vel Optimus Medicus omnium scientiam, & experientiam habere debet, quibus animus, & corpus hominis utcumque alterari, vel moveri possunt.
- 3 Quod probatur auctoritate Galeni, Hippocratis, Platonis, aliorumque clarissimorum Virorum.
- 4 In quorum auctoritate omnino acquiescere debent, qui alicujus magni nominis celebritate populo imponere consueverunt.
- 5 Illud idem ostenditur generalissimè; nempe Optimum Medicum indigere disciplinis omnibus.
- 6 Quod etiam ostenditur in specie de iis disciplinis, quæ magis existimantur alienæ à medicinæ studio: ac primo demonstratur musicæ peritiâ Optimo Medico esse utilem, atque necessariam.
- 7 Scientia, quæ leges refractionum, reflexionumque luminis edocet, Medico est utilis, atque necessaria.
- 8 Astronomia Optimo Medico utilis est, atque etiam necessaria.
- 9 Geographia ne dum Optimo Medico utilis est, sed etiam necessaria.
- 10 Mechanicæ facultates, quas complectitur Architectura, Medicone dùm utiles, verum etiam necessariae sunt.
- 11 De reliquis disciplinis omittitur hoc idem ostendere, quod jam omnes consentiunt Medico esse necessarias.
- 12 Imposuerunt hominum generi, qui illis disciplinis minimè instructi Optimi Medici dicti sunt. Quod manifestum est ex illorum scriptis: ex quibus nullus potest exprimere tantum scientiæ, quo saltem simplicis scabiæ (morbi scilicet plerumque familiarissimi, & tutissimi) naturam, & essentiam exponere valeat.
- 13 Difficillimum est decernere, Medici nè opera sanatus sit æger.
- 14 Non etiam si opera alicujus quis sanatur, statim ille, qui sanat Optimus Medicus dicendus est, & quidnam aliud præterea requiratur. Qua occasione multa de cohibendo fluxu sanguinis & naribus, & de curatione eorum, qui lue venerea laborant.
- 15 Cur Medicina practica non satis æstimetur: assentatoresque facilius admitti ad medicinæ exercitium.
- 16 Dignitas, & difficultas alicujus facultatis, quos affectus producat in hominis animo.

17 *Homo animal superbissimum, Deitatem affectans, quam cum non possit assequi, facile labitur in stultitias, fitque vanarum artium cultor.*

18 *Stulti, ineptique nunquam hesitant, quin etiam neque hesitare, neque dubitare sciunt.*

19 *Affectus ille, qui assentatio di-*

citur, unde frequentius oritur.
 20 *Eorum, qui boni natura sunt, alii pervertuntur, & fiunt deceptores, alii, morum ut servant candorem, vitæque integritatem, angustiis premuntur; ac demum Jo: Baptista Capuccii, & Crotoniatorum laus.*



311

DISSERTATIO SECUNDA

*De aere artificiali flammæ, & animalibus
mortifero.*

AD ILLUSTRISS. ET EXCELLENTISS.

D. FRIDERICUM CORNELIUM

Æquitem, Oratoremque designatum pro Veneta Republica
ad Cæsarem,

VINCENTIUM PASQUALICUM,

E T

BENEDICTUM CAPELLO

Patritios Venetos.



X quo fortuna, & summa humanitate vestra mihi datum fuit una vobiscum observare ea, quæ apud Illustrissimum Paulum Sarotti Serenissimæ hujus Reipublicæ à secretis Disertissimus Ambrosius ejusdem filius igni, & passeribus accidere ostendebat in artificiali aere, me vobis, benignitatisque vestræ, qua me audivistis, adeò devinctum existimavi, ut vel nulla ætate, nullave industria me unquam exsolvi posse putem.

Quod equidem non solum minimè displicet, sed potius arctius, atque firmitus si fortè fieri possit, devinciri exoptem. Cumque nullis videam meis meritis id posse contingere, aliquid tamen experiri placuit, quo saltem obsequium erga vos meum, animique pietatem demonstrem: videlicet aliquantò lucidius, atque fusiùs ea exponendo, quæ tunc breviter de illis experimentis sum locutus. Quo etiam videbor veluti parva, & tenuia quædam mei vestigia reliquisse Venetiis: quibus multos post annos possint filii vestri de me dicere, fuit quodque ille quondam hic inter nostros, & licèt non longissimo tempore, patrum nostrorum tamen aspectu frui eidem licuit! Quoniam autem facilè fieri potest, ut hæc in eorum etiam manus deveniant, qui non intelligunt, quid pro aere artificiali, sive fastidio accipiatur, non abs re fuerit paucis illud priùs exposuisse.

2. Aer, inquam, artificialis quantum primo aspectu dignoscere possumus, substantia est similis aeri, quo in respirationibus utimur; re tamen ipsa multum differt. Nam præter alia, quæ fortè in his hucusque minùs sunt observata, in aere artificiali ignis citò extinguitur, & animalia brevi

tem-

temporis momento mortem obeunt. At si factitius aeris utilis, quo vivimus, aliquid permixtum habeat, in eo animalia ægrotant, & languent, & tandem, etsi longiori tempore, moriuntur etiam, & ignis item tardius quidem, sed paulatim, atque paulatim tandem extinguitur. Artificialis autem, sive factitius aer dicitur substantia ista vitalibus carens aeris, non quia non multis in locis ipsius naturæ spontè genita reperiatur; sed quoniam facile hominum industria, & artificio quodam (ut mox referam) ubique locorum parari, & haberi possit. Quod si quis eum tantum aerem appellari velit, qui respiratus est animantibus utilis, vel artificialem etiam aerem dici debere affirmet substantiam quamcunque quavis industria præparatam, & ipso aere communi respirantibus utiliore; quæstio jam inanis, & de nomine tantum erit, in qua non debeam immorari. Et mihi quidem in his placuit retinere aliorum voces, & aliorum more, ac præsertim Clarissimi Roberti Boylei, quancunque substantiam aerem dicere, quæ utcunque aer videri possit, sive utilis, sive inutilis, & respirantibus salutaris, vel mortifera illa fuerit, sive quocunque alio nomine eandem libuerit insignire, & ita sanè quancunque aliam de nominibus controversiam, modò de re ipsa conveniamus, præcisam velim.

3. Perpetuò substantia ista mortifera reperitur in crypta, quæ propè lacum Agnani non longè à tumulto Celeberrimi Poetarum omnium Vergilii Maronis inter Neapolim, & Puteolos vulgò la *Grotta de' Cani* appellatur. Quod nomen obtinuit, non quia cætera animalia tutò in illa degere possint, sed quoniam in canibus præcipuè mos est hominibus rerum naturalium curiosis periculum facere, quàm maturè aer ille præsentem animalibus, extremamque afferat perniciem. Præterea non est in canibus tanto opus studio, qui natura ferè semper terram olfacientes statim vitiosum illum aerem hauriunt.

Hæc eadem substantia non assurgit in crypta nisi ad semicubiti circiter altitudinem, ad quam etiam nonnunquam ibidem attollitur tenuis quædam nubecula, & ad hanc eandem præcisè altitudinem circum circa in cryptæ latera, quæ terrea sunt, videntur humore uvida. Ac experimenta complura docent, aerem istum, quem igni, & animalibus inutilem, sive mortiferum appellamus, ad decliviora semper ferri more fluentis aquæ, ac extra cryptam diffluere, & diffusum paulatim evanescere, ut nulla ampliùs postea ejusdem signa observentur. Præterea in crypta lethalis illa regio calidiuscula percipitur, cum regio superior salubris nullum notabilem in sensu calorem excitet: fitque non minus, ac si ab aere in proximas thermas transferamus digitum; notabilem scilicet à thermis percipimus calorem, cum nullum in contiguo aere notabilem percepissemus. Quippe substantia superior, & inferior sunt in crypta duo liquores natura nimis diversi, & non multum inter se communicantes: etsi primo aspectu non tanta inter ipsos differentia appareat. Confines autem utriusque aeris utilis nempe, & mortiferi sunt veluti in plana superficie secundum profunditatem indivisibili, atque aded brevissimo sanè loci intervallo observare licet utrumque aerem, scilicet in loco paulum altiori flamma nutritur, vivit, viget, & perdurat; verum in paulum humiliori extemplo extinguitur; nihilo segnius, ac si aquis ignis immergeretur. Anser qui collo procero, & capite altiori aere utebatur utili,

qui

qui semper adest in suprema regione illius loci, nihil profectò patiebatur, sed postquam pondere coactus est caput reclinare, citò quoque & ipse mortuus est.

4. Et ab his fortè similibusque Poetarum optimus Vergilius, quem constat amœnitate illorum locorum maximè fuisse delectatum, canendi occasionem desumpsit:

*Spelunca alta fuit, vastoque iuvis hiatu
Scrupea tuta lacu nigro, nemorumque tenebris,
Quam super haud ullæ poterant impune volantes
Tendere iter pennis: talis sese halitus atris
Faucibus effundens supera ad convexa ferebat;
Unde locum Graii dixerunt nomine Avernum.*

Ac priùs de Columbis Aeneæ ducibus, aureas arbores junoni infernæ sacras quærenti, dixerat.

*Indè ubi venere ad fauces graveolentis Averni
Tollunt se celeres;*

ne scilicet respiratione subiectum mortiferum aerem haurirent, & morentur. Et alibi sic cecininit.

*Est locus Italiæ in medio sub montibus altis.
Nobilis, & fama multis memoratus in oris
Ainsanti valles, densis hinc frondibus atrum.
Urget utrumque latus nemoris, medioque fragosus
Dat sonitum saxi, & torto vortice torrens.
Hic specus horrendum, & sævi spiracula ditis
Monstrantur; ruptoque ingens Acheronte vorago
Pestiferas aperit fauces.*

Tota autem regio illa thermarum est ferax, & alicubi exhalatio sulphurea nares ferit. In crypta tamen, & prope cryptam ad multos sanè passus nullus odor neque bonus, neque malus percipi solet.

5. Memini autem me olim cum Neapoli essem vulgò accepisse nonnullos exteros, nescio quos thesauros sibi quærentes, cum prope lacum Agnani terram ad nonnullas ulnas noctu effodissent, manè repertos fuisse mortuos. Quod aliis in locis terra de recenti effossa quandoque similiter accidisse compertum est, & non semel etiam non revoluta terra: videlicet id, quod perpetuum est in crypta canum, prout varia sunt ea, quæ interdum moventur in terræ visceribus, aliis in locis non rarò accidit.

Meis item temporibus pluries tum Romæ, tum Neapoli in iis locis subterraneis in quibus hominum cadavera humari solent, observatum est extinctas fuisse faces, & mortuos homines imprudentiores, qui priusquam exhalasset noxius vapor, qui ibi fuerat longo tempore inclusus, vel priusquam is aer cum externo satis commixtus utilis fuisset redditus, cum face in sepulchreta descenderant. Quod pariter, ubi multa concurrant, contingit in puteis, in quibus frumentum diutiùs fuerit servatum: nisi enim aperto putei ore sinatur præterire certum temporis spatium, quo malus aer exhalet, vel cum externo utili aere quantum opus est, permisceatur, tum ignis, tum animantes in puteo commoriuntur. Simile quid non rarò accidere narratur in iis fodinis, è quibus bituminis species quædam eruitur,

qua pro carbonibus utuntur tum in inferiori Germania, tum in Anglia, ac in fodinis metallorum quibusdam temporibus, & quibusdam in locis simile quid fertur quandoque fuisse observatum. De quibus quidem multæ narrantur historiæ, quas non refero, quoniam nulla prorsus dum hæc scriberem, librorum mihi copia fuit, in quibus aliquo modo de his ageretur: neque profectò nunc mihi historiæ illæ nimis essent ex usu.

6. Arte autem, & industria hic idem inutilis, aut similiter mortiferus aer paratur spatio unius, vel alterius, aut plurium dierum si in vase, puta vitreo, aliquid statuatur massæ, ex qua panis conficitur; vel uvarum contusarum aliquid; vel spiritus aceti, & coralliorum pulvis; vel aqua fortis, & ostreorum testæ; vel quid aliud simile: ubi enim aer communis, atque utilis consueto artificio extractus fuerit è vase, dum computrescit, vel fermentatur id, quod in eo collocatum fuit; vel dum solvuntur testæ, aut corallia, vitioso, sive mortifero aere vas repletur: quod citò sanè fit ex dissolutionibus plerisque, ut testarum ostreorum in aqua forti.

7. Verum enim verò existimo absque aeris utilis vi, pneumaticæ machinæ extractione vitiosum, sive mortiferum aerem posse nos obtinere ex eorum solutione sive putrefactione, & fermentatione, quæ in vasis continentur. Et profectò è puteis in quibus frumentum diutius fuerit conditum non fuerat extractus utilis aer; cum tamen postea non rarò mortifero reperiuntur repleti. Item nulla unquam industria aer utilis extractus fuerat è sepulchreto quodam in celeberrimo Templo Divæ Mariæ ad Martyres Romæ, quod Pantheon fuerat ab Agrippa extructum, cum tamen vespillo quidam unà cum face, quam secum deferebat, novissimè in eo perierit. Videlicet non videtur inverisimile (quin imò videtur omnino verum) posse nos habere vitro inclusum aerem ad nutriendum ignem, & ad prorogandam, sustentandamque animalium vitam prorsus inutilem, & ineptum, absque eo, quod communis, & utilis aer prius extractus fuerit ab ejusdem vitri capacitare. Memini etiam in doljis, è quibus de recenti extractum fuit vinum maximè generosum, quo repleta erant, non vivere lucernæ flammulam; item neque in furno, cujus lateres igniti sunt, quales esse debent, cum panis crudus in furnum immittitur, ut excoquatur.

8. Cæterum utcunque contingant hæc, & multa alia similia nos experiri, illud videtur certum, aliquam esse inter flammam, & animalium vitam analogiam. Ubi enim ob aeris vitium flamma non vivit, animal etiam minimè potest suam vitam prorogare, & è converso ubi animal aeris utilis defectu nequit vivere, flamma item ob eundem defectum extinguitur, & perit ignis. Atque hæc fiunt statim vel nictu oculi in flamma, si omnino desit utilis substantia ad ipsam nutriendam, & citius, vel tardius tum in flamma, tum in animantibus prout major, minorve quantitas inutilis aeris utili, idoneoque ad ignem, animaliumque vitam sustentandam fuerit permixta. Præterea sicuti flammæ præter aerem necessarium est crassius aliquod pabulum (puta oleum, vel spiritus vini, vel aliud) ita homo, & bos præter aeris, necessitatem habent crassiorum aliorum alimentorum: nempe cibi, & potus. Ac sicuti flamma in vase optimè clauso extinguitur; ita pariter homo, & bos in loco optimè clauso moriuntur: indigent enim hæc omnia aere, qui possit continuò perflari, & recentari, quod clarius constabit cum

Deo adjuvante de respiratione edisseram.

9. Nolim autem his confirmari nonnullorum sententiam, qua affirmant in animalium corporibus verum ignem, veramque flammam reperiri. Nam neque hæc, quæ retulimus, neque quæcunque alia valeant adducere, illud demonstrant.

Fieri autem potest, ut unum, idemque necessarium sit pluribus, etsi natura maximè discrepantibus. Quod docent flumina omnia, quæ in terris hætenus novimus, quorum aquis vegetant herbæ, plantæque juxta ripas consistæ; iisdemque vivunt anguillæ, piscesque alii, quos fert flumen. Etenim si cessent aquæ, & exarescat fluminis alveus, vel mutetur aquarum natura (ut si fiant falsæ, vel vitriolatæ) vel loco aquarum salubrium fluat oleum, vel mercurius, jam brevi tempore una deperibunt pisces, & haud longo intervallo herbæ, & arbores, quæ illis aquis vivebant demortuæ conspicientur. Quæ accidunt non quia plantæ sint pisces, vel pisces plantarum naturam habeant, (nisi fortè ubi quis omnia jam velit unum, idemque esse,) verùm quia his, licèt in plerisque nimium, atque nimium dissimilibus, eadem, similesque necessariae erant aquæ ad vitam protrahendam. Sic inquam contingere potest, ut quamvis nullus verus ignis, & nulla vera flamma reperiatur in animantibus; attamen animalium vita aliquo indigeat, quod ab aere continuo suscipiatur, quod item necessarium sit flammarum perennitati. Vel fortassis utraque hæc flamma, & animalium vita in aere communi, quem etiam utilem dicimus, id habeant, quod necessum est pro eorundem sustentatione, etsi fortè illud non sit omnino alterum alteri simile. Cumque desit hoc, vel desint hæc in aere artificiali, vel in eo, qui est in sacro, horrendoque specu Vergilii versibus celebrato, nil mirum sit si iisdem in locis tum ignis, tum animalia exinguantur. Similiter quibuscunque aliis conjecturis responderi potest, quibus nonnulli pugnare, & defendere enitantur vitam animalium esse verum ignem, veramque flammam, modò, inquam iterum, nolimus illud, omnia unum, unum, idemque esse!

10. Neque illi nimis placent, qui ut hæc, atque similia explicent, nitrum quoddam in aere afferunt, quo flamma, & animalium vita nutriantur, cujus defectu utraque vivere cessent. Ut neque placent illi, qui sulphur, vel nitro-sulphur hoc idem appellant, qui etiam varia alia nomina multò sanè aliter usurpant, ac communiter usurpentur, & nova quadam verborum acceptione, nonnisi ipsis cognita omnia explicasse videri volunt. Nam multa mihi videntur præter nitrum, & præter sulphur, & præter quodcunque aliud singulare ipsi dixerint, nutriendæ flammæ idonea: neque omnia, quæ id præstant, nitrum, aut sulphur velim appellari, sed combustibilia, sive inflammabilia, & ad nutriendam flammam idonea. Quoniam enim verò rem istam diligentius perpendens tandem cognovi, nova, & inusitata vocum usurpatione tenebras potius offundi veritati, quam claritudinem nos eidem conciliare. Ego autem malim despici propter claritatem, & rerum de quibus loquor evidentiam, si possim illam assequi, quàm suspici, & laudari propter sesquipedalia verba, & sermonis obscuritatem a stultis, atque stolidis hominibus. Ac cum aliquid consuetis vocibus explicari nequit, novis definitionibus, circumscriptionibusque novis nos satius uti existimo,

quàm nova veterum verborum usurpatione confusionem facere rerum. Neque video, cur oleum, ex: grat., sulphur potius, & non canphura, vel terebinti, aut abietis lacryma, vel è contra sulphur, oleum, vel quid aliud, si licentia uti fas sit, non nos dicere valeamus! Cumque complura, quæ combustibilia sunt, & facile flammam comci piunt, multa sanè habeant, quibus dissimilia, & sint, & dici mereantur, non erunt planè uno, eodemque nomine appellanda, & confundenda, neque ex hoc, quod sint combustibilia, sulphur proinde habere, vel oleum dicenda sunt, sed sufficit ad indicandam communem affectionem dixisse illa omnia esse combustibilia, vel inflammabilia.

11. Sed nunc aliquibus minùs prudentibus facilè videri possum de nominibus disceptare, cum re vera de vanitate principiorum cujusdam sectæ Philosophorum disputem. Idcirco non protraham quæstionem istam. Admonendi tamen quidam fuerunt, qui si dixerint quæstionem esse de nomine, patiantur me potius meis uti vocibus, quibus panem appello panem, & caseum caseum, quàm eorum uti verbis, quibus unum dicunt, & aliud intelligunt, & fortè nonnunquam multa cum dicant, nihil omnino intelligunt. Tamen non negabo plerosque istorum multas habere observationes, quæ non parùm contribuere possint in naturæ rerum indagatione, quod fortassis aliquando manifestum faciam.

12. Verùm enim verò existimo, ut ea explicentur, quæ jam relata sunt, necessum esse rarefactionum, & condensationum naturam perceptam habere, vel saltem hypothesim aliquam de his facere, qua reliqua faciliùs exponantur. De natura autem rarefactionum, & condensationum omnium non plures tribus haberi possunt sententiæ, & quotcunque aliæ ad tres istas reducuntur. I. quæ dicat rarefactiones omnes fieri per alicujus corporeæ substantiæ inter particulas corporis rarefacti novam admissionem, condensationes verò per expressionem alicujus substantiæ. II. quæ dicat rarefactionibus majus spatium inane reperiri inter particulas corporis rarefacti, condensationibus minus. III. tandem quæ affirmet id, quod actu occupat spatium unum potentiam habere ad occupandum spatium duplum, vel triplum, vel quadruplum, atque sic corpora rarefieri deducendo potentiam istam ad actum, & è converso condensari cum potentia, quam habent corpora occupandi subquadruplum, vel subtriplum, vel subduplum spatium deducatur item ad actum.

13. Illi, qui primam sententiam amplectuntur, cum videant magnam procul dubio fieri eorum, quæ inflammantur rarefactionem, rectè ex iis, quæ posuerunt postmodum deducunt, continuè aerem aliquid subministrare, quo olei guttulæ successivè inflammandæ rarefiant. Nam quaque verum perquiratis, non invenietis, unde promptius haberi possit id, quod ad olei guttulam rarefaciendam necessum est.

Præterea iidem isti, qui affirmant rarefactiones omnes fieri per alicujus novæ substantiæ admissionem inter particulas corporis rarefacti, cum videant continuè flumen veluti substantiæ cujusdam egredi ab igne, puta à flamma cereæ candelæ, & interim flammam videri ejusdem molis, sed pedetentim absumi ceram, ex suppositis manifestò concludunt id nulla alia ratione posse contingere, quàm novis, atque novis ab aere succedentibus

particulis, quibus olei, vel ceræ guttulæ dum inflammantur, rarefiant. Atque inde certum esse affirmant ignem, flammamque continuò aliquid accipere ab aere.

15. Ea item, quæ sub cibi, potusque forma in ventrem ingeruntur, solidiuscula cum sint, & ab halituum, & aurarum natura nimis remota; postea, quæ ab animantibus perenni effluvio per universum corporis habitum emittuntur, sunt tenues halitus, auræque leves. Omitto hîc considerare sudores, qui rarè accidunt, & quæ sub urinaram, aut superfluitatum alvi forma expelluntur, quorum moles minima etiam est respectivè ad molem ejus, quod nimis rarefactum insensibiliter postea in tenues auras resolvitur.

Ex his igitur, similibusque suasi inquit, ut cibi, potionesque in humores corporis conversi tam immaniter valeant rarefieri, & in tenues auras resolvi, necessum esse continuò substantiale, & corporeum aliquid animalia ab aere accipiant, quod permixtum humoribus corporis eosdem rarefaciat, & attenuet. Etenim non est unde promptius, & aptius haberi possit id, quod ad tam sensibiles rarefactiones istas est necessarium, & sine additione nullum esse potest molis cujuslibet augmentum. Atque idè in animantibus, quæ jam libero fruuntur cœlo, etiam isti iidem Philosophi, qui dicunt rarefactiones fieri per alicujus novæ substantiæ susceptionem inter particulas corporis rarefacti, rectè ex hac hypothese concludere possunt, multum, atque multum à circumfuso aere animalibus continuò suppeditari ad eorum vitam sustentandam: Nisi enim hæc fiat humorum rarefactio, & attenuatio, atque inde partium resolutio, animal vivere nequit. Et è converso tum in animante, quæ jam cœlo libero fruitur, tum in flamma, quæ nusquam diu est, nisi cœlum pateat, cum perennis quædam fiat partium resolutio, nisi perennis etiam sit aliarum partium attenuatio, & rarefactio; cum animans, tum flamma necessariò extinguantur, de quibus fortasse pluribus alibi dicam.

15. Porro etiam si hæc non fiat de natura rarefactionum suppositio (nimirum, quod semper aliquid novi accedat iis, quæ rarefunt) experimentis compluribus constare potest parte maxima flammam aere nutriri.

Neque hîc adducendum puto in vase optimè clauso, etsi aer fuerit utilis flammam tamen, & animalia pleraque haud diu vivere, quod supra innui. Nam quis facilè respondebit suffocari flammam a fumositatibus ab ipsamet flamma emanantibus, item, & fuliginibus prodeuntibus è corpore animalium suffocari animalia. Quæ verba tam facile prolata a plerisque non solum non explicantur, sed neque intelliguntur: ac meo quidem iudicio neque explicari, neque intelligi possunt, nisi percepta prius rarefactionum, & condensationum natura de qua nunc non vacat plura addere iis, quæ jam breviter retulimus.

At illud manifestum est etiam si in lanternæ superiori parte sit justum foramen, per quod ea, quæ ab inclusa flammula prodeunt, possint exhalare; nisi tamen alicubi (& aptius erit in parte inferiori lanternæ) sit aliud justum foramen per quod aer admittatur, flamma extinguitur. Et licebit observare flammam eandem extenuari, & languescere si foramen parte sui aliqua occludatur, ac si ex angustiori magis, atque magis aperiatur, & amplietur aeri aditus, donec ad justam amplitudinem perveniat, flamma quoque

magis, atque magis crescet, & perveniet ad magnitudinem ellychnio decentem. Simile quid observatur in quibusdam animalibus, in quibus non raro nonnullæ functiones languidius fiunt, aut omnino cessant, ad diminuti usus aeris rationem.

Quinetiam si flammæ, quæ in patenti aere est, parte inferiori, quæ veluti basis est, tenue aliquod facile mobile, & levissimis auris flexibile corpus admoveas (ut sunt serici tenuissima quædam filamenta quovis capillulo tenuiora) observabitis tenue illud corpus impelli versus flammam ab aere, qui continuè ad flammam accedit, non minus, ac perpetuè semper aliquid ob eadem egreditur.

15. Atque his quidem similibusque facile videri potest flamma electricam vim habere, & forte electro omnino similem vim habet, modo falsum sit, quod nonnulli verum existimant, trahi leviora corpora a succino, & ab iis, quæ electricam vim habere perhibentur! Sed de his etiam alia occasione futius, neque forte confutanda dicemus.

17. Illud autem idem multo sane manifestius observabitur in furno dum ligna comburuntur; nam cum parte superiori oris exhalationes igneæ erumpant, si in humiliori regione ejusdem oris pix, thus, vel quid aliud statuat, ex quo fumus elevetur, observabimus fumum illum vento quodam propulsum (aere scilicet, qui fertur ad ignem) horizontali fere motu intra furnum excurrere, & ad ignem accedere.

In fornacibus autem, in quibus lapides excoquantur, non quidem flammæ erumpunt ostio, per quod ligna immittuntur, ac si quando motuum irregularitate erumpant, veluti vento impelli intra fornacem, vel oculis manifestum est. Et ad nonnullos passus ab ostio fornacis stabilis quidam ventus percipitur: videlicet propter aeris ad os fornacis confluxum. Similis ventus observabitur in conclavi in quo sit ignis, cujus exhalationes, fumique per caminum extra ferantur, per quodcumque enim aliud non nimis amplum foramen haud levi impetu aer irrumperet in conclave, secumque advehet corpora leviora per aerem volitantia, haud secus ac flumine vehuntur, quæ in ipso natant corpora. Atque his etiam simillima videre licet in fornacibus, in quibus liquatur, excoquiturque vitrum.

Hoc, inquam, continuo aeris ad ignem affluxu clarissime donemur ignem continuo item multum, atque multum accipere ab aere, quod simul cum combusta olei, sulphuris, aut lignorum substantia fluminis ad instar feratur, inque auras dispergatur.

18. Hinc facile quis poterit conjicere quàm efficax sit ignis ad perpurgandum aera, & eventus simul rationem pernoscere. Nam non minus, ac si in limosam paludem aquas inducas fluminum, rapidiorum præcipue, & puriorum, novis, atque recentibus succedentibus aquis alio transvehentibus, quas in palude auferunt impuritates, perpurgabitur palus, novi, atque novi aeris ad ignem appulsu, dumque ignis motibus aliud decedit ab igne, aliud ad ignem eundem continuo accedit (quæ est Platonis corporum in motibus circumpulsio a Thoma Cornelio disertissime exposita) necessario ejus loci aer perpurgabitur, & renovabitur.

19. Id autem, quod flammæ necessarium est, haud semper reperitur in omni aere, sicuti non in omni aqua æque ea reperiuntur, quæ nutriendis plan-

plantis, & piscibus utilia sunt. Ac omnino veritati consonum est differre inter se aeris cujuslibet particulas non minus ac differant partes, quæ vinum quodlibet constituunt, differre item aerem ab aere, non minus ac differt vinum a vino, vel aqua ab alia aqua; nec minorem esse secundum locos inter aerem, & aerem diversitatem, ac inter aquas tum inter se, tum aliis liquoribus comparatas. Cumque videam spiritus, cæterarumque partium vini, aquæ, olei, mercurii, aliorumque liquorum varios, atque varios in natura esse usus, ac aliquo ex his nequaquam ea omnia fieri, quæ fiunt aliis, pariter existimo non esse cujuscumque aeris eundem usum in natura, ac tantam nonnunquam esse inter aerem, & aerem differentiam, ut alio oppositum fiat ejus, quod ab altero fit.

20. Enim verò ex eorum permixtione constat aer, quæ ex terra, mare, que eleventur, cum illa substantia, quæ cælum replet, & undique terra-queum globum amplectitur. Cumque differant mare, & tellus, quin etiam cum mare differat a mare, & insignes terrarum tractus multum sane differant inter se, ac pleraque sint, quorum vires neque eadem, neque similes sunt; necessario aer ab aere diversus erit, & non erunt unius aeris eadem, ac alterius, vel similes vires, quippe alia sunt componentia unius, & alia sunt componentia alterius. Præterea vario solis aspectu substantia, quam diximus cælum replere, & terra-queo globo undique circumfusam neque sibi similis ubique est, neque similiter, aut æqualiter agitur.

Hinc est quod aliud, atque aliud ad nos advehunt varii venti, & quod ejusdem venti boreæ, ex: grat., in variis tamen regionibus, non sint iidem, aut similes effectus.

21. Hinc etiam est, quod in quadam aeris constitutione ligna tardius comburuntur, & oleum longiori tempore perdurat in lucerna, deficiente scilicet eo propter quod facilius rarescunt, & inflammantur. In alia autem aeris constitutione tum ligna breviori tempore comburuntur, tum oleum minus durat. Et aliquando etiam si eodem utamur oleo, tum breviori tempore, tum majores in ellychnio succrescunt fungi. Ex quibus pluvia, & cæli serenitas prædici potest. Quod indicat Apulejus, apud quem venefica illa ex iis, quæ observabat in flamma lucernæ, pluviam prædixit. Et Apulejus forte monitus à Vergilio fuit, qui cecinit

*Nec nocturna quidem carpentes pensa puellæ
Nescivere hyemem testa cum ardente viderent
Scintillare oleum, & putres concreescere fungos.*

12. Ex his autem, quæ hætenus dicta sunt non erit nimis difficile rationes investigare, propter quas homines, & cæteræ animantes in uno aere vegetiorem ducant vitam, & ad omnia alacriorem, in alio aere tanquam minus viverent, languidiores sint ad omnia, & ad pleraque omnino impotentes. Licebit etiam investigare cur in uno aere plures ad extremam perveniant senectutem, in alio pauciores? & cur in uno aere magis appetant animalia, facilius concoquant, & magis dissipent, in alio vero, vel prorsus non egeant, ut hyeme serpentibus accidit, vel vix tenui aliquo, levique indigeant cibo, potuque, ac si plus accipiant facilius ægrotent? & undè fit id, quod unusquisque facile observavit, in quadam aeris constitutione se semetipso ingeniosorem, & perspicaciorem, & qui plura mente videat, &

rectius dijudicet, & qui magis vivat, ut sic dicam, in alia se metipso stupidiores, tardiores, ineptiores, ad sumnum magis proclivem, & qui minus vivat?

23. Quæ quidem non contingerent, nisi aere potissimum viveremus, & nisi humoribus nostri corporis respirationis beneficio magna semper fieret accessio ex iis idoneis substantiis, quæ in aere utili reperiuntur. Atque hæc postea una cum liquoribus animati corporis, quibus permiscuntur, in circulum rapta, & variis usibus absumpta, iterum insensibili transpiratione in auras abeunt, atque iterum aeri nobis circumfuso confunduntur.

24. Ac si libeat aliquid addere, quo videamur ad illos accedere, qui additione alicujus substantiæ affirmant corpora rarefieri, sanguinem, inquam, cæterosque liquores animati corporis additione istarum particularum ab aere desumptarum rarefcere, & attenuari, ut purior tandem, & tenuior eorundem pars spiritus possint appellari. Neque alios reperire, & concipere in toto corpore possumus spirititus, nisi quos genitos credimus, permixtione eorum, quæ ab aere accipimus spiritus, nisi quos genitos credimus, permixtione eorum, quæ ab aere accipimus, cum efficacioribus particulis humorum, quæ in animante sunt.

25. Rarefactio autem ista major, minorve est pro ut ea, quæ intus sunt, & ea, quæ extrinsecus adveniunt, magis, minusve ad id sunt idonea. Et in magis quibusdam ambientis substantiæ mutationibus tam immanis illa est, ut pluries viderim ranas turpiter toto corpore turgere oculis nimium extra orbitas prominentibus. Ossæ scilicet capsulæ, quibus oculi conduntur, oculorum nimium turgidorum factæ erant incapaces. Nonnunquam verò hæc eadem rarefactio etsi mole neque major, neque minor sit, quam deceat, non est tamen earundem, aut plane similis sit usus. Ac aliquando omnino cessat ista humorum rarefactio in animalibus, aut olei in lucerna: unde tam animalia, quam flamma vivere nequeunt, quod contingit in aere artificiali, & in crypta canum, aliisque in locis similibus, ut lucidius fortè dicam Deo favente cum de respiratione agam, & cum nonnulla de foetus in utero natura explicabo.

Hæc autem, quæ retuli veluti fundamenta sunt eorum omnium, quæ rectius dici possunt, vel ut ignis natura, vel ut usus aeris necessitas exponatur, & quid conferat si bonus est, quid noceat aer, cum est vitiosus, atque ut item alia his similia explicentur, ac de nonnullis aliquid fortassis postea dicam sigillatim, nunc verò ne vestra abutar humanitate rerum summan tradidisse sufficiat.

S U M M A R E R U M.

In hac Secunda Differtatione contentarum.

- 1 **O**ccasio scribendi.
- 2 **Q**uid pro aere artificiali mortifero accipiat.
- 3 **C**rypta canum, vulgò dicta, in agro Neapolitano substantiam habet mortiferam aeri artificiali similem: ut patet ex eventibus, qui referuntur.
- 4 **E**x quibus fortè Vergilius, cuius carmina adducuntur, occasionem desumpsit multa de Averno canendi.
- 5 **N**arrantur infelices eventus, mortesque nonnullorum hominum, vel in sepulchretis, vel in puteis, in quibus frumentum diutius fuerit conditum, vel in fodinis, sive metallorum, sive carbonum fossilium.
- 6 **U**t arte paretur aer mortiferus.
- 7 **N**on est necessaria utilis aeris extractio ad habendum aerem artificialem mortiferum, quod confirmatur pluribus experimentis.
- 8 **A**nalogiæ narrantur, quæ sunt inter flammam, & animalium vitam.
- 9 **Q**uæ quidem analogiæ tanti non sunt, ut vera flamma, verusque ignis asserendus sit in corporibus animalium.
- 10 **M**inimè placent illi, qui defectu nitri cuiusdam in aere, vel sulphuris, vel nitro-sulphuris deficere flammam, & enecari animalia affirmant; sibi que licitum faciunt nomina multò sanè aliter accipere, ac communiter accipiantur.
- 11 **E**t cum istis philosophis, non quidem lis tantum de nomine est.
- 12 **A**d explicandum ea, quæ observantur in aere artificiali, crypta canum; aliisque in locis necessum est prius rarefactionum, & condensationum naturam perceptam habere: de qua tres tantum opiniones haberi possunt.
- 13 **I**lli, qui credunt rarefactiones fieri per accessum novæ substantiæ, iure merito affirmant ignem, & ea omnia, quæ inflantur aliquid continuo ab aere circumiecto accipere.
- 14 **I**dem isti Philosophi meritò etiam affirmant multum sanè animalia à circumfuso aere continuo accipere.
- 15 **F**lammam parte maxima aere nutriri multis confirmatur experimentis.
- 16 **F**lamma electri vim habere videtur.
- 17 **Q**uæ omnia manifestius observantur in fumo dum ligna comburantur, & in fornacibus, in quibus lapides excoquuntur.
- 18 **I**gnis vis ad perpurgandum aerem demonstratur.
- 19 **N**on quicumque aer id habet, quod nutriendæ flammæ necessarium est.
- 20 **E**x quibus aer componatur, & cur differat aer ab aere, & cur ejusdem venti non sint in omnibus regionibus similes effectus.
- 21 **P**ro ut varia est aeris constitutio magis, minusve durant ea, quæ comburantur, vel inflantur, & tardius, vel citius concreverunt fungi in lucerna, ex quibus de pluvia, vel serenitate fieri potest conjectura.
- 22 **P**ro ut varia est aeris constitutio, ita haud similiter multa fiunt in homine, & in animantibus.
- 23 **A**ere potissimum homines vivunt.
- 24 **Q**uid spiritus sint in corporibus animalium.
- 25 **N**on quivis aer æque idoneus est ad humorum in corpore animalium rarefactiones.

DISSERTATIO TERTIA

De rarefactionum natura.

A D N. N.



Itius vobiscum agere videbor, & cumulatius mihi consultum, atque melius provisum erit, si vos omnes innominatos præteream; nam nullum cum nominem, excipio neminem, & non solum notis, sed occultis etiam satisfaciam. Quod si ex iis, qui adhuc non sunt manifesti, postmodum aliquis fiat, qui tibi fortè velit nominatim satisfieri, parte non minima futuri laboris levatus, non immeritò existimabor; nam cum jam omnibus, & consequenter singulis, & prout occasio datur ad pleraque communi vestrum omnium consilio agitata respondeam, in posterum ad ea tantum, quæ dies ostendet, respondere debere videbor. Dixeram equidem, fatebor ultro, tres tantum posse nos habere de rarefactionum, & condensationum natura sententias, cunctasque, quas homo potest excogitare de his opiniones ad tres facilè reduci; cujus quidem verissimæ assertio- nis ommissa tunc fuit ratio; enim verò pudit in nobilissimo congressu, vi- rorum omni genere eruditionis ornatissimorum, atque clarissimorum faci- liora minutius examinare, & in mustaceo, ut dicitur, gloriam quærendo pluribus in iis immorari, quæ cuivis in studiis mediocriter versato esse pos- sunt obvia. Verùm non sine aliqua animi molestia, opinionisque, quam de vobis conceperam diminutione audiui audacter me de his protulisse senten- tiam, & fastu nimio me hæc determinasse vos fuisse conquestos, quasi non solum omnes legerim de his scriptores, verùm etiam circa hæc eadem pos- sibilia omnia perspexerim! Atque hoc mihi de vobis magis displicuit, quod iudicio vestro audiverim sententiam meam visam fuisse falsam, & plures, atque plures habere vos de rarefactionum, atque condensationum natura sententias, quæ non omnes possint ad tres illas reduci!

2. Cum quis vera loquitur, etsi fortassis ea nequaquam ab omnibus in- telligantur (cujus rei ex vobis nunc facio periculum) neque fastu loqui, neque audax dicendus est; sed potius meliora, & plura videns. An audax is fuit, qui generalissimè possibilia omnia in his prospexisse professus, quam- cunque in sphaera plano factam sectionem circulum esse pronuntiavit? Mi- nimè: quin admirandus idem, & laudandus est; gratiæque haud leves ei- dem semper debebunt imperitiores, qui paucis verbis multis sunt liberati ambiguitatibus, & cum honesti, modestique, admirationeque pleni quærent, an non aliqua sectio in sphaera plano facta circulus non sit, confirmantur in veritate, cum nullam prorsus inveniant.

3. Ego autem etsi potuissem tranquillo animo expectare à vobis quar- tam sententiam, si non tres illæ satis, superque sunt; attamen (non enim ego vos odio habebo unquam, etiam si vos me odio habeatis) ut vos libe-

rem ab irritō vestro conatu in pessima illa inquisitione non minus vana, ac si quæreretur sectionem in sphaera plano factam, quæ non sit circulus, rationem nunc vobis afferam, quam tunc omisi, ne sapientissimos plerisque viros aliqua afficerem injuria, quasi non hæc ex se sciant.

4. Attendite quæso si quid omittam. Ac primum loquar de rarefactionibus, id tantum assumens, quod ab omnibus admittitur: ea dici rarefieri, quæ ampliantur, & majus spatium videntur occupare, quam prius occuparent: nunc sic.

Corpus quodcumque vel potest re vera, & strictè rem accipiendo, sive rigorosè loquendo majus spatium occupare, quam nunc occupet, vel non potest re vera majus spatium occupare?

Nemo vestrum poterit effugere alterum ex duobus; nam est principium per se notum, aliquid est, vel non est, aliquid possibile est, vel non est possibile, fieri potest, vel non potest fieri.

5. Si admittatur primum, jam habebimus unam sententiam de natura rarefactionum: corpus scilicet, quod nunc occupat unum spatium potentiam habere occupandi spatium majus, quam nunc occupet. Quod si unquam occupet majus spatium, vel, quod idem est, si unquam potentia illa deducatur ad actum, & corpus occupet re vera majus spatium, quam prius occuparet, tunc corpus illud dicetur rarefactum. Neque ex illa hypothese *corpus potest re vera occupare majus spatium, quam nunc occupet*, alia sententia nasci potest de rarefactionum natura excepta unica, quam modo explicavi; quæve nihil omittit eorum omnium, quæ continentur in hypothese, sed omnia comprehendit: rarefieri scilicet corpora cum id, quod possibile est, deducitur ad actum, rarefieri cum re vera occupant majus spatium, quam prius occupassent.

6. Verum si non admittatur illud *posse re vera corpus quodpiam majus spatium occupare, quam nunc actu occupet*; sed aliquando videri tantum, & proinde dici rarefactum; habebimus hoc, quod omnino continetur in hac secunda hypothese: videlicet in spatio majori, sive ampliori, quod videtur occupare corpus, quod dicimus rarefactum, esse multa spatiola, quæ re vera non occupantur à partibus corporis rarefacti. Enim verò si totum illud majus spatium, & quæcunque sunt in eo spatiola, occupentur re vera à partibus corporis rarefacti, oporteret admittere id, quod negamus *posse corpus aliquod occupare majus spatium*, & destructa secunda hypothese, restitueremus primam, quæ supponit *posse re vera corpus quodpiam majus spatium occupare, quam nunc occupet*.

Cum igitur in spatio ampliori, quod videtur occupare corpus rarefactum, sint quædam spatiola, quæ re vera non occupantur à partibus corporis rarefacti; jam de his spatiolis quærere possumus, vel illa esse omnino inania, vel illa eadem esse adventitio aliquo repleta corpore? Atque iterum in angustiis erimus, è quibus non valeamus effugere, quin alterum ex his duobus admittamus: *multa esse in spatio, quod videtur occupari à corpore rarefacto inania spatiola*, vel *in spatio, quod videtur occupari à corpore rarefacto re vera esse multa adventitio repleta corpore spatiola*. Quæ duæ aliæ sunt sententiæ de natura rarefactionum; altera, quam tenent illi, qui vacuum admittunt; altera, quam habent illi, qui cum affirmant repugnare vacuum

in natura, negant posse corpora quaecunque re vera majus spatium occupare, quam unquam occupaverint. Qui postremi si unquam viderint corpus aliquod rarefactum, necessario debent concedere videri illud occupare majus spatium, quoniam alicujus novae substantiae facta accessio est inter illius particulas.

7. Numero quinto unam habuimus sententiam; numero sexto habemus binas, quae simul sumptae faciunt trium sententiarum summam: 1 & 2 summa 3. Neque quicquam omissum fuit in quo possit collocari quarta sententia. Patet igitur propositum tres tantum de natura rarefactionum posse nos habere sententias.

8. Quod etiam dicendum est de condensationum omnium natura, & ferè iisdem planè verbis rem explicabimus: videlicet unam sententiam esse eorum, qui dicunt posse re vera corpora in angustius spatium cogi, quam nunc actu occupent; binas verò eorum, qui cum hoc negent; alii tamen affirmant dari spatiola omnino inania inter particulas corporum, quae spatiola minora, vel pauciora, vel minora simul, & pauciora sint, cum corpus condensatur: alii verò, qui cum non admittant vacuum, affirmant inter particulas plerorumque corporum reperiri aliquid aliud corporeum item, quod totum, vel ex parte exprimatur cum corpus condensatur, atque inde fieri, quod videatur corpus condensatum minus spatium, quam antea occupare, cum re vera tantundem loci occupet semper.

9. Posset aliquis conjunctis prima, & secunda sententiis componere quandam veluti quartam, & ex secunda, & tertia facere aliam sententiam veluti quintam, & ex prima, & tertia facere aliam, veluti sextam sententiam, & ex omnibus tribus simul sumptis facere quandam septimam sententiam, ut tres sint simplices, quatuor compositae sententiae, verum hoc puerile nimis esset.

10. Item potuissim ego rem aliter, atque brevius proponere, & expedire; sed vestro nomini, gloriaeque datum est pluribus exposuisse: quo etiam addam philosophos omnes omnino opus habere unam ex illis tribus sententiis admittere. Enim verò frequentissimae sunt in natura rarefactiones, & condensationes, ut vix ultra quicquam progredi valeant in physica disciplina, nisi prius determinaverint (saltem per aliquam suppositionem, quae non sit manifestò falsa) ut fiant condensationes, & rarefactiones. Quod non animadvertentes nonnulli pluries turpiter lapsi sunt, & multum, atque multum locuti, nihil tandem dixerunt. Doctiores autem, & ingeniosiores Philosophi aggressi naturae rerum explicationem primum determinarunt dari, vel non dari vacuum; postmodum unam ex illis tribus opinionibus admiserunt. Sed de his jam plusquam satis.

SUMMA RERUM.

In hac Tertia Dissertatione contentarum,

- 1 **T** Res tantum esse sententias, quas de natura rarefactionum, & condensationum habere possumus.
- 2 Quod equidem non est adaucter, sed verè pronuntiatur.
- 3 Qui non intelligit tres tantum nos habere posse de rarefactionum natura sententias debet invenire quartam.
- 4 Probatur non plures tribus esse de rarefactionum natura sententias.
- 5 Explicatur quænam sit prima sententia.
- 6 Explicatur, quænam sint binæ reliquæ sententiæ de rarefactionum natura.
- 7 Omnes in universum sunt tres; neque plures haberi possunt.
- 8 Similiter ostenditur tres tantum de condensationum natura nos posse habere sententias.
- 9 Puerile esset asserere plures sententias, ex varia commixtione trium expositarum.
- 10 Philosophos omnino debere unam Ex illis tribus sententiis admittere.



DISSERTATIO QUARTA.

*Qua quaeritur an frigidi sit condensare, &
calidi rarefacere.*

AD ILLUSTRISS. ET EXCELLENTISS. DD.

SYLVESTRUM VALERIUM

Aequitem, Divique MARCI Procuratorem,

E T

FRIDERICUM MARCELLUM.



IUM saepe, dum rerum naturam contemplor, multa in hominum ingeniis, moribusque demirer Illustrissimi, atque Excellentissimi Domini; eos tamen saepè numero non convenire, & frequenter unum, idemque caput non esse manè, & vesperi unius planè, vel ejusdem ferme sententiæ non sum unquam demiratus. Etenim multa mutantur in homine, ut aliter postmodum videat, & aliter sentiat. Et non pauci mali firmi in omnibus, veluti vento folium hac, illac opinandi facilitate impelluntur. Atque non minùs ac facies, vultusque, quorum difficillimum est duos invenire aded similes, qui non facile internoscantur, hominum differunt inter se ingenia. Quin etiam plerique haud rectè in pueritia instituti, & principiis usi nimis longè remotis ab iis, quæ ipsa natura cunctis æqua hominum menti veluti sigillo impressit, præjudicia multa biberunt, & nonnullis falsis opinionibus tam tenaciter adhæserunt, ut meliora non videant, etiam si ostendantur, vel si videant, non tamen intelligant, & amplectantur illa: sed aspernentur, & pejora ut priùs sequantur. Verùm sunt etiam nonnulli, qui supra alios intelligendo se tollant, quorum exemplo, & consuetudine semper ego aliquid condiscam. Sed alii quoque sunt, qui cum multa quidem intelligant, ubi ac si digito fuerint ipsis indicata, & propterea à veteri proposito incipiant titubare, difficultates tamen plerasque habeant, quibus vereantur meliora amplecti, & amputatis erroribus aliquando demum pati aliquem in eorum animis veritati esse locum.

2. Hinc est, quod nemini succenseam, cum aliquas videam esse ortas difficultates circa ea, quæ de ignis, & vitæ animalium natura fueram speculatus; dum ea intueremur, quæ in aere artificiali observantur. Non equidem quod aliquid ex illis, quantum huc usque audiavi, non videatur verum; sed timent ne illis iisdem argumentis aliquid ostendatur falsum, quod ipsi priùs verum credidissent.

3. Et

3. Et profectò summa eorum, quæ tunc dicta sunt vera omnino est: magnam nempe esse eorum, quæ comburuntur, vel inflammantur; sive eorum, quæ ignem concipiunt rarefactionem, quod innumeris constat experimentis, & præ omnibus pyrii pulveris accensione in tormentis bellicis, quod tunc omissum fuit: Nisi enim maxima esset ejusdem pulveris rarefactio, non equidem foret vehementissima plumbei, vel ferrei globi explosio. Magnam item dictum fuit esse partium in animantibus dissolutionem, & rarefactionem; idcirco enim corpus animantis quotidiano cibo, potuque reficiendum est, quoniam quotidie in tenues, rarasque auras resolvitur; Quod idem est ac dicere, post varias alterationes, ususque varios, ciborum, potuumque substantiam tandem nimis, atque nimis rarefactam in tenues halitus converti, & continua transpiratione in leves auras abire. Atque illud quodque verissimum erat, nisi nos dicamus id, quod actu unum spatium occupat potentiam habere ad duplum, vel triplum spatium occupandum, vel nisi dicamus rarefactionem fieri ob plura, vel ob majora, vel simul ob plura, & majora omnino vacua spatia, posita inter particulas corporis rarefacti, necessariò debere nos admittere tertiam sententiam, quæ in his haberi potest: accessione scilicet alicujus nove substantiæ corpora rarefieri, ac huiusmodi substantiam in ignis, partiumque corporis animalium rarefactionibus haberi ab aere, non quidem quovis, sed qui sit ad hoc idoneus, cum magna sit inter aerem, & aerem differentia.

4. Quæ omnia tam vera sunt, & tam clarè patent, ut à nemine, quem sciam doctiorum in dubium vertantur. Attamen ab aliquo dubitatum est, ne ab his fortè sequatur respirationem non esse præcipuè institutam ad refrigerandum cor, vel si hoc admittatur, ne sequatur illud aliud non esse frigidi condensare, æquè ac calidi est rarefacere, quod ab Aristotele pronunciatum est, cui ferè omnes subscribere, ut nihil jam tam frequens sit in ore Philosophorum?

5. Risi planè inanem hominis timorem, qui illis veretur consentire, quæ manifesta sunt, ne eorum, quæ crediderat deprehendat falsitatem! cumque haud difficile sit virum doctissimum Aristotelem in meliorem sententiam trahere, ut tamen adversus me invidiam moveat, concitetque odia iniquorum hominum, Aristotelem adducit, quem etiam propterea criminibus omnibus onerare non veretur! Sed si vacabit, aliquando ostendam plerosque hoc ipso decipere simplices animas, quod Aristotelei se prædicent, cum neque legerint unquam Aristotelem, neque si legant intelligere valeant.

6. At nunc primò inquam, quod memini respondere solitum virum doctissimum Joannem Baptistam Capuccium, qui circa hanc ipsam quæstionem monebat, conceptum frigidi, sive frigoris, sive frigiditatis non includere conceptum densi, sive densitatis, & è converso conceptum densi, sive densitatis non includere conceptum frigidi: unde est, quod possimus habere nnum absque alio. Similiter agebat conceptum calidi non includere conceptum rari, sive raritatis, & è converso conceptum rari, sive raritatis non includere conceptum calidi, sive caloris, aut caliditatis. Et omissis illis, qui pro calido causas quasque intelligendo (calidum innatum, sive naturale quidam appellant) quibus aliquid sit in viventibus, calidi nomen fecera

cere æquivocum, sicuti est canis nomen, quod sydera, piscem, & terrestrem quoddam animal significat, addebat conceptum sive frigidi, sive calidi usitata magis significatione accepti, necessario includere eam perceptionem, sensationemque, quæ frigidi, sive calidi dicitur. Itaut cum dicimus objectum aliquod, puta nivem, vel ignem esse frigidum, vel calidum, semper hoc referatur ad sensum: videlicet, quod objectum illud applicatum aptè eam faciat sensationem, quæ frigidi, vel calidi appellatur, & idem sit objectum esse frigidum, vel calidum, ac objectum sic applicatum facere, vel excitare frigidi, vel calidi perceptionem. Quæ perceptio ubi tollatur è medio, jam ignoramus, quid pro frigido, quidve pro calido intelligendum sit! Hinc est, quod cuncti semper sensum adhibeant iudicem, ut dignoscant frigidum ne, an calidum sit objectum aliquod, & frigidum illud dicunt, si refrigeret sensum, hoc est si eam excitet sensationem, quæ frigidi dicitur, calidum si sensus ex illo fuerit calefactus.

7. Conceptus autem densi, & rari non quidem aliquid includunt, quod referendum sit ad sensum, vel ad sensationem aliquam, sed potius aliquid, quod referri debeat ad spatium nobis, & nostro animo, sensibus, organisque sensuum extrinsecum, quod quidem spatium modò ampliùs, & latius occupetur, sive saltem videatur occupari ab objecto, & tunc dicimus objectum rarum, sive rarefactum, modo strictius, & angustius sit spatium, quod videtur occupare objectum, & tunc idem objectum densum, sive condensatum dicatur. Porro ut illos adjuvaret Capuccius, qui minus intelligentes essent, illud Vergilii exponebat.


Apparent rari nantes in gurgite vasto:

hoc est multum maris interpositum erat inter singulos nantes. Qui ut densi, conferti que intelligantur natate, non est aliud necessum, nisi eosdem intelligere accessisse, & factos fuisse proximiores ad invicem, ut minus postea maris inter singulos interponatur; natentque in gurgite minus patienti, sive angustiori. Quæ omnia intelliguntur absque ulla relatione ad sensationem quamcunque.

8. Atque ideò ad intelligendum aliquid rarefactum, sive condensatum, non est necessum simul intelligere illud idem calidum esse, vel calefactum, aut frigidum, sive frigefactum, & è converso, & si contingere possit aliquid esse rarum, sive densum, quod item applicatum sensui frigidi, vel calidi perceptionem possit facere, & propterea frigidum, vel calidum mereatur quoque dici, non minus ac item contingere possit aliquid rarefieri, vel condensari à causa, quæ alteram ex illis duabus sensationibus excitare valeat; licet non ideò rarefiat, vel condensetur, quia calefacit, vel quia refrigerat; verum quia ipsius partes magis, vel minus accedunt, vel removentur ad invicem.

9. Atque hic idem doctissimus Vir, ut erat ingenio acutissimo, ex hoc ipso, quod plerique affirmarent frigidi esse condensare, ostendebat (quicquid tandem pro frigido acciperetur) frigidum posse rarefacere, & ex hoc ipso, quod dicerent calidi esse rarefacere, ostendebat (quicquid tandem pro calido intelligeretur) calidi item esse aliquando condensare. Quæ principio videbantur vel absurda, vel saltem paradoxa: at ille sic breviter rem totam explicabat. Quocunque motu, sive quocunque, quod movendi vim habeat

habeat fieri potest, ut aliud quodpiam corpus quaqueverfus moveatur. Quod manifestum est in horologiis, quorum partes solo motu contorti chalybis elasticam vim habentis diversissimis planè modis, & ad varias plagas moventur: & pro varia horologii positione pars eadem nunc in horizontali plano, nunc in verticali, nunc in plano diversimodè inclinato suas tamen obit motiones. Similiter motu gravium pro varia organizatione machinarum fieri potest, ut aliquod corpus vel ascendat, vel descendat, vel horizontaliter, vel secundum quamvis inclinationem agitetur. Estque naturæ lumine manifestum, vim, quæ potest transferre corpus quodpiam à loco B ad locum C, aliter applicatam posse revehere idem corpus à loco C ad locum B, in quo priùs erat, ut si dicam patere lumine naturæ naviculam, quæ nos ducit Venetiis Muranum, posse nos reducere Murano Venetias. At rarefactiones, & condensationes non fiunt sine motu, non consistunt sine motu, & ea, quæ possunt corpus quodpiam vel rarefacere, vel condensare, non erunt motus expertia. Ut autem omnem adimeret scrupulum, addebat, sine motu locali partium corporis nullas omnino fieri unquam posse corporum quorumcunque, sive rarefactiones, sive condensationes.



Consideratione autem dignum erat, quod contendebat convenire hæc cuicunque hypothese, & esse admittenda, quamcunque tandem habuerimus de rarefactionum, ac condensationum natura sententiam; neque ab iis, qui disertissimum philosophorum omnium (uno excepto Platone iudicio Marci Tullii) Aristotelem sequuntur, vel Democritei, aut alii dicuntur, validi quicquam adversus hæc adduci posse. Omnes enim modo termini tantum intelligantur, admittere debent in rarefactionibus partes corporis, quod rarefit loco moveri, ut totum postea videatur majorem locum occupare: in condensationibus item partes corporis, quod condensatur loco moveri, coarctarique, ut totum postea videatur spatium angustius tenere.

Igitur aiebat si frigidi est condensare, frigidi etiam erit loco movere, & in angustius spatium cogere partes corporis, quod condensatur.

At motu quocunque ad quamvis plagam alios motus quoscunque ad quasvis plagas etiam ad oppositam dictum priùs fuit excitari posse.

Frigido igitur si possent moveri partes quæcunque corporis B ab A, A,

A, A, ad C, C, C, C, & sic condensari corpus B; eodem frigido aliter applicato, atque in alia corporum organizatione eadem partes corporis B moveri poterent ab C, C, C, C, ad A, A, A, A, & sic corpus B rarefieri, constituique sicut prius erat. Atque idem adversus hæc nihil notatu dignum posse adduci monebat.

10. Verum ego etsi pernicious essem donatus alis, non tamen valerem tanti viri sublimes volatus imitari, & hæc vobis clarius exponere, quæ ille brevi ratione demonstrabat; attamen existimo cuncta facilia esse excultissimo ingenio vestro, & jam vos tum percepisse vim sermonis disertissimi Capuccii, tum si libuerit posse vos eandem aliis ostendere. Ego autem omnis rationibus subtilioribus nonnulla adducam, quibus manifestum sit non paucas rarefactiones, & non paucas condensationes quandoque fieri in quavis cœli constitutione sive calida, sive frigida illa dicenda sit: ut etiam si respiratione frigidus aer admittatur, multæ tamen in humoribus accessione ejus, quod ab aere accipiunt animalia, rarefactiones fieri possint. Quin etiam constabit posse contingere aliud condensari, aliud rarefieri unius, ejusdemque aeris beneficio, quod Capuccii sententiam confirmat.

Neque adducam, quæ eodem tempore in sublimi fiunt tonitrua, & fulmina, & pluviarum, tempestatumque coactiones, quæ omnia non nisi aliis rarefactis, aliis eodem tempore condensatis fiunt. Neque iis utar, quæ observantur in aere artificiali mortifero, vel in crypta canum, vel in sepulchretis, vel aliis in locis, in quibus sive æstatis, sive hyemis temporibus illæ cessant rarefactiones, quæ necessariae sunt ad ignis perennitatem, quod neque ad calorem, neque ad frigus potest referri. Sed animum quæso advertite ad ea, quæ fiunt dum sal tartari humore liquidus, vitriolique spiritus sese mutuò tangunt in patenti aere: statim namque quæcunque fuerit anni tempestas, amborum fit magna rarefactio, & veluti efflagratio quædam. Neque æstatis calor, aut hyemis frigus hanc impediunt rarefactionem. Neve quis dicat hæc item eodem tempore videri incaluisse; nam calor ille subsequitur, non præcedit rarefactionem, & ego quædam ostendam, quæ dum rarefiunt videntur perfrigerari, sive frigidiora esse, quàm prius fuerint!

Pulveris item pyrii admota ignis exigua scintillula vehemens est rarefactio in quacunque cœli constitutione, & modo ficcus sit pulvis, tum æstatis, tum hyemis temporibus illa contingit. Nec Boreæ tam latè patentis frigus tam immanem rarefactionem impedit. Nec immensum aeris frigidi veluti mare undique circumfusus scintillulæ vim, qua bellicus pulvis accenditur, & rarefit, quicquam retardare, aut coercere valet!

Sunt insuper substantiæ quædam ponderosæ nimis, quæ in vase clauso liquorum crassiorum conservant formam; sed si aliquid eorum libero, & aperto statuatur in aere, tum hyeme, tum æstate statim primum in nubem crassiculam convertitur; mox magis, atque magis attenuatum tenues evanescit in auras. Hujusmodi liquorum non semel meminit Robertus Boyle Nobilis Anglus diligentissimus naturæ perscrutator, & ego pluries quid simile observavi tum Romæ, tum Venetiis.

11. Quo facile mihi persuasum est posse dari aliquid, quod in vase perfecte clauso propriam servet formam, in aere autem libero, & aperto ignem
conci-

concipiat. Quorum multa passim narrantur à scriptoribus, & non raro habita sunt, tanquam naturæ superarent vires, à Deo ter Optimo Maximo immediatè nobis ostensa. Quin & ignes, quos nonnulli dicunt æternos, hujus generis esse existimo: non equidem, quod alicubi sinè pabuli indigentia diu inclusus ignis esse possit, sed quod adaperto loco ex quibusdam ibi inclusis, & ex patenti aere statim producat. Et fortè etiam aliquando fumus similis illi, qui attollitur ex liquore, quem refert Boylius, vel pro igne acceptus est, vel ab igne genitus est creditus, qui in loco illo clauso diu vixerit, & postmodum propter aeris communicationem fuerit extinctus, cum res fortè omnino ex opposito se habuerit, videlicet quod nullus clausus fuerit ignis; sed vel genitus propter extrinseci aeris communicationem, vel fumus tantum tunc elevatus sit propter eandem aeris communicationem.

12. Porro in thermometris hermeticè clausis flante borea, qui apud nos frigidus dicitur, eodem momento spiritus vini condensatur, & aer inclusus attenuatur, & rarefit. Mutata autem aeris constitutione in calidiorem inclusus vini spiritus rarefcit, majoremque sibi locum exposcit; aer verò inclusus in angustius spatium constipatur a rarefcente vini spiritu: hoc est condensatur aer, dum vini spiritus rarefit. Quæ vel sola patent inspectione.

13. Item in machinis pneumaticis aer ad libitum ferè modò maximè attenuatur, modò maximè condensatur; nulla facta imaginabili, aut certè perceptibili in calido, vel frigido mutatione.

14. Si quis autem contentiosus homo contra velit pugnare, & asserere alia ex his fieri per se, alia fieri per accidens, alia formaliter, alia virtualiter tantum contingere, ego nunc non per Pollucem repugnabo, & dummodo ille quisquis fuerit, fieri hæc, & passim contingere affirmet, libenti, gratoque animo in præsentia dabo illi alia ex his per se, alia per accidens fieri, alia formaliter, alia virtualiter tantum accidere concedam!

15. Neque aqua omittenda est, quæ primùm frigore non parum condensatur; postea dum in glaciem convertitur rarefit, & multò majus spatium occupat: quamobrem glacies aquis innatat ejusdem generis ex quibus fit. Tantaque vis ejus est, quod aquam dum in glaciem illa convertitur, rarefacit, ut propter loci incapacitatem, nedùm vitra, sed metallici orbes, in quibus aqua illa continetur, plerumque disrumpantur.

16. Ad hujus eventus autem similitudinem exponendum videtur illud Vergilii Georg. 4.

*Et quum tristis hyems etiam nunc frigore saxa
Rumperet, & glacie cursus frænaret aquarum.*

videlicet quod pleraque saxa poris suis humorem admittentia, qui postea frigore congelascant, & mole crescant, vi disrumpantur rarefactæ aquæ, & majorem, atque majorem sibi locum exposcentis.

17. Atque vidimus hoc anno pluribus in locis sola glaciei vi marmoreos etiam lapides dimotos. Vidimus, & lapides plerosque, qui sese mutò priùs contingebant vi urgentis cunei ad morem glaciei sejunctos, remotosque factos ad invicem, ut marmoreæ proindè scalæ non multos ante menses eleganter constructæ ad ripas majoris canalis Venetiarum ante fores Templi Sanctæ Mariæ Salutis Reverendissimæ, & Spectatissimæ Congregationis de Somasca refarciendæ fuerint! Et glaciem etiam vidimus hoc eodem anno

multas adaperuisse vias imbris, & adveniente tepido & aquoso austri flatu decimoquarto, & decimotertio Calendas exacti mensis Martii, quo tempore pigrum gelu ex parte solutum est, vix aliquid fuisse tutum in Venetorum domibus, quod non ab imbre corrumpere, quin & non paucae domus diruere. Litesque ex hoc ortae sunt inter conductores, & domorum dominos; dum alter, alterius incuria tantum malorum factum contenderet, cum glacies re vera fuerit in culpa. Vel si quae fuit hominum negligentia, ea potissima est, quod non statim post nivium casum tecta purgaverint; laticque niveis sphaerulis manu compactis inter se ludentes passi fuerint nives esse intestis multorum profecto, atque multorum spatium dierum. Circa meridiem autem solis radiis, etsi languidulis, aquae quaedam guttulae solutae ex nivibus sunt, quae repentes occupavere rimulas inter ligna, saxa, lateresque, aut alias quacunque datum est. Sed vesperi guttulae istae rigentes iterum, geluque majorem locum sibi exposcentes veluti adacto cuneo rimulam effecere ampliore. At sequenti die iterum circa meridiem liquescentes in rimulis congelatae guttulae, minusque spatium occupantes locum concesserunt novis aquis, quae ampliore jam rimulam repleverunt. Inde vesperi, noctuque iterum dum in glaciem conversae majus spatium sibi exposcerent, iterum veluti adacto cuneo adhuc ampliore rimam effecerunt. Similiter etiam factum est multis aliis sequentibus diebus. Hinc dimoti lapides etiam graves, & marmorei e suis sedibus, dilapsaeque domus nonnullae caduciores, & in aliis viae multae adapertae imbris: adeo ut decimoquarto Calendas Martii cum tepidus vesperi, & humidus inciperet flare auster solutis noctu nivibus, quibus tecta premebantur, solutoque gelu inter rimas parietum, & contignationum magnus fuerit aquarum in domos influxus.

18. Quibus quidem rite perpensis manifestum erit saepenumero frigore, geluque haud leviora fieri, & minoris momenti, ac igne fieri consueverint: cujus vi metallum liquefcit potius, quam quod urgente aqua intus rarefacta alicubi vas adaperiatur! Videlicet, aiebat Capuccius, quaedam igne admittuntur inter corporum particulas, quae haud difficulter dimittantur, & frequenter influxus simul, effluxusque facilis est cujusdam substantiae, ut non sit proinde necessum disrumpi corpora, vel vasa diffringi, quae aliquid a circumfuso igne susceptum admittunt. Quaedam vero circumjecto frigido (puta nive, ex: gr.) ita admittuntur inter aquas contentas vitreo, vel metallico orbe, vel in poris nonnullorum saxorum, ut haud postea facile dimittantur; ac proinde non raro propter loci incapacitatem necessum sit saxa, vasaque disrumpi. Atque haec, addebat, ratione equidem fieri haud multum dissimili, ac chordae ex contorto lino constructae inter fibrillas, & fila ita injectas admittunt aquas, ut non possint postea facile illas dimittere; atque ideo aquis turgidae decurtentur illae, & ingentia pondera simul eleventur. Secus contingeret si alia forte esset fibrillarum illarum constructio, & coordinatio, vel cum alio forte liquore chordae perfunduntur, qui vel non admittatur inter fila, vel admissus facile dimittatur, vel quacunque de causa non in tanta copia admittatur, & retineatur, quanta necessaria est ad inflandum, & decurtandum chordas.

19. Diligentius autem observata innumeris quibusdam aeris bullis ap-
pa-

paret glacies perspersa. Cumque dictum fuerit tres tantum esse de natura rarefactionum sententias; ad quas quaecunque aliae referri possint, illi, qui rarefactiones cunctas per accessum fieri novae substantiae inter particulas corporis rarefacti existimant, non possunt in glacie se excusare, quin illam admittant rarefactam. Habent enim id omne, quod volunt, ut aliquid dicatur rarefactum; aquam nempe, quae propter perspersum minutissimè aerem inter ejusdem particulas conversa in glaciem majorem locum videtur occupare. Ac meo judicio ne illi quidem possunt abnuere glaciem esse aquam certo modo rarefactam, qui rarefactiones fieri inquirunt, cum multa, vel majora sunt posita inter particulas corporis rarefacti inania spatia. Nam etsi aeris bullis glacies videatur perspersa, hi tamen iidem in aere affirmant multum inanis reperiri, vel plus sanè aeri, quàm aquis inesse inanis concedunt, & indè inquirunt contingere aerem aquis minus esse ponderosum. Quamobrem cum multum aeris interpositum sit inter congelatas aquae partes, multum etiam inanis, vel saltem plusquam priùs adesset inter easdem reperiri concedendum est. Atque idè dum glaciei formam aquae induunt, debebunt & hi quòque Philosophi concedere, quod illae rarefiant.

20. Cæterum tertiae opinionis assertores ponentes posse re vera corpus quodpiam majus spatium occupare, quam actu occupet, sive, quod idem est, corpus quod occupat spatium unum, potentiam habere ad duplum, triplum, & multo majus spatium occupandum, rarefactionemque corporis esse, cum id, quod in potentia est, deducitur ad actum, non equidem tenentur asserere aquas congelatas esse rarefactas. Nam cum videant magnam profectò aeris quantitatem inter glaciei particulas constitutam, contra possunt propriae inhærentes hypothesei asseveranter dicere aquae in glaciem conversionem non habere ullam veram aquae rarefactionem. Enim vero aqua in hac transmutatione tantum spatii occupat, quantum priùs occuparet, & partium aquae facta tantum quaedam divulsio est, & inter divulsas aquae particulas aeris facta interpositio est. Ideoque etsi aquae conversae in glaciem videantur primo aspectu majus spatium occupare; non tamen re vera occupant: quin etiam si interjectum inter aquae partes auferas aerem, redibunt aquae ad spatium æquale spatio, quod priùs occupabant, & fortassis etiam ad minus. At isti volunt corpus rarefactum re vera occupare majus spatium, quàm priùs occuparet. Meritò igitur negare poterunt rarefieri aquas, quae in glaciem convertuntur. Qui si obstinatè in eo persistant, quod assument, posse corpora occupare, sive potentiam habere occupandi majus, atque majus spatium, non est profectò, quo illos convincere valeamus. Ac licèt, nisi fallor, ea potissimum via urgeri possint, qua admittunt corporum impenetrabilitatem (de qua non leve dubium esset in eorum condensationibus) sunt tamen acuti, sunt ingeniosi, sunt terminis quamplurimis armati, quibus argumentorum omnium vim facillè eludant.

21. Verùm enim verò iidem isti nunquam clarè, & expeditè corpus quodpiam poterunt ostendere sic rarefactum, ut ipsi supponunt posse rarefieri per majoris loci, quàm priùs exigeret repletionem; neque hoc ipsum unquam probarunt posse contingere, sed tantum supponunt illud. Contra autem primi illi sexcenta demonstrare possunt evidenter sic rarefacta, ut ipsi definiunt fieri rarefactiones per accessum novae substantiae, positumque ejusdem

eiusdem inter particulas aliorum corporum, quæ proinde majus spatium videantur occupare, & rarefacta ex eo dicantur!

22. Cuncti autem cujuscunque fuerint sectæ, & quancunque fuerint amplexati sententiam ex illis tribus, non modicum quidem habent in glacie quo dignè valeant ingenia exercere: ex: gr.: quærere poterunt unde tanta in glacie aeris quantitas? Quo nonnunquam per adventum æstatis nimis rarefacto, non minùs ac terra interno motu, quatitur glacies, dissilitque cum fragore! An extrinsecùs adveniat aer ille? Quò admittatur inter aquæ partes; maximè ubi vas aqua plenum fuerit undique clausum? An partim ex aliquo, quod extrinsecus adveniat, partim ex aliquo, quod jam esset in aquis generetur hic aer? Quid sales plerique, & quædam alia extrinsecùs admota, nivibusque admixta internæ aquæ congelationem promoveant? Quidve salium penetret ad inclusas aquas? Et multa alia profecto curiositate hominum digna quæri poterunt: de quibus luculentissimam quamdam veluti historiam conscripsit Reverendissimus Pater Daniel Bartolus Societatis Jesu in eruditissimo tractatu *De gli agghiacciamenti*; ac non satis nunc memini an in his omnibus, quæ ego hac occasione parerga de glacie scripsi, cum amicissimo sanè, & doctissimo viro penitus consentiam.

23. Verùm enim verò quicunque philosophi hæc, atque similia indagare, & explicare tentabunt, semper illud magis, atque magis confirmabunt, frigido (quicquid tandem pro eo intelligant) quo aquæ in glaciem transformantur, multas, atque multas fieri partium ejusdem aquæ locorum mutationes: ac proinde, ut item agebat Capuccius, si verum est ignem ideò rarefacere, quia movet, cum frigidum quoque multa evidenter moveat, poterit etiam frigidum aliquando rarefacere. Neque equidem illud negari potest; ignem ideò rarefacere, quia movet, etsi non pauci addant hanc aliam rationem, quam omnino expressam volunt, quia simul dum ignis movet, aliquid etiam intrudatur inter partes corporis, quod postea majus spatium exigens propterea dicitur rarefactum.

24. Quæ quidem iis videntur maximè convenire, quæ docuit Hippocrates libro de veteri Medicina; ubi eos acriter (sed prohi facinus sinè operæ pretio) coarguit, qui febres, & peripneumonias à calido, vel à frigido fieri contendunt; neque quid pro his intelligant, explicare nituntur, vel si quid aliud inquirunt, ut se se explicent, est morbos fieri a calido, vel frigido: hoc est ab iis quæ calefaciunt, vel refrigerant, & quoniam calefaciunt, vel refrigerant. Et cum hac stolidi philosophia, quæ neque apta est ad explicandam scabiei naturam, vel ad verisimile aliquid de eadem dicendum, innumeros orco demittunt. Rerum enim præter hoc calefacere, vel refrigerare hominem, infinitus planè, & alius, atque alius potest esse in natura usus: ut multa sanè, atque multa fiant independenter ab hoc calefacere, vel ab hoc refrigerare hominem. Quoniam non est hæc omnis vis rerum calefacere, vel refrigerare, sed illa eadem, quæ id præstant, aliud, atque aliud efficere valent, tum in homine, tum in lapide, tum in aliis quibuscunque. Et hoc est, quod agebat Hippocrates eodem libro infinitas inesse rebus facultates, quod idem est, ac si dixisset unum, idemque præter illud calefacere, vel illud refrigerare infinita alia præstare posse, & ad infinitorum productionem diversimodè concurrere.

25. Non videtur hîc prætereundus primarius quidam Medicinæ professor, qui, quod ego sciam, nunquam monuit in suis voluminibus non unius viri esse, quos sub unius Hippocratis nomine legimus libros, de quo dicere solitus erat Capuccius, quod is tanta fuerit petulantia, & oris impudentia, tanta animi determinatione, & præparatione ad decipiendum, ut aliquando verba nonnulla ausus sit adducere ex hoc libro de Veteri Medicina, ut alios summa sua dicacitate refelleret, non quicquam interim pudens hoc eodem libro de Veteri Medicina omnem ejus verbositatem (nam in voluminibus ejusdem nullam agebat Capuccius adesse doctrinam,) omnino damnari, omnino reprobari, & falsam esse manifestissimo ostendi. Agebat insuper, quod hic idem Impudentissimus Medicinæ Professor cum multis annis Hippocraticum, & Galenicum se jactitans medicinam maximo cum lucro fecerit, & sanguinis circulationem vel rejecisset, vel non admisisset, calumniisque semper alios, conviciisque ex hoc petivisset tanquam non Galenicos, tanquam non Hippocraticos; tandem æquali petulantia, & impudentia multis disputavit, & probasse videri voluit Hippocrati, & Galeno sanguinis circuitum fuisse cognitum! Non nominabo hominem, & parcam famæ illius, quæ apud plerisque clarissima est: monendi tamen fuerunt Principes, qui in studiis bonarum artium non sunt versati; nam facile decipiuntur ab illis, qui in ostentando tantum sapientiam, quam non habent, & in meliores calumniis, & versutiis opprimendo sunt excellentissimi.

26. Sed revertar ad ea, quæ frigido fieri perhibentur amœnissimumque Vergilium proferam canentem Georg. 3.

*Concrescunt subitæ currenti in flumine crustæ
Undaque jam tergo ferratos sustinet orbes;
Puppibus illa prius patulis, nunc hospita plaustris.
Æraque dissiliunt vulgo, vestesque rigescunt
Indutæ, caduntque securibus humida vino,
Et totæ solidam in glaciem vertere lacunæ.*

Quod hoc etiam anno non sine aliquo omnium incommodo factum vidimus in his lacunis, quæ Venetiis sunt circumfusæ. Atque equidem frequentissimum est observare eo, quod frigidum dicitur, multa desinere esse liquida: ex quibus alia rarefiunt, ut aqua; alia condensantur, & angustiori contenta sunt loco, ut oleum: quod etsi amittat frigido liquiditatem, formamque adipiscatur solidæ alicujus pinguedinis, minus tamen loci occupat, quàm prius liquidum occuparet. Oleum frigidum, & aqua frigida gravitate specifica graviora sunt respectivè oleo, & aqua calidis, vel etiam his iisdem, minus tamen frigidis sunt illa graviora. At licet à validiori frigido utraque desinant esse liquida, & oleum fiat veluti spissa pinguedo, aqua verò in glaciem vertatur; oleum tamen non liquidum liquido gravius est, & in eo constitutum fundum petit; glacies autem innatat aquis, etsi calidæ fuerit. Cælo autem mitiori oleum modo, quo dictum est, coagulatum, & congelatæ aquæ liquiditatem quidem recuperant; sed oleum crescit mole, glacies vero fusa in aquas mole decrescit: oleum ex coagulato in liquidum rediens specie fit levius, glacies reversa in aquas ponderosior specie fit. Porro in oleo, dum ex una in aliam ex his transit formam, non solent

solent apparere bullæ aeris , cum contra frequentissimæ , & in maxima copia observentur in glacie .

27. Sunt autem , quæ facilius calido liquiditatem amittant , quàm frigido , & sunt , quæ neque frigido , neque calido desint esse liquida , ut est spiritus vini purissimus , & defœcatissimus , cui neque igne , neque nivibus , neque boreæ flatu frigidiori deperit liquiditas , qui tamen ut à plerisque chymicorum fide dignorum traditum est , facile urinæ spiritu coagulatur . Mercurius autem , quantum ego observare potui , circumfusus etiam nivibus non coagulatur , non desinit esse liquidus ; at idem Mercurius absque alterius rei additione , vel ulla sensibili sui deperditione solo igne potest liquiditatem suam amittere , & in pulveris , vel sacchari forma spectari ; atque sic ignis beneficio concretus majori loci amplitudine videtur indigere .

28. Sunt etiam non pauca , quæ fiunt igni specie graviora ; quin etiam , & duriora : qualia sunt ligna pleraque , quibus præustis , sive igne torrefactis , quod reliquum ipsorum est , specie gravius , & durius est ; adeò concinnatum ut decet , pro telo possit inservire .

Quibus quidem ritè perpensis cuicunque manifestum esse potest , facile in his , similibusque decipi eos , qui meliori non sunt instructi philosophia illa , qua hætenus fuere imbuti .

29. Atque in his etiam , similibusque tum Philosophi , tum Medici , quorum non pauci meritò sunt toto orbe clarissimi , animadvertere debent non esse semper idem rarefcere corpus , & liquidius fieri : neque esse semper idem corpus condensari , hoc est angustius spatium exigere , & concrefcere , sive coagulari , & fluiditatem amittere . Nam habemus concreta , quæ ampliorem , & quæ angustio rem , quàm cum essent liquida , exposcant locum . Habemus item liquefcencia , quæ ampliorem , & quæ angustio rem , quàm priùs , cum essent concreta , exigant locum .

30. Concretiones autem , sive coagulationes partium liquidorum , quæ sunt in animante , plerorumque morborum sunt causæ , & à concretionibus humorum potissimum fiunt tumores , inter quos illi sunt , quos inflammationes Medici appellant , in quibus ferè semper hoc maximè tentandum est , ut solvantur , & liquefcant ea , quæ in parte affecta coagulata sunt .

31. *Æraque dissiliunt vulgò , vestesque rigescunt*
Induta

Inquit Vergilius . Et profectò frigore , sive frigido , quod dicunt , pleraque corpora ; ut ossa , cornua , rami arborum , aliaque fiunt magis frangibilia , & facilius dissiliunt , veluti vitream naturam fuissent adepta . Quædam etiam , quæ flexibilia nimis erant (ut cera molliuscula) frigido minus obsequentia fiunt motibus , vel si flectantur facile disrumpuntur .

Quæ equidem omnia in quibusdam corporibus contingunt propter humiditas substantias rigentes , & gelu prehensas inter particulas eorum , partiumque poris , ut postea ad impressos extrinsecus motus disrumpi , & dissilire necessum sit . Vel etiam sæpe sæpius hæc eadem fiunt ad similitudinem eorum , quæ vasis accidunt sive æneis , sive vitreis , aliisque , ubi inclusa in ipsis aqua dum in glaciem convertitur , rarefcit , ut supradictum est . Sed de hujus generis disruptionibus non viderur intellexisse Vergilius cum cecinit *Æraque dissiliunt vulgò* . Qui fortassis his verbis referre voluit , quod mul-

ta (metallica quodque) apud Scythas facile diffingantur frigore, etiam si illa nullum habeant humorem vel in conspicua cavitate aliqua, vel in poris contentum, qui gelu prehensus majorem locum exposcat. Et de his non ego quicquam memini observasse. Existimo tamen campanas, quæ ex mixtis metallis quibusdam componuntur tempestate, & regione nimis frigida facilius dissilire, diffingique in frusta, quam tempestate, & regione calidioribus: maximè si quid aliud concurrat, ut mallei ictus, vel aliquid, quod tinnitum impediat, qui excepto ictu fieri solet, vel quid aliud.

32. Ac vitrea quidem vasa semper ac repente, celerique mutatione ex statu frigido in calidum (non est necessum ut sæpius repetam, quid pro his vocibus intelligendum sit, cum semel, atque iterum fuit expositum) & ex calido in frigidum transeunt, disruptionis subeunt periculum. Quod si paulatim, atque paulatim, tardoque gradu fiat ista mutatio ex frigido in calidum, vel ex calido in frigidum, non equidem tam facile disrumpuntur. Videlicet aliquod justum tempus requiritur, quo partes vitri, vel alterius corporis in mutationibus his possint accommodari ad invicem, aptèque disponi, & coordinari inter se; atque in eo statu collocari in quo esse debent cum calefacere, vel refrigerare valent: vel justum temporis spatium requiritur, quo partes vitri disponantur, & coordinentur ad accipiendum, & retinendum in poris, vel ad dimittendum aliquid ab iisdem; excursusque liberiores concedendum alicui substantiæ, quæ per poros fluit in uno, vel altero statu ejusdem vitri, vel in utroque. Nam etiam si vitrum solidum, atque durum, rigidumque videatur, aliquos tamen patitur partium motus sine scissura, quod manifestum est ex nonnullis vitri, partiumque ejusdem tum rarefactionibus, tum condensationibus: quæ negari non debent, & à multis recensentur. Neque profectò eadem omnino, aut similes prorsus sunt partium coordinationes, quibus tam id, quo vitrum est calidum, quam id, quo vitrum est frigidum promptè, & facile admittatur vel dimittatur. Alii dicerent aliquam debere esse in partibus vitri organizationis mutationem cum altera istarum qualitatum caliditas, vel frigiditas introducitur: Quamobrem cum desit in repentinis mutationibus tempus justum in quo partes vitri coaptari, coordinarique possint ad aliud admittendum, aliud non ejusdem, aut similis naturæ dimittendum, vel ad excursus liberos alicui substantiæ concedendum, vel ad illam novam in organizatione partium mutationem sine scissura faciendam, facile disrumpuntur, dissiliuntque. Quæ tamen, quantum memini, facilius diffinguntur, dissiliunt, crepitantque cum repente è statu calido in frigidum transeunt, quam cum à calido in frigidum.

33. Et dignum relatu est in sphæculis plumbeis vulgaribus, & in iis sæpe sæpius, quæ seminum coriandri circiter magnitudinem exæquant, & fiunt ex liquido plumbo guttatim decidente in aquas, frequenter observari foraminulum quoddam, effectum, nisi fallor, quod, dum fiunt sphæculæ istæ, incipiente constipatione, & condensatione partium ex refrigerata primùm extrinseca crusta non potuerit ab interioribus partibus aliquid dimitti, nisi facto impetu, & foraminulo aperto: quæ vis,

ut conjicere est, satis fuisset ad vitrum quodpiam, vel quid aliud cum fragore dirumpendum.

34. Metalla autem, ut plumbum, stannum, & quod ex ære, & stanno constat, percussa malleo, vel alio cum calida nimis sunt (multò tamen priùs quàm fundantur, & liquecant) diffinduntur in frusta, veluti si casei naturam haberent.

35. At metalla pluries, atque pluries, & frequentioribus ictibus percussa minus ductilia fiunt, & duritiem magnam acquirunt: nec non etiam vi inflexa resiliunt, restituntque se se, videlicet vim elasticam crebris ictibus acquirunt. Ex quo fit, quod incus, & instrumenta pleraque ferrariorum, quæ plures, atque plures exceperunt ictus, sint durissima, & limæ nimium resistent. Quæ omnia calore tum duritiem, tum vim elasticam deponunt.

36. Ferrum autem maximè perpurgatum, quod chalybs appellatur, si ubi ignitum fuerit, aquis immergatur frigidis, & sic extinguatur, multò sanè facilius in frusta frangi potest, flexumque vi extrinseca se se restituit in pristinum statum, multo etiam copiosius ignem è silicibus excutit, durum nimis fit, limæque maximæ resistens. Ac de hujusmodi ferro sic præparato, quod *temprato* Itali dicunt ab aliis observatum ac cepi illud remanere rarefactum, hoc est majus spatium occupare, quàm occupasset si paulatim, & lento gradu fuisset refrigeratum: de quo minimè dubito; nam in illa repentina partium extimarum mutatione è flexilibus, & ductilibus in rigidas, & duras, non est datum tempus partibus profundioribus se se colligendi. Hoc idem ferrum collocatum inter cineres calidiores, refrigeratumque lento gradu fit densius, & specie gravius, quod ab aliis observatum est; amittit vim elasticam, & eliquò inflexum haud tanta vi, nec tam promptè, nec tam exactè se se restituit in pristinum situm, multò minus durum est, limæque minus resistens, & eodem vel nulli, vel pauciores sanè è silice excutiuntur ignes: atque amittit illam temperiem, & *stemprato* ab Italis dicitur. Et in his etiam dignum consideratione est, quantum intersit celeriter, vel lentò fieri mutationes, & quantum in omnibus possit modus, ad cujus variationem aliud, atque aliud fit.

37. Simile quid accidit vitreis lacrymis, quæ ex Anglia primum advenit, vel in Anglia primum repertæ Anglicæ dicuntur. Sunt istæ parte crassiori duræ nimis, ut vel mallei ictibus resistere valeant; parte autem tenuiore, qua desinunt in cuspidem, si digitis diffringantur, totæ in crassiusculum pulverem non sine notabili crepitu dissolvuntur. Enim verò lacrymæ istæ inter cineres calidiores collocatæ si sinantur paulatim, & tardo gradu una cum cineribus refrigerari; vel, ut rectius dicam, si iterum adaperitis poris, laxataque iterum extrema superficie sinantur partes omnes, ut natura fert, lento motu, & paulatim, atque paulatim componi ad invicem, coordinarique, amittunt virtutem dissiliendi; nec ampliùs in pulverem dissolvuntur, suntque ut cætera vitra.

38. Ex his autem, nisi me mea fallit sententia, æquum videtur posse nos tandem concludere, quod etiam si respiratio instituta potissimum sit ad cor, & sanguinem refrigerandum; non tamen indè sequatur aeris, & respi-

spirationis beneficio non rarefieri multa, & non attenuari multa in corporibus animalium! Et illud acerrimè negabat Joannes Baptista Capuccius respirationis præcipuum usum esse cor, & sanguinem refrigerare. Qui agebat non magis ipsi videri respirare animalia ut cor refrigeretur, ac aeris flumen quoddam continuò accurrere ad ignem refrigerandum; vel ignem attrahere aerem refrigerii gratia; vel potius ad ignes, ad furni, & ad fornacis ardentis ostium propelli, ac properare aerem, ut ignis cujuscunque calor moderatior sit, & ut furnus, vel ardentes fornaces refrigerentur! Quo nihil ineptius dici posset.

At ego, ne cum omnibus velle nunc disputare videar, dico quod etiam si illud admittatur, vel ex parte concedatur, nequaquam ex eo sequitur humores, substantiasque complures non rarefieri aeris beneficio. Si quidem multa sunt, quæ frigido rarefiunt, & majus spatium expolcunt. Neque ex hoc quod multa rarefiant beneficio eorum, quæ accipiunt ab aere, sequitur eadem magis, vel minùs propterea liquida esse. Nam multa rarefiunt, & liquiditatem amittunt; multa condensantur, & liquiditatem amittunt; & multa rarefiunt, vel condensantur absque eo, quod amittant liquiditatem; & quædam liquiditatem amittunt calido; & quædam liquiditatem amittunt frigido.

39. Ex quibus illud constat, quod docet Hippocrates libro de Veteri Medicina, cum iis, quæ frigida, vel calida dicuntur aliud, atque aliud sæpè sapiùs adjungi; ut contraria non rarè his iisdem fiant. Non enim omnia quæ calida, vel frigida dicuntur, uniusmodi sunt; neque his in omnibus eadem, aut similia fiunt, ut non semel Divinus etiam docuit Plato. Aliud liquat, aliud coagulat, aliud solvit ventrem, aliud astringit, aliud urinas, vel sudores ciet, aliud venenum est, aliud est antidotus, & non rarè quoddam huic venenum est, alteri est antidotus, vel etiam cibus salutaris. Quod quidem non negatur à prudentioribus Medicorum. Non pauci tamen minùs prudentes miserabilibus planè conditionibus hallucinati altercantur ad invicem quærentes calidum nè aliquid, an frigidum sit (puta opium, caphura, acetum, cichorium, vel quid aliud) & in hac inquisitione eam tenent viam, quæ nullum habet exitum! Qui eo magis commiseratione digni sunt, quò ignorant id, quod nisi præjudiciis essent occæcati, facillimè cognoscere possent; ex eo, quod scimus aliquod esse calidum, nihil aliud omnium, quæ in natura fiunt, posse nos rectè deducere, nisi quod illud valeat calefacere hominem, bovem, vel equum: & sæpe id, quod calefacit hominem, non calefacit bovem, vel equum; non minus ac multa sunt venena homini, quæ non sunt venena bovi, vel equo. Ex eo autem, quod scimus aliquod esse nobis frigidum, nihil aliud possumus rectè deducere; nisi illud idem nobis rectè applicatum posse refrigerare nostrum sensum; sive sensationem eam excitare posse, quæ frigidi appellatur. Quæ tum iis, quæ docuit Hippocrates eodem loco, tum etiam convenire videntur iis, quæ docuit Galenus quibusdam tamen in locis, qui non sunt ab omnibus notati. Sed de his jam satis. Quod si videam, hæc vobis non displicuisse, aliquid aliud fortè conabor, quòd non erit levioris momenti.

S U M M A R E R U M.

In hac Quarta Dissertatione contentarum,

- 1 **C**ur variæ sint hominum sententia.
- 2 Non est iis succensendum, qui non mecum in plerisque sentiunt.
- 3 Referuntur præcipua, quæ dicta sunt in dissertatione secunda de aere mortifero.
- 4 Ex quibus orta difficultas est, vel non esse frigidi condensare, vel respirationem non esse præcipuè institutam ad refrigerandum cor.
- 5 Nonnulli Aristotelem adducunt testem ad concitandam invidiam adversus alios.
- 6 Joannes Baptista Capuccii de frigido, & calido sententia.
- 7 Eiusdem de denso, & raro sententia.
- 8 Densum, vel rarum non habent aliquid perpetuò adnexum frigido, vel calido.
- 9 Ex eodem Capuccio si frigidi est condensare, & calidi rarefacere, poterit item frigidum rarefacere, & calidum condensare.
- 10 Multa expeditè, & promptè rarefiunt, vel condensantur in quavis cæli constitutione.
- 11 De igne perpetuo, deque aliis quibusdam sententia.
- 12 In thermometris clausis, quo tempore spiritus vini condensatur, aer rarefit, & è converso.
- 13 In machinis quibusdam pneumaticis aer ad libitum condensatur, vel rarefit absque ullo frigidi, vel calidi interventu.
- 14 Non cum iis nunc pugnandum est, qui alia per se, alia per accidens exhibis, alia formaliter, alia virtualiter fieri affirmant.
- 15 A qua dum in glaciem convertitur rarefcit.
- 16 Ut saxa disrumpantur propter rarefcentem aquam, dum congelascit.
- 17 Exponitur qua ratione hoc anno 1684. Venetiis propter gelu nonnullæ domus ruinam passæ sint; lapidesque loco dimoti, & alia similia acciderint.
- 18 Non raro haud minora fiunt frigido, ac igne fieri consueverint, cujus eventus ex Capuccio ratio adducitur.
- 19 Qui Philosophi teneantur concedere aquas rarefieri, cum congelantur.
- 20 Qui Philosophi possint negare aquarum rarefactionem in glacie.
- 21 Primi multa possunt ostendere corpora sic rarefacta, ut ipsi dicunt fieri rarefactiones. Secundi autem non possunt ostendere corpora rarefacta, ut ipsi dicunt rarefieri.
- 22 Enumerantur multa, quæ in glacie sunt consideratione digna.
- 23 Eo, quo partes aquæ in glaciem convertuntur, moventur partes aquæ, quo magis confirmatur Capuccii sententia asserentis frigidum posse rarefacere.
- 24 Quæ dicta sunt consentiunt iis, quæ docuit Hippocrates libro de Veteri Medicina, & præter posse calefacere, vel refrigerare infinitas alias inesse rebus facultates.
- 25 Narratur petulantia cuiusdam Medicinæ professoris.
- 26 Eo, quod frigidum dicitur, multa corpora liquiditatem amittunt: quorum alia rarefiunt, alia condensantur, alia sunt graviora specie,

cie, alia minus gravia.

- 27 *Quædam facilius calido, sive ignis vi liquiditatem amittunt, quam frigido, sive nivium virtute. Quædam non aliquo ex his desinunt esse liquida, sed aliò potiùs, quod neutrum est.*
- 28 *Quædam igne sunt specie graviora, & duriora.*
- 29 *Non est idem rarescere, & liquidius fieri; neque est idem condensari, & liquiditatem amittere, sive minùs liquidum esse.*
- 30 *Coagulationes liquidarum substantiarum sunt in animante plurimorum morborum causæ.*
- 31 *Frigore, sive frigido, quod dicitur, pleraque corpora fiunt frangibilia, minus flexibilia, & minùs obsequentia motibus, quod diversimodè potest accipi, & diversimodè explicari.*
- 32 *Vitrea vasa in celeri mutatione ex statu calido in frigidum, vel ex frigido in calidum facile disrumpuntur, & eventus ratio traditur.*
- 33 *Plumbeæ spherulæ foraminulum habentes propter inæqualem partium eodem momento condensationem.*
- 34 *Metalla calida facilius malleo disrumpuntur.*
- 35 *Metalla, quæ plures excipiunt ictus, fiunt duriora, & vim elasticam acquirunt.*
- 36 *Quæ observentur in ferro, quod ignitum aquis immergitur.*
- 37 *Narrantur ea, quæ observantur in lacrymis vitreis.*
- 38 *Etiam si respiratio sit instituta ad cor refrigerandum, possunt tamen aeris beneficio rarefieri humores, & Capuccii de his sententia.*
- 39 *Ex eo, quod aliquid rectè frigidum appelletur, nihil aliud rectè posse nos concludere, nisi quod illud idem possit refrigerare.*

F I N I S.

IN HIPPOCRATIS

LIBRUM

DE VETERI MEDICINA


LUCAE ANTONII

PORII

Neapolitani.

PARAPHRASIS.

CHRISTINÆ SVECORUM REGINÆ.



Udaciæ fortè, si non temeritatis, multi me in-
simulabunt, Augustissima Regina, quod varia
hæc, quæ præsentî volumine continentur tibi
dicare decreverim. Sed ut hoc illis si me spe-
ciem, & meos conatus, non uno ex capite li-
bentissimè concedam, & liberè etiam ipsemet
fatear; ità haud facilè affirmabo, quod jure ex hac causa
me possint increpare. Norunt namque omnes quod, quò
majora quæquè tibi debeantur; eò summa clementia, & ani-
mi tui magnanimitate humilia non despicias: adeò ut in-
ter eos, quos tuo nomine protegis, me quoque volueris
connumeratum. Illud certè temeritatis esset si id, quod
multò sane feliciores calami, dignissima nempè omnia, quæ
de te dici possunt, recensere conati sunt, & tandem etsi
clarissimo, & copiosissimo dicendi genere usi ad ea se im-
pares professi sunt, ipse nunc tentare velim! Nihil post il-
los jam superest, nisi ut universus terrarum orbis, qui
omnibus futuris seculis multa virtutum tuarum vestigia ha-
bebit, & ipsamet tua gesta te prædicent. Vale.

Humillimus Servus
Lucas Antonius Portius.

P R Æ F A T I O.



Ulm multa sub Hippocratis nomine circumferantur, si in ipsis tùm sententia, tùm dictio modò robustior, modò remissior examinentur; manifestum erit vel non esse ea omnia ejusdem Authoris opera, vel si ab eodem homine conscripta sunt non quidem in eadem ætate, vel ex industria aliquem sibi complacuisse varia, & nonnunquam repugnantia posteris tradere, quod equidem affirmandum non est de ingenuo, pio, atque benefico Viro, qualis fertur Hippocrates. Verisimilius mihi videtur ea, quæ congesta sunt in volumina sub unius Hippocratis nomine non esse unius tantum Viri. Quod apertè deducitur ex iis, quæ Svidas habet, plures fuisse ex eodem genere homines, qui Hippocrates dicti sint; quivè omnes Medici scripserint: ut facillimum inde fuerit, quæ à multis olim diversisque temporibus conscripta sunt, tanquàm si unius fuissent monumenta ad nos devenisse. Galenus verò *commentario 1. in lib. de victus ratione in morbis acutis tex. 18.* postquàm quædam notasset ex *libro de victu salubri*, qui Hippocrati ascriptus est, hæc verba subjungit: *nam etsi liber ille Hippocratis non sit, sed vel Euriphontis, vel Phaontis, vel Philistionis, vel Aristonis, vel alterius cujuscumque ex antiquis (nempe ad multos librum hunc referunt) sane omnes hi veteres Viri sunt, atque ex eis quidam, & Hippocrate antiquiores, alii verò tempore ipsius vixerunt.* Loquor autem de Hippocrate Heraclide filio, qui librum hunc confecit: nam avus ipsius Gnosidici filius Hippocrates, quorundam iudicio nihil omnino scripsit; aliorum verò sententia duos libros scripsit; unum de fracturis, alterum verò de articulis. Qui duo libelli extant adhuc usque, & non sunt profectò spernendi. Idem Galenus *commentario 2. in librum de natura humana tex. 1.* dubitans & ipse multa fuisse illi libro adjecta sigillatim, inquit, omnibus hujus orationis versibus signum id Dioscorides ascripsit, quod obeliscum appellant: quo signo Aristarchus omnes notabat versus, qui apud Poetam sibi erant suspecti; sic & Dioscorides agebat, quia suspicabatur partem hanc fuisse Hippocratis, qui fuit Thessali filius. Nam duo hi magno Hippocrati fuere filii Draco, & Thessalus; amboque genuere filios nominatos Hippocrates. Non est Thessalus hic ille, quem acriter reprehendit Galenus *lib. 1. meth. medendi*, qui pariter Medicus fuit; sed non multum Galeno antiquior. Ad Thessalum istum, de quo loquimur, extat epistola magni Hippocratis, qua Geometriæ, & figurarum, & numerorum scientiam commendat. Atque hujus Thessali honorificè pluries meminit Galenus ut *comment. in lib. 3. de morbis vulgaribus*, ubi hæc habet: & quidem in librum secundum, & sextum de morbis vulgaribus interjecta sunt quedam, ut etiam ad finem aphorismorum: cætera omnia libri secundi, & sexti vulgarium morborum sunt Hippocratis magna ex parte in commentariis reperta; partem verò eorum is, qui ea contraxit adiecit, ut ajunt. Erat ille Hippocratis filiorum Clarissimus Thessalus nomine, qui exactè sententiam est patris æmulatus. Commentario verò in librum sextum de morbis vulgaribus multa conqueritur Galenus in librum irrepsisse, multa fuisse corru-

pta ab expositoribus, inter quos, ait, & Zeuxis Tarentinus, & Erythraeus Heracledes censentur, ante quos etiam Bacchius, & Glaucias extiterunt, qui cum quid deletum invenissent proprio ingenio adiecerunt nulla mentione facta de vitio Codicis = Sextum verò hunc, quem in præsentia habemus in manibus, & ante ipsum secundum librum ex illis, quæ sibi ipse Hippocrates collegerat Thessalum ejus filium ajunt conflavisse: quin, & nonnulli ipsum Thessalum aliquid ex propria sententia adscripsisse opinantur, nonnulli verò post ipsum alios. Præterea Polybi cujusdam sæpè meminit Galenus, quem ait fuisse Hippocratis discipulum, & integros libellos extare, qui sub Hippocratis nomine leguntur, cum Polybi sint, non Hippocratis. Neque prætereundum est plagarios, impostores, & sycophantas sordidissimos lucri causa multa inseruisse operibus Hippocratis, & aliorum etiam auctorum: quæ enim tempore, inquit Galenus commentario 2. in lib. de natura humana: Attalus & Ptolomæus certatim inter se de comparandis sibi libris contendebant, ab his, qui ex oblati celebriorum Virorum scriptis pecuniam à Regibus reportabant, cæpere inscriptiones, & digestiones librorum vitiari. Unde cum utrique libri, & qui de natura humana est, & qui de salubri victu (quem hoc loco Polybi esse existimat ipse Galenus) essent pusilli: arbitratus quispiam ob parvitatem neutrum ipsorum multifaciendum, ambos in unum contulit: subinde verò alius quidam, vel ille idem etiam, qui hos primum in unum redegit, hæc ipsa illis interposuit, quæ nunc exponenda suscepturi sumus. Ex his quidem omnibus manifestum fit, difficile sanè esse distinguere cujusnam Hippocratis, aut cujusnam alterius Viri sit liber, qui de Veteri Medicina inscribitur, & inter Hippocratis libros connumeratur. Verum enim verò cum videam quamplurimis documentis confirmatum, Hippocratem quemdam ætate satis provectum Democriti fuisse discipulum, cujus planè in Physicis sapientiam Hippocrates sit demiratus; cumque videam librum de Veteri Medicina multa continere, quæ maximè consentiant cum Democriti placitis; verisimillimum existimo librum de Veteri Medicina ab eo Hippocrate fuisse conscriptum, qui Democritum audivit. Et profectò ea, quæ docentur *text. 1.* errare illos, qui hypothesein habent ex calido, frigido, humido, & sicco vel alio quocunque his similibus cuncta, quæ in homine accidunt fieri, & ea, quæ *text. 6.* necessitatem fuisse Medicinæ principium, & ea, quæ *text. 26.* & *27.* impossibile esse, aut dubium imperare ægroto calidum, aut frigidum, & nomina hæc, hoc est calidum, hoc est frigidum imposita fuisse ad decipiendum potius homines, quàm ad aliquid verum denotandum, & quæ *text. 29.* & *30.* non ex calido, neque ex frigido homines febribus corripì; neque in calido, neque in frigido quærendam esse febrium Medicinam, & quæ *text. 39.* oportere cognoscere rerum figuras, & alia multa quæ hoc libro docentur, ipsum Democritum quam maximè sapiunt, & non possunt placitis aliorum Philosophorum accommodari. Cæterum cum multis sæculis Democriti philosophandi ratio omissa fuerit à Medicis etiam magni nominis, ut à Galeno, & ab ejus sectatoribus; liber iste Hippocratis de Veteri Medicina, etsi veneratus passim, & in hominum aliquandò estimatione fuerit, tamen veluti jacuit, & quodam modo delituit: nullum enim usum habebat apud eos, qui calido, & frigido omnia fieri affirmabant. Atque

complures alii, qui hoc ipsum negant, quoniam in Democriti philosophia minus versati sunt, non videntur Hippocratis mentem assecuti. Quod quidem me movit ad paraphrasim hanc conscribendam; qua mihi videor Hippocratis sententiam servasse, & multa clariùs exposuisse, & quædam passim adjecisse scitu necessaria desumpta occasione ex ejusdem Hippocratis verbis. Atque censeo hoc parvo Hippocratis libello Medicinæ compendium, & institutionem optimam comprehendere; ac neminem alia via aliisque principiis, quam his, quæ ab Hippocrate hic docentur in Medica disciplina profecturum.



IN HIPPOCRATIS LIBRUM

DE VETERI MEDICINA

LUCAE ANTONII PORTII

Neapolitani.

PARAPHRASIS.



I. Ulicunque de Medicina dicere, aut scribere aggressi rem in compendium contrahere conati sunt, & à calido, frigido, humido, & sicco, vel ab acido, & salso, aut amaro, aut ab alio, sive aliis quibuscumque his similibus cuncta, quæ hominibus accidunt, fieri supposuerunt, in multis quidem manifesto errasseprehenduntur, & ab ipsa Medica Disciplina, qua omnes in maximis utuntur, quamvè colunt optimi Professores graviter reprehendi possunt, quoniam illam non parùm dehonestarunt

II. Ægrotantium namque corporum Medicina ex iis non est, quæ prorsus vana existunt. Neque æquum est illam facere iis similem, quæ etiamsi aliquo pacto vera sint; hypothesi tamen, & fundamento ficto in praxim deducuntur, & explicantur. Siquidem jam non exiguus est inventorum, & observationum in Medicina numerus, & alii Medici tum manu, tum mente aliis sunt multo præstantiores. Quod factum non fuisset si Medicina prorsus inanis esset, & ficta indigeret hypothesi; sed etiam nunc qui eam profitentur, æqualiter essent ignari, & inexperti, & fortuna potius, atque casu, quam Medicorum prudentia ægrotorum res gubernarentur.

III. Sic sæpenumero fit, cum de sublimibus in aere rebus, aut de subterraneis, aut de aliis hujuscemodi agitur; in quibus non est, quo conferantur ea, quæ dicuntur, & non est, quo vera, ac falsa notentur: ac proinde qui de his loquuntur, æqualiter sunt ignari, & inexperti, ac si aliquid ab ipsis rectè dicitur, id casu fit, & fortuna, non disciplina! Secus in Medicina, quæ principium habet, quo multa olim ab antiquis inventa ritè, & manifesta facta sunt, & multa deinceps invenientur: modo is, qui inquirat
ido-

Idoneus sit, & gnarus eorum, quæ jam sunt comperta; atque ex his similiter eodem principio ad alia perquirenda procedat. Quicumque verò his reiectis, ac reprobatis alia via, aliave forma, ac methodo inquirere conetur, aut conatus sit, & quid invenisse gloriatur, aut fuerit gloriatus, falsus is est, aut fuit, non solum alios, sed etiam sæpe se ipsum decipiens. Impossibile enim est in Medicina alio niti principio diverso ab illo, quo antiquiores usi sunt, & impossibile est aliis principiis aliquid recte invenire, aut aliquid concludenter addere his, quæ ab antiquis sunt inventa.

IV. Quas autem ob causas hoc sit impossibile demonstrabo, ac docebo quibus principiis disciplina Medica, quæ jam est, ortum duxerit, & ut hæc eadem principia non sint deferenda. Mihi verò de his dicturus videtur debere ea dicere, quæ vulgò intelligi, & ab iis etiam, quorum animus studiis non fuerit excultus concipi possint. Enim verò ipsamet corporis, animique affectiones, quibus hic, vel ille ægrotat, dicendæ nobis, atque quærendæ sunt.

V. Ac licet indocti, & rudes, qui in naturæ speculatione, atque contemplatione se se non exercuerunt, condiscere haud semper facile possint ipsorummet affectiones corporum, & ut illæ fiant, ac desinant, & ut augeantur, aut minuantur haud semper possint ex se se promptè cognoscere: attamen si quis adsit, qui hæc noverit, & vocibus ad propriam uniuscujusque intelligentiam aptis de his loquatur, & prudenter de his interroget, non multò sanè difficilius indocti homines, quàm docti affectiones proprias intelligent. Nihil enim libentius, aut facilius quisque recordatur, quàm quæ sibi ipsi accidisse audit. Si quis igitur de Medicina loquatur, & audientium intelligentiam, atque animos sermone non afficiat; neque ipse etiam veritatis compos erit, & vana ut plurimum loquetur. Ac nihil proderit, quod omittens affectiones proprias corporum, quas qui patitur intelliget, aliqua hyporhesi, quæ captu semper difficilior est, aut fundamento in sermonibus suis fuerit usus. Hypothesi namque neque initium, neque incrementum ullum habuit Medicina: ac nisi homines observassent varias esse sanorum, & ægrotantium corporum affectiones, pleraque ex iis, quæ sanis corporibus conveniunt, ægrotantibus non convenire, & pleraque ex iis, quæ conveniunt ægrotis corporibus, non convenire sanis, nunquam profecto de Medicina cogitassent, & nonnullarum ægritudinum remedia non invenissent.

VI. Necessitas igitur Medicinæ principium fuit. Quæ quidem ab ipsa viventium natura orta est, & ex contactu vario corporum, incursumque in sensum. Ex quibus omnia, quæ fiunt, necessario fiunt: neque aliud ex illis fieri potest. Cum enim ex hac totius naturæ necessitate aliud ex alio fieri olim cognovisset homines, quamplurimis experimentis edocti fuerint aliud, atque aliud prodesse sanis, ut conserventur; aliud, atque aliud opus esse ægrotis cum ut superstites sint, tum ut integri fiant, de morborum Medicina inveniendâ, atque excolendâ cogitarunt: ea notantes, quæ ipsis ægrotantibus convenientiora vidissent, & alia, atque alla insuper experiundo, atque notando. Quin etiam rem altius expendens censeo ea, quibus nunc homines in sanitate maxime utuntur, vel ut ab æstu, vel ut à frigoribus sese defendant, & ut vitam melius degant, aliis cibis, potibusque
vita-

vitatis, aliis admissis, hac eadem naturæ necessitate olim fuisse inventa. Natura etenim necessitatem, & sensum, sive experiundi multiplicem facultatem indidit tum homini, tum brutis, qua meliora, & convenientiora propriæ uniuscujusque naturæ notare possent. Hinc fit ut bos etiam, aut canis superstes ab injuriis ex multiplici corporum incurso, quibus dum nascitur est obnoxius; postea recordatus eorum, quæ observavit, sit callidior, & melius se defendat à lupis, aut antra, specusque quærat intempestatum cœli munimenta, aut quercus folia omittat, si gramine luxurient prata. Id autem rectius fit ab hominibus, qui præterea animadverterunt pleraque ex aliquo capite ingrata opem in non paucis morbis attulisse, & quædam non ingrata, & sæpe etiam jucunda enecasse, quod fortè non fit à brutis, aut certè minus exactè. Quamobrem non solum ægritudinum Medicinam, sed ipsam quoque sanorum corporum dietam, & alimoniam, ipsam vivendi rationem, qua nunc utimur, non quidem hypothese aliqua, sed multiplici usu adinvenisse homines existimo. Qui neque hæc quælivissent, aut invenissent, si ipsis suffecisset idem cibus, & potus, qui bovi, aut equo, aut pecudi, quibus sat est fœnum ex quo nutriuntur, & augescunt, & illæsi manent, alia fortassis non indigentes dieta, qua melius vivant. Usus autem ubi non visibilibus machinamentis, sed cœcis corporibus res geruntur, quid naturæ ferat necessitas in unoquoque casu edocet.

VII. Ac simili quidem victu, potuque, aut prorsus eodem ab initio homines, & bruta animalia usos fuisse puto, & ea, quibus nunc vescimur multa arte excogitata fuisse, & inventa post multum tempus, & post multarum rerum experientiam. Cum olim vidissent homines pecus hyeme facilius ferre aeris inclementias, atque minus lædi à rubis, quærentes etiam sibi ab his tutamen, imitati pecoris naturæ necessitatem, qua ob oppositam aeri vel duriores, vel villosam pellem minus læduntur, detraxerunt pellem pecori, qua postea induti sunt, atque id belle ipsis, & secundum vota successit. At cum vidissent multa, & gravia ipsis fieri à ferino victu, & ab iis, quæ humanam naturam maximè alterare valerent, ac cognovissent non eadem sequi commoda ab iis, quæ facile in nostri corporis substantiam abirent, atque ab iis, quibus aut difficulter nutrimur, aut omnino non nutrimur, paulatim desciverunt à ferarum victu, & nunc hoc, nunc illud aliud vitantes, hoc, vel illud aliud experiundo, sive naturæ usi necessitate quærentes hanc vivendi rationem, atque dietam, qua nunc utimur, adinvenire, & minus obnoxii facti sunt quamplurimis doloribus, & morbis, quibus olim dum ferino victu uterentur, affligebantur, & nunc etiam sæpè sæpiùs infestarentur, si his dimissi, quibus utimur, ferino antiquorum patrum victu vescerentur.

Verisimile autem est tunc minus perpeffos homines à fortioribus eduliis, potibusque propter consuetudinem, plurimos tamen debiliori natura præditos periisse atque eos, qui victum illum magis superare potuerunt, longiori tempore durasse, & superfuisse: quemadmodum etiam nunc ab iisdem, quæ humano corpori applicari possunt, tum propter varias consuetudines, quæ paulatim aliam inducunt naturam, tum propter varias corporum habitudines, alios magis, alios minus affici observamus, alios faciliùs à gravioribus liberari, alios non nisi cum multis doloribus, ac malis, alios omninò extinguì.

VIII. Homines, inquam, naturæ edocti necessitate ex tritico macerato, & à cortice purgato, molitoque, aquisque, in quibus fermentum sit dissolutum, permixto, postmodum subacto, fermentato, & affato panem fecerunt, ex ordeo vero mazam, quoniam viderunt crudum triticum, & hordeum quale ex campis colligitur, licet non grave aviculis, & equo, gravia esse homini. Alia ex aliis coxerunt, & miscuerunt; fermentationeque apta aliter, atque aliter pararunt. Fortia, & intemperata, quæ hominem nimis alterarent, aut difficulter in nostram substantiam abirent, & propterea morbos crearent, debilibus temperarunt, & quæ minus ex se se apta essent ad vitam conservandam, ac bene gerendam, multiplici usu aliud addentes, aliud detrahentes secundum hominis naturam, ac vires affinxerunt.

Quibus quidem inventis non video quoddam justius, ac magis conveniens nomen dari possit, quàm Medicinæ! quandoquidem ad hominis sanitatem, alimentumque, ut magis sanus, morbis, doloribus, & languoribus minus esset homo obnoxius, sunt inventa, in permutationem ferini illius victus, ex quo dolores, & morbi frequentiores erant.

IX. At si quis neget convenire aliquem his, quæ ad sanorum dietam pertinent, Medicum appellari; nihil fortè absurdi erit: Sicuti absurdum non est dicere inter eos, qui oculos habent neminem habere videndi artem; quoniam si objecta adsint visibilia secundum uniuscujusque proprios oculos, modo illos adaperitos habere velint, omnes necessitate quadam naturæ sunt videntes, & inter eos, qui vulgariter loquuntur, nemo dicitur loquendi artem habere, quoniam consuetudine eorum qui loquuntur, omnes necessitate veluti quadam naturæ loquimur.

Sed ut hoc ipsum loqui magnum quoddam est; ita inventum ipsum panis, vini, aliorumque similium, quæ ad sanorum dietam pertinent, & magnum, & multæ artis, & considerationis existit. Quæ licet principio omnibus hominibus communi, hoc est necessitate quadam naturæ sensum habentis, sint inventa, si quis tamen ea, quæ huc usque comperta sunt non ignoret, & alia insuper eadem via investiget: nec ea tantum, quæ sibi integro contingunt, advertat; sed quæ aliis sanis hominibus accidunt, observet, atque notet, non immeritò hic artis reparandarum, & conservandarum virium, & hujus partis totius Medicinæ artifex peritus dicetur.

X. Sed nos de ea disciplina edisseramus, quæ ab omnibus absque hæsitazione Medicina appellatur: de ea scilicet, quæ propter ægrotos inventa est, & consideremus an re vera sit, & professores habeat, qui ipsius præcepta servare debeant in ægritudinibus, & unde initium sumpserit.

Mihi equidem velut in principio dixi, nemo nè quæsisse quidem Medicinam videtur, si idem victus & ægrotis, & sanis convenisset, & nihil interfuisset aliam instituere ægrotis, ac sanis dietam. Hinc fit ut barbaræ quædam gentes, quæ id huc usque non animadverterunt eodem, ut fertur, nunc etiam modo, quo sani victitent ad voluptatem, & à nulla re, quam concupiscant in morbis abstineant, neque quicquam devitent. Nec ea profectò omnia, quæ à nobis cognoscuntur, ab uno aliquo primum inventa sunt; sed aliud post aliud à plerisque. Ipsi etenim Patres, ex quibus Ego ortum duco, Trojani tempore belli, in quo Duces fuerunt, non quidem in pesti-

pestilentie, neque in variis generibus morborum opem aliquam commilitonibus suis attulerunt, sed vulneribus tantummodo ferro, & medicamentis mederi soliti fuerunt, quoniam licet tunc comperta essent multa, quæ vulneratis convenirent, quæ tamen in aliis morbis potiora essent, ignorabantur. Cæterum qui alicujus morbi Medicinam quæsierunt, & invenerunt eandem cum illis sententiam habuerunt, qui relicto ferino victu ipsis etiam sanis gravi, alium instituerunt: de quibus superiori sermone dictum est. Videlicet sicuti illi quæsierunt victum naturæ humanæ magis convenientem, dum homo sanus esset, sic hi eodem principio desumpto ex naturæ universæ necessitate quæsierunt cibum ægrotis aptum. Et primum ex his ipsis cibis, quibus sani utebantur, copiam detraxerunt, (quod sæpe ex ipsius ægrotantis natura fit, cum parum homines, & canes etiam nonnullis in morbis appetant) & ex multis cibis paucos elegerunt, qui scilicet ad servandos hos, vel illos ægrotantes magis essent idonei.

XI. At hæc detractio ex quantitate solidiorum ciborum sufficiebat quidem nonnullis ægrotis, sed non omnibus, erant enim quidam ita malè habentes, ut neque modicos cibos solidiores superare possent. Imbecilliore sanè quopiam victu tales indigere visi sunt, sorbitiones proinde inventæ sunt, & pauca ex fortibus atque solidioribus sumpta sunt, additaque non exigua aquæ quantitate, robur ipsum temperatura, & coctura detractum est.

XII. Quod si quos viderunt, qui neque sorbitiones superare possent, has quoque detraxerunt, & ad potiones moderatas, quæ neque copia excederent, neque meraciores essent, pervenerunt. Probe autem nosse oportet, quibus in morbis sorbitiones non conducunt, non raro namque quibusdam exacerbantur mala, & manifestum fit sorbitiones, aut aliquid durius assumptum morbo quidem incrementum, & alimentum præstitisse, corpori verò ægrotanti tabem, & infirmitatem majorem, quin etiam sæpe ea, quæ conveniunt, neque omni tempore, neque in quacunque diei hora cum operæ pretio exhibentur.

XIII. Et in his quidem morbis, quos nunc innuo, si quis sicco cibo, aut maza, aut pane utatur etiam modice, decuplo magis, ac manifestius lædatur, quàm si sorbitione tantum esset usus. Sorbitio enim etsi & ipsa quoque his sæpè sit inconveniens, multo magis tamen inconveniens est siccus cibus, aut maza, aut panis, maximè intempestivè, & hora incongrua exhibitus. Idque ob nullam aliam causam, nisi quia sanum corpus non est idem, ac ægrotans, neque semper est morbus morbo similis, neque tempora ejusdem morbi sunt similia. Atque ideò non est eadem ratio hujus cibi ad sanum corpus, ac ejusdem cibi ad corpus ægrotans, ut neque hujus edulii, sive sorbitionis, aut potionis, aut aeris ad hoc corpus ægrotans, & hoc morbi tempore, ac ejusdem edulii, sive sorbitionis, aut potionis, aut aeris, aut alterius cujuscunque rei, ad aliud corpus dissimili morbo ægrotans. Unde quo quis in his magis erret, eo magis lædatur homo necessum est. His potissimum ægrotant homines, ac si ægrotent, in his potissimum si delinquant, pejus se habent.

Quid igitur aliud cogitasse videri queat hic appellatus Medicus, & confessus artifex, qui ægrorum dietam, ac victum, & alia multa, quæ convenirent, adinvenit, quàm ille, qui ab initio omnibus fere hominibus victum

Quam, quo nunc utimur ex agresti illo, ac ferino reperit, ac subornavit! aut quo alio novo principio, ac fundamento hic usus est, ut ægrorum dietam inveniret, quam hic, qui sanorum reperit dietam fuerit usus! Mihi equidem videtur idem modus, idem principium, atque via, & unum quoddam, aut saltem simile esse inventum. Et licet indicio sumpto à juvantibus, & lædentibus hæc Medicinæ species, quæ ægrorum dietam invenit multiplicior, & variegatior sane sit, ac multo majoris negotii, ab illa tamen, quæ sanorum dietam invenit aliquo pacto dependet, aut idem prorsus fuit utriusque principium.

XIV. Accidit autem quibusdam in morbis, vel certis temporibus nonnullorum morborum plus lædi ægrotantes ab iis cibis, quibus sani innoxie uti solent, ut est panis, & maza, quam sani lædantur, aut periclitentur ab ervo, & hordeo crudo, aliisque similibus, quibus bovum, & equorum necessitati satisfacit.

XV. Neque verum est, quod nonnulli putant, fortiora, & quæ corpus sive sanum, sive infirmum magis alterare possunt, aut difficilius à viventium viribus transmutantur simpliciter nocere, & ea, quæ debiliora sunt, & intus assumpta facile mutantur, simpliciter propterea prodesse, aut nutriendo, aut aliter opem ferendo sive sanis, sive ægris corporibus. Si quidem, si ita se res haberet, facillimum omnino esset necessitati tum sanorum, tum ægrotantium providere, ea scilicet, quæ debiliora, & minoris energię essent, eligendo, & aliquid de securo, atque mediocri victu detrahendo, ut demum is sive sanis, sive ægris tutissimus esset. Sed res aliter nimis se habet, & sive modum, sive rerum substantiam spectes nulla prorsus excepta, quod huic juvat, sæpè alteri nocet, quæve huic ægrotanti profunt, postea huic eidem, quoniam is mutatus est, nocebunt. Præterea fortiora, & fames, & sitis, ut etiam repletio, & evacuatio, aut quid aliud his simile magnam potentiam in naturam hominis habent nunc sanandi, nunc debilitandi, nunc occidendi. Quapropter multo sane est, uti dixi, hæc disciplina, quæ ægrotos respicit, variegatior, & multo maiorem diligentiam requireret, quam illa, quæ sanorum victum quærit, atque ideò modum, rationemque conjectare oportet, qua certus hic ægrotus sit habendus.

XVI. Verum enim vero in his omnibus, quæ ad artem sunt necessaria neque certioremodum, rationemque, neque magis exactum pondus, neque numerum, aut mensuram, aut normam aliquam, ad quam referas reperies unquam, quacunque tandem methodo utaris, quam corporis sensum. Difficile autem, & operosum nimis, exacte adeo, quæ unicuique convenient condiscere, ut parum in alterutram partem delinquas: quamquam Ego eum etiam Medicum maximè laudarim, qui parum delinquat, certitudinem enim prorsus exactam rarè videre contingit, neque quicquam reperire licet, adeò perfectum, ut nihil in eo desiderare possis.

XVII. At quidam Medici similes sunt iis, qui imprudenter, sine arte, & casu, fortunaque naves gubernant. Hi cum mare est tranquillum, & nulli vehementiores aera turbant venti, & cum nullus adest proximus navi scopulus, longeque remotæ sunt syrtes, etiam si non leviter in munere peccent, haud tamen multum nocent; neque tunc ex eorum erroribus sequitur facile naufragium. Sed si mediocris, aut forte magnus ipsos deprehende-

rit ventus, aut tempestas navem adoriatur, tunc propter imperitiam ignorantibus, quæ faciendæ, quæ præcavendæ sint facile sibi ipsis, ac navi naufragium parant. Sic sane etiam imperiti quamplurimi Medicorum cum tractant homines, nihil quod occidere possit patientes, in quos si quis etiam non parum delinquat, nihil grave faciat (sunt autem multi tales morbi, & multo sæpius, quàm graves hominibus accidunt) etsi in multis errent, aliquando tamen parum, & vix quod notari possit, nocent. Ubi vero obtigerit magnus, fortis, periculosus morbus, tunc ipsorum imperitiæ delicta haud leviter afferunt incommoda. Enim vero nonnunquam is, qui facile servari potuisset, propter remedii ignorance, habendique modum orco demittitur, ac sunt non pauci morbi, in quibus si aptum remedium non afferas, & res rite non administrantur, ægrotantes pereant, at ubi afferas cito servantur.

XVIII. Quod autem non minores afflictiones ab intempestiva evacuatione, quàm à repletione, ut etiam à motu, aut quiete, & à plerisque aliis contrariis hominibus contingant, probe quidem discemus, si in sanis rem istam expendamus; nam non solum ægrum corpus, sed etiam sanum mutatur, & alteratur diversimodè à vario rerum omnium usu, & varia est illius diversis tamen temporibus necessitas.

Quod, ut fiat manifestum, omittamus primum eos homines, qui ob voluptatem, aut ob aliam aliquam minus probabilem rationem, non propter utilitatem prandunt, aut cœnant, aut utrumque faciunt, & consideremus esse quædam corpora, quorum naturæ necessitas exigit, ut si bene vivere velint, semel tantum in die cibum capiant: idque aliis hominibus fieri debet cœnantibus tantum, aliis prandentibus tantum. Sunt alia corpora, quorum necessitas jubet, si bene vivere velint, bis in die cibum sumant, cœnent scilicet, & prandeant singulis diebus, aut sunt etiam, quibus pluries opus est in unoquoque die ciborum, & potionum usus.

XIX. Ex his autem, ille, qui satis integer erat, necessitatem tamen quæ jubebat cœnam tantum non servavit, & pransus est, facile fit corpore gravis, & segnis, mente piger, & somniculosus, oscitatione, siti, aliisque forte malis infestabitur. Huic, si postea insuper cœnet, alia mala facile contingent, ut flatus, tormina, vertigines, vomitus, laxior alvus, atque similia ob mutatam ab inutili prandio corporis sui necessitatem, quam aliquando etiam dicere possis dispositionem, propter quam aliquid aliud, quod non fuisset factum, necessario fit. Item si quis prandere debeat, & huic non serviat necessitati, mox ubi prandii tempus præterierit, facile fit corpore impotens, animo delinquens, oculis languidulis, pallidus, & caligans, urina illi erit crassior, & mordacior, os amarum, & grave olens, viscera pendere ipsi videbuntur, & contorqueri, ac membra tremore corripientur: his sæpe vertigines, iracundiæ, & tristitiæ adiunguntur. Quæ quidem sunt ob omissum utile prandium spe cœnæ, quam consequuntur nocte insomnia tumultuosa, & conturbata, & ægre dormiunt. Sequenti die non fit ipsis hora solita prandendi consueta necessitas: idque ob errores præcedentis diei, qui nisi corrigantur alia mala adveniunt.

XX. Et hæc quidem plerisque sunt graviorum morborum initia. Aliis quidem quoniam non expectaverunt tempus iustum sive prandii, sive cœ-

næ, & novos cibos ingesserunt prioribus ferventibus adhuc in fermentationibus; & quantum opus erat non consumptis, aut transmutatis, vel cum venter non esset evacuatus, & non quievisset à priori cibo. Aliis morbi fiunt propter abstinentiam post elapsam jam prandii, aut cœnæ tempus; quoniam consumptis prioribus cibis non habet corpus alimenti fruitionem; & id, quo assumptus cibum paratur in aptum alimentum non habet materiam, in quam suas exercent vires: quapropter necessitate quadam ipsam hominis naturam afficit. Aliis autem aliter fit ob alias necessitates, sive ob alium, atque alium causarum necessitate quadam agentium concursum, & complicationem. Quæ tam varia sunt, ut etiam si inutiliter repletis abstinentia plerunque remedium sit; expediat tamen non raro novum sumere cibum priori adhuc non consumpto: vel ut ventriculus evacuatione indigens, quod plura ingessit, eò facilius postea evacuetur; vel ut id, quod in ipso mordax nimis jam factum est, contemperetur; vel ob alias causas. Sic aliquando operæ pretium non erit replere corpora ex nimia inanitione laborantia; vel quia deest id, quo ea, quæ sumuntur parentur, & apponi possint, vel ob alias causas, sive naturæ necessitates.

XXI. Est tamen rebus in omnibus latitudo quædam, quam si non transgrediare, nihil magnum, aut notabile facias sive boni, sive mali: unde nequaquam ex quovis errore omnis homo statim, aut graviter ægrotat. Illi cui saltu, vel cursu corpus est nimis agitatam, levis haustus egelidæ, aut nihil, aut vix sensibilibus nocebit. Corpora, quæ præ nivibus quam maximè dirigerunt, igni proxima citò protinus corrumpuntur: hæc eadem ab igne remotiori non solum non læduntur, verum etiam frequentè restituntur. Is qui solitus est nudo capite incedere, haud statim ægrotat, si cooperiatur brevi tempore, & è converso: ut neque facile ægrotabit, qui ex eo, quod noxium est, minùs accipiat quàm quo lædi possit: maximè si alia non concurrant.

Eas autem naturas, quæ facile non ex levissima, sed ex levi causa malè habent, imbecilliores appello; quæ etiam aliquandò facile mobiles, & alterabiles dici possunt, & nonnunquam aliis nominibus congruenter appellantur. Sanis autem imbecilliores, & facilius mobiles, & alterabiles sunt ægrotantes, qui si ex ea parte peccent ex qua ægrotant; multò sanè gravius læduntur, quàm quilibet imbecillis, aut malè robustus homo, si ex illa eadem parte ex qua imbecillis est, peccet: scilicet ex errore facilius movetur æger, quàm imbecillis homo, sanus tamen; quæve ad movendum hunc est levis, & impotens causa; ad movendum illum est gravis, & potens nimis.

Ex his autem omnibus manifestum fit, difficile sanè in morbis esse, rectissimum semper assequi. Sed non propterea debemus veterem disciplinam damnare, tanquam non existentem; aut non probè investigatam, vel quoniam non habeat circà omnia exactam certitudinem. Quin imò quoniam Medicina in plerisque recto propinqua est, ac si prudentiores Professores eadem utantur via, qua veteres sunt usi; ad ipsum rectum perveniri possit; admirari oportere censeo ea, quæ ex multa rerum omnium ignorance sunt eruta! Prudens autem Medicus cum multa necessariò semper fiant in ægro corpore, & circà ægrum corpus etiam nullo jubente; sæpè

non expectabit magnas mutationes, ut quid faciendum sit determinet: sed frequentissimè à levioribus quibuscunque sive juvantibus, sive nocentibus indicia eorum, quæ conveniunt sumet, & non sinet præterire occasionem rei benè gerendæ.

XXII. Sed redeamus ad eos Medicos, quibus ex hypothese omnia sunt plana: quivè veterem viam deferentes ad malè confictam hypothese omnia deducunt. Si calidum, aut frigidum, siccum, aut humidum, acidum, aut amarum, album, aut nigrum, aut aliud quodcunque his simile est, quod hominem lædit, & oporteat rectè medentem auxiliari calido quidem in frigidum permutato; frigido autem in calidum, & sic similiter dicant in quacunque simili inani hypothese: contingat mihi homo non fortis naturæ, qui triticum edat, quod ex area sustulit non elaboratum, & carnes crudas, & bibat aquam. Hoc victu utens satis scio, quod multa, & gravia patietur: nam flatibus turgescet, doloribus vexabitur, & ejus corpus debile evadet, & venter corrumpetur, & multò tempore vivere non poterit. Quod igitur auxilium præparare oportet sic habenti calidum, an frigidum, siccum, an verò humidum, vel acidum, vel album, vel nigrum? Simplex enim est, quodcunque ex istis: & ex his factæ hypotheses similes prorsus mihi videntur, non quidem ad inveniendum, sed ad vanas contentiones vix aptæ. Si unum ex his est quod hominem lædit, contrario solvere oportet, ac liberare, quemadmodum eorum sermo testatur! Atqui certissimum, & manifestissimum medicamentum est, victum, quo usus est, auferre, & pro tritico panem dare, pro crudis verò carnibus coctas, insuperque vinum propinare. His permutatis impossibile est non fieri sanum; nili penitus fuerit homo tempore, ac victu corruptus. Quid itaque dicemus? nùm quodd ipsi à frigido afflicto calida hæc oblata auxilium tulerunt, aut contra? Equidem opinor me multam hæsitationem interrogato præbiturum: modo is sit ingenuus, ac benè morigeratus, & contentionum contemptor.

XXIII. Nam qui panem ex tritico paravit calidum, aut frigidum non quæsit, neque quicquam aliud ex iis, quæ non pertinent ad panis substantiam. Refert autem sit ne panis cui nihil surfurum decessit, nec ne? & ex tritico decorticato, aut non decorticato, aliisque seminibus permixto, aut puro, in subtilissimum pulverem redacto, aut leviter contuso? Refert multa nè fuerit aqua subactus, aut contra; magis, minus fermentatus; satis coctus, aut crudior fuerit? Et hæc quidem atque similia sunt consideranda in pane, quæ re vera ad ipsius naturam, & substantiam pertinent. At qui hæc non considerat, quomodo affectiones, quæ in homine ex pane sunt cognoscere poterit! ab unoquoque enim istorum, similiumque ad rerum substantiam pertinentium afficitur, & alteratur homo vel hoc, vel alio modo, & ex his omnis vita, & sano, & ex morbo convalescenti, & aegroto.

XXIV. Nihil igitur utilis, neque magis necessarium, quam rerum proprias affectiones cognovisse; quæve sint illarum in corpus humanum vires, & è converso, quæ sint corporis humani, partiumque ejus in res alias vires; quæve fiant ex concursu mutuo corporum. Et profectò primi Medicinæ inventores multiplici rerum usu, via scilicet, quam nobis natura tradidit, hæc, quantum tunc licuit, investigantes admirati tum diffi-

cultatem rei, tùm utilitatem judicaverunt artem dignam, quæ Deo ascriberetur, quemadmodum recepimus! Illi autem neque quod siccum simpliciter dicitur, aut humidum, neque quod calidum, aut frigidum, aut aliud his simile putaverunt hominem lædere, neque in his quærendis anxia cura opus esse existimaverunt. Nàm fortè de his similiter credebant, ac de gladio; qui non enecat, quia dolorem affert, sed quia viventis organa dilacerat, quin imò quia partem aliquam dilacerat dolorem affert. Nec si quando juvat gladius, idèd juvat, quia dolores excitat, sed quia sinus aperit, in quibus sanies continebatur. Præterea dormientes tùm juvari, tùm perimi possunt ferro, vel igne absque ullo aut dolore, aut calore. Ridiculus autem est, qui dixerit sine doloris quidem perceptione, sed non sine dolore ferro nos juvari, vel lædi posse. Verùm enim verò quod in unoquoque fortè est, & humana natura potentiùs; quodvè non solum omninò superari non possit, sed quod plus minusvè superet naturam, hoc ipsum lædere sæpenumerò duxerunt, & hoc ut plurimum auferre quæsierunt. Fortissimum autem est, quod aliud maximè immutat: ut sunt ea, quibus liquida concresecunt, concreta liquescunt, conjuncta, disjunguntur; disjuncta conglutinantur, clausa aperiuntur; aperta clauduntur, & alia infinita, & inter hæc connumerari possunt ea, quæ dicuntur calidissima, frigidissima, dulcissima, amarissima, acidissima, & alia; quoniam hæc quidem, quæ vehementes excitare possunt sensationes (nam nulla alia ratione sic dicuntur) possunt etiam, aut corporea hominis organa vehementer movere, aut viventium partium motus si qui erant sistere, ex quibus, vel coagulatio, vel liquatio, vel disruptio, vel trituration, aut quid aliud simile fiat in organis, sive in hominis partibus corporeis. Quorum quidem omnium causæ sæpè in ipso homine omnino reperiuntur; neque semper opus est, ut extrinsecus occasiones, sive extrinsecæ causæ adveniant, ut aliquid fiat in nobis, sive boni, sive mali. Si quidem vel ea, quæ corpori insunt permolari possunt, ut aliud, atque aliud ex illis iisdem postea fiat; vel quæ permixta sunt, & altera alteris refracta, ut propterea temperata dici mereantur discerni, & separari possunt; ut unumquodque, aut alterum ex illis intemperatum postea sit, & hominem lædat. Atque idèd non absurdè quandoque dicitur, inesse homini non solum calidum, & frigidum, amarum, & falsum, dulce, & acidum, & acerbum; sed etiam alia infinita incidentia, coagulantia, liquantia, & alia aliis vocibus denotata: quibus scilicet omnigenæ potentia, & facultates rerum exprimi possint. Quod idem est, ac si dicerem affectiones quascunque: partium nempe dilatationes, constrictiones, dilacerationes, rarefactiones, condensationes, coagulationes, liquationes, & alia infinita fieri posse in homine ab iis, quæ homini insunt.

XXV. Sic similiter pleraque sunt extra hominem efficacissima, quæ cum aliis confusa conspicua non sunt; secreta verò ab aliis manifesta fiunt, & hominem sæpè lædere possunt. Ignis ipse rarissimè aliis perspersus substantiis nihil magni, aut violenti producit; estque idcirco occultus, sive temperatus: quod si quis partes illas dispersas iterum congreget, intemperatum quid illarum aggregatum, & excedens erit. Cibi, qui nobis inutiles sunt, aut ingesti hominem gravitèr afficiunt, sunt nobis intemperati, & aliquid habent ad nos forte, & excedens: quod quidem cum non raro

sensum vehementer excitet, dicuntur proinde illi aut amari, aut acidi, aut alii desumpto nomine à sensatione magis conspicua, qua ab illis affici-
mur. Turbamur ab his quemadmodum etiam ab illis, quæ in ipso corpo-
re fiunt potentiam magnam habentia sine manifesta extrinseca causa; quo-
rum pleraque frequenter excernuntur, & oculis subjiciuntur; fitque eorum
vis plurimis signis manifesta. Secus quæ edit, & bibit homo sine noxa nihil
habent quod ad nos, & nostram naturam dici possit, vel dissidens, vel ex-
cedens, vel aliud quid simile: ut sunt panis, & maza, quibus assuetus est
homo plurimis, & semper uti. Id tamen pani, & maza aliisque similibus
cibis dandum est, dum homo bene valet; nam ægrotanti sæpe non conve-
niunt ea ipsa, quæ sano apta erant; eique non raro operæ pretium est ad-
hibere ea, quæ fortissima, & efficacissima dicuntur, quæ sano non conve-
niunt.

XXVI. Cæterum ego non video quemadmodum curaturi sint homines
illi, qui rejecta veteri antiquorum via Medicinam ad scopum, sive ad hy-
pothesim aliquam ab ipsis excogitatam abducunt. Enim verò non est ipsis,
velut ego opinor, inventum quid in se ipso calidum, aut frigidum, aut
siccum, aut humidum; quod simpliciter tale sit, & ideò homini opem af-
ferat, vel lædat illum! Quin imò hæc, quæ nos habemus si calida dici
quandoque merentur, quia calefacere possunt; similiter dici possunt frigida,
quia aliquando refrigerare possunt: Et dulce dici potest amarum, vel aci-
dum. Neque equidem arbitror alios esse ipsis cibos, aut potus! Illi tamen
apponunt huic cibo, quod sit calidus, huic quod sit frigidus, huic, quod
sit acidus, aut salus, aut albus, aut niger!

XXVII. Id autem fit, quoniam impossibile est, aut saltem dubium im-
perare agroto calidum quid assumere; statim enim interrogabit, quid sit
illud: ut nugas producere necessum sit, & inanes fabulas, aut aliquid osten-
dere eorum, quæ applicantur sive intus, sive extra: panem scilicet, aut ca-
seum, aut lactucam, aut aliud.

At cum eorum, quæ calida ab ipsis dicuntur, aliud sit rarum, aliud
densum, aliud fluidum, aliud non fluidum, aliud asperum, aliud leve,
aliud, quod facile ab his, quæ in corpore insunt, solvatur, aliud quod
minime solvi possit, aliud quod his permixtum ebullitiones faciat, vel è
contra, aliud quod hæc liquida coagulet, aliud quod hæc coagulata in liquo-
rem vertat; cumque sexcenta alia opposita notari possint in iis, quæ calida
appellantur; ut etiam in iis, quæ dicuntur acida, vel amara, quodnam
erit hoc calidum, quod Medici præcipient sive vitandum, sive sumendum?
liquidem eorum, quæ ab ipsis calida dicuntur, non sunt eadem vires; &
sæpe ab hoc ipsorum calido fit oppositum ejus, quod fit ab hoc alio ipsorum
calido: idque non solum in homine, sed etiam in corio, ac ligno, & aliis
multis rebus, quæ magis stupidum sensum habent, quam homo! Et equi-
dem caliditatem, & frigiditatem, quam nuncupant Medici, omnium fa-
cultatum minimè potentes esse in corpore existimo; adeout sapissimè ni-
hil prorsus referat eorum, quæ calida, an eorum quæ frigida dicuntur, sit
id, quod assumitur.

XXVIII. Neque calidum est tam remotum à frigido, quam multi exi-
stimant; neque acidum est nimis remotum ab amaro, vel à dulci: hoc est
illud

illud idem, quod calidi sensum producit, paucis mutatis potest producere sensum frigidi. Quod ex eo constat, quod sapissimè homo nullo auxilio, & nulla indigens præparatione extrinseca ex se se mox fit frigidus; mox fit calidus in sensu; sive brevi tempore ex iis, quæ in ipsomet fiunt frigidi, & calidi perceptiones habet. Neque quod huic homini, vel quàm plurimis hominibus calidum, aut viride, aut amarum esse dicitur, similiter & cani viride esse, vel amarum dicendum est, cum neque, & eidem homini hoc semper viride, & hoc semper amarum sit.

XXIX. Item si quis sanus hyeme corpus perfrigeret, aut frigida lotione, aut alio quopiam modo, quanto id magis fecerit, tanto magis, & amplius postea ubi vestimenta acceperit, & sub tegmen venerit incalescet: dummodo non fuerit prius à frigida perfusione omnino congelatus; tunc enim ut nullum percipit frigus, ita nullum neque ex sese, neque etiam admotis ignibus percipit calorem. Sic etiam si quis calido lavacro, vel ignis vi nimis fuerit excalestus; postmodum remotis ignibus multo magis perfrigetabitur, ac magis horrebit, quam is qui præ æstu ventilationem admisit, & sibi frigus paravit, atque hic multo maiorem æstum, & ardorem percipit ab igne, atque à calido lavacro, quam is, qui sibi frigus non paravit. Præterea quicumque per nivem, aut aliud, quod frigidum dicatur, iter facientes excellenter frigescent, ubi postea ab illis locis discesserint, & in tepore extiterint ab æstu, & pluritu vexantur, quibusdam etiam velut ambustis ab igne bullæ exurgunt: promptè scilicet in nobis utrumque fit, & altera ex istis affectionibus promptè nimis ad alteram accedit. Possem alia multa recensere, sed hæc sufficere possunt iis, qui frigoris, calorisve naturam apti sunt intelligere. Id tamen, quod in morbis frequenter observatur, in eorum gratiam addamus, qui volentes pertinaces non sunt in illa sententia, sed quia decipiuntur ipsi, alios decipiunt. Nonne sapissime quibus frigus, & rigor contingit, his acutissima febris percalida relucet per totum corpus penetrans, desinens maximè in pedes, ubi sane rigor, & frigus validissimum diutissime duravit? Quod malum ut plurimum, periculo vacat. Rursus cum sudor prodierit, & febris decesserit, nonne multo magis frigescit æger, quam si nè febris apprehendisset quidem ab initio? Cui igitur brevi adeò contrarium accedit, cuique vis adimitur sua sponte, quodnam magnum opus est auxilium? aut quid nam magnum, aut grave ab his fiat? Consistit morbus iste in calido, an in frigido, cum utramque affectionem habeant, qui eo agrotant? Nonnè unico ille sanari potest remedio, quod neutrum ex his sit? Est nè remedium hocce tum adversus calidum, sive caliditatem, tum adversus frigidum, sive frigiditatem huius morbi?

XXX. Verùm dixerit aliquis, qui ardenti febre febricitant, itemque peripneumonia, & aliis plerisque morbis, non cito ex calore liberantur, neque adest hic promptum frigidum adversus calidum. Atqui Ego hoc maximum signum esse puto, quod non propter calidum simpliciter homines febricitant, neque hoc simpliciter sit afflictionis causa. Nam facile esset tum naturæ spontè, tum Medici inventionem remedium. Inest rebus amarum, ac calidum idem, & calidum, ac acidum, & salsum, ac calidum, & alia infinita, & rursus frigidum cum aliis infinitis facultatibus conjunctum: hoc est tum sensus diversimodè affici potest à rebus, (quæ propterea calida dicuntur

tur si calefaciant, amara, aut acida, si amarities aut aciditas propter ipsa in ore percipiatur) tum etiam condensationes, & rarefactiones, liquationes, & coagulationes, & alia infinita fieri possunt ex vario variarum rerum concursu, & applicatione. Si calidum igitur dixeris, nihil aliud significabis, nisi quod hoc sic dictum calefacere possit, sive quod hæc ab ipso sensatio fiat. Quod profecto satis non est ad explicandam illius rei naturam, cum infinita alia ex illa eadem re fieri possint, sicuti non sufficit ad ferri naturam explicandam dicere quod incidere possit; nam hoc minimum fortè est eorum omnium, quæ ferro fieri possunt. Ac sicuti æquum non est hanc de ferro simplicem hypothesein facere, quod sit incisivum, sive quod incidere possit, & sicuti ad hanc hypothesein ineptia est infinita alia, quæ in ferro, & cum ferro fiunt, reducere, ita æquum non est hypothesein facere de re quacunque quod calida, aut frigida sit, aut humida, aut sicca, & ita quoque ineptia est hac hypothesei, aut alia simili infinita alia, quæ rebus insunt, aut infinita alia, quæ fieri possunt à vario rerum usu hac hypothesei explicanda suscipere. Namque, vel nulla facienda de rebus hypothesis est, vel si quæ sit omnia comprehendere debet, quæ in rebus reperiuntur, & omnia explicare debet, quæ fieri possunt.

XXXI. Signa porro alia adducam ex communibus observationibus desumpta, quibus hoc idem quod dictum est manifestum magis sit. Nonnunquam nobis gravedo innascitur, & fluxus per nares movetur, qui sæpe acrior est eo, qui prius quotidie per nares prodibat, & tumescere facit nasum, quem exurit, calentem, & nimis ignitum reddit. Quod si diutius perseveraverit, exulceratur etiam non raro nasus. Sedatur autem aliquo modo ardor in naribus postquam fluxus minus acris factus, & fluens substantia concocta magis, & permixta fuerit, hoc est cum intemperantias amiserit propter quas molesta erat naribus. Quæ cum fiant quandoque tum ab eo, quod dicitur frigidum, tum ab eo, quod dicitur calidum, oportet conicere quid insuper intit in illis rebus, sive quas alias potentias præter istas calefaciendi, & refrigerandi habeant, propter quas gravedines fiant, & id quod fluit nares tumefaciat, & exulcerat. Nam si nihil aliud factum est, quam perfrigeratio, calefactio simplex remedium est, si calefactio simplex facta est, refrigeratio est remedium. Quæ quidem brevi accedunt, & nulla concoctione opus habent, ut fiant. Verum cum aliquid aliud factum est, remedio indigemus, quo illud aliud auferatur, videlicet si cutis poruli facti fuerint angustiores laxandi illi, & aperiendi sunt, si humor acris factus sit, & mordax, moderandus; & mitigandus, si liquidior, crassior faciendus est, aliæque intemperantiæ corrigendæ sunt. Sic si simplex calefactio ab igne molestiam afferat, simplex refrigeratio, utcunque parata, auferet illam. Sed si præterea ignis carnibus ulcere inusserit, si ignis vi membranæ, & fibræ corrugatio facta fuerit, si meatus alii fuerint disrupti, alii clausi, si alia insuper facta fuerint ab igne, procul dubio frustra his omnibus à quacunque simplici refrigeratione auxilium sperabimus. Hæc enim molestiam tantum calefactionem de medio tollit, non sanat ulcera, neque membranas, neque fibras restituit. Quod aded verum est, ut in iis, quæ præter incongruam calefactionem nobis molesta fieri possunt ab igne ut est exulceratio, licet aliquando remedium habeamus ab iis, quæ præter alias potentias, re-

frige-

frigerandi vim habent, non raro tamen remedium hoc inveniatur in iis etiam rebus, quæ non solum non refrigerant exulceratum corpus, sed manifesto calefaciunt. Sic pleuritis, quæ frequens est in rigidiori cœli tempestate non sanatur iis, quæ simpliciter calefacere possunt, licet & in his quoque illius sæpe remedium inveniatur. Ita similiter non est viride, vel flavum, vel album id, quod in cibis non nutrire potest, licet inter ea, quæ viridia nuncupantur multi nobis apti cibi reperiantur.

XXXII. Illa etiam, quæ ab oculis fluunt, sæpe fortia existunt, & aliquam acrimoniam habent (sunt enim acrimoniarum multiplices): Unde exulcerantur aliquando, & corroduntur tunicae oculorum, ut etiam & palpebræ, & genæ ab effluente ab oculis humore. Dolores, ardores, & inflammationes fiunt. Quæ mitiora sunt cum fluxiones fuerint concoctæ, sive intemperantiam, quam habebant amiserint, quod permixtione quandoque fit, & temperatura, (ut cum acetum, aquis permixtum temperatur) quandoque maturatione quadam, similis illi, quæ in fructibus observatur, & lemæ frequenter ab his fiunt.

XXXIII. Rursus quædam fluunt è faucibus, vel in faucibus consistunt, ex quibus vocis, & respirationis organa offenduntur, & raucedines fiunt, & angina; nonnunquam erysipelata, peripneumoniæ, febres, alique morbi. Hæc, vel idèd nocent, quod in loco sint, cui non conveniunt, & ut sanguis optimus, qui in venis utilis est, in cavitate vesicæ consistens morbos progignit; pleraque, quæ in aliis locis utilitatem aliquam afferrent, in faucibus, & in organis respirationis afflictionem aliquam pariunt, vel nocent, quia intemperantiam aliquam habeant, & nimis fluida sint, aut acria nimis, & mordacia, aut plurimo sale hujus, vel illius generis sint referta, aut aliter sint intemperata. Et illud quidem auferre convenit, propter quod nocent. Oportet enim causas uniuscujusque ea putare, quæ cum adsunt, illud fieri necessum est, cum non adsunt, vel cum permutantur in aliud temperamentum, illud cessat, & aliud fit.

XXXIV. Item bilis, quæ ad tenue intestinum propter aliquam causam non descendit; sed per totum corpus diffunditur, aut illa quæ liquidior, & tenuior, aut minus efficax facta est, ut etiam illa, quæ acrior, & mordacior, aut crassior est, aut aliter est intemperata, morbos plerisque facere potest. Fiunt sæpe ab ipsa dolores, & febres, rabies, & morsus viscerum, desperationes, anxietates, æstus, impotentia; fiunt vomitus, & inappetentia, & cibus sæpè minus rectè elaboratur. Quæ non cessant, nisi id propter quod fiunt, auferatur, vel scilicet ad tenue intestinum bilem deducendo; & id, quo descensus iste prohibebatur, auferendo, vel intemperantias corrigendo, vel id, quod alicubi exuperat, & inconveniens est evacuando.

XXXV. Temperari autem, & maturari, aut concoqui humores per multas, & infinitas species contingit. Quapropter & modi, & tempora, & numeri, & mensuræ in his multum possunt. Etenim ut caro, quæ putrida est, aut incipit putrescere, & propterea nobis intemperata dicitur, quibusdam animalibus, quæ illa utiliter vescuntur, temperata, matura, & concocta dici potest; ita quædam sunt huic homini temperata, & concocta, quæ aliis hominibus cruda, & intemperata, ac fortia dici debent. Quin

etiam in uno eodemque homine sapissime, quod prodest ventriculo male concoquenti, & ad ventriculum nullam habet intemperantiam; nocet, & intemperatum est brachio exulcerato, quodque ad hanc partem corporis coctum, maturum, & temperatum est, ad aliam particulam crudum, acerbum, & intemperatum dici meretur.

Sed dicet non nemo pro calido, & pro frigido, sive pro caliditate, & frigiditate non esse intelligendum id tantum, quod calefacere, & refrigerare potest; sed id, quo omnia fiunt, quæ in fermentationibus, concoctionibus, maturationibus, temperaturis, aliisque similibus fieri contingunt! Hic etiam si fortè de rebus haud malè sentiat, non est tamen ferendus; nam voces multò sanè aliter accipit, ac communiter accipiantur, & hominum animos suis sermonibus præjudiciis, & erroribus replet. Comuni enim hominum sensu cum calidum dixeris, intelligitur id, quod calefacere potest, non id quod maturationem, vel incrassationem, vel putrefactionem suscipere aptum est, cum frigidum, intelligitur id, quod refrigerare potest: quæ significationes sunt servandæ tum ut sermonum, tum ut eorum de quibus loquimur, confusio vitetur. Retinendæ sunt vocum significationes, quas vulgus retinet, & oportet panem appellare panem, & caseum caseum, ut homines appellare soliti sunt: etiam si & hi quoque in his non raro peccent; dicunt enim sæpenumero aliquid tale, non quale est, sed quales illud nos facere consuevit: sic Democriti Præceptoris volumina dicuntur erudita, & docta, quoniam, qui legunt, & perlegunt docti, & eruditi fiunt, & calidam sapissimè dicitur non aliquid, quod tale sit, sed id, quo nos calefieri possumus.

XXXVI. Cæterum Medici quidam, itemque & sophistæ quamplurimi dicunt, quod impossibile est Medicinam cognoscere eum, qui non novit quid sit homo, & quomodo primum factus, & compactus sit. Qui si loquantur de eo, qui rectissimus, & omni ex capite perfectissimus Medicus dici mereatur, verum profectò inquiunt; sed hoc opus, hic labor apollineus est nosse hominem unumquemque, & quomodo omnia gerantur, quæ in homine fiunt! Mihi equidem nullus videtur hæc exactè cognovisse, non inquam in homine; sed neque in musca, neque in verme! Scio tamen plerisque Medicorum, & Sophistarum multa confidenter nimis, & audacter de homine fuisse locutos, sed quæ ab ipsis dicta sunt, minùs censeo Medicæ arti convenire, quàm Pictoriæ. At si quid de hominis natura cum aliqua certitudine cognoscere possumus, id continget ex Medicina eo principio excultarità, & promota, de quo dictum est. Ac licet alia via nonnulli non pauca cognovisse videantur, illorum tamen scientia, neque evidens est, neque ullum, ut plurimum habet in Medicina usum. Medicus enim maxime cognoscere debet, quid sit homo ad ea, quæ comeduntur, aut bibuntur, quid sit ad hunc, vel illum aerem, quo est circumfusus, quovè in respirationibus utitur, quid sit ad ea, quæ quomodolibet ipsi applicantur, aut ad ea, quæ in ipsomet fiunt, quæve ipsi contingant ab hoc, vel cibo, vel potu, vel aere, vel animi affectu, vel corporis exercitatione cognoscere oportet.

Neque satis est existimare, quod malum edulium est caseus, ex: gr.; quonia aliquando repletio ex ipso dolorem, & noxam affert, sed opus est
ani-

animadvertēre, cuinam homini id factum sit, quānam sit doloris species, cui parti intrā hominem existenti, an omnibus incommodus, & inconveniēns sit caseus, & quānam ab illo huic homini contingat mutatio? Nam cum dicimus hoc incommodum, vel commodum est ad nullius peculiarem naturam relatum; tum non distinguimus hoc ab aliis, quæ etiam commoda, vel incommoda dici possunt, tum facile decipi possumus, siquidem quod uni incommodum est, alteri est commodum, & conveniens.

XXXVII. Itā sanè vinum meracum multum potum aliquem hominem debilem reddit, & omnes qui viderint hoc fatentur, & cognoscunt, quod hæc est vis vini, sed nonnunquam alteri homini aliter, atque aliter fit ex vino. Caseus etiam non omnes homines lædit, ac sunt, qui ipso repleti ne tantillum quidem offenduntur: imò caseus quibusdam gracilibus mirabiliter conferre dicitur. Hominum namque naturæ non parum differunt, est in hujus corpore, quod commixtum caseo profit, in alio corpore est, quod commixtum caseo noceat. In hujus corpore hanc suscipit caseus mutationem, ex qua detrimentum sequatur, in alio verò corpore alia fit mutatio, sive alteratio ex qua sequatur utilitas. Si toti humanæ naturæ malus esset caseus, omnes utique læderet, ut etiam vinum, & aliud quodcunque. Hæc si quis novisset vitatis iis, quæ detrimentum asserunt, non dole-ret, neque pateretur. Item in quocunque statu sive sanitatis, sive ægritudinis, sive cum corpora convalescunt, & restituuntur ex morbis præcipuè longioribus multæ prævaricationes, & conturbationes fiunt partim spontè ex ipsa mutabilitate corporum, partim à quibuslibet minùs congruis casu aliquo, vel temerè admissis.

XXXVIII. Novi autem Medicos nonnullos veluti Idiotas, qui ubi homines sinè illorum consilio aliquid fecissent, ut si lavissent, vel deambulassent, aut aliquid comedissent, & bibissent, & fortassis hæc melius fuisset adhibuisse, quàm non; nihilominùs causam sive ægritudinis, sive exacerbationis alicui ex his tribuebant, veram quidem causam ignorantes, & fortassis id quod commodissimum fuerat damnantes. Sic autem facere non convenit, sed oportet scire, quid balneum intempestivè adhibitum operetur, quid item fatigatio, & lassitudo, quid hæc sive comestio, sive potatio. Nunquàm enim eadem afflictio ab his, similibusque provenit, neque cuicunque. Quisquis igitur hæc non cognoscet, quomodo scilicet singula se habeant ad hominem comparata, is neque cognoscere, quæ ab ipsis fiunt, potest, neque rectè uti.

XXXIX. Oportet igitur cognoscere, quānam affectiones homini ex facultatibus, & potentiis fiant, scilicet quæ sint rerum vires ad nos, quodvè robur. Et hæc quidem haud alio principio faciliùs cognoscuntur, quàm eo, quo primùm Medicina ortum habuit, hoc est experiundo, quæ sit in his, atque his naturæ necessitas. Quibus cognitis tandem aut veras, aut saltem minùs absurdas de rerum natura hypotheses habere poterimus, quæ scilicet res ipsas attingant sine relatione ad alias res. Quod sanè difficillimum est, & fortè homini impossibile; Homo enim facile cognoscit ignem, quod oculos feriat, quod celefaciat, quod solvat aurum, sed hoc est cognoscere ignem sibi, & auro comparatum, atque relatum. Verùm haud facile cognoscitur, quid ipsemet in se sit ignis nulli relatus. Enim verò

motus, figura, magnitudo, & concursus minutiorum corporum effugiunt hominis sensus, ac vix datur illa mentis acie, & ad eorum, quæ sensibus subjiciuntur, similitudinem concipere. Animadvertendum autem est quædam percipi in sensu, quæ nihil simile habent extra sensum, ut sunt dolores, & alia multa, quæ fiunt ab incurso rerum in organa sensus, & nihil ipsis simile est extra sensum. Et frustra quidem laboratur, his, quæ non insunt rebus hypothesim confingere, quæ rerum naturam explicet! Si quæ facienda hypothesis est, ea esse debet ex iis, quæ insunt rebus, quorum species licet sæpè sæpius sensibus suscipiantur, & percipiantur, sunt tamen ex eorum genere, quibus aliquid simile reperiri potest extra sensum. Ut est corporum figura, quæ talis est, qualis est, siue percipiatur, siue non percipiatur à sensu, vel siue eo modo percipiatur, quo est, siue alio modo percipiatur. Et ut figuræ, quæ extra sensum est, aliquid simile esse potest in sensu, ita figuræ, quæ in sensu, siue in mente est, aliquid simile reperiri potest extra sensum, siue extra mentem. Dolori autem, aut voluptati, aut etiam sonitui, qui in aure fit ob aeris incursum, quidnam simile dicemus esse extra sensum? Quod si aliquid dicatur dolorificum, quidnam aliud ex hoc fundamento rectè deducitur, nisi hoc idem, quod sit dolorificum? At si ponatur corpus ea figura præditum, qua fistula est, præterquam quod ex hac hypothesi multa tum contemplari, & admirari; tum rectè dici, & explicari possunt in hoc corpore nulli alteri relato; præterea si illud ad alia corpora comparetur infinita profecto cognosci poterunt, quæ ex illo cum aliis fiant. An hoc parum est, quod corpore sic figurato aquæ commode diducantur? An & hoc, quod ejus cavitas, quæ facillimè quovis cono, cujus basis major sit fistulæ basi, obstrui, & occludi possit, nulla pyramide exacte occludatur, & obstruatur? An parum est deducere ex illa hypothesi, quod possit corpus illud excipere cylindrum cujus diameter non sit major diametro cavitatis fistulæ? & hoc quod cylindrus licet longissimus ultra ferri possit per corporis fistulosi cavitatem, quam tamen subire, & permeare nequeat sphaera aliqua cylindro minor? An fortè desunt, & alia infinita, quæ rectè trahantur, & deducantur ex illa hypothesi? Quid plura! Ego sic filium meum Thessalum institutum volui, sic monui, ut figurarum proprietates, & numerorum scientiam cognosceret, & illi disciplinæ, quæ illas edocet, & magnitudines quascunque metitur, multum studii adhiberet. Hæc, dixi, mi fili non solum vitam tuam illustrem, & ad multa commodam in humanarum rerum statu efficient; sed etiam animam acutiorem, & clariorem reddent ad omnium, quorum usus in Medicina expetitur, utilitatem consequendam. Quod filio dixi, omnibus dico, literasque, quas ad illum dedi, ad omnes gentes datas volo. Leviora nunc attingam, quibus tamen manifestum fiat hoc studium apprimè Medico convenire.

Ore hiantes, aerique aditum non intercludentes nihil sanè vicini humoris bibemus. Ubi verò labra foras produxeris, contraxerisque, ac comprefferis, & aerem prohibueris; aut etiam fistulam admoveris, facile sanè promotò pectore quantum volueris, bibere poteris. Cucurbitæ quæ corpori apponi solent, commodiores erunt, si parte qua patent, minùs amplæ sint, & eam debent habere figuram, qua omnis circumambientibus sub-

substantiis prohibeatur aditus : alias nihil ex carnibus in cucurbitarum cavitatem propelletur . Sunt etiam instrumenta non pauca sive ex ferro, sive ex alia materia parata , quorum peculiaris figura est, vel ut cognoscantur vitia, quæ in utero, vel intestinis, vel alia in parte latent, vel ut illa curentur . Sic multa fiunt intrinsecus ab ipsa natura , quæ necessario ex partium figuris pendent . Si vesica cavitatem non haberet , vasa quæ in ipsam inferuntur non essent fistulosa ; nulla unquam fieret in vesica urinae collectio . Beneficio figuræ partium , quæ in renibus sunt , urina tantum seceratur ab humoribus , qui ad renes appellant . Descensus bilis ad intestina necessario dependet ex figura partium hepatis, cistis felleæ , & vasorum quibus illa separatur , & deducitur . Sic etiam alia infinita necessario fiunt motu rerum, aptaque rerum figura , quæ vitiosa si fuerit, necessum quoque erit mala multa fieri.

XL. Pulmones spongiformes sunt , & molles , & in ipsis innumerabiles canaliculi innumerabiles cellulae reperiuntur . Qua quidem constructione, & figura apti sunt pulmones magna copia humores suscipere , aliisque vasis admittere aerem , aliis sanguinem , cæterasque substantias , & textura illa minutissima vasorum , concursuque variarum substantiarum multa fiunt in pulmonibus ad vitæ functiones utilia , quæ non fiunt in aliis partibus . Facillime ampliantur , & turgent aere , quo dimisso facillime concidunt . Figuræ mutatio in partibus pulmonis, vasis disruptio , angustia , contractio fibrarum , & earundem rigiditas , multos morbos facere possunt in pulmonibus , qui quidem morbi non fiunt musculis ob diversam musculorum , & pulmonum figuram , & constructionem . Humor nimia rarefactione alia patitur musculus, alia pulmones . Ab aere multo sane facilius læduntur pulmones . quam aliæ partes , quoniam figura , & motu pulmones magnam admittunt aeris quantitatem , quod non accidit aliis partibus . Figura , & motu pulmonum , & partium , quæ ad asperam arteriam pertinent , figura , & motu œsophagi , & partium , quæ ad ipsum pertinent , aer descendit quidem in pulmones, non autem in ventriculum , cibus in ventriculum dilabatur , non autem in pulmones , & licet uno eodemque ore aer , & cibus sumantur , licet proximæ sint viæ ad pulmones , & ad ventriculum , alter tamen alterius vias non ingreditur . An fortè novit aer vias suas , & cibus suas cognoscit ? Similiter in liene, & in mammis multa accidunt propter figuram , & structuram , quam obtinent . In ventriculo , & intestinis multa fiunt , à flatibus ex gr. : quæ non contingunt aliis partibus , quarum alius est necessitate naturæ , sive propriæ constructionis usus.

XLI. Et in his quidem , quæ à flatibus fiunt , considerare oportet substantiam ex qua elewantur , quæ aliquando aquosa est , & facile flatus in aquam revertitur , aliquando alia est , & sæpè non redit flatus facile in humorem . Alii flatus acres sunt , & mordaces , & partem aliquam , aut vellicant , aut etiam exulcerant , alii sunt mitiores , & aquosiores . Examinare etiam expedit partium , in quibus flatus continentur structuram , aliæ facile cedunt , & ampliantur , sive distenduntur , aliæ verò minime , & æquum non est opinari fieri eadem in his , quæ eadem non sunt . Rursus pro situ vario , in quo reperiuntur flatus , hæc , vel alia corporis pars , ut

nervus, aut musculus, aut tendo, aut fistula aliqua, aut quid aliud comprimitur, & absque alia causa hac sola compressione morbi, & leves, & graves fieri possunt.

Ea autem quæ corporibus insunt infinitis modis alterari, & mutari possunt, & figurarum infinitæ sane sunt species, quibus aliud, atque aliud fit tum in sano, tum in ægro corpore. Neque satis est cognovisse capita magna, an parva sint, colla tenuia, an crassa, longa, an breviora, ventres longi, aut rotundi, costarum latitudines, & angustias, & alia infinita, quæ sensibus cognosci possunt, verum etiam ad similitudinem eorum, quæ sensibus dignoscuntur, conicere oportet, quænam sint minutiorum corporum figuræ, quæ combinationes, qui motus, ad hoc ut singularum affectionum causæ probè cognitæ sint, vel saltem majori cum verisimilitudine concipiantur.

XLII. Ex his enim potentia rerum oriuntur, & his cognitis quid unum in aliud possit perspicuum fit, quasve habeant res inter se cognationes. Videndum insuper an aliquid ex se se in aliam speciem mutetur, an vero mutetur ex permixtione aliarum substantiarum, & cuinam, cum mutatum fuerit conveniat, vel noceat: nam sæpe venenum non assumitur; sed ex eo, quod assumptum est, venenum fit, sæpe non sumitur remedium; sed ex eo quod sumitur, remedium fit. Sit autem noxius humor ex: g: is, qui aciditatis sensum prebet, & propter hoc noceat, igitur quidpiam quod potenter id auferat commodissimum erit, quod quærendum est, & optimum ex iis, quæ id præstare possunt, eligendum est. Optimum autem est, quod longissimè distat ab incommodo, quodque superat, & in melius mutat id, quod noxium est. Demum quàm maximè refert ea, quæ nota sunt sapissimè in Catalogum referre, & ex illis aliaminus cognita quærere, & invenire.



FONS JOVIS,

FONS SOLIS,

PADI FONS,

Aliique similes.



Ulorum meminit Plinius libro secundo naturalis historię capite 103. his verbis: *idem* (scilicet Fons jovis in Dodone) *meridie semper deficit, qua de causa Anapavome non vocant: mox increscens ad medium noctis exuberat, ab eo rursus sensim deficit* = Et paucis interjectis: Jovis Hammonis Fons *interdiu frigidus, noctibus fervet*. In Troglodytis Fons solis appellatur, *dulcis, & circa meridiem maxime frigidus, mox paulatim tepescens, ad noctis media fervore, & amaritudine infestatur*. Padi Fons *mediis diebus æstivis, velut interquiescens semper aret*. In Tenedo insula Fons *semper à tertia noctis hora in sextam ab æstivo solstitio exundat*.

Quæ quidem cum quamplurimis admiranda nimis visa fuerint, non abs re fore judicavi si rationem traderem, qua similes fontes parari possint. Quod si assequar, credendum quoque erit iisdem rationibus natura tum solis fontem, tum Hammonis, tum alios quotcunque his similes, vel constitisse, vel nunc etiam constare (quod nunc non quæro) vel saltem constare posse, ea etenim, quæ nos arte disponere valemus, natura in montium visceribus disposita esse possunt.

Sed vereor nè id contingat his, quæ afferam, quod plerisque aliis re-
tè inventis contigisse animadversum est, quorum, priusquam publici juris facta essent, maxima fuit omnium admiratio; sed post evulgatam inventionem, quoniam manifestum fuit facili, & simplicissima via illa fieri posse, non solum quamplurimi hominum non sunt amplius admirati naturæ, aut artis opera, sed ignaviores ex ipsis eorum rationes spreverunt, & vili habuerunt, quæ prius propter rerum ignorationem summè demirabantur, aut fortè impossibilia afferebantur. Qui non rarò etiam injurii, & contumelioli fuerunt in eos, qui aliquid invenerunt, & in eos, qui nova rite inventa ab aliis primi amplexati sunt. Ut accidit iis, qui statim audito invento motus sanguinis ab arteriis in venas, rationum, & experimentorum momentis perceptis, illud probavere, & in explicanda plerorumque morborum natura eo usi sunt, ut etiam in Medicina investiganda. Adversus quos in omnibus fere Europæ urbibus ferum insurrexit eorum vulgus, qui postremi, licet pluries admoniti, sanguinis circulationem cognoverunt! Et utinam his etiam temporibus non essent, qui huic invento refragentur, & aliis non essent molesti semper, & infensi nimis.

Aliquem tamen propterea credere nolum me contendere non potuisse

alios

alios hæc tum cognoscere, tum ostendere, & demonstrare! Neque id profecto præ me fero. Quin potius tanti hæc eadem mihi non sunt visa, ut à quocunque in studiis mediocriter versato non potuerint facile inveniri, ab iis namque, quæ jam satis superque comperta sunt, manifesto deduci posse videntur. Sed cum illis mihi nunc res agitur, qui fabulas esse omnia, quæ à Plinio in hoc capite narrantur, affirmarunt, & impossibiles esse similes fontes crediderunt, quorum aliquam velim inire gratiam, si fortè hoc possibile est. Sed videamus nunc quæso quanto facili negotio fontes isti, similesque, & natura constare, & arte etiam parari possint.

Sit A B D C (FIG. I.) tubus retortus patulus, & pervius in extremis A, & C. Verùm extremum C proximius sit centro telluris, quàm alterum extremum A, & crus A B, vel ipsius pars aliqua quantacumque, vase, sive concha aliqua detineatur, ut vase E F D G: hac tamen lege, ut vasis suprema pars altior sit summitate B crurum, & undique illud perfecte integrum sit, & clausum etiam in D, ut nullus humor diffuere possit inter vallis, & tubi commissuras in D, nec aliunde, vel si foramen aliquod adsit, è quo aqua, vel alius liquor effluere possit, parvum illud sit, & minus, quàm quod opus de quo deinceps, turbare, aut impedire valeat.

His sic dispositis sint aquæ confluentes in vas, sive concham E F D G, ut est aqua H I. Manifestum est, quod principio hujus influxus nihil effluet ab extremo C, etiam si utraque extrema A, & C pateant, & A sit immersum aquis. Sed postquam collectæ aquæ in vase E F D G superaverint altitudinem cruris A B, ipso pondere, & aquarum majori altitudine in vase, quàm in crure A B propellentur aquæ in crus B C, & continuo effluent ab extremo C.

Ac si nunquam deficient aquæ in horizontali A K, quæ ducitur ab extremo A, nunquam profecto cessabit aquarum fluxus ab altero extremo C. Quod continget cum quantum aquæ effluit ab extremitate cruris B C, perpetuo tantundem saltem influat per H I in vas E F D G.

Quod si minus aquarum influet in concham, quàm effluat ab extremo C retorti tubi A B C, tandem, etiam si perpetuò influant aquæ in vas, illis tamen deficientibus in horizontali A K cessabit fluxus aquarum ab extremo C retorti tubi A B C, qui tunc erit prorsus inanis, & sine aquis.

Verum cum aliæ, atque aliæ aquæ iterum colligantur in vas ex perpetuo influxu per H I, crescent iterum illæ in vase, & post certum aliquod tempus iterum superabunt altitudinem cruris A B, ac proinde ex sese propellentur denuò in crus B C, & renovabitur fluxus aquarum ab extremo C, duraturus similiter usque quo non deficient aquæ in horizontali A K. Et sic similiter in perpetuum certis horis fluent aquæ, certis arefcet extremum C.

Fontem igitur habebimus, quem *Anapavomenon* vocari dixit Plinius: hoc est veluti recedens, & requiescens, & cujus aquæ per intervalla fluere definant.

Neque inverisimile est similes in montibus reperiri cavitates, & similes reperiri conchas, quæ æquivaleant tubo retorto A B C, & vasi E F D G.

Neque inverisimile est nonnunquam rivulos dari, qui minus aquarum adve-

advehant in concham E F D G , quàm ab ore effluere possit.

Et illud quoque in his notandum est , quod principio velocior erit aquarum fluxus ab extremo C , atque idèd majori etiam copia , quàm in fine , & cum desinunt : quoniam paulatim , atque paulatim deficientibus aquis in vase , minor , atque minor semper erit earundem altitudo supra horizontalem A K , & minori vi impellentur aquæ in crus A B , & inde in crus B C .

Aliæ tamen sunt rationes haud sane difficiliore , quibus primum copiosiores aquæ effundantur ab ore aliquo , postea minori copia , & quæ tandem omninò cessent. Ut si plures adsint tubi retorti similes tubo A B C , quorum alterum crus similiter mergatur aquis contentis in concha , sive conchis , aut vasis aliquibus , sed non ad eandem aquarum profunditatem ; summitates tamen in quibus inflectuntur crura in eodem sint horizontali plano. Hi tubi ubi aqua vasis eorundem summitates superaverit eodem tempore incipient effundere aquas , sed non cessabunt eodem tempore . Ac proinde aliis prius desinentibus , aliis posterius , quæ ab ipsis ad fontem aliquem concurrunt aquæ principid erunt copiosiores , postmodum in minori , atque minori copia.

At si tubulorum summitates non fuerint in eodem horizontali plano , crura vero merfa sint aquis ad eandem profunditatem , fontes construi poterunt , qui in principio effluxus parciore habeant aquas , & circa illud tempus , in quo requiescere , & omnino cessare debent , aquas effundant copiosiores.

Quæ cum multipliciter variari possint , & multipliciter possint moderari , tum ex varia tubulorum dispositione , tum ex vario influxu aquarum in concham , sive conchas , quibus tubuli applicantur , tum ex varia capacitate concharum , & aquarum in ipsis altitudine , tum etiam ex varia crurum amplitudine , & crurum inter se habitudine ; alii , atque alii mirabiles prodibunt fontes.

Et ex his quidem facile deducitur ratio , qua construi possit fons , cujus meminit Plinius secundus junior Epistola ad Licinium . *Attuli inquit tibi ex patria mea pro munusculo quæstionem , altissima ista eruditione dignissimam . Fons oritur in monte , per saxa decurrit , excipitur cœnatiuncula manu facta : ibi paululum retentus in larium lacum decedit . Hujus mira natura ter in die statis auctibus , ac diminutionibus crescit , decrescitque . Cernitur id palam , & cum summa voluptate deprehenditur . Juxta recumbis , ac vesceris , atque etiam ex ipso fonte , nam est frigidissimus , potas : interim ille certis dimensisque momentis , vel subtrahitur , vel assurgit . Annulum , seu quid aliud ponis in sicco , alluitur sensim , ac novissimè operitur , detegitur rursus , paulatimque deseritur . Si diutius observes , utrumque iterum , ac tertio videas . Si inquam aquis quibusdam perennibus ter in die certis dimensisque momentis aliæ aquæ addantur è tubi alicujus retorti orificio fluentes , & ter in die , qua supra expositum est ratione , subtrahantur , huic similem fontem habebimus .*

Sed priusquam reliqua , quæ à Plinio seniori memorantur , explicem , placet rationes adducere eorum , quæ in fluxu aquarum è tubis retortis observantur .

Pro quibus supponendum est omne spatium in rerum universitate esse plenum, vel ut aliis placet, nullum sensibus notabile spatium prorsus inane reperiri posse, nisi factum à vi majori, ea quam habet mercurius altus in aliquo tubo ad longitudinem cubiti unius cum quadrante, vel ea quam habent aquæ, quarum altitudo sit ad hanc mercurii altitudinem, ut est reciproce pondus mercurii ad pondus aquæ: hoc est ut 1. ad 14. sive ut cubitus 1. e un quarto ad cubitos 18. circiter. Verùm libet potius supponere omne spatium esse plenum.

Nec non etiam supponendum est rarefactiones omnes fieri per introductionem novæ substantiæ inter particulas corporis rarefacti, condensationes verò per expressionem alicujus substantiæ.

His suppositis in tubo retorto A B C aquis pleno, si aquis res tentetur, cujus tamen crura minorem habeant altitudinem cubitorum 18. si hæc crura fuerint æque alta quiescent aquæ, & ex neutra parte decident, nisi forte foramina, & orificia A, & C fuerint ampla nimis, ut possit ex alia parte orificii utriusque, vel alterius aqua destillare, ex alia aerem, vel aliquid aliud intromitti, quo desertum ab aquis spatium repleatur. Nam cum crurum altitudo minor sit ea, qua opus est ad ætherem exprimendum à circumfuso aere, vel aliorum sententia, minor sit ea, qua opus est ad faciendum vacuum in summitate tubi retorti, ac cum crura sint æque alta, prolapsus aquarum fieri nequit. Sed nequaquam idcirco non conabuntur semper aquæ utriusque cruris ad humiliorem locum descendere! conatus tamen cum sint æquales ex una, & ex altera parte, aquæ in cruribus quiescere videbuntur.

At si crura non fuerint æque alta, & saltem crus brevius minorem altitudinem habeat cubitorum 18, conatus isti non erunt æquales; major enim semper erit vis aquarum in crure majorem altitudinem habente, ut in crure B C figuræ primæ. Atque idè cum omne spatium plenum sit, majori vi deturbatus aer ex hac parte B C impellet aquas contentas in crure A B: Quæ cum resistere nequeant aquis B C ascendent, & effundentur ex orificio C, ascendent, ab aere scilicet propulsæ, & ab aere quidem, qui propellitur, & è suo loco exturbatur ab aquis B C.

Cœterum si crus A B aliqua sui parte demersum fuerit aquis vase aliquo contentis, ut in eadem prima figura, hic aeris impetus fiet in aquarum vasis superficiem, & sentient vasis E F D G aquæ excessum impetus, sive gravitatis aquarum B C: atque idè propellentur in crus A B, & effundentur ab orificio C. Idque fiet quo usque aquæ vasis non deficient in horizontali A K; quinimò donec non deficient in A, ubi si tubus fuerit aquis madidus, ut ferè semper est, aquæ vasis altiores sunt, & veluti conum faciunt verticem habentem in A: ut alibi diximus.

Cruris autem A B pars demersa aquis principio nullum usum habet: verum postea effluentibus aquis cum illæ, quæ supersunt humiliores sint in vase, cito disjungerentur ab extremo A, nisi prius cruris A B pars saltem aliqua demersa fuisset aquis in vase contentis. Verum de his satis, reliqua autem persequar, quæ à Plinio narrantur.

Si diversorum generum aquas habeamus, quarum aliæ dicantur calidæ,

lidæ, aliæ frigidaæ, aliæ falsæ, aut amaraæ, aut aliæ, quales sæpè è montium scatebris erumpunt, fontes habere poterimus, qui certis horis has fundant aquas, certis alias diverſi generis emittant, & conſtrui poterit fons Jovis de quo Plinius interdiù frigidus, noctibus fervens, & è contrà: vel conſtrui poterit fons Solis ejuldem Plinii *dulcis, & circa meridiem maxime frigidus, mox paulatim tepescens, ad noctis media fervore, & amaritudine infestatus*, & è converſo qui circa meridiem amaras, & calidas habeat aquas, noctibus dulces, & frigidas, aliique his ſimiles.

Emanent ex: gr: è fonte P. (FIG.2.) aquæ dulces, & frigidaæ, diductæ ab iis quæ effluunt è tubo retorto A B C. ſuffecturæ pro certo tempore ratione, qua dictum eſt, quo elapſo ceſſent, ac niſi aliunde aquæ advehantur ſiccus propterea futurus ſit fons P. Sed quo tempore finiunt aquæ tubi retorti A B C, aut circa illarum finem fluere incipiant aquæ alterius generis è tubo retorto M N O: nempè calidæ, amaraæ, aut aliæ, quæ ſufficiant in fonte P donec ea, qua expoſitum eſt ratione fluant iterum aquæ ab extremo C tubi A B C, & his ceſſantibus fluant aliæ è tubo M N O, & ſic perpetuo: fons P perennis erit; verum certo tempore fundet aquas unius generis, alio tempore alterius generis aquæ ab ipſo ſcaturient.

Ceſſantibus autem aquis tubi A B C, & fluentibus illis tubi M N O, quæ eſſi calidæ dici mereantur, tamen cum primum manabunt è fonte P, videbuntur tepidæ, vel quia tranſeunt per frigidam concham Q P, vel quia fortè, ut fieri poteſt, permilcentur frigidis aquis reſiduis in concha ex iis, quæ diductæ fuerant ex alia vena C. Poſtmodum aquæ fluent calidiores, atque calidiores, aut etiam amaraæ. Et his ceſſantibus licèt frigidaæ aquæ advehantur è vena C in fontem P, eadem tamen ratione, quæ ferventes fluebant, erunt minus calidæ, poſtea minus, atque minus, ac demum refrigerata ſatis concha Q P, vel omnibus jam effluxis calidis reſiduis aquis ab eadem concha Q P; frigida fundetur è fonte P.

Obſervamus autem in eodem monte alicubi ſcaturigines eſſe aquarum dulcium, & frigidarum, alicubi vel calidas, vel amaras, vel falſas, vel aliis vocibus nuncupatas proſilire, ut omnino poſſibile ſit, ſi cavitates adſint, quæ æquivalent tubis retortis A B C, M N O, fontes, quos diximus dari. Neque ſane difficilius explicatur iſdem principiis, ut fontes quidam certis horis exundent, ſi quidem dictum eſt varia applicatione, & diſpoſitione in conchis plurimorum tuborum retortorum, copioſiores, aut parciores aquas certis temporibus præbere fontes.

Sed forte in Tenedo inſula fons, cujus aqua *ſemper à tertia noctis hora in ſextam ab æſtivo ſolſtitio exundat*: cum aquas perennes habeat è ſcatebris locorum, alias fortaiſe habebit circa ſolſtitium æſtivum è concretis vaporibus, quæ alicubi collectæ tubi alicujus retorti beneficio à tertia noctis hora ad ſextam addantur aquis perennibus. Ac proinde fons illo tempore exundet, poſteà deficientibus his augetariis aquis fluat fons conſuetis, quæ perennes ſunt: donec iterum è vaporibus collectæ aquæ tubi retorti beneficio his addantur. Et profeſſò loci plerique ſunt æſtate humidiores, & magis ulgiñoſi, & ruidiores, quam hyeme: ac ſcimus æſtate potius, quam hyeme, & in cœli conſtitutione potiùs auſtrali, quàm boreali extrinſecus

parietibus scyphi vitrei aquæ guttulas congregari si scyphus nives, aut frigidas aquas contineat.

Porro si vera sunt, quæ feruntur contingere in Ægypto: homines nempe junii mense facillimè gravi, ac veluti pestilenti morbo corripì, & illos, qui ante Nili exundationem non perierunt, ad primam fluminis intumescentiam sanari; non erit inverisimile aliquid independens à futura exundatione circa ea tempora reperiri in aere Ægypti, quo hominum corpora facile ægrotent, tellus fermentetur, & sales concipiat. Qui quidem sales liquati præter Æthiopiæ pluvias aliquid contribuant ad Nili intumescentiam, & nitro quidem dicitur Nilus tunc temporis abundare. Tellus insuper illius Regionis, ut ex Georgio Sandio refert expertissimus Robertus Boyle lib. de determinata natura effluviæ cap. 4. quæ in loco sicco servata nullam ostendit toto anno in pondere mutationem exundationis verò tempore fit manifestò ponderosior. Ab aere quidem humidior hanc patitur ponderis alterationem; sed fortè id evidentius contingit propter salem, quem tellus illa permixtum habet: scilicet terra, cui sal est permixtus facillimè ab aere tantum humidior humorem imbibit, secus quæ salis est expers. Et ut uno verbo dicam non solum ab Æthiopiæ pluviis; sed ab eo etiam quod ex terra Ægypti solvitur, & aquis permiscetur Nilus excrescere potest. Quod si quid simile fundatur, & solvatur in Delo Insula, & aquis permisceatur. *Inopus fons eodem, quo Nilus modo, ac pariter cum eo decrescet, augebiturque*, ut refert Plinius.

In Ægypti magna parte non pluit, idque non ob siderum, & planetarum aspectum; nam multæ aliæ regiones in globo terraqueo omnino eisdem habent aliorum aspectus, cum tamen in sola Ægypto minimè pluat, tellus igitur, & aer Ægypti aliquid habeant, propter quod pluviae non decidant in illa regione, & fortè ab hoc ipso multa alia accidunt in Ægypto, quæ non fiunt in aliis regionibus.

Verum enim verò illud, quod addit idem Plinius: *contra Timavum amnem insula parva in mari est fontibus calidis, qui pariter cum aestu maris, crescunt, minuunturque*; (FIG. 3.) contingere posse videtur si in montis, sive clivi sinu aliquo aquæ adsint in sufficienti copia descendentes per canalem DE, quarum aliæ in mare decurrant per foramen F semper demersum mari etiam in humiliori æquoris statu, ut cum ejus superficies in maximo refluxu non est supra horizontalem AB. Foramen vero F minus amplum esse debet, quam aquarum copia exigit, ut proinde aliæ aquæ effluere possint è Fonte G. In fluxu verò crescente maris altitudine ex B usque ad C ex: gr: minori profecto velocitate, atque idè in minori copia descendunt per F in mare, sed majori tum velocitate, tum copia exilient aquæ è fonte G. Aliquid etiam huic operi contribuere videtur major gravitas aquarum maris propter admixtum salem, quam sit specifica aquarum dulcium, & calidarum gravitas, ut ex iis colligitur, quæ monuit Reverendissimus D. Urbanus Davisius in Epistola de fluminum origine ad eruditissimum virum. D. Geminianum Mantanarium.

Sed aliæ etiam excogitari possunt rationes, quibus hoc idem eveniat,





Fig. III.



Fig. III.





niat, ut si ex majori aquarum maris altitudine in fluxu ejusdem compressio fiat inclusi aeris in aliqua clivi cavitare, quo quidem aere comprimatur superficies aquarum descendantium ad fontem aliquem.

Sit enim (EIG.4.) aer C D crypta aliqua inclusus, & mare A B in humiliori statu aquarum. Et in eadem crypta sit E concha aquarum, quæ descendentes per canalem E H faciant fontem H. In refluxu quidem maris inclusus aer C D satis expansus est, atque rarus, & idcirco non comprimit aquas conchæ E. At in fluxu evectis aquis pelagi usque ad F G comprimetur aer C D ab aquis extrinsecis A F, & proinde is idem aer comprimet aquas contentas in concha E, & ex hac causa majori cum] velocitate, atque copia descendant aquæ istæ ad fontem H.

Multa alia, quæ hoc eodem capite 103 libri secundi adducuntur à Plinio aliis vel discutienda, & explicanda, vel castiganda, & moderanda relinquo.



DE INCREMENTO,

Sivè Generatione Metallorum

EPISTOLA

AD ILLUSTRISS. ET REVERENDISS. DD.

D. ANDREAM DE AQUINO

Olim Episcopum Tricaricen.



Uæ tua fuit erga me humanitas vir Illustrissime, non solum familiariter me semper excepisti, atque summa benignitate fovisti, verum etiam non es dedignatus temporis aliquid subripere studiis tuis, ut, si quid ingenio meo, qualecunque sit, molirer, audires. Cumque in te uno concurrant animi mores probatissimi, magnanimitas, & beneficentia, quæ rogari non patitur, & rerum maxima notitia; effectum est, ut tibi potius, quàm aliis quamplurimis placere velim, & magni habeam ad te referre, ac tecum communicare quæcunque vel lectione, vel meditatione, vel propriis observationibus fuerim assecutus. Quod nunc ex parte faciam tum ea recensendo, quæ Robertus Boyle Nobilis Anglus expertissimus de metallorum sive incremento, sive generatione habet; tum ea notando, quæ ego ipse quibusdam fultus propriis observationibus circa hoc idem argumentum suspicatus sum. Rerum autem summam principid tradam eorum, quæ Boyl. ab aliis collecta, aut sibi relata communis juris fieri voluit, nè facti aliquid, ut ille dicere solet, depereat. Inquit autem se accepisse stanni fodinam quandam octoginta circiter annis intactam relictam, quoniam lotione, cribratione, aliave industria, omne metallum inde secretum fuerat, à prioribus fossoribus, & metallurgis, qui recentioribus peritiores, & accuratiores feruntur; postea cum non exiguo operæ pretio magnam stanni copiam exhibuisse. Simile quid observatum, inquit, in terra quadam, ex qua metallum, quod abstrahi potuit, hominum avaritia secreverat: terra etenim illa in cumulos congesta aeri expositos post triginta circiter annos denuò stanno ditata colonis fuit emolumento: aliosque cumulos hujus similis terræ post decennium examinatos jam novam stanni promittere copiam. Similia de plumbi, & ferri sive generatione, sive incremento refert se accepisse: quin imo evidentius id conspici in terra ex qua plumbum fuerat liquatum, congesta scilicet in cumulos tum citius, quàm

quàm ea, quæ stannum habuit, tum majori copia plumbum concipere, ut sic dicam, & fortè sic dicens non aberro. De argento autem refert se vidisse lapidem in quo argentum conspiciebatur permixtum, ac audivisse lapidis dominum asseverantem argentum tractu temporis excrevisse in lapidem. Neque reticenda, quæ excerpta addidit ex relationibus quibusdam gallicè conscriptis itinerum ad indias, *Argentum per omnem Indiam optimum, & purissimum est Potasium*. Præcipua eius fodina inventa fuerunt in monte Aranzasse = Metallum hoc elicitur ex ipsissimis mineris terreis, quæ olim fuerant abjectæ, quando solum illud fuit reclusum, & fissæ, puteique in montibus illis occurrentes excavati, cum observatum fuerit in recrementis illis metallum denuò post ea tempora fuisse renatum. Id quod satis superque ostendit soli ad metallum hoc gignendum proclivitatem. Certum tamen est terras has denuò fœtas redditas non tantam argenti copiam largiri, ac minera ordinaria, quæ in venis inter ipsas rupes invenitur. Cœterum postquam idem disertissimus Auctor retulisset acceptum in Hungaria cuniculos, ex quibus auri vena fuerat effossa iterum repleti terra, quæ postea aurum, quod non habebat suppeditet, & ni, inquit, nuperus quidam medicinae professor Germanus perperam nos instruat ipsius patria insigno nobis renati auri argumentum præbet: nam Corbachi Westphaliæ sub ditione comitis de Isenburg, & Waldek aurum excoquitur ex cumulis congestis, ita ut singulis quadrienniis iterum elaboretur cumulus unus, semper se restaurante natura. His motus præclarissimus scriptor dubitat, an aer multum contribuat ad metallorum sive incrementum, sive generationem in apta materia, ut sane multum ille contribuere videtur ad salium plerorumque generationem.

I. Verùm Ego invisens Templum Divæ Mariæ supra Rotundam, vel, ut alio nomine inquiunt, Divæ Mariæ ad Martyres, quod Pantheon fuerat ab Agrippa extructum, immanes porticus columnas inspiciens observavi marcasitæ atomos quasdam, & passim granula metallica. Principio ratus sum excisas columnas è montibus, in quibus metallum aliquod, & marcasitæ varia genera reperiiebantur has secum advexisse atomos, atque granula tum marcasitæ, tum metallorum, neque novum mihi erat metalla, & quæ metallica sunt non rarè reperiri inter lapides etiam duriores. II. Sed rem melius lustrans conspexi columnas istas in ea parte, quæ boream aspicit, aut nihil prorsus metallicum continere, aut rariora sane, & minora ex hac parte observari puncta, & granula metallica: frequentiora verò, atque majora reperiri in ea plaga, quæ meridiem spectat. III. Præterea in hac meridionali columnarum plaga pluries observavi lapidis particulas quasdam, veluti assulas, tempore excindi, & sponte decidere, vel facili negotio digitis evelli, ac nunc etiam quædam extant, quæ facile divellantur. Cumque id contingere possit quamplurimis causis, ut ex gr: ab omni eo, quod inter fissuras variis anni tempestatibus æstu, geluque rarefiat, & majorem sibi locum exposcat, & ab omni eo, quod ibidem congregetur, & veluti vecte lapidis particulas divellat, ut crustulæ, postea sive assulæ decident; nonnunquam tamen visum est id accidere ob adauctam metallicarum atomorum copiam in locis quibusdam, & quoniam ab iis, quæ per aera volitant aliquid additur priori metallo. IV. In quibusdam verò columnis

lumnis frequentius decidunt crustulæ istæ ex parte boreali, in aliis frequentius ex parte meridionali: Verum in omnibus ex parte boreali, aut nihil, aut vix aliquid metallicum conspicuum est, in meridionali verò sensibilia, & conspicua magis sunt metallica puncta. V. Omnes columnæ istæ numero sexdecim non sunt ex uniformi lapide, neque ex uniformi substantia videntur conflatae: quin imò singulæ sunt ex lapidibus multorum generum veluti congeries, & coagmentatio quædam. Ac nonnullæ partes quasdam habent figura varia terminatas, latum circiter unguem plerumque exquant, colore subnigras, substantia teneriori, quàm sint reliquæ partes columnæ. Quarum quidem macularum subnigrarum, quædam veluti in fuliginem abierunt, & in hujus fuliginis medio passim visuntur puncta metallica. Et licet tùm in parte boreali, tùm in meridionali multæ partes subnigræ notari possint, quæ abire potuissent in fuliginem, videntur enim ejusdem naturæ: illæ tamen, quæ in fuliginem mutatae sunt meridiem spectant. VI. Insuper si omnia hæc metallica puncta, & marcasitæ granula antiquissima essent, & nihil omnino ipsis accederet, tam diuturno tempore ambientis injuriis, à quo nihil suscipiant, exposita, mihi jam viderentur quod mutassent aspectum, ut brevi quidem accidit tùm plumbo, tùm ferro, tùm stanno, tùm æri, quæ etiam perpolita, ut lumen reflectant vividum, postea minimè talia videntur, argentum etiam, & aurum minus diligenter servata mutant aspectum, & non eodem modo, nec adeò validè lumen reflectunt. Cumque ab initio columnæ levigatae fuerint, apparent enim nunc etiam in durioribus partibus lapidis signa antiquæ levigationis, levigatione quoque viderentur mihi metallica puncta aliter debere videri, ac conspiciuntur, ut nunc etiam si denuò uniformiter levigarentur, aliter viderentur. Neque videtur verisimile hæc, quæ dicta sunt, olim sic extitisse in columnis, ut nunc spectantur. VII. Binæ ex his erectæ fuerunt sub Alexandro Septimo P. Op. Maximo, in quibus vix aliquid conspicitur; sed jam in altera ipsarum fuliginosum aliquid apparet in parte ejus plagæ, quæ ad meridiem potius versa est, & aliquid metallicum passim in hac meridionali plaga conspicitur.

Verum enim verò fortassis aliquis dicere poterit I. Casu quidem factum esse in his columnis, quæ tunc etiam cum in montibus essent omnia hæc metallica puncta habebant, ut dum erigerentur in porticu, ea pars, quæ his punctis metallicis esset insignita ad meridiem statueretur. An non id casu fieri potuit? II. Casu etiam fieri potuit, ut earum columnarum, quæ subnigras maculas habent, ea pars, in qua metallica puncta observantur, ad meridiem vergeret, & ex hac parte sive naturali aliquarum macularum habitudine, sive solis lumine, sive imbre, & vento aliquo, cui pars ista magis sit exposita, nonnullæ ex maculis istis in substantiam fuligini similem mutatae sint. III. Ad id autem, quod dixi, si omnia hæc granula metallica antiquissima essent, & nihil prorsus ipsis accederet; jam omnia mutassent apparentiam; neque tam vivide luminis radios reflecterent, contra quis dicere possit, vel ventum, vel quid aliud servasse eorundem superficiem perpolitam, vel à lapidis crustulis antequam deciderent servata fuerunt illæsa ab ambientis injuriis. Sed, ut id moneam, nequaquam omnia hæc puncta metallica in iis tantum locis, è quibus affulæ deciderunt,

runt, sed in aliis etiam è quibus nullæ crustulæ sublatae sunt, visuntur. IV. Demum inquiet, in his, quæ pluries longo tempore spectantur, fieri posse, ut obliti eorum, quæ prius visa sunt, nova quædam videamur videre, atomos nempe multiplicatas, divulsas assulas, crustulas alias casuras, alias, quæ digitis evelli possint. Sicuti factum est nonnullis, qui dum imaginem aliquam diutius, & attentius intuerentur, tandem visi sunt videre illam nictasse, vel manum movisse, & hominibus, foeminis præcipuè, dum varia animo spesque, timoresque concipiunt, multa videri videntur, quæ omnino non sunt.

Quid Ego his respondeam? nihil profectò Vir Illustrissime; scio namque facillimum esse hominem hallucinari, ac non solum existimo alia ratione hæc, quæ dicta sunt constare potuisse, verum etiam casu, fortunave columnas illas non hominum industria, tum fundatas, tum erectas in eo situ, & positione, quibus nunc perspiciuntur, minime reor fuisse impossibile. Neque insistam multa, atque varia per aera volitare quorum vi, & concursu morbi diversorum generum fiant animantibus, spiritus, sales, olea, & alia multa concipiantur in apta materia, & magnam esse aeris, & eorum, quæ aeri permiscuntur, aut per aera excurrunt in omnibus ferè fermentationibus, & permutationibus usum. Neque addam ex his, quædam penetrare cuncta, quæ sunt, & poros sibi invenire aptos, quibus omnia pervadant, ac in generatione metallorum multa concurrere ex his, quæ per aera feruntur, & laxa, ac terræ viscera permeant, non minùs, ac certò scimus ex his quæ in aere moventur, & in aere fiunt, quædam metalla corrumpi: hæc scilicet, & alia multa omittam, cum quia in præsentī non vacat, tum nè longiori epistola humanitatem tuam tedio afficiam. Attamen omittere nolui ea, quæ alios ad hæc curiosius observanda excitare potuissent, & hoc obsequii erga te mei, & devoti animi extare volui documentum. Vale Vir Illustrissime, & ut me ames, & me foveas enixe rogo, Data Romæ idibus Decembris M.DC.LXXX.

Dominat. Tuæ Illustrissimæ, atque Reverendiss.

Dum è Capitolio descendimus in forum boarium octo spectantur columnæ, in quibus similia observantur.

Addictissimus Servus
L. A. P.

DISSERTATIO LOGICA.

Sæpe cogitanti mihi unde Philosophorum, & Medicorum dissensiones ortum habeant, ea potissimum occurrunt, quæ Claudius docuit Galenus Pergamenus libro primo methodi medendi, capite quarto, scilicet plerosque, qui rationales se se dixerunt, non fuisse meditationes suas, ac scientiarum inventiones ab iisdem principiis auspicatos; sed multa supponentes, quæ fortè ab aliis negarentur, in contrarias tandem abiisse sententias. Cumque hi proceres fuerint, & antesignani, quos reliqui homines sequuti sunt, in discrepantes quoque partes, & in sectas varias vulgus divisum est; adeò ut præter vanas quæstiones, & inutiles altercationes, vix nunc apud nonnullos boni, compertique aliquid reperire valeamus. Debuissent autem illi si adultas jam posteris suis disciplinas tradere voluissent, ab uno aliquo, de quo inter omnes homines conveniret, exordiri; dehinc secundum, tertium, atque quartum, & sic deinceps alia adjicere, donec ad id quod ab initio propositum erat, perventum fuisset. Si quidem, sive nosmetipsos, sive alios in quacunque rerum inquisitione versati docere velimus, necessariò aliquid assumendum nobis est, ex quo nostra inchoetur oratio, & per quod quidquid deinde dicitur, demonstretur. Quod ubi semel factum, constantes esse in assumpto principio, & ad ea, quæ ab illo ritè consequuntur diligenter inspicere debemus. Qua ratione etiam si plures philosopharentur, eadem tamen semper essent omnium inventiones, eadem conclusiones: vix fortè mutato ordine.

His similia conquestus Galenus exemplum adducit trianguli rectanguli latera habentis circa rectum angulum alterum quinque, alterum duodecim, atque ideò aream æqualem 30. mensuris. Quod constat tum ex eo, quod quinque in 12 magnitudinem creant æqualem 60 mensuris, tum ex eo, quod prius demonstratum est omne triangulum dimidium esse ejus, quod sub altitudine, & basi continetur. Quæ demonstrationes ab aliis dependent, & illæ ab aliis, donec perducamur ad prima matheseos principia, quæ cunctis hominibus æque sunt manifesta, & ut sunt indemonstrabilia, ita quoque demonstratione non indigent, quoniam ex se fidem faciunt. Si igitur, inquit Galenus, *Medici omnes de medendi methodo sic dicere aliquid instituisent, prorsus sicuti inter Arithmeticos, Geometras, & Logisticos, ita inter ipsos convenisset, quippe apud illos discere ab ipso statim initio licet, quid quoque nomine, quo usuri sunt significetur, quas præterea propositiones indemonstrabiles, quæ axiomata vocantur, ad disceptationem sint sumpturi.* Postmodum nulla apud Mathematicos conclusio est, quæ non ad assumpta principia referatur, nulla, quæ non in assumptis principiis contineatur. Ac si homines rerum mathematicarum prorsus ignari iisdem nunc utantur principiis, quibus usi sunt mathematici, qui hætenus fuerunt, nihil omnino contrarium his, sed eadem, quæ jam sunt inventa invenient, mutato fortè ordine.

Axiomata verò, sive dignitates, & communes opiniones, ut vocat Aristoteles lib. 3. metaphis. tex. 4. & 5. & à Galeno loc. cit. *communitates* dicuntur, cuicunque hominum apprimè necessariae sunt; nam omni in scientia, omni arte, omnive disciplina dignitatum, & communium opinionum usus est maximus, ut jurè sanè merito à sapientioribus, & ab Aristotele cit. loco communes hominum opiniones, eas scilicet in quibus cuncti homines conveniunt, principia demonstrativa appellentur rerum omnium, quæ ab homine inveniri possunt. At disertissimus Plato tanti fecit communes opiniones! tanti fecit axiomata! ut ex hac una potissimum causa existimaverit (quod tamen probandum non est.) homines universos studiis quibuscunque, improbisque laboribus, & industria nihil unquam novi addiscere; verùm recordari tantùm eorum, quæ priusquam corporibus inderentur, animæ sciebant. Enim verò una cum aliis multis credidit Plato opiniones, quæ habemus communes minime esse acquisite; sed unumquemque nasci illas bene ab ipsa natura edoctum. Cumque omne, quod homini post ortum innotescit in communibus comprehendatur opinionibus, quæ sunt veluti præmissæ infinitas sub se continentes conclusiones, visum est illi, studiis nullam novam scientiam acquirere homines; verumtamen recordari nonnullarum ex veritatibus, quæ in scientia communium opinionum, qua cum nascimur, continentur. Atque hujus placiti documentum in Phædone est: *quod si homines rectè interrogentur, ipsi omnia quemadmodum sunt respondent. Atqui nunquam id facere possent, nisi inesset ipsis scientia, rectaque ratio. Deinde si quis eos ad geometricas figuras, descriptionesque, vel simile aliquid converterit, ibi manifestè comperiet, ita id se habere.* Hæc Plato, quæ confirmari videntur à Renato des Cartes asserente, (locum non memini), animas hominum æquales esse ad percipiendum omnia, ratione tamen occasionum, quæ semper eædem non sunt, & ratione differentiae organorum, quibus corpora constructa sunt, alias citius alias tardiùs quæcumque percipimus percipere.

Cæterùm licèt hæc majori ex parte verissima censeri possint; homini tamen, ut satis excultus animo sit, non sufficere existimo, universalialia, & communia scientiarum principia. Oportet enim non rarò ad particularia descendere, & singularem alicujus rei nobis scientiam comparare. Quod non fit nisi assumpto etiam peculiari, & proprio aliquo quæsitæ rei principio. Sed non inficiabor ingenium excolendi, & exercendi gratia posse nos arbitrato nostro quæcumque velimus determinare, & cujuscunque speculationis, quod lubet statuere principium, atque inde quænam consequantur investigare. Quod si ea, quæ inveniuntur, consona fuerint, tum ei, quod sumplimus, hypothesi scilicèt prius factæ, tum scientiarum dignitatibus, hoc est propositionibus per se notis, & communibus hominum opinionibus, tunc affirmare poterimus rectè nos fuisse speculatos. Si quid vero consequatur, quod, vel repugnet axiomati alicui, vel sit contra hypothesein, tunc certi esse possumus de fallacia aliqua nostrarum cogitationum. Exemplo rem expediam, etiam si nullum habeamus circulum; ut ingenium exerceamus possumus assumere, ac mente concipere figuram aliquam rudi licèt descriptam baculo esse circulum, & tanquam si re vera circulus esset, quænam ex hoc consequantur contemplari: eritque assumpta hy-

pothesis unum ex principiis nostrarum, tum speculationum, tum inventionum. Simili pacto in corporibus animalium supponere possumus præcipuum glandularum usum esse munire, ac fulcire vasa, ne disrumpantur, bilem, quæ in cisti fellea est sanguinis esse excrementum in hepate geniti, humores veluti stagnare in vasis, & aliquando putrescere, vel intra venas, vel extra, & hinc deducere in priori casu fieri febres continuas, in secundo febres fieri intermittentes, sic & alia multa arbitrio nostro supponere, ac pro febre quidquid magis placuerit accipere poterimus. Soppo-
 sitis autem quibuscunque tanquam principiis multa equidem digne quære-
 re, multa & non sine laude invenire possumus. Semper tamen in his om-
 nibus, similibusque meminisse oportet, nos ex hypothese fuisse locutos
 non ex ipsa rerum essentia. Namque si scientiam modo, quo dictum est,
 comparatam usu comprobare velimus, sæpe frustra conceptos sperabimus
 eventus; speculationibusque sæpe res minimè respondebunt. Si pro circu-
 lo rudi supsumus figuram descriptam baculo, frustra quæremus applicatas
 diametro, quæ mediæ sint inter segmenta ejusdem diametri! frustra spe-
 rabimus ex hujus figuræ circa diametrum revolutione sphaeram creari!
 Ut hæc fiant, oportet circulum, quem fuimus imaginati, aut similem ha-
 bere, non figuram, quam posuimus pro circulo, cum re vera circulus non
 esset! Ut usus sit scientiæ deductæ ex principiis, ut lubuit positus de homi-
 ne, necessum est talem habere hominem, qualem supposuimus. Quando-
 quidem homini, cujus bilis non sit excrementum, cujus glandulæ multo
 sane nobiliorem usum præstent, quàm si culcitra, sive pulvinar essent, ho-
 mini cujus humores perpetuo in circulum agantur, non eveniunt, quæ
 recta licet usi ratione eventura, ac futura prædiximus homini supposito.
 Et profecto omne erratum ex falsa nascitur hypothese, & omnis hominis
 deceptio est huic similis, qua credere quis potest ex quinario in binarium
 fieri quindecim; quoniam sumpsit binarium pro ternario. Sed propterea
 nequaquam binarium factum est ternarium! Non quia ponimus hominem
 non habere nasum, homini, qui in rerum natura est, decidit continuo
 nasus; fitque homo non habens nasum! Procul dubio remanent res, uti
 stetit, si nulla unquam de illis facta fuisset hypothesis. Quamobrem
 si non idcirco philosophamur, ut ingenium tantummodo exerceamus; ve-
 rum etiam ut speculationum, & inventionum nostrarum aliquis sit usus,
 deducendæ illæ sunt tum ab universalibus scientiarum principiis com-
 munitibus hominum opinionibus; tum ex peculiari non ficto princi-
 pio, non ficta hypothese; sed quæ sit secundum rei naturam, quam in-
 dagandam suscepimus. Atque idcirco meo quidem judicio summe custo-
 dienda, atque promovenda est rerum omnium historia sive civilium, sive
 bellicarum, sive physicarum, sive aliarum quarumcunque rerum, utcun-
 que observatarum. Etenim cum vel ipsa natura universalis non edoceat,
 observatarum rerum historia particularia nobis præbet principia unicui-
 que scientiæ propria, quibus adjuti pleraque, quæ nobis occulta erant,
 dignoscere valeamus. Ac si quid hac methodo in secretiori naturæ scri-
 nio adhuc absconditum remanet, aptiores tamen, ac magis idonei sem-
 per erimus ad hypotheses universaliores, & quanto minus fieri potest, ab-
 surdas de rebus confingendas. Atque hujus omnino sententiæ ex Phœbi
 nepo-

nepotibus fuisse videtur Hippocrates Couston alibi, non principio libri de iis, quæ in officina medici: ubi totius artis commune proœmium exhibuit paucissimis verbis primas, quas dicunt institutiones comprehendens, ut Galenus in commentario affirmat, recenset enim Hippocrates, quæ medico considerata sint, ut morbum cognoscat, & remedium inveniat. Inquit autem: *aut similia, aut dissimilia, principio à maximis, à facillimis, ab his, quæ undequaque penitus cognoscuntur, quæ & videre, & tangere, & audire licet, quæ & visu, & tactu, & auditu, & naribus, & lingua, & intelligentia sentire licet, quæ, & quibus cognoscuntur omnibus cognoscere licet.* Hoc est, observationibus quibuscunque circa rem quacunque quæsitam in catalogum relatis, iisdemque politis tanquam principiis peculiaribus, quibus reliqua singularia investigentur, atque probentur, recta dehinc si medici utantur ratione, mentis si utantur acumine de morbi natura, ac medendi methodo, remediisque decernere poterunt: sin minus, nunquam rem acu tangent. Placuit tamen mihi, quæ arctius ab Hippocrate pronunciantur via universaliori, ac generaliori disciplinas omnes complectente exposuisse, ut quanam logica ipse utar in omnibus meis lucubrationibus, manifestum facerem; atque etiam, ut breviter ostenderem in his omnibus me Hippocratem, Cartesium, Platonem, Aristotelem, Galenum, aliosque præclarissimos viros, semper, & constanter imitari. Atque ausim affirmare *nullum plane esse inventum*, quod hac via non sit inventum, ac nullum, nisi hac methodo disciplinas habuisse incrementum.



E P I S T O L A D E F O N T I U M,

Atque fluminum origine

AD ILLUSTRISS. ET REVERENDISS. DD.

D. ANDREAM DE AQUINO

Olim Episcopum Tricaricen.

AUCTORE URBANO DAVISIO.

ILLUSTRISS. ET REVERENDISS. DOMINE.



Dominus Lucas Antonius Portius Vir planè illius Philosophiæ studiosus, quæ ab experimentis suum esse cognoscit, & Nominis tui observantissimus, opusculo de admirandis quibusdam fontibus à Plinio descriptis, dum rationes exponit ejus fontis, qui cum maris æstu crescit, minuiturque, inquit id ex parte dependere à majori aquarum salinarum maris specifica gravitate, respectu ad aquarum dulcium gravitatem, & hac occasione honestam mei mentionem fecit. Ego enim in quadam Epistola ad eruditum Virum Geminianum Montanarium circa Fontium, Fluminumque originem, quæ typis mandata est anno 1666. hac aquarum salinarum majori gravitate usus sum ad diducendas aquas ad montium cacumina. Cumque illius Epistolæ desint exemplaria, decrevi summam eorum, quæ tunc dixeram, rescribere, & objectionibus quibusdam satisfacere, & hæc omnia tuo nomini consecrare Vir Illustrissime prudentia, antiquiorum morum gravitate, doctrina, & humanitate suscipiende. Atque cuncta omittam, quæ ab aliis fusè explicata sunt circa hoc idem argumentum, utpotè quæ tibi, in lectione voluminum eruditissimorum virorum versatissimo, sint nota. Hoc solum dicam, quod per distillationes, hanc Fontium perennitatem demonstrari posse putabam, tum aliis rationibus, tum quia, ut in alia Epistola ad Dominum Jo: Baptistam Capponum in studio Bononiensi Lectorem directâ circa Metheora, existimavi melius, & aptius Ignis Elementum in centro Terræ, quam in concavo Lunæ collocari: Ex cujus calore, non solum Plantarum, Metallorumque productiones, ob humorum fermentationes aptissime explicari possent; sed etiam infinitis evaporationibus ad montium cacumina delatis, illas aquarum congeries congregari, quæ fontium, fluminumque perennem efficerent fluxum, quem ad terram irrigandam quotidie videmus emanare. Sed in hoc invento minime acquiescebam. Primo quidam quia hæc immensa ampli-

amplitudo receptaculorum non probabatur. Secundo quia numquam legeram aliquem, vel unum ex tantis reperisse. Et ultimo quia noveram Serenissimum Ferdinandum Secundum Magnum Hetruriæ Ducem, qui circa hoc Problema multum desudaverat secando montes, semper aquarum venas ascendere, & non descendere reperiisse. Unde desperans me ad hujus Problematis captionem perventurum, amplius circa illud cogitandum fore non duxi. Quando repente sacram perlegendo Bibliam in primo Cap. libri Ecclesiastes in hæc incidi verba. *Omnia flumina intrant in mare & mare non redundat, ad locum, unde exeunt flumina, revertuntur, ut iterum fluant.* Quæ ita mihi sunt visa fontium originem clarissime demonstrare, ut solum indigerent dicti introitus, & exitus modum esse declarandum. Ad quæ reflectendo, inter speculationes, quæ circa gravitatem fluidorum intercedunt, subvenit mihi, quod navis onusta minus descendit in aqua marina, quam in aqua dulci: Unde ut assequeretur differentiam, quæ intercedit inter dictas aquas, animum apposui, & assumpto Siphone vitreo, cujus diameter esset latitudinis unius uncix, & longitudinis uniuscujusque brachiorum duorum pedum cum dimidio, infudi prius tantum aquæ salitæ in illo, ut ejus medietatem repleret, postea superinjeci aquam puram, usque adeo aqua salita per alterum brachium ascenderet, & observavi, quod dum aqua dulcis pervenit ad summum dicti Siphonis, tunc aqua salita deficiebat ab ipsa libella spatium quatuor digitorum, quæ æquabat proportionem, quæ intercedit inter octo, & novem. Quo facto cognovi quod salsedo aquæ marinæ, id est compositi aquæ, & salis, qui est species quædam substantiæ terrenæ gravior ipsa aqua, esset causa efficiens productionum Fontium, & Fluminum.

Supposito enim mare esse quoddam vas amplum, latitudinis magnæ, sed non infinitæ: certum est, quod quando plenum fuerit aqua, si alia superinducatur, excedet ejus altitudinis terminos, nisi quis sub ejus fundo foramen apposuerit tantæ amplitudinis, ut ex illo effluat eadem quantitas aquæ, quæ desuper inducta fuerit. His positis observare possumus continuo, & perpetuo in mare tam multa se exonerare flumina, ut si omnia simul essent unita, efficerent aliud vas amplissimum aquæ dulcis, & tamen *mare non redundat*. Unde necesse habemus affirmare, quod sub fundo maris detur exitus æqualis in quantitate aquis fluminum, quæ perpetuo in illud influunt, quem facile inveniemus, si considerabimus, quod aquæ maris, dum descendunt sub ejus fundo, aut penetrant totum terrestre globum diametraliter, quod non probatur, aut postquam descenderint per aliquod spatium sub terra dicti fundi arenosa, & friabili, incidant in aliam majoris consistentiæ, velut marmorum, in quam impingentes, nec eam penetrare valentes, per lineam perpendicularem, & desuper ab aqua maris pressæ, cogantur angulum facere, & percurrere lineam horizontali parallelam, eo usque pervenerint ad terminum, super quem maris aqua non incumbit, & tunc cum ex parte maris sint gravatæ ab ejus aqua, & ex altera parte nihil eis opponatur, sublevabuntur inter spatia vacua, quæ intercedunt inter partes terræ, & ascendent per illa, usque dum perveniant ad illam lineam, quæ transit per superficiem ipsius maris. Quæ aqua, si esset ejusdem gravitatis dictæ aquæ maris, in dicta consisteret linea. Sed

cum

cum sal sit quædam terræ species, quæ unitur quidem aquæ, & cum ipsa efficit certum corpus, sed est separabilis ab ipsa, ut in distillationibus experimur, in quibus aqua exhalatur, & sal remanet in vasis fundo: Ita etiam fieri poterit dicta separatio per jugem filtrationem, scilicet transeundo dictam aquam salitam per terræ diversas species, in quibus remaneat sal, & tunc ipsa aqua posita in minore proportionem gravitatis respectu marinæ, præmitur ab hac, & sublevatur supra altitudinem superficiei maris, usque ad eam quantitatem, quam diximus intercedere inter aquam dulcem, & salitam, vel ad qualemcumque aliam quantitatem, & si incidit sub montium fundamentis, per illorum se conducent fixuras ad verticem perveniens, per eorum superficiem dilabitur, & unione multorum rivulorum efficit flumina, quæ denuo ad mare se conferunt; ubi iterum se sali miscens efficitur gravior, ad extrudendam inferiorem sale nudatam, & efficere hanc circulationem, tam necessariam ad hujus mundi conservationem. In quo admiremur summam Creatoris sapientiam, dum tam faciliter, respectu nostram intelligentiam, perfecit istam circulationem, idest miscendo salem cum aqua maris, ut gravior effecta quam pura, cogeret hanc transire per terræ venas, ibique spoliata sale, & levior constituta, ascendere per montium altitudines, qui forsitan ad hunc effectum constituti sunt, & denuo ad mare confluat, postquam irrigaverit ejusdem terræ superficiem aridam, & reddiderit aptam ad generationes herbarum, & plantarum, animalium potum, & ad navigationem, ex qua hominum commercium exurgit.

Verum superest nunc mihi quibusdam objectionibus satisfacere viri quidem non mediocris eruditionis. Quarum prima fuit Aquam maris non habere ad dulcem eam, quam dixi, proportionem, scilicet ut octo ad novem, sed eam esse sicut 49 ad 50. Secunda, quod altitudines montium essent nimis excelsæ, & idè non posse aquam ea proportionem, minus gravem ad tantam exurgere elevationem, & pro confirmatione dicti assumpti affert Picum montem in Tenariffa, una ex insulis Canariis, esse altitudinis quatuor milliaria cum dimidio: Et idè ut vera esset dicta mea demonstratio, necesse foret aquam descendere plusquam ducenta viginti quinque milliaria, & quadringenta passus, ut postea potuisset se extollere supra dictum montem: ob quod, vel impossibilis, vel perdificillima dicta foret demonstratio. Tertia, quod si in fundo dicti Siphonis separaretur sal ab aqua, tandem aqua maris dulcis evaderet. Quarto quod cum in dicta Epistola ego dixissem nos debere imaginari quemdam Siphonem habere unum caput in mari, & aliud in montium cacuminibus, & in fundo dicti Siphonis fieri separationem salis ab aqua, absque eo, quod hujus effectus reddiderim rationes, dicit quod si ego velim omnia cum intellectu confingere, omnes demonstrationes mihi facillimas evasuras.

Quæ objectiones licet nihil dictam meam pervertant demonstrationem; tamen quia ex earum explanatione ista magis dilucidata remanebit, ab hac ultima incipiendo, dico nunquam me in tam magnam incidisse admirationem, cum quando hanc legi oppositionem. Enim vero Ego supposui, tum verisimilia, tum possibilia, tum quæ captu facilia essent; quin imo, quæ omnino concedi debeant: Terram scilicet pluribus
in

in locis esse bibulam, & maris aquas penetrare ejusdem viscera, & cavitates reperiri in montibus: quæ quidam supponi debent à quocumque, qui de his loqui velit, & in quacumque hypothese, ut supponuntur ab eodem scriptore, licet ipse quædam alia supponat, quæ concipi minime possunt. Ut autem explicem meum dictum Respondeo; quod quando dixi nos debere imaginari Siphonem &c. posui dictum verbum pro considerare, sicut, licet non videamus ductus fontium, qui sub terra extant, plumbeos, vel terreos, tamen supponimus illos, & non imaginatione constringimus. At ego cum supponam aquam maris transire per viscera terræ, & ad montium cacumina pervenire, certum est hunc transitum non posse perfici, nisi transeat per aliquos meatus subteraneos, & ideo à nobis non nisi imaginatione supponendos, sed cum certa & indubitata ratione, quod non posset dici de suo orbe terrestri, & vere suo dum totum in suo intellectu habuit esse.

Ut autem aliis oppositionibus satisfaciam, & circa primam. Quod aqua salita ad dulcem eam proportionem non habeat, quam dixi, scilicet, ut octo ad novem, sed habere ut quadragintanovem ad quinquaginta. Respondeo, quod potuerit accipere me sumpsisse aquam magis salitam, quam marina, dum dictum experimentum feci, cum mihi non fuisset copia dictæ aquæ marinæ, sicut ipsi, qui ad litus maris ipsum fecit experimentum. Sed hoc nihil contra dictam facit demonstrationem, quia si cum dicta proportionem dicebam aquam maris sub terra descendere per octo milliaria, ut postea sale exuta ascenderet novem, idest uno plus super maris lineam horizontalem. Attenta dicta sua proportionem, dicam, aquam descensuram milliaria quadragintanovem, ut sale deposito assurgere possit ad quinquaginta. Et hoc non debet illi fastidium ingerere. Quia in hoc nostro terrestri globo adsunt spatia multæ profunditatis pro dictis descensu, & ascensu, & magis, & minus demonstrationem non vitiant: Et tanto minus, quia montes non assurgunt tota milliaria ut ipse dicit de suo monte Pico in Canariis, ab eo mensurata per solam suppositionem, quod à Botero dicatur visibilem esse in mari ad sexaginta leucas, quia dictus meus Antagonista in hoc calculo oblitus fuit rescindere à dicta mensura illud, quod addebat angulus refractionis ipsi notissimus, dum alias illi visibiles effecit Solem, & Lunam Eclipsatam. Et ideo cogitur fateri cum cæteris auctoribus, qui tractant de montium altitudinibus, eas non excedere millaria duo.

Circa tertiam autem oppositionem, quod si in fundo Siphonis separaretur sal ab aqua, tandem aqua maris remaneret dulcis, dico me hujus effectus relinquere cognitionem ad Dei omnipotentiam, quæ dicto omnia perfecit. Mihi solum sufficit demonstrasse sal naturaliter ab aqua separari, licet nec modi desint quibus explicari possit hæc separatio salis, & aquæ absque eo, quod totum sal remaneat in fundo Siphonum, & aqua maris tandem ad dulcedinem sit perventura. Quorum unum qui mihi commodè probatur, ostendam. Supponendo primo, quod experientia patet, Sal positum in fundo alicujus vasis, si aqua ei superinfundatur, liquefit, & ascendit per totum corpus aquæ. Secundo aquam tantam admittere salis quantitatem, ut amplius salis dictæ speciei, qua inhibita est non recipiat,

cipiat, sicut etiam de illo tantum admittat, quantum ad sanitatem illi sufficiat. His positis dico aquam maris plenè esse sale imbibitam, si flumina aquarum dulcium in illud non influerent, ad quæ salienda attrahit ex fundo maris illud sal, quod depositum fuit ab aquis dulcescentibus, quæ transeunt per illos meatus, in quibus sal ab aqua separatur. Et ideo sal non in fundo maris remanet, sed per universam dispergitur aquæ molem. Quibus maxime teneor dicto Auctori, quia cum tantum has attulerit objectiones, quæ nihil officiunt dictæ meæ demonstrationi, & quod acumen illius intellectus, si dicta demonstratio non existeret à parte rei vera, alias validissimas objectiones produxisset ad illius falsitatem demonstrandam. Et ex alia parte viderim alios viros eruditissimos recepisse illam pro concludenti: Lætor me invenisse modum facilem, & demonstratum ad dictam circulationem perficiendam, & adhuc ab aliis auctoribus, quos sciam, non allatum.

Hoc solum restat, ut apud te Illustrissime Præsul talis appareat: Quia tunc firmiter credam me male non ratiocinasse; Certus de perspicacitate tui intellectus demonstrationibus mathematicis, ad ingeniorum Lydium lapidem, affuetum. Vale Data Romæ ex ædibus nostris die prima Novembris 1680.

Illustris. & Reverendissimæ Dominationis Tuæ.

Addictissimus Servus.
Urbanus Davisius.

INDEX

TITULORUM.

P <i>Refatio.</i>	pag. 345
<i>Paraphrasis in librum de veteri medicina.</i>	348
<i>Fons Jovis, Fons Solis, Padi fons, alique similes, de quibus Plinius cap. 103.</i>	367
<i>Epistola ad Illustrissimum, & Reverendissimum D.D. Andream de Aquino olim Episcopum Tricaricen. de incremento, sive generatione metallorum.</i>	374
<i>Dissertatio Logica.</i>	378
<i>Epistola Reverendissimi Domini Urbani Davisii ad Illustrissimum, & Reverendissimum D. D. Andream de Aquino, de fontium, atque fluminum origine.</i>	382



INDEX

RERUM NOTABILIMUM.

A

- A** Abſtinentia. pag. 355
 Acidum non eſt remotum ab amaro, vel dulci. 358
 Aciditatis ſenſatio moleſta. 366
 Acrimonix, & intemperantiæ multiplices. 361
 Ægroti læduntur à cibis ſanorum. 353. graviffimè afficiuntur ſi ex ea parte peccent ex qua ægrotant. 355. ægrotis ſæpe proſunt fortiffima, & excedentia. 358
 Aer compreſſus impellit aquas 373. magnus ejuſdem uſus in fermentationibus, & permutationibus. 377
 Ægyptus aliquid habet, quod non eſt, in aliis locis. 372
 Amarum non eſt omnibus amarum. 359
 Antiqui putaverunt calidum non lædere. 357
 Anxietas à bile. 361
 Aquæ copioſiores, & parciores in fontibus, earum varia altitudo. 369
 Argentum. 375
 Aurum. ibid.
 Axiomata in omni diſciplina uſum habent. 379

B

- B** Barbaræ gentes. 351
 Bilis vitia; morbi. 361
 Bruta animantia naturæ edocentur neceſſitate. 350
 Bullæ ab iis, quæ refrigerant. 359

C

- C** alidum cur nam aliquid dicatur. 357. 360. non eſt remotum à frigido. 358. non eſt omnibus calidum 359. non datur quicquam in ſe calidum 358. non eſt remedium, neque cauſa morborum 356. ſæpiſſime nihil reſert calidum, an frigidum ſit id quod ſumitur 358. calida, quæ dicuntur oppoſitas vires habent. Calida non juvant, aut nocent quia calida. 357

- Caliditas, & frigiditas minime omnium potentes in homine. 358
 Calefactio tollit refrigerationem 360. non ſuſcipit concoctionem, aut maturationem. 362
 Caſeus, aliis utilis, aliis noxius. 363
 Cauſa levis, & potens nimis reſpectively 355., quæ cauſæ alicujus dici debent. 361
 Ciborum inventiones 351. magnum inventum panis, & vini ibid. cibus intempeſtivus 354. 355. cibus ſanorum nocet ægrotantibus 353. qui prodeſt huic, nocet alteri. 352
 Cognitio rerum relativa, & non relativa. 363
 Cognationes rerum ut cognoscuntur. pag. 366
 Columnæ in porticu Divæ Mariæ ad martyres 375. in foro boario. 377
 Concluſiones eadem ab iſdem principiis. 378
 Communes hominum Opiniones, quæ pag. 379
 Comparata ad hominem. 363
 Concoctum uni non eſt omnibus concoctum. 362
 Conſuetudo aliam inducit naturam. pag. 350
 Corporum varia eſt neceſſitas. 354. 352. non læduntur notabiliter à leviffima cauſa 355. quando repleta magis ſint replenda ibid. corpora tum varie poſſunt afficere ſenſum, tum alia multa præſtant. 360

D

- D** ebilia ſæpe minime juvant. 353
 Decipiunt nonnulli, quia decipiuntur. 359
 Detractio à quantitate. 352
 Difficile eſt aſſequi rectiſſimum. 355
 Dignitates, ſive axiomata. 379
 Diſſenſiones Philoſophorum, & Medicorum. 378
 Dolori nihil ſimile extra ſenſum. 364
 Dolorificum, & calidum non quia talia nocent, aut juvant. 357

E

E Adem causa non producit eadem in his, quæ eadem non sunt. 369
 Experientia cognoscuntur rerum necessitates. 363
 Ex eo quod aliquod sit dolorificum, vel calorificum nihil infertur, nisi quod sit dolorificum. 364
 Erysipelata. 361

F

F Ebris non consistit in calido, neque in frigido 359. citò, & facillime sanaretur si in his consisteret ibid. remedium ipsius non est neque calidum, neque frigidum, ibid.
 Ferrum male definitur ex eo, quod incidere possit 360. ferri generatio. 374
 Figura eorum, quæ sub sensum non cadunt concipienda 366. figura, motuque diverso multa fiunt diversa 365. figuræ quæ in sensu est aliquid simile habet extra sensum 364. figurarum scientia utilis ibid. figuræ vitia faciunt morbos. 364. 366.
 Flatus à cibo intempestivo 354. differunt inter se 363. ratione loci 365. comprimere possunt vasa, nervos, ib.
 Fluxu reflexuque maris fontes adaucti, vel diminuti. 372. 373
 Fons anapayomenon 368. certis temporibus fundens calidas, certis frigidas 371. Plinii junioris 369. in Delo 372. in Tenedo 371. ex fluxu maris crescens. 373
 Fortissimum quid 357. fortia aliquando juvant. 353
 Frigidum non est omnibus frigidum 359. neque æqualiter ibid. non est remedium morborum 356. nihil est in se frigidum 358. quæ dicuntur frigida alias vires habent, & sæpe oppositas ibid. sæpe nihil refert frigidum, an calidum sit, quod sumitur. ibid.

G

G Ravedo, & fluxus ad nares ab eo, quod frigefacit, & ab eo, quod calefacit. 360
 Geometria utilis, animum acuit. 364

H

H Ippocrates non est author omnium quæ sibi ascribuntur 345. 346. plures dicti sunt Hippocrates 345. multa adjecta operibus illius, multa corrupta 346. Democriti discipulus, cujus est liber de veteri medicina. 346
 Historia rerum omnium custodienda. pag. 380
 Homo primum usus est victu brutorum 350. descendit à brutorum victu, & quare ibid. ex se se fit frigidus, fit calidus in sensu 359. minus appetit in quibusdam morbis 352. Homini propter consuetudinem alia sunt magis minusve gravia 350. insunt ipsi omnes potentia. 357
 Humor nimia rarefactione varia fiunt in variis partibus. 365
 Hypotheses quænam sint vanæ 358. debent explicare, & comprehendere omnia 360. debent attingere rerum naturam 380. 363. 364. hypothesi circa figuram multa possunt rectè concludi. 364

I

I Gnis morbos facit, qui non sanantur frigido 360. mediocris, aut magnæ vis. 355. ignem relative cognoscere non est cognoscere ignem. 364
 Ignavi ultimi veritates amplectuntur, sunt sæpe maligni. 367
 Imbecillis. 355
 Impotentia à bile. 361
 Inappetentia à bile. ibid.
 Impossibile est imperare aliquid in se calidum. 358
 Intempestiva evacuatio, somnus, quies. pag. 354
 In pane, quæ sint quærenda. 356
 Ineptia est reducere omnia, quæ igne fiunt ad id quod calefacere possit. 360
 Intemperantia, & acrimoniae multiplices. 361
 Juvantia, & nocentia dant indicia eorum, quæ conveniunt. 355
 Inopus fons cum nilo crescens. 372

L

L Atitudo moralis est in omnibus rebus. 355
 Laxior alvus à cibo intempestivo. 354
 Liber de veteri medicina cujusnam Hip-

Hyppocratis 346. cur hic posthabitus
ibid. continet optimam medicinæ in-
stitutionem 347. sapit Democriti do-
ctrinam. 346

M

M Ala quæ fiunt ab igne non sanan-
tur refrigerantibus. 361
Maris major altitudo, quid in fontibus
faciat. 373
Mathematicorum Logica. 378
Maturatio 361. dicitur multipliciter, ibi.
Medicus debet afficere idiotarum intel-
ligentiam 349. similis navis guberna-
tori 353. qui minus errat maxime lau-
dandus ibid. malè inquit hoc est cali-
dum hoc est frigidum 358. prudens
non expectat magnas mutationes 355
rectissimus non datur 362. sæpe dam-
nat, id quod utile est, & è con-
tra 363. quid cognoscere debeat 362.
Medici antiquiores vulneribus, &
ulceribus tantum medebantur. 352
Medicina non indiget vana hypothesi
348. nullum incrementum habuit hy-
pothesi 349. principium habet ibid. ex
necessitate orta est 351. sanorum, &
ægotiarum ab eodem principio 352.
nullo alio principio niti potest 349.
Deo ascripta. 356
Metalla. 354
Morbi, sæpe enecant propter imperi-
tiam medicorum 354. qui citò non sa-
nantur non consistunt in calido, aut
frigido. 359
Multa dicuntur non qualia sunt, sed
qualia faciunt. 362
Mutabilitas corporum facit morbos. 363

N

N Aturæ facile mobiles 355. hominum
differunt 363. natura sæpè disposi-
ta sunt quæ arte disponi possunt. 367
Necessitas nature, quid sit 349. 350. 354. 355
reperit medicinam 350. cibi, & potus
tempore congruo 354. mutatur 353.
354. necessitates cognoscuntur expe-
rientia. 350
Nili intumescencia. 372
Non est in se hoc calidum, hoc frigi-
dum, hoc viride. 358
Nocentia, & juvantia docent quid con-
veniat. 354
Nullus cognovit quomodo omnia ge-
runtur in musca. 362
Numerorum scientia utilis. 364

P

P Anis inventum magnum 351. qui
bonus, qui malus. 356
Partes corporis mutabiles. 365. 366
Philosophorum, & Medicorum dissen-
siones. 378
Potentiæ rerum in quibus consistunt.
pag. 366
Pulmones. 365
Potus intempestivus. 354
Putridum non est putridum omnibus
pag. 361

R

R Ationes ejusdem ad diversa non
sunt eadem. 352
Replenda corpora repleta, & quando.
pag. 355
Remedium ex eo, quod non est reme-
dium. 366
Renes. 365

S

S Apores non sunt iidem omnibus.
pag. 359
Sensus mensura omnium 353. quædam
habet quibus nihil simile extra sen-
sum. 364
Sensationes vehementes dant nomina
iis, ex quibus excitantur. 357. 358
Sorbitiores. 352
Sonitui nihil simile extra sensum. 364
Stannum. 374
Siphonis retorti effectus. 369. 370

T

T Hæsalus. 345
Temperatum, & temperari. 361. 362
Tormina. 354
Tubi retorti effectus 370. aptitudo, &
dispositio varia. 369

V

V Alidissima. 357
Vapores adaugent fontium aquas.
pag. 371
Vertigines. 354
Vehementes sensationes. 357
Venenum. 366
Vires rerum, vires corporis viven-
tis.

RERUM NOTABILUM.

391

tis.	356	Ulcera facta ab igne non sanantur re-	
Viride non nutrit, quoniam viride.		frigeratione.	361
pag.	361	Voluptati nihil simile extra sensum.	
Vinum aliis utile, aliis inutile.	363	pag.	364
Vocum significationes servandæ.	362	Utile aliquid dicitur respectivè.	363

F I N I S.



LIBRARY

THE UNIVERSITY OF CHICAGO
CHICAGO, ILL. 60637
1964

1964



